

ଦୁ-ହାରୀ

নূর-ই-চশ্ম

শ্রীমান মৈয়দ জগলুল আলী

করকমলে—

দু-হারা

দ্বিতীয় বিশ্বযুদ্ধের পূর্বে বরোদার বিখ্যাত মহারাজা সয়াজী রাওয়ের কাছে আমি চাকরি নিয়ে যাই। শহরের আকার ও লোকসংখ্যা গুজরাতের অন্যান্য শহরের তুলনায় উল্লেখযোগ্য নয়, কিন্তু স্বাধীন রাজ্য বলে ছোটখাটো মিউজিয়াম, তোষাখানা, চিড়িয়াখানা, রাজপ্রাসাদ, পালপরবে গাওনা-বাজনা এবং আর পাঁচটা জিনিস ছিল বলে একদিক দিয়ে দেখতে গেলে পাশের ধনী শহর আহমদাবাদের তুলনায় এর আপন বৈশিষ্ট্য ছিল।

আজ আর আমার ঠিক মনে নেই, মহারাজা নিজে মদ না খেলেও তাঁর ক'টি ছেলে দিবারাত্র বোতল সেবা করে করে বাপ-মায়ের চোখের সামনে মারা যান। তাঁদের মদ খাওয়া বন্ধ করার জন্ত কিছুদিনের তরে তিনি তাবৎ বরোদা শহর ও তার পার্শ্ববর্তী অঞ্চল ড্রাই করে দেন, কিন্তু তাতেও কোনো ফলাদয় হয় নি। শেষ পর্যন্ত বাকি ছিলেন একমাত্র ধৈর্যশীল রাও। একেও সাদা চোখে বড় একটা দেখা যেত না।

মহারাজার বড় ছেলের ছেলে—তিনিই তখন যুবরাজ—প্রতাপসিং রাওও প্রচুর মত্তপান করতেন—এ নিয়ে বৃড়া মহারাজার বড়ই দুঃখ ছিল—কিন্তু নাতি তখনো দু'কান কাটা হয়ে যান নি। রাজা হওয়ার পর তিনিও সম্পূর্ণ বেসামাল হয়ে গেলেন এবং ভারত স্বাধীন হয়ে যাওয়ার পর তিনি আকাট মুখ' ইয়ারবজীর প্ররোচনায় ভারতের সঙ্গে লড়াই করতে চেয়েছিলেন! তিনি গদীচ্যাত হওয়ার পর তাঁর ছেলে ফতেহ্ সিং রাও মহারাজা উপাধি পান—এবং বর্তমান ভারতীয় ক্রিকেট বোর্ডের সঙ্গে সংযুক্ত বলে অনেকেই তাঁকে চেনেন। শুনেছি, মানুষ হিসেবে চমৎকার।

কিন্তু এসব অনেক পরের কথা।

বৃড়া মহারাজার মত্তের প্রতি অনীহা ছিল বলে বরোদা শহরে সংযমের পরিচয় পাওয়া যেত—বিশেষ করে যখন অন্যান্য নেটিভ স্টেটে মত্তপানটাই সবচেয়ে বড় রাজকার্য বলে বিবেচনা করা হত, ও প্রজারাও যখন রাজাদর্শ অমুকরণে পরাভূত ছিল না।

কিন্তু বৃড়া মহারাজা বিস্তর বিলাতক্ষের্তা যোগাড় করেছিলেন বলে প্রায়ই কারো না কারো বাড়িতে পার্টি বসত। দু-এক জায়গায় যে মদ নিয়ে বাড়াবাড়ি হত না, সে কথা বলতে পারি নে। তবে সেটা সম্পূর্ণ নির্ভর করতো গৃহকর্তার আপন সংযমের উপর।

এরই দু-একটা পার্টিতে একজন ভদ্রলোকের সঙ্গে আলাপ হয়। ভুল বললুম, পরিচয় হয়। কারণ এ রকম স্বল্পভাষী লোক আমি জীবনে কমই দেখেছি। ঘণ্টার পর ঘণ্টা তিনি চুপ করে বসে থাকতেন এক পাশে, এবং অতিশয় মনোযোগ সহকারে ধীরে ধীরে গেলাসের পর গেলাস নামিয়ে যেতেন। কিন্তু বানচাল হওয়া দূরে থাক, তাঁর চোখের পাতাটিও কখনো নড়তে দেখি নি। আমি জানতুম, ইনি বন্ বিশ্ববিদ্যালয় থেকে বছর দশেক পূর্বে ডক্টরেট পাশ করে বরোদায় ফিরে এসে উচ্চতর পদে বহাল হন। আমিও বন্ থেকে বছর তিনেক পূর্বে পাশ করে আসি ও তিনি যে-সব গুরুর কাছে পড়াশোনা করেছিলেন আমিও তাঁদের কয়েক-জনের কাছে বিতর্জন করার চেষ্টা করি। আমি তাই আশা করেছিলুম তিনি অস্তুত আমার সঙ্গে দু-চারিটি কথা বলবেন—বন্ বিশ্ববিদ্যালয়, তাঁর সহপাঠী, তাঁর আমার উভয়ের গুরু, রাইন নদী, শহরের চতুর্দিকের বন-নদী-পাহাড়ের পিকনিক নিয়ে তিনি পুরানো দিনের স্মৃতি ঝালাবেন, নিদেন দু-একটা প্রশ্ন জিজ্ঞেস করবেন। আমি দু-তিনবার চেষ্টা দিয়ে দেখলুম, আমার পক্ষে তিনি বন্ থেকে পাশ না করে উত্তর মেরু থেকে পাশ করে থাকলে একই ফল হত। সাপের খোলসের মত তিনি বন্ শহরের স্মৃতি কোন্ আন্তাকুড়ে নিবিকার চিন্তে ফেলে এসেছেন। আমি আর তাঁকে ঘাঁটালুম না।

এর পর কার্খোপলক্ষে আমি এক-আধবার তাঁর দফতরে যাই। এক্ষেত্রেও তদ্বং। নিতান্ত প্রয়োজন হলে বলেন ইয়েস, নইলে জিভে ক্লোরোফরম মেখে নিয়ে নিশ্চুপ।

বাড়ি ফিরে এসে তাঁর ধীসিস্থানা ঘোগাড় করে নিয়ে পড়লুম। অত্যাংকুষ্ট জর্মনে লেখা। নিশ্চয়ই কোনো জর্মনের সাহায্য নিয়ে। তা সে আমরা সবাই নিয়েছি এবং এখনো সর্ব অজর্মনই নিশ্চয়ই নেয়, কিন্তু ইনি পেয়েছিলেন সত্যাকারের জউরির সাহায্য। তবে তিনি এখন কতখানি জর্মন বলতে এবং বুঝতে পড়তে পারেন তার হাদিস পেলুম না। কারণ বরোদায় আসে অতি অল্প জর্মন, তারাও আবার ইংরিজি শেখার জগ্না তৎপর। তরুপরি তৃতীয় ব্যক্তির সাক্ষাতে দেখা হলে এবং সে যদি জর্মন না জানে তবে তার অজানা ভাষায় কথা বলাটা বেয়া-দবিও বটে। এতাবং হয়তো তাই শ্রীযুত কাণের সামনে জর্মন বলার কোনো অনিবার্ধ পরিস্থিতি উপস্থিত হয় নি।

এর পরে আরো দু' বৎসর কেটে গেছে ঐ একই ভাবে। তবে ইতিমধ্যে আমার সর্বজ্ঞ বন্ধু পার্সী অধ্যাপক সোহরাব ওয়াডিয়া আমাকে বললেন, আপন অন্তরঙ্গ জাতভাইদের সঙ্গে নিভূতে তিনি নাকি জিতটাতে লুক্সেমবুর্গ ডেল ডেলে

দেন এবং তখন তাঁর কথাবার্তা নাকি flows smoothly like oil, বসনার উপর অগ্নিতর তাঁর সংঘম অবিশ্বাস্য।

এই দু' বছর কাটার পর আমার হাতে ফোকটে কিঞ্চিৎ অর্থ জমে যায়। দয়াময় জানেন সেটা আমার দোষ নয়। সে যুগে বরোদায় খরচ করতে চাইলেও খরচ করার উপায় ছিল না। ওদিকে জার্মানিতে হিটলারের নাচন-কুদন দেখে অস্তিত্ব আমার মনে কোনো সন্দেহইল না, তাঁর ওয়াল্টস্ নাচ এবারে জার্মানির গণ্ডি ছাড়িয়ে বাইরেও গড়াবে। এবং সেটা আকছারই গড়ায় প্রতিবেশী ফ্রান্সের আঙ্গিনায়। দুই দেশেই আমার বিস্তার বন্ধু। এইবেলা তাহলে তাদের শেষ দর্শনে যাই। ১৯১৮ সালে জার্মানরা আকাশ থেকে বোমাবর্ষণ করে ও রণাঙ্গনে গ্যাসও চালায়। এবারে শুরুই হবে ওসব দিয়ে—অনেক দূরপাল্লার বোমারু এবং জঙ্গী বিমান নিয়ে, তীব্রতর বিষাক্ত গ্যাস নিয়ে। ধুনুয়ার শেষ হলে আমার ক'জন বন্ধু যে আস্ত চামড়া নিয়ে বেরিয়ে আসবেন বলা কঠিন।

১৯৩৮-এর গরমিকালে ভেনিস মিলান হয়ে বন্ শহরে পৌঁছলুম। জাহাজে বিশেষ কিছু লক্ষ্য করবার ফুরসৎ পাই নি। প্রথম দিনেই আলাপ হয়ে যায় এক ফ্রেঞ্চ ইণ্ডোচায়নার তরুণীর সঙ্গে। অপূর্ব সুন্দরী। 'অপূর্ব' বললুম ভেবেচিন্তেই। আমার নিজের বিশ্বাস—এবং আমার সে-বিশ্বাসে আমার এক বিশ্বপথটক বন্ধু সোৎসাহে সাথ দেন—দোআঁসলা রমণীরা সৌন্দর্যে সব সময়ই খাঁটিকে হার মানায়। পার্টিশনের পরের কথা বলতে পারি নে, কিন্তু তার পূর্বে কলকাতার ইলিয়ট রোড, ম্যাকলাউড স্ট্রিটের যে অংশে অ্যাংলো ইণ্ডিয়ান সুন্দরীদের হাট বসতো—থারাপ অর্থে নেবেন না—সে রকমটা আমি প্যারিস ভিয়েনা কোথাও দেখি নি।

কিন্তু এ তো গেল আর্যে আর্যে সংমিশ্রণ। কিন্তু ইণ্ডোচায়নায় ফ্রেঞ্চ আর্য রক্ত ও চীনা মঙ্গোলিয়ান রক্তে সংমিশ্রণ। এ জিনিস আমার কাছে 'অপূর্ব' বলে মনে হয়েছিল। শুধু আমার কাছে নয়, অন্ত্র অনেকেরই কাছে। কিন্তু হলে কি হয়, পানির দেবতা বদর পীর আমার প্রতি বড়ই মেহেরবাণী ধরেন—সপত্নদের কেউই একবর্ণ ফরাসী বলতে পারেন না। আমি যে অত্যন্তম ফরাসী বলতে পারি তাও নয়। কিন্তু কথায় আছে, 'শয়তানও বিপদে পড়লে মাছি ধরে ধরে খায়।' তরুণী যাবেন কোথায়! জাহাজে অবশ্য দু-একটি পাঁড় টুরিস্ট ছিলেন যারা ফরাসী জানেন, কিন্তু পাঁড় টুরিস্ট হতে সময় লাগে—বসলটা ততদিন কিছু চূপ করে দাঁড়িয়ে ঘাড়াগান দেখে না—পাঁড় টুরিস্ট হয় বুড়ো-হাবড়া। ওদিকে লুজাভিত আছে, 'বৃদ্ধার আলিঙ্গন অপেক্ষা তরুণীর পদাঘাত জেয়।'।

প্রবাদটা উঠে দিক থেকেও আকছারই খাটে। আমার তখন তরুণ বয়স, তহপরি আমি বাঙলা দেশের লোক—গায়ে বেশ কিছুটা চীনা-মকোল রক্ত আছে। তরুণীর সেটা ভারী পছন্দ হয়েছে—বলতেও কষ্ট করলেন না।

আমার তখন এমনই অবস্থা যে ওঁর সঙ্গে পৃথিবীর অল্প প্রান্ত অবধি যেতে পারি। অবশ্য জানি, পৃথিবীটা গোল—আবার মোকামে ফিরে আসবো নিশ্চয়ই, এই বা ভরসা।

ভেনিস পৌঁছে জানা গেল, এ জাহাজ পৃথিবীর অল্প প্রান্ত অবধি যায় না। ইনি শুধু মাকু মারেন ইতালি ও বোসাইয়ের মধ্যখানে। আমাদের মধ্যে প্রেম হয়েছিল গভীর, কিন্তু ব্যাডমিণ্টনের শাটল কক্ হতে যতখানি প্রেমের প্রয়োজন ততখানি তখনো হয়ে ওঠে নি। আসলে সব কিছু ভুল হয়ে গিয়েছিল সফরটা তেরো দিনের ছিল বলে। তেরো সংখ্যাটা অপয়া। বারো কিংবা চোদ্দ দিনের হলে হয়তো একটা হেস্টনেস্ট হয়ে যেত। ভেনিস বন্দরে সজল নয়নে আমরা একে অন্তের কাছ থেকে বিদায় নিলুম। আমার যেসব সপত্নী (আজকের দিনের ভাষায় পুংসতীন) ফরাসী জানতো না বলে বিফল মনোরথ হয়েছিল তাদের মুখে পরিতৃপ্তির স্মিতহাস্য ফুটে উঠেছিল। বিচ্ছেদাগর মশাই নাকি মাহুঘের মুখে হাসি ফোটাতে পারলে উল্লাস বোধ করতেন; জানি নে তিনি কখনো এমন হাসি দেখেছেন কি না যেটা দেখলে মাহুঘের মাথায় খুন চাপে।

ব্রেমার পাস, অষ্ট্রিয়া হয়ে জার্মানিতে ঢুকলুম। বন্ শহরে পৌঁছলুম সন্ধ্যার সময়।

বন্ প্রাচীন দিনের গলি-ঘুঁচির শহর। একে আমি আপন হাতের উঠো পিঠের চেয়েও ভাল করে চিনি। মালপত্র হোটলে নামিয়ে বেরিয়ে পড়লুম প্রাচীন দিনের সন্ধ্যানে।

ওই তো সামনে হান্সেন্ রেস্টোরাঁ। দেখি তো, আমার দোস্ত বুড়ো গুয়েটার হান্স্ এখনো টিকে আছে কি না। যেই না ঢোকা, হান্সের সঙ্গে প্রায় হেড্-অন্ কলিশন। বুড়ো হান্স্ বাজিকর। দু-হাতে সে একসঙ্গে পাঁচ প্লেট—দু-হাতে চার প্লেট, পঞ্চমটা এই চারটির মধ্যখানে, উপরে—সুপ রান্নাঘর থেকে খাবার ঘরে তার চিরপ্রচলিত পদ্ধতিতে নিয়ে আসছিল। কোনোগতিকে সামলে নিয়ে ছকার দিলে, ‘ওই রে, আবার এসেছে সেই কালো শয়তানটা!’ আমি বললুম, ‘তোমার জান নিতে।’ ‘হিটলার তোমার জান নেবে—তুই ইহুদি!’ দীর্ঘশ্বাস ফেলে মনে মনে সেই লোকটার কথা ভাবলুম, যে ছুঃখ করে বলেছিল, ‘হায় মা, টাক তো দিলি, কিন্তু “ক”-এর সঙ্গে “আ”কারটা দিতে ভুলে গেলি।’ আমি বললুম, ‘ইহুদির কালো চুল দিলি, মা, কিন্তু তার পকেটের রেস্তাটা দিতে

ভুলে গেলি।’ হান্সকে শুধালুম, ‘তোমার ডিউটি কটা অবধি?’ ‘নটা।’
‘তাহলে “কাইজার কালে” এসো নটায়।’ ‘কেন? আমেরিকায় পয়সাওলা কাকা
মারা গেছে নাকি?’ ‘না, কোলারে।’ ‘সে আবার কোথায়?’ ‘ভারতবর্ষে
সেনার খনি।’ ‘ওঃ! তাহলে একটা গোল্ড-ডিগার সঙ্গে নিয়ে আসবো।’

‘গোল্ড-ডিগার’ মানে যে-সব খাবহুৱং মেয়ে প্রেমের অভিনয় করে আপনার
মনি-ব্যাগটি ফাঁকা করতে সাহায্য করে। আপনারই উপকারার্থে। পোকা
লাগার ভয়ে সেটাতে বাতাস খেলাতে চায়।

গোরস্তানে ঢুকলে আমরা চেনা লোকের গোরের সন্ধান করি; অচেনা
লাইব্রেরিতে ঢুকলে চেনা লেখকের বই আছে কিনা তারই সন্ধান করি প্রথম।
বন্ শহর নতনত্ব অত্যন্ত অপছন্দ করে; তৎসঙ্গেও হু-চারটে নতন রেস্টোরাঁ
কাফে জন্ম নিয়েছে। সেগুলো তদারক করার কণামাত্র কোঁতুহল অহুভব করলুম
না। কে বলে মাহুশ নতনত্ব চায়?

কুকুর যে রকম পথ হারিয়ে ফেললে আপন গন্ধ শুঁকে শুঁকে বাড়ি ফেরে,
আমিও ঠিক তেমনি সাত দিন ধরে আজ ভেহুসবের্গ, কাল গোডেনসবের্গ, পরশু
জৌবেনগেবের্গে, পরের দিন রাইনে লঞ্চ-বিহার করে করে আপন প্রাচীন দিনের
গন্ধ খুঁজে খুঁজে কাটালুম; আর শহরের ভিতরকার গলি-ঘুঁচির রেস্টোরাঁ-বারের
তো কথাই নেই।

অষ্টম দিনে ড্যামলডর্ফে আমার প্রাচীন দিনের সতীর্থ পাউলকে ট্রাঙ্ক করলুম।
প্রথমটায় সে একচোট গালাগালি দিলে আমি কেন আগে জানাই নি। আমি
বললুম, ‘কেন? বেতার তো আমার টুরের খবর প্রতিদিন বুলেটিনে ঝাড়ছে।’

শুধালে, ‘কোন্ বেতার? দক্ষিণ মেরুর?’

‘না, কন্সান্ট্রেশন ক্যাম্পের।’

‘এই! চুপ চুপ!’

‘না রে না, ভয় পাস নি। তোদের ফ্যুরারের সঙ্গে আমাদের এখন খুব
দোস্তী। তিনি গোপনে আমাদের হু-একজন বেসরকারী নেতাকে শুধিয়েছেন,
তিনি যদি ব্রিটন আক্রমণ করেন তবে ভারতীয়েরা তার মোকা নিয়ে ইংরেজের
বিরুদ্ধে বিদ্রোহ করবে কি না।’

‘থাক্ থাক্। আজ সন্ধ্যায় দেখা হবে।’

আমি বললুম, ‘হাইল হিটলার।’

রিসীভার রাখার এক মিনিট যেতে না যেতে টেলিফোন বাজলো। রিসীভার
তুললুম। অপর প্রান্ত থেকে অহুরোধ এল বামাকর্থে, ‘আমি কি ডক্টর স্নায়েরের

সঙ্গে কথা বলতে পারি ?’

‘কথা বলছি।’

‘আমি ট্রান্সকল দফতর থেকে কথা বলছি। খানিকক্ষণ আগে আপনি ড্যাসলডফে ট্রান্সকল করেছিলেন না ?’

সর্বনাশ! পাউলের ভয় তাহলে অমূলক নয়। নিশ্চয়ই নাৎসি স্পাই। আমাদের কথাবার্তা ট্যাপ করেছে। ক্ষীণকণ্ঠে বললুম, ‘হ্যাঁ।’

‘আপনি ইণ্ডিয়ান ?’

‘কি করে—’

‘না, না, মাফ করবেন—আপনার জার্মান উচ্চারণ খুবই খাঁটি, কিন্তু কি জানেন, আমি ট্রান্সকল একসূচক্কে কাজ করি বলে নানান দেশের নানান ভাষা নানান উচ্চারণের সঙ্গে আমার ঘনিষ্ঠ পরিচয়। শুধু কণ্ঠস্বর নিয়ে সব-কিছু বুঝতে হয় বলে অল্প দিনের ভিতরেই এ জিনিসটা আমাদের আয়ত্ত হয়ে যায়।’

আশ্চর্য নয়। মাহুশ তার মাতৃভাষার বৈশিষ্ট্য বিদেশী ভাষা বলার সময় আপন অজ্ঞানতে প্রকাশ করে ফেলে আর ওকীবহাল ব্যক্তি সেটা ধরে ফেলতে পারেন। শুনেছি লণ্ডনের কোন্ এক আর্ট একাডেমির অধ্যাপক যে কোনো ছবি দেখেই বলে দিতে পারতেন, কোন্ দেশের লোক এটা এঁকেছে। একই মডেল দেখে দেড়শটি ছেলে স্কেচ করেছে; তিনি দ্বিবা বলতে পারতেন, কোনটা ইংরেজের, কোনটা চীনার, আর কোনটা ভারতীয়ের। এবং যদিও মডেলের মেয়েটি ইংরেজ তবু সব চাইতে ভাল এঁকেছে ইণ্ডিয়ান। মনকে এরই স্বরণে সাস্তনা দিলুম, তবে বোধ হয় আমার জার্মান উচ্চারণ জার্মানদের চেয়েও ভাল।

অনেক ইতিউতি করে নারীকণ্ঠ বললে, ‘আপনি যদি কিছু মনে না করেন, আমি বার বার ক্ষমা চাইছি, আমি কি পাঁচ মিনিটের জন্তু আপনার দর্শন পেতে পারি ? আমার একটু দরকার আছে। সেটা কিন্তু জরুরী নয়; আপনার যেদিন যখন সুবিধে হয়।’

তাড়াতাড়ি বললুম, ‘পাঁচ মিনিট কেন—পাঁচ ঘণ্টা নিন। আমি এখানে ছুটিতে। দিন ক্ষণ আপনিই ঠিক করুন।’

‘কাল হবে ? আমার ডিউটি বিকেল পাঁচটা অবধি। আপনার হোটেলের পাশেই তো ক্যাফে “হুফ্‌স্লাগ্”। সেখানে সাড়ে পাঁচটায় ? আমি আপনাকে ঠিক চিনে নেব। বনু শহরে আপনিই হয়তো একমাত্র ইণ্ডিয়ান।’

পরদিন ক্যাফের মুখেই একটি মহিলা এগিয়ে এসে বললেন, ‘গুটনট্যাং ! হের সায়েন্স !’

আমি বললুম, ‘গুট্‌নটাক্স, ফ্রাইন—’

এস্থলে প্রথম পরিচয়ে আপন নাম বলা হয়। ফ্রাইন (কুমারী, মিস্) কি একটা অস্পষ্ট কণ্ঠে বললেন, আমি ঠিক ধরতে পারলুম না। কিন্তু নিতান্ত জরুরী প্রয়োজন না হলে এস্থলে তু’বার প্রশ্ন করা—বিশেষ করে মহিলাকে—আদব-দ্রবস্ত নয়।

দেহের গঠনটি ভারী সুন্দর, আটসাঁট, দোহারী। প্রলম্বিত বাহু দুখানি এমনি সুডোল যে, মনে হয় যেন দু গুচ্ছ রজনীগন্ধা। রাস্তার উজ্জল আলোতে দেখছিলুম বলে লক্ষ্য করলুম কহুইয়ের কাছে মণি-খনির মত দুটি টোল। গোটা দেহটি যেন রসে রসে ভরা। শুধু দেহটি দেখলে যে কেউ বলবে, মধুভরা পূর্ণ যুবতী।

কিন্তু মুখটির দিকে তাকানো মাত্র যে-কোনো মানুষের মনের ভাব সম্পূর্ণ বদলে যাবে। ব্লাউজের গলার বোতাম থেকে আরম্ভ করে মাথার চুল পর্যন্ত—মনে হল এ যেন অগ্নি বয়সের ভিন্ন নারী। মুখের চামড়ায় এক কণা লাভণ্য এক কাঁচা মৃগতার তেল নেই। গলার চামড়া পর্যন্ত বেশ-কিছুটা খুলে পড়েছে। সিকি পরিমাণ চুলে পাক ধরেছে। আর চোখ দুটি—সেগুলোর যেন দর্শনশক্তিও হারিয়ে গিয়েছে—জ্যোতিহীন, প্রাণহীন। এর বয়স কত হবে?—শুধু যদি মুখ থেকেই বিচার করতে হয়? আর সে কী বিষয় মুখ! বয়স বিচারের সময় সেই বিষয়টাই তো হবে প্রধান সাক্ষী—জ্যোতিব্রষ্ট চক্ষুতারকার চেয়েও কণ্ঠদেশের লোলচর্মের চেয়েও।

ইতিমধ্যে আমরা কাফেতে ঢুকে আসন নিয়েছি। মহিলাটি—না যুবতীটি, কি বলবো? (সেই যে কালিদাসের গল্পে বুড়ো স্বামীর ধড়ের সঙ্গে জোয়ান ভাইয়ের কাটা মৃগু জুড়ে দিয়েছিল এক নারী)—ইতিমধ্যে দাস্তানা খুলে নিয়েছেন। মুখের সঙ্গে মিলিয়ে বেরলো হাত দুখানা—রসে ফাটো-ফাটো দেহের সঙ্গে মিলিয়ে নয়—নির্জীব, কৌকড়ানো চামড়া; ইংরিজিতে বলে কোজ ফীট, কাকের পা। অতি কণ্ঠে নিজেই সামলেছিলুম।

বললেন, ‘আপনাকে আমি নিমন্ত্রণ করেছি।’ অর্থাৎ তিনি বিল শোধ করবেন। অগ্নি সময় হলে এ বারতা আমার কর্ণকুহরে নন্দন-কাননের স্বর্ণোজ্জল মধুসিক্তন করতো। কিন্তু এই বিষয় মুখের সামনে আমার গলা দিয়ে যে কিছুই নামবে না। বললুম, ‘আমি এখন এখানে পড়তুম—’

বাধা দিয়ে শুধোলেন, ‘আপনিও পড়েছেন নাকি?’

এই ‘ও’টার অর্থ কি?

আমি বললুম, 'তখন তো কোনো অবিবাহিত রমণীর নিয়ন্ত্রণ গ্রহণ করা আমাদের মধ্যে বেওয়াজ ছিল না।'

তার কণ্ঠটি ছিল এমনতেই ক্ষীণ—এখন শোনালো মুম্বু প্রায়। যেন মাফ চেয়ে বললেন, 'ব্যত্যয় সব সময়ই দুটো একটা থাকে। কিন্তু দয়া করে আপনি এসব গায়ে মাখবেন না। আমি আপনার অগ্নিয় কোনো কাজ করতে চাই নে।'

কাফেতে এ সময়ে জার্মানদের ইয়া ইয়া লাশ ভামিনীদের ভিড়। ওয়েস্টেস এক কোণে একটি খালি টেবিল দেখিয়ে দিল। বুঝলুম, মহিলাটি পূর্বাহ্নেই টেবিলটি রিজার্ভ করে রেখেছিলেন। ব্যাগ খুলতে খুলতে বললেন, 'আপনি কি খেতে ভালবাসেন? চা নিশ্চয়ই। কিন্তু এদেশে যে চা বিক্রী হয় সে তো অখাদ্য। তবে আমার কাছে ভাল চা আছে। আমি লণ্ডন থেকে সেটা আনাছি।' ব্যাগ থেকে বের করে একটি ছোট পুদিনা তিনি ওয়েস্টেসের হাতে তুলে দিলেন। সে কিছু বললো না বলে বুঝলুম, এ ব্যবস্থায় সে অভ্যস্ত।

আমাদের অর্ডার না দেওয়া সত্ত্বেও ভাল ভাল কেক, স্ট্রান্ড্‌উইজ্, টার্ট উপস্থিত হল। বুঝলুম, এগুলো পূর্বের থেকেই অর্ডার দেওয়া ছিল।

কিছুক্ষণ পরে জিজ্ঞেস করলেন, 'আপনাদের দেশের খুব বেশী ছাত্র জার্মানিতে পড়তে আসে না—কি বলেন?'

আমি বললুম, 'অতি অল্পই। তাও বেশীর ভাগ শিখতে আসে সায়েন্স আর টেকনিকাল বিদ্যা।'

একটু হেসে বললেন, 'স্পষ্ট বোঝা যাচ্ছে, আপনি হিউম্যানিটিজের। আর বনু তো তারই জন্তু বিখ্যাত। তবে এখানে এসেছেন অল্প ভারতীয়ই। আপনারা যারা এসেছিলেন, ভারতে তাঁদের কোনো সম্ভাব আছে কি, যার মাধ্যমে একে অগ্নের সঙ্গে আপনারা যুক্ত থাকতে পারেন?'

আমি বললুম, 'না। এমন কি আমি এঁদের মাত্র দু-একজনকে চিনি। ভারতবর্ষ বিরাট দেশ—' বলে আমি চায়ে চুমুক দিলুম। তিনি বললেন, 'ডিক্রাগড থেকে দ্বারকা, কুলু থেকে কণ্ঠাকুমারী।' আমি তো অবাক! আশ্চর্য হয়ে বললুম, 'আপনি অত ভীটেল জানলেন কোথা থেকে? এখানকার শিক্ষিত লোককে পর্বস্ত ইণ্ডার (ভারতীয়) আর ইণ্ডিয়ানার (রেড ইণ্ডিয়ান) এ দুয়ের পার্থক্য বুঝিয়ে বলতে হয়।'

'এবং তার পরও কেউ কেউ আপনাকে শুধায়, আপনি ৎসেন্ট্রাল আফ্রিকানার (সেন্ট্রাল আফ্রিকান) না জুড্ ইটালিয়ানার (সাউথ ইটালিয়ান)?'

‘আমি আরো আশ্চর্য হয়ে বললুম, ‘আপনি অন্তত জানলেন কি করে?’

‘পরে বলবো। কিন্তু আপনি ভারতে বন্-এর ছাত্রদের সম্বন্ধে কি যেন বলছিলেন?’

‘ভারতের বুদ্ধিজীবীর প্রধান অংশ থাকেন কলকাতায়। সেখানে থাকলেও খানিকটা বোগহুত্র থাকে। আমি থাকি ছোট বরোদায়—’

অক্ষুট শব্দ শুনে আমি গুঁর মুখের দিকে তাকালুম। দেখি, তাঁর পাংক্ত মুখে যে হু-ফোঁটা রক্ত ছিল তাও অন্তর্ধান করেছে। ভয় পেয়ে শুধালুম, ‘কি হল আপনার?’

টোক গিলে খানিকটা সামলে নিয়ে বললেন, ‘ও কিছু না। আমি অনিভ্রায় ভুগে ভুগে দুর্বল হয়ে পড়েছি। এখানে বদ্দ লোকের ভিড়। সব বদ্দ। আমি আমার অফিস-ঘরের জানলা শীত গ্রীষ্ম সব সময় খোলা রাখি।’

আমি বললুম, ‘তা হলে খোলায় চলুন।’ তারপর শুধালুম, ‘আপনার সহকর্মী অল্প মেয়েরা কিছু বলে না?’

প্রথমটায় ঠিক বুঝতে পারেন নি। পরে বললেন, ‘ও। আমি এককালে টেলিফোন গাল্‌ই ছিলুম। এখন তারই বড় অফিসে কাজ করি। অ্যাডমিনিস্ট্রেটিভ কাজ। কিন্তু আগেরটাই ছিল ভালো।’

বাইরে বেরিয়ে আসতেই আমি বললুম, ‘আমার মনে হচ্ছে আপনি বেশী হাঁটাইটা করতে পারবেন না। তার চেয়ে চলুন, ওই যে প্রাচীন যুগের একথানা ঘোড়ার গাড়ি এখনো অবশিষ্ট আছে, তাই চড়ে রাইনের পাড়ে গিয়ে বসি।’

মাথা নেড়ে সাই দিলেন।

আন্তে আন্তে শুধোলেন, ‘গেলটনার যে স্বথের জর্মন অহুবাদ করেন সেইটের উপর নির্ভর করে যে একটি ইংরেজি অহুবাদ ভারতবর্ষ থেকে বেরোবার কথা ছিল, তার কি হল?’

আমি এবারে সত্যিই অবাক হলুম। গেলটনারের অহুবাদ অনবত্ত। গত একশ বছরে স্বথের সম্বন্ধে ইয়োরোপ তথা ভারতে যত গবেষণা হয়েছে গেলটনারের কাছে তার একটিও অজানা ছিল না, এবং অহুবাদ করার সময় যেখানে যেটির দরকার হয়েছে সেখানে সেইটে ব্যবহার করেছেন। কিন্তু এ মহিলাটি যে অভিশয় সমীচীন ও সময়োপযোগী প্রস্তাবটির কথা বললেন সে সম্বন্ধে আমি কিছুই জানতুম না। বিস্ময় প্রকাশ করে বললুম, ‘কিন্তু আপনি এ সবের খবর পেলেন কোথায়?’

তিনি চুপ করে রইলেন। গাড়ি মন্থর গতিতে বেটোফেনের প্রতিমূর্তির

পাশ দিয়ে, ম্যান্‌স্টার গির্জা পেরিয়ে, হুনিভার্সিটি হয়ে রাইনের পাশে এসে দাঁড়ালো।

গাড়ি থেকে নেমে তাকিয়ে দেখি, মহিলার মুখ তখনো ফ্যাকাশে। প্রস্তাব করলুম, ‘ওই ক্যাফেটার খোলা বারান্দায় গিয়ে বসি, আর আপনি কিছু একটা কড়া খান।’ ওয়েটারকে বললুম কন্ডাক্ট নিয়ে আসতে।

দুই চৌক কন্ডাক্ট খেয়ে যেন বল পেলেন। বললেন, ‘আমি এখনো অবসরমত কিছু কিছু ইংলিঞ্জির চর্চা করি। বছর বারো পূর্বে যখন আরম্ভ করি তখন পূর্ণোত্তমেরই করেছিলুম।’

তারপর আবার অনেকক্ষণ ধরে চিন্তা করলেন। রাইনের জলের উপর তখন অন্ধকার ঘনিয়ে আসছে। দু-একখানা মোটর বোট আসা-যাওয়া করছে মাত্র। বাতাস নিস্তব্ধ। এমনিতেই রাইনের সন্ধ্যা আমাদের বিষণ্ণ করে তোলে, আজ যেন রাইনের জলে চোখের জল ছলছল করছে।

মহিলাটি বললেন, ‘কাল থেকে ভাবছি, কি করে কথাটি পাড়ি।’

যে কোনো কারণেই হোক মহিলাটি যে বেদনাতুর হয়ে আছেন সে-কথা আমি ততক্ষণে বুঝতে পেরেছি। বললুম, ‘আপনি দয়া করে কোনো সঙ্কোচ করবেন না। আমাধারা যদি কোন-কিছু করা সম্ভব হয়, কিংবা সুকুমাত্র আমাকে কিছু বলতে পেরে আপনার মন হালকা হয়—’

মানুষকে ক্রমাগত সান্ত্বনার বাক্য দিয়ে প্রত্যয় দিতে থাকলেই যে সে মনস্থির করতে পারে তা নয়; বরঞ্চ কথা বন্ধ করে দিলে সে আপন মনে ভাববার এবং সিদ্ধান্তে পৌঁছবার সুযোগ পায়। আমি বন্-বয়েল শহরের মাঝখানে রাইনের উপরের পাথরের মোটা মোটা ধামের তুলে-ধরা বিস্তীর্ণ স্পানওলা স্পন্দর সেতুটির দিকে তাকিয়ে রইলুম। লোহার পুল কেমন যেন নদীর সঙ্গে খাপ খায় না—পাথর যেন জলের সঙ্গে মিশে এক হয়ে যায়, উভয়েরই রঙ এক।

হুনিয়াতে হেন তালা আবিষ্কৃত হয় নি যেটা কলেক্টরশলে, কখনো বা পশুবল প্রয়োগ করে, কখনো বা মোলায়েম আদরসোহাগ করে খোলা যায় না; ওদিকে আবার গেন্ডাপো, গুগপু এ সব-কটা পদ্ধতি এবং আরো মেলা নয়া নয়া কৌশল খাটিয়েও বহু মানুষের মনের তালা খুলতে পারে নি। এবং হঠাৎ অকারণে কেন যে সেটা খুলে যায় তার হৃদিস কন্‌ফেশনের পাজীসায়ের থেকে আরম্ভ করে আমাদের ঘৌবনকালের টেগার্ট পাথওও সম্ভান পায় নি।

মহিলা ভিজ্‌জ করলেন, ‘আচ্ছা বলুন তো, দময়ন্তী নিজাভর্গের পর দেখলেন নলরাজ নেই; তারপর তাঁর ইহজীবনে যদি নলের সঙ্গে আদৌ সাক্ষাৎ না হত

তবে তিনি নল সঙ্কে বা আপন অদৃষ্ট সঙ্কে কি ভাবতেন ?

নলোপাখ্যানের উল্লেখ আমি আশ্চর্য হলাম না ! বেঁ রমণী গেলটনারের বেদান্তবাদের সঙ্গে স্থপরিচিতা, নলরাজ তো তাঁর নিত্যালাপী আত্মীয় !

আমি একটু ভেবে বললাম, ‘রসরাজও তো বৃন্দাবনে শ্রীমতীর কাছে ফিরে যান নি । তবু তো তিনি তাঁর প্রতি প্রত্যয় ত্যাগ করেন নি । মহাত্মা উদ্ধব যখন বৃন্দাবন দর্শন করে মথুরা ফিরে এলেন তখন রসরাজ সব শুনে বলেছিলেন, “বিরহাগ্নি যদি তাঁর এতই প্রবল হয় তবে তিনি জলে পুড়ে ভস্ম হয়ে যান নি কেন ?” কী বেদদয়ী প্রশ্ন ! কিন্তু শ্রীরাধা সেটা জানতেন বলে উদ্ধবকে বলতে বলে দিয়েছিলেন, তার অবিরাম অশ্রুধারা সেই অগ্নি বার বার নির্বাণিত করছে —“তমু জরি জাত জো ন অহুয়া চরত্ উধো”—যদুপতি শেষ প্রশ্ন শুধান, “আমার বিরহে তাঁর প্রাণবায়ু বেরিয়ে যায় নি কেন ?” এর উত্তরও উদ্ধব শিখে নিয়েছিলেন, “আপনি একদিন না একদিন বৃন্দাবনে ফিরবেন এই প্রত্যয়ই তাঁকে বাঁচিয়ে রেখেছে ।”

দময়ন্তী নিশ্চয়ই প্রত্যয় ছাড়েন নি ।

মহিলা বললেন, ‘তুলনাটা কি ঠিক হলো ? শ্রীরাধা তো মাঝে মাঝে শ্রীকৃষ্ণের সংবাদ পেতেন, তিনি কংস বধ করেছেন, তিনি কুরু-পাণ্ডবের মধ্যে শান্তি স্থাপনার্থ দৌত্য করেছেন, জনসমাজের বৃহত্তর সেবায় নিজেকে নিয়োজিত করেছেন—এই ভেবে মনে সান্ত্বনা পেতেন—’

আমি বাধা দিয়ে বললাম, ‘এবং ঋক্মিণীকে—সে কুমারী আবার শিশুপালের বাগদস্তা বধু—বিয়ে করেছেন, তার পর সত্যভামাকে, সর্বশেষে ভান্সুকী—’

আমি নিজের থেকে থেকে গেলে পর মহিলাটি বললেন, ‘শ্রীকৃষ্ণের উদাহরণ আপনাই তুলেছিলেন ; আমি তুলি নি ।’

আমি বললাম, ‘আপনি দময়ন্তীর কথা তুলেছিলেন—ভগবান করুন, আপনার নল যেন—’

তিনি মাথা নাড়তে আমি চুপ করে গেলুম ।

বললেন, ‘আপনি গোডেসবের্গ চেনেন ?’

আমি বললাম, ‘বা রে, সেখানে তো আমি এক বছর বাস করেছি ।’

‘প্রক্লেসর কিফেল সেখানে বাস করতেন ; আমরা ছিলাম তাঁর প্রতিবেশী । আমি প্রতিদিন বন শহরে আসতুম চাকরি করতে । হঠাৎ একদিন দেখি তার পয়ের স্টপেজ হোথু-ক্রয়েৎস একজন বিদেশী উঠলেন । মুখখানা বিবল । সেদিন আর কিছু লক্ষ্য করি নি । কাইজার প্রাৎসের স্টপেজে উনিও নামলেন । আমি

বইয়ের দোকান রোয়াশাইটে কাজ করতুম। আপন অজান্তেই লক্ষ্য করলুম বিদেশী যুনিভার্সিটিতে ঢুকলেন।

তিন-চার মাস প্রায় রোজই একই ট্রামে যেতুম, ভদ্রলোকের প্রতি আমার কোনো কৌতূহল ছিল না কিন্তু লক্ষ্য করলুম, বিদেশীর বিয়ল ভাব আর কাটলো না।

তারপর একদিন তিনি আমাদের দোকানে এসে ঢুকলেন। আমি এগিয়ে গিয়ে অভ্যর্থনা জানাতে তিনি একেবারে থতমত খেয়ে গেলেন। ভাবলুম এ আবার কোন্ দেশের লোক? এত লাজুক কেন?

ভাঙা ভাঙা জার্মান ভাষায় এক জার্মান ইণ্ডলজিস্টের বইয়ের ইংরিজি অম্ববাদ চাইলেন। আমি একটু আশ্চর্য হলুম : জার্মানিতে বসে জার্মানের লেখা বই পড়লেই হয়। বললুম, “এটা লগুন থেকে আনাতে হবে।” তারপর কিন্তু-কিন্তু করে বললুম, “মূল জার্মানটা পড়লেই তো ভাল হয়।”

তিনি বললেন, “আমার আছে, কিন্তু বুঝতে বড় অসুবিধা হয়।” সঙ্গে সঙ্গে বইখানা পোর্টফোলিয়ো থেকে বের করে কাউন্টারের উপর রাখলেন।

আমি তখনো ইণ্ডলজির কিছুই জানতুম না—নামটাম টুকে নিয়ে তাঁকে দু-চারখানা ভাল অভিধান, সরল জার্মান বই, ব্যাকরণ দেখালুম। আমি ইংরিজি জানতুম বলে তাঁর ঠিক কোন্ কোন্টা কাজে লাগবে সে বিষয়ে বিশেষজ্ঞের মত সংপরামর্শ দিলুম। আমি যেটা দেখাই সেটাই তিনি কিনে ফেলেন। শেষটায় আমিই হেসে বললুম, “এগুলো শেষ করুন। এর পরের ধাপের বই আমি বেছে রাখবো।” টাকা দিয়ে বইগুলো নিয়ে যখন চলে গেছেন তখন দেখি তাঁর ইণ্ডলজির বইখানা কাউন্টারে ফেলে গেছেন। তা যান, কাল ট্রামে দিয়ে দিলেই হবে।

ইণ্ডিয়া সম্বন্ধে এই আমার প্রথম পাঠ। এবং এখানো সে বইখানা মাঝে মাঝে পড়ি। ভিণ্টারনিংসের ভারতীয় সাহিত্যের ইতিহাস। এ বই দিয়ে আরম্ভ না করলে হয়তো ভারতীয় সংস্কৃতির প্রতি আমার কৌতূহল অল্পরেই মাঝা যেত।

ভিণ্টারনিংস লেখেন অতি সরল জার্মান; তাই আশ্চর্য হলুম যে বইয়ের মালিক এতদিনেও এতখানি জার্মান শিখে উঠতে পারেন নি কেন?

আমি চেপে গেলুম যে, ঠিক এই বইখানাই ভিণ্টারনিংস শান্তিনিকেতনে আমাদের পড়িয়েছিলেন।

আর পাঁচজন জার্মানের তুলনায় বিদেশীদের সম্বন্ধে আমার কৌতূহল কম। বইয়ের দোকানে কাজ করলে ইচ্ছা-অনিচ্ছায় জাত-বেজাতের বই পড়া হয়ে যায়।

আমার কৌতূহল নিবৃত্তি হয়ে গিয়েছিল—অনেকখানি—ওই করে।

কিন্তু এই লোকটির প্রতি কেমন যেন আমার একটু দয়া হল। তবু এটা ঠিক, আমি নিশ্চয়ই গায়ে পড়ে তাঁকে সাহায্য করতে যেতুম না। তবে এ-কথাও ঠিক, ভিক্টারিনিংসের বেদ অল্পক্ষেদে উষ্ম আবাহন এবং জুয়াড়ির মনস্তাপ দুটোই আমার কল্পনাকে এক অপূর্ব উত্তেজনায় আলোড়িত করেছিল। উষ্মস্তম্ভ লিরিক, রহস্তময়, ধরা-ছোঁওয়ার বাইরে, আর অবিশ্বাস্য বলে মনে হল যে, ওই একই সময়ে অতিশয় নিদারুণ বাস্তব জুয়োখেলা ও জুয়াড়িভীষনের নিষ্ঠুর অভিজ্ঞতা একই সঙ্কল্পনে স্থান পেয়েছে। আমার বাবা ছিলেন গ্রীক ভাষার অধ্যাপক। ইস্কুলে আর পাঁচটা ছেলেমেয়ে যা গ্রীক শেখে সেটা ম্যাট্রিক পাশের পরই তুলে যায়। আমার পিতা সেটা হতে দেন নি। এখন আমার ইচ্ছে হল সংস্কৃত শেখার। তাই তাঁর সঙ্গে ভাল করে আলাপ করলুম। আমি তাঁর জন্ম ভিক্টারিনিংসের জার্মান থেকে ইংরিজি অম্মবাদ করে দিতুম, আর তিনি আমাকে সংস্কৃত পড়াতেন।’

আমার মনে সর্বক্ষণ নানা প্রশ্নের উদয় হচ্ছিল, কিন্তু মহিলাকে বাধা দিলুম না।

ততক্ষণে কাফেতে উল্লাস, হৈ চৈ পড়ে গিয়েছে। জার্মান জনগণের বহুদিনের মনস্কামনা পূর্ণ হয়েছে। ঘড়ি ঘড়ি খবর আসছে, নাৎসি বিজয়-সেনানী কি ভাবে অস্ট্রিয়ার শহরের পর শহর দখল করে যাচ্ছে, তারা কি ভাবে সর্বত্র উদ্ভাষ অভিনন্দিত হচ্ছে।

আমি একটু মুচকি হেসে বললুম, ‘ভালুকও মাঝুষকে আলিঙ্গন করে শুনেছি, কিন্তু সে আলিঙ্গন—যাক্ গে।’

মহিলাটি একটু চমকে উঠলেন। বললেন, ‘এসব মস্তব্য আপনি সাবধানে করবেন। কি করে জানলেন, আমি নাৎসি নই?’

আমি হেসে বললুম, ‘জলবস্তুরলম্—আপনি তো সংস্কৃত জানেন। তার মানে যে-জন বেদ পড়েছে, সে-ই জানে বেদের আৰ্ঘ্যধর্মের সঙ্গে নাৎসিদের এই “আৰ্ঘ্যামি”র বড়কাটাইয়ের সূচ্যত্র পরিমাণ সম্বন্ধ নেই। কিন্তু আপনি চিন্তাবিক্ষেপ হতে দেবেন না। তার পরের কথা বলুন।’

একটু চিন্তা করে বললেন, ‘প্রথমে সাহচর্য, তারপর বন্ধুত্ব, সর্বশেষে প্রণয় হল আমাদের হুজনাতে।’

এবারে অনেকক্ষণ চুপ থেকে বললেন, ‘তিন বছরের প্রশয়—তারপর দশ বছর ধরে আমি তাঁর কোনো খবর পাই নি। এই দশ বছর আমার একা একা

কেটেছে। এই দীর্ঘ তেরো বছরের কথা আপনাকে বলতে গেলে ক'মাস ক' বছর লাগবার কথা তার সামান্ততম অহুমান আমার নেই।

এই শেষের দশ বৎসর কি করে কেটেছে, এখন কি করে কাটছে সেটা বোঝাবার চেষ্টাও আমি করবো না। আর সেটা শোনাবার জন্যও আমি আপনার দর্শন কামনা করি নি। এই যে বন্ বিশ্ববিদ্যালয় আমরা পেরিয়ে এলুম, এখানে পড়বার সময় ঠিক একশ বছর আগে, আমাদের সবচেয়ে সেরা লিরিক কবি হাইনে একটি চার লাইনের কবিতা লেখেন :

“প্রথমে আশাহত হয়েছি
ভেবেছিলাম হবে না বেদনা ;
তবু তো কোনো মতে সয়েছি
কি ক'রে যে সে-কথা শুখিয়ে না।”

তীব্র বেদনার তীব্র প্রকাশ দেবার চেষ্টা করেছেন হাইনে বার বার, কিন্তু হার মেনে উপরের চতুর্দশটি রচন। একশ বছর ধরে দেশ-বিদেশে লক্ষ লক্ষ নয়নারী সেগুলো পড়ছে—

এবারে আমি বাধা দিয়ে বললুম, ‘আমাদের পোয়েট টেগোর তাঁর প্রথম বোঁবনে এক জর্মন মহিলার কাছ থেকে অল্প জর্মন শেখার পরই তাঁর গুটিদশেক কবিতা বাঙলায় অনুবাদ করেন। আপনি যেটি বললেন সেই চতুর্দশটিও তাতে আছে।’

‘প্রথম বোঁবনে তিনি কি শোক পেয়েছিলেন?’

‘তাঁর প্রাণাধিকা ভ্রাতৃত্ব আত্মহত্যা করেন। কিন্তু সে-কথা আরেকদিন হবে। আমি নিজে কাপুরুষতম এসকেপিষ্ট ; তাই হুংথের কথা এড়িয়ে চলি। তার চেয়ে আপনাদের সেই তিন বছরের আনন্দের কথা বলুন।’

‘প্রথম বছর কেটেছে স্বপ্নের মত। স্বপ্ন যেমন চেনা-অচেনার মিশে যায়, হঠাৎ চেনা জিনিস, চেনা মানুষ মনে হয় অচেনা, আবার অচেনা জন চেনা, এ যেন তাই। তাঁকে যখন মনে হয়েছে এঁর সব কিছু আমার চেনা হয়ে গিয়েছে তখন হঠাৎ মনে হয়েছে যেন ইনি আমার সম্পূর্ণ অজানা জন। আবার কেমন যেন এক প্রহেলিকার সামনে অন্ধকারে ব্যাকুল হয়ে হাতড়াচ্ছি—মধ্যরাত্রে হঠাৎ তাঁর ঘুমন্ত হাত পড়ল আমার গায়ের উপর আর সঙ্গে সঙ্গে আমার সমস্ত শরীর যেন অবশ হয়ে গেল। আমার চৈতন্ত্যে তখন বিশ্বব্যাপী মাত্র একটি অল্পভূতি—এই লোকটির মাঝেই আমার অস্তিত্ব, আমার অন্ত কোনো সত্তা নেই। গোডেসবর্গের পিছনে নির্জনে গভীর পাইন বনে সকাল থেকে পরের দিন তোরা

অবধি কাটিয়েছি একটানা, রাইনের ওপারে বরফ ভেঙে ভেঙে উঠেছি মার্গারেটেন হোহ অবধি, ফ্যান্সি বলে স্লাম্পনের পর স্লাম্পন থেয়ে আমি অবশ হয়ে শুয়ে পড়েছি ডান্স-হলের সামনের ঘাসের উপর—তিনি পৌঁছে দিয়েছেন বাড়িতে।’

কেন জানি নে, হঠাৎ জিজ্ঞেস করে বললুম, ‘উনি কখনো বে-একুতয়ার হতেন না?’

বললেন, ‘আশ্চর্য, আপনি যে এ-প্রশ্ন জিজ্ঞেস করলেন! না, কখনো না। এখানকার পাঁড়দের সঙ্গে সমানে পাঞ্জা দিয়ে তাঁকে খেতে দেখেছি বছবার, চোখের পাতাটি পর্যন্ত নড়তো না। অথচ তিনি একাধিক বার আমাকে বলেছেন, তাঁর জানা মতে তাঁর সাত পুরুষের কেউ কখনো মদ খায় নি।’

কিন্তু প্রথম বছরের চেয়েও—অন্ততঃ আমার পক্ষে—মধুরতর আর গৌরবময় শেষের দুই বছর।

এক বৎসর ক্লাস আর সেমিনার করার পর অধ্যাপকের আদেশে তিনি আরম্ভ করলেন তাঁর ডক্টরেট থীসিসের প্রথম খসড়া—অবশ্য ইংরিজিতে। মোটামুটি তিনি কি লিখবেন সে সম্বন্ধে তিনি আমার সঙ্গে আলোচনাও করেছিলেন।’

থেমে গিয়ে তিনি অত্যন্ত করুণ নয়নে আমার দিকে তাকিয়ে বললেন, ‘আপনার কাছে আমার একটা ভিক্ষা আছে—’

আমি বাধা দিয়ে বললুম, ‘ছি ছি। আপনি আমাকে এখনো চিনলেন না!’

‘চিনেছি বলেই চাইছি। এখন যা বলব, আপনি প্রতিজ্ঞা করুন, কাউকে বলবেন না।’

আমি তাঁর হাতে—সেই শুষ্ক, জরাজীর্ণ হাতে চাপ দিলুম।

‘প্রথম পরিচ্ছেদের কাঁচা খসড়া পড়ে আমি অবাক। একেবারে কিছুই হয় নি বললে অত্যাুক্তি হয়, কিন্তু এতে যে কোনো বাধাই নেই, বক্তব্য কোন্ দিকে যাচ্ছে তার কোনো নির্দেশ নেই—আছে গাদা গাদা ফ্যাক্টস, এবং তার মধ্যেও কোনো সিস্টেম নেই।’

কারণ ইতিমধ্যে আমি যে খুব বেশী সংস্কৃত শিখেছি তা নয়, তবে আপনি তো জানেন, জার্মান, ফরাসী এবং ইংরেজী, মাত্র এই তিনটি ভাষাতেই ইণ্ডিয়া সম্বন্ধে এত বই লেখা হয়ে গিয়েছে যে সেগুলো মন দিয়ে বার বার পড়লে, নোট টুকে মুখস্থ করলে কার সাধ্য বলে আপনি সংস্কৃত জানেন না! যেদিন তিনি আমার প্রথম তাঁর থীসিসের সাবজেক্ট—‘গুপ্তযুগের কালচারাল লাইফ’—বলেন সেদিন থেকেই আমি ঐ বিষয়ের উপর যা পাওয়া যায় তাই পড়তে আরম্ভ

করেছি, নোট টুকেছি, মুখস্থ না করেও যতখানি সম্ভব মনে রাখবার চেষ্টা করেছি। আর সংস্কৃত তো সঙ্গে সঙ্গে চলছেই। আপনি তো আমাদের সিস্টেম জানেন। তাই তিন মাস যেতে না যেতেই আমি ব্যাপিড্, রীডিং সিস্টেমে খানিকটা বুঝে কিছুটা না বুঝে কালিদাসের সব লেখা—এমন কি কালিদাসের নামে প্রচলিত অল্প জিনিসও পড়ে ফেলেছি। তবে আমার ব্যাকরণ জ্ঞান এখনো কাঁচা, যদিও গ্রীকের সাহায্যে শব্দতত্ত্বে আমার কিছুটা দখল আছে।

ওঁর ইংরিজিটা যে আমি জার্মানে অনুবাদ করবো সেটা তো ধরেই নেওয়া হয়েছিল। তারই অছিলা নিয়ে আমি সমস্তটা টেলে সেজে লিখলুম। পাছে তাঁর আত্মসম্মানে লাগে তাই বললুম, “তুমি এ-কাঠামোর উপর আরো ফ্যাক্টের কাদামাটি চাপাও, রঙ বোলাও।”

ইতিমধ্যে আমার বইয়ের দোকান আমাকে পাঠালো লণ্ডন, অক্সফোর্ড, কেমব্রিজে—আমাদের বইয়ের বাজার প্রসার করতে। তিনিও তাঁর প্রফেসরের কাছ থেকে ছুটি নিলেন ব্রিটিশ মিউজিয়ামে ও ইণ্ডিয়া অফিস লাইব্রেরিতে মাল-মশলার সন্ধানে যাবার জন্য।

সে সুযোগের অবহেলা আমি না করে আমাদের প্রকাশিত আর বিরল আউট অব প্রিন্ট কিছু কিছু বই নিয়ে দেখা করতে গেলুম লণ্ডন স্কুল অব ওরিয়েণ্টাল স্টাডিজের ইণ্ডোলজি-অধ্যাপকদের সঙ্গে। তাঁরা আমায় ভারি খাতির করলেন, কেউ কেউ চায়ে ডিনারে নিমন্ত্রণও করলেন। আমি ঘুরে ফিরে শুধু গুপ্ত যুগের কালচারাল লাইফের দিকে কথার মোড় কেরাই। ওঁরা অকুপণ হৃদয়ে আপন আপন গবেষণার ফল বলে যেতে লাগলেন। একদিন এক অধ্যাপকের বাড়িতে নিমন্ত্রণে ছিলেন আরো দুজন ইণ্ডোলজির অধ্যাপক। আমি গুপ্ত যুগ টুইয়ে দিতেই লেগে গেল তিন পণ্ডিতে লড়াই। ঘণ্টাখানেকের ভিতরই পরিষ্কার হয়ে গেল তিন জনার তিন খীলিস। একজন বললেন : গুপ্ত কেন, তার পরবর্তী যুগেরও সর্ব নাট্যের কাঠামো গ্রীক নাট্য থেকে নেওয়া। দ্বিতীয় জনের বক্তব্য : গুপ্ত যুগের চোন্দ্র আনা কৃষ্টির মূলে আবুড়ি। বেদ উপনিষদ রামায়ণ মহাভারতের চোরাবালির ভিতর দিয়ে চুইয়ে চুইয়ে গুপ্ত যুগে এসে নির্মল ত্বাহরা হুদে পরিণত হয়েছে। আর তৃতীয় জনের মতে গুপ্ত যুগের বেশীর ভাগ পরবর্তী যুগের—গুপ্ত যুগের নামে পাচার হচ্ছে। যে রকম ওমর খৈয়ামের দু’শ বছর পরে রচনা বিস্তর চতুস্পদী তাঁর সঙ্কলনে ঢুকে গেছে।

ভোরের প্রথম বাস্ ধরে আমরা যে ঘর বাসার ফিরেছিলুম।

তার পূর্বে আমি সবিনয়ে শুধিয়েছিলুম, আমি তাঁদের বক্তব্যের কিছু কিছু

ব্যবহার করতে পারি কি না। তিনিজন একবাক্যে বলেছিলেন, “আলবৎ, নিশ্চয়, অতি অবশ্যই। এসব তো কমন নলেজ। তাই দয়া করে কৃতজ্ঞতা স্বীকার করো না। আমাদের বদনাম হবে যে আমরা কমন নলেজ গবেষণা বলে পাচার করি।” একেই বলে প্রকৃত বিনয়।

বাসে বাসেই আমি যতখানি স্বরণে আনতে পারি শট্‌হাও টুকতে আরম্ভ করি। বাড়ি ফিরে বিছানা না নিয়ে যখন কাজ প্রায় শেষ করে এনেছি তখন বন্ধু বিছানায় বসে চোখ কচলাতে কচলাতে বেড্‌-টীর জুত ঘণ্টা বাজালেন।

অক্সফোর্ড কেমব্রিজও অধ্যাপকদের সাহায্য পেলুম।

তারপর বনে ফিরে এসে সেই সব বস্তু গুছিয়ে, খসড়া বানিয়ে ফেম্মার কপি টাইপ করে, তাঁর প্রোফেসরের মেরামতির পর সে অল্পঘায়া আবার টাইপ করে পরিপূর্ণ থীসিস তৈরী হল।’

আমি বললুম, ‘অর্থাৎ—’

তিনি ব্যাকুল হয়ে চিৎকার করে উঠলেন, ‘না, না, না। আপনি ভুল ইনফারেন্স করছেন। সংস্কৃত ভাষাটি ছিল তাঁর সম্পূর্ণ করায়ত্ত। হেন ব্যাকরণ নেই যার প্রত্যেকটি সূত্র, নিপাতন, আর্ষপ্রয়োগ তাঁর কর্তৃত্ব ছিল না। কঠিন কঠিন টেকস্ট ছবার না পড়েই তিনি অর্থ বের করে দিতে পারতেন। বললে বিশ্বাস করবেন না, তিনি তাঁর অধ্যাপককে এই দুরূহ ব্যাপারে সাহায্য করতেন। তাঁর থীসিসে যে অসংখ্য বস্তু মূল সংস্কৃত থেকে নেওয়া হয়েছে তার অল্পবাদে তো কোনো ভুল পাবেনই না, আর সেগুলোই করেছে তাঁর বইখানাকে রিচ ইন্ টেকস্চার—সমৃদ্ধশালী। তাঁর কৃতিত্ব অনন্তসাধারণ—’

আমি বাধা দিয়ে বললুম, ‘আমি আপনার প্রত্যেকটি কথা মেনে নিচ্ছি।’

রমণীটি বড়ই সরলা। স্বস্তির নিশ্বাস ফেলে বললেন, ‘বাঁচালেন। এসব কথা আমি এ জীবনে কাউকে বলি নি। এবং আরেকটা কথা, শুঁকে তো ভাইভাও দিতে হয়েছিল।’

আমি বললুম, ‘নিশ্চয়ই।’ ভাইভাতে কোন ক্লাস, আর রিটনে (অর্থাৎ) থীসিসে কোন ক্লাস পেয়েছিলেন সেটা আর শুধালুম না। তাহলে সর্বনাশ হয়ে যেত।

হঠাৎ মহিলাটি চমকে উঠে বললেন, ‘ছি ছি। অনেক রাত হয়ে গিয়েছে; ওদিকে আপনার ডিনারের কথা আমি একবারও ভুলি নি। কোথায় যাবেন বলুন।’

আমি কিছু-কিছু করছি দেখে বললেন, ‘আমার ক্যাটে যাবেন? এখানেই,

বোনী দূরে না। গোডেসবের্গের সে-বাড়িতে আমি আর বাই না।’

আমি ইতিমধ্যে একাধিক বার লক্ষ্য করেছি যে মহিলাটি এখনো তাঁর ক্লাস্তি কাটিয়ে উঠতে পারেন নি। তাঁকে বাড়িতে শুইয়ে দেওয়াই ভালো।

মোড় নিতেই দেখি সেই প্রাচীন দিনের শেষ ঘোড়ার গাড়িখানা যেন আমাদের জন্তাই দাঁড়িয়ে। মহিলাটি যে-আমলের কথা বলছিলেন তখন এরও ছিল ভরা ঘোঁবন। আমি বললুম, ‘কি হে যাবে নাকি?’

টপ্‌হাট তুলে বাও করে বললে, ‘নিশ্চয়ই, শ্রম।’ ঘোড়াকে বললে, ‘চল্‌ বার্বা রস্‌লা—গোডেসবের্গ।’

আমি চৈচিয়ে বললুম, ‘না হে না—’

বললে, ‘সরি, শ্রম! এই বছর পাঁচেক পূর্বেও তো আপনাকে ফ্যান্সি ডান্স থেকে ভোরবেলা হোথায় নিয়ে গিয়েছিলুম! হা হ্‌হা, হা হ্‌হা, আপনি তখন ভারী জলি ছিলেন, শ্রম, নামবার সময় ঝপ করে আমার হ্যাটটি কেড়ে নিয়ে হাওয়া। হা হ্‌হা—পরে আমার ওল্ড উম্মান বলে কি না আমি হ্যাট বন্ধক দিয়ে বিয়ার খেয়েছি। হা হা হা হা! চল্‌, বার্বা রস্‌লা—’

মহিলাটি হেসে উঠলেন। তাঁর চেনা দিনের ভোলা দিনের দমকা বাতাস যেন হঠাৎ গলিটাকে ভরে দিয়ে সব শুকনো পাতা উড়িয়ে নিয়ে চলে গেল রাইন বাগে। শহরের গলির ভিতর নির্বাসিতা স্রুসান্‌ দিবান্বপ্নে যে রকম তার গায়ের নদীটিকে শহরের গলি দিয়ে বয়ে যেতে দেখেছিল।*

তখনও আমার বয়েস ছিল কম, জ্ঞানভূম না, আমার কপালে ভাগ্যবিধাতা লিখে রেখেছেন এমনই দুর্দৈব যে তখন আমার অন্ধ কারাগারে না বইবে চেনা দিনের ভোলা দিনের বাতাস, না বইবে স্রুসানের গ্রামের নদী—স্বতির আবর্জনা উড়িয়ে নিতে ভাসিয়ে দিতে।

গাড়ি-ভাড়টা দেবার পর্যন্ত মোকা পেলুম না।

গেট খুলে বাড়িতে ঢোকার সময় শুনি, কোচম্যান বলছে, ‘চ বার্বা রস্‌লা, —দেখলি তো, তখনি তো তোকে বলি নি অস্ত্র সোয়ায়ি নিস্‌ নি। আজ আর না। চ, বাড়ি বাই।’ আমার দিকে ঘাড় ফিরিয়ে বললে ‘য়েতে বেরাতে যখন খুশী ঐ সামনের গলিতে ঢুকে পয়লা বাড়ির সামনে বলবেন, “ভালিং বার্বা রস্‌লা!” সঙ্গে সঙ্গে গাড়ি পাবেন তৈরী। সম্রাট বার্বা রস্‌লার মত আপনার

* “সকল গলির মোড়ে যখন দিনের আলো ঝরে

ময়না দাঁড়ে গাহে এমন গাইছে বছর ধরে।”

বার্‌বা রসলাও দেখবেন ক্রুসেড লড়তে হোলি ল্যাণ্ডে যেতে তৈরী।’

জর্মন কেন, প্রায় সব জাতের লোকই কোনো বিশেষ দেশ ভ্রমণ করে এলে বা সে দেশ নিয়ে চর্চা করলে আপন বাড়ি ভর্তি করে ফেলে সে দেশের ভালোমন্দ মাঝারি রাবিশ-জাঙ্ক-বিল্জ-কীচ্‌ দিয়ে। এঁর বাড়িতে পরিপূর্ণ ব্যতায় না হলেও একথা কেউ বলতে পারবে না যে ইনি সারাজীবন শুধু ইণ্ডিয়া ইণ্ডিয়াই করেছেন। মাত্র একখানি ছবি—অজস্কার। রাহুল-জননী পুত্রকে নিয়ে দাঁড়িয়েছেন তথাগতের (তিনি ছবিতে নেই) সামনে। আর লেখা-পড়ার টেবিলের উপর সাংখ্যকার মহর্ষি কপিলের একটি মূর্তি। ইনি এটি যোগাড় করলেন কোথা থেকে ? ওটা মূলে মূর্তি কি না জানি নে—হয়তো বা রিলীফ। আমি দেখেছি ছবিতে—বহু বৎসর হল।

কিন্তু অত বড় বড় ঘরওলা স্ল্যাট তিনি পোষেন কি করে ?

আমার অহুমান তুল নয়। স্ল্যাটে ঢুকে আমাকে আসন নিতে অহুরোধ করে তিনি সোফায় শুয়ে পড়লেন। একটু মাফ-চাওয়ার স্বরে বললেন, ‘আপনাদের দার্শনিক সর্বপল্লী মহাশয় নাকি লেখাপড়া পর্যন্ত খাটে শুয়ে শুয়ে করেন।’

ফোটোগ্রাফে মহারানী ভিক্টোরিয়ার বৃদ্ধ বয়সের যে ছবি দেখি ছবছ ঠিক সেই পোশাক পরে উনবিংশ শতাব্দীর মধ্যাঞ্চল যেন ঘরে এসে ঢুকলেন। মহিলা আলাপ করিয়ে-দিয়ে বললেন, ‘আমার আইমা। ঠাকুরমার সঙ্গে সঙ্গে আমাদের বাড়িতে আসেন। তাঁর ছেলে-নাতিরা ভালো ভালো ব্যবসা করেন। আইমা কিন্তু আমার সঙ্গেই থাকতে ভালোবাসেন।’

আমি বার বার বললুম, ‘আমি নিরামিষাণী নই, আমার আহাৰাদির জন্ত তুলকালাম করে রাইনের জলে আগুন লাগাতে হবে না, আমি সব খাই, টিনের খাণ্ডেও অরুচি নেই।’

মহিলা বললেন, ‘জানেন কি, হিটলার কড়া নিরামিষাণী ?’

আমি বললুম, ‘তা হলে নিরামিষ ভোজনের বিপক্ষে আরেকটা কড়া যুক্তি-পেলুম ! আর আপনি ?’

ক্লাস্তির স্বরে বললেন, ‘আইমা যা দেয়, তাই খাই।’

আমি বললুম, ‘আপনি তাহলে বৌদ্ধ ভিক্ষুণী !’

‘অস্তুত হিটলারের মত জৈন গৃহীও নই।’

ইনি সব জানেন।

আমাকে চেয়ারটা কাছে টেনে আনবার অহুরোধ করে বললেন, ‘আজ্জা-

‘আপনি নিওরসিস, সাইকসিস, মনমেনিয়া, ইদে ফিক্স—এসব কথাগুলোর অর্থ জানেন ?’

আমি বললুম, ‘ধারা এসব নিয়ে কারবার করেন, তাঁরাই কি জানেন ? এই যে আমরা নিত্য নিত্য ধর্ম, নীতি, মরালিটি, রিয়ালিজম, আইডিয়ালিজম শব্দ ব্যবহার করি, এগুলোর ঠিক ঠিক অর্থ জানি ? তবে আপনি যেগুলো বললেন, তার ভিতর একটা জিনিস সব কটারই আছে : কোনো একটা চিন্তা সর্ব চৈতন্ত্যকে এমনই গ্রাস করে ফেলে যে মানুষ তার থেকে অহোরাত্র চেষ্টা করেও নিষ্কৃতি পায় না।’

‘দুঃস্বপ্ন যে রকম বলেছিলেন, তিনি শকুন্তলার চিন্তা মন থেকে কিছুতেই সরাতে পারছেন না, অপমানিত জন যে রকম আপ্রাণ চেষ্টা করেও অপমানের স্মৃতি মন থেকে তাড়াতে পারে না—বার বার সেটা ফিরে আসে।’ তারপর বললেন, ‘কিন্তু আশ্চর্য, কালিদাস অপমানের সঙ্গে বিরহবেদনার তুলনা দিলেন কেন ? শকুন্তলা তো দুঃস্বপ্নকে কোনো পীড়া দেন নি—অপমান দূরে থাক !’

আমি বললুম, ‘শত্রু কাছে এসে দহন করে ; মিত্র দূরে গিয়ে দহন করে। দুজনেই দুঃখ দেয়—শত্রু মিত্রে কি প্রভেদ ?’

শত্রুদ্বৈত সংযোগে বিয়োগে মিত্রমপ্যাহো।

উভয়োর্দুঃখ দায়িত্ব কো ভেদঃ শত্রুমিত্রয়োঃ ?

দুঃস্বপ্ন দুঃস্বপ্নকে অপমানিত করলে তাঁর যে বেদনা-বোধ হত, শকুন্তলার বিরহও তাঁকে সেই পীড়াই দিচ্ছিল। তাই বোধ হয় কালিদাস উভয়কে পাশাপাশি বসিয়েছেন। রবীন্দ্রনাথও কিছুদিন পূর্বে বলেছেন, ‘তাঁর জন্মদিন ও মৃত্যুদিন কাছাকাছি এসে গেছে। একই মন্ত্রে দুজনকে আশ্রয় জানাবেন’।’

ঘরের আলো যদিও সূক্ষ্ম মলমলের ভিতর দিয়ে রক্তাক্ত গোলাপী আভার মত মোলায়েম, তবু শ্রীমতী দুঃহাত দিয়ে চোখ ঢেকে রেখেছিলেন।

এবারে উঠে বসে আমাকে বললেন, ‘আপনাকে সর্বক্ষণ আমার আপন কথা বলে উৎপীড়িত করার ইচ্ছা আমার নেই—বিশেষ করে বাড়িতে টেনে এনে।

আর এখন বার বার মনে হচ্ছে কী লাভ ? নিউরটিক ইত্যাদি যে শব্দগুলো বললুম, তার কটা আমার বেলা প্রযোজ্য আমি জানি নে। কিন্তু এ-কথা দৃঢ়নিশ্চয় জানি, আমি নরমাল নই। কখনো মনে হয়, আমার এই অহুত্বটি সত্যের উপর সুপ্রতিষ্ঠিত, আবার হঠাৎ মাঝরাতে জেগে উঠে দেখি, সেটা সম্পূর্ণ মতিভ্রম। একটা ইদে ফিক্স—ফিক্সাই আইডিয়া থেকে কিছুতেই নিষ্কৃতি পাই নে, এবং নিজের কোনো সিদ্ধান্তকে আর অবিচল চিন্তে গ্রহণ করতে

পারি নে। তাই দয়া করে আপনি এই নিউরটিক, মনমেনিয়াকের কোনো কথা গারে মাখবেন না।’

আমি বললুম, ‘তথ্যস্তু (এবং সংস্কৃতেই বলেছিলুম)। কিন্তু আপনি কি যেন জানবার জন্ত আমাকে ফোন করেছিলেন?’

‘আরেকদিন হবে। আপনি এখানে আর কত দিন আছেন?’

‘অন্তত দেড় মাস। কয়েকদিনের জন্ত ডাসলডর্ফ যাবো, সেই যে বন্ধু পাউলকে ট্রান্সকল করেছিলুম, তার ওখানে! আপনিও চলুন না।’

বললেন, ‘মন্দ নয়; পরে দেখা যাবে।’

ইতিমধ্যে আইমা একটা বরফে ভর্তি অত্যাশ্চর্য রূপালি বালতিতে করে এক বোতল শ্যাম্পেন আর এক বোতল মোজেল নিয়ে এসেছেন।

আমি বললুম ‘সর্বনাশ!’ আইমা কি যেন একটা বললেন। শুধু ‘মাটিল্ডে’ শব্দটি বৃকতে পারলুম। তাহলে এর ক্রিস্টান নাম ঐ।

তিনি বললেন, ‘হোথ্ ডয়েচ্-স্—হাই জার্মান—ব্যানেন্ আউসগ্রাথে দিয়ে উচ্চারণ করার ফ্যাশান আইমার কুমারী বয়সে চালু হয় নি বলে আমরা এখনো আলজাসের ডায়লেক্ট বলি। আর বোতলগুলো যদিও অত পুরনো নয়, তবু আমার পিতার আমলের। শ্যাম্পেন নাকি পুরনো হলে খারাপ হয়ে যায়। ভালো না লাগলে মোজেলটা খাবেন।’

আমি নিজেকে থাই আর না-ই থাই, এর মনে যদি একটু রঙ লাগে তবে আমি খুশী।

শুধালুম, ‘আপনি কি এখনো ভারতীয় শাস্ত্রের চর্চা রেখেছেন? আপনার বিশেষ ইণ্টারেস্ট কিসে?’

‘বিষয়টা কঠিন নয়। আপনি নিশ্চয় লক্ষ্য করেছেন, বৈদিক যুগে জ্ঞী-পুরুষের সমান অধিকার ছিল। এমন কি হোমবজ্জেও জ্ঞী-পুরুষে সমান অধিকার—’

আমি বাধা দিয়ে বললুম, ‘ইণ্ডলজি আমার সাবজেক্ট নয়। আপনি সবিস্তার না বললে মোষের সামনে বীণা বাজানোর মত হবে।’

তিনি বললেন, ‘সে কি, আপনি তো ইণ্ডিয়ান!’

আমি বললুম, ‘আপনাদের ইহুদিদের মত আমারও লয়েলটি দ্বি-ধা। আমাকে আমার পারিবারিক মুসলিম ঐতিহ্যের সঙ্গে বোগ রাখতে হয় আর যে দেশে পুরুষাভুত্বকে আছি তার অতীত গৌরবেও আমার হিস্তে আছে। তবে আমাদের দেশের মেজরিটি আপনাদের নাৎসিদের মত নয়। আমাদের মুসলমান

কবি কাজীকে হিন্দু। মাথায় তুলে নাচে, আর সেদিন নাৎসিদের একথানা বইয়ে পড়ছিলাম, ইহুদি হাইনে সবকে বলেছে, “১৯৩৩ খৃষ্টাব্দ থেকে অপরিচিত।” উচ্চাঙ্গের বসিকতা বলতে হবে। যে লোককে ১৮১৭।২০ থেকে তাবৎ জর্মনি ও পরবর্তী যুগের রসগ্রাহী বিশ্বজন চেনে তিনি ১৯৩৩ খৃষ্টাব্দে হঠাৎ ‘অপরিচিত’ হয়ে গেলেন, যেদিন হিটলার চ্যান্সেলর হলেন।’

তারপর তাড়াতাড়ি বললুম, ‘কিন্তু এসব থাক। আপনার কথা বলুন।’

‘বৈদিক যুগে স্ত্রী-পুরুষের সমান অধিকার। স্মার্ত যুগেই সেটা কমতে আরম্ভ করলো। করে করে শেষ পর্যন্ত সতীদাহ পর্যন্ত।’

তারপর তিনি যে রকম সবিস্তর ধাপে ধাপে নামতে লাগলেন তার সঙ্গে পাল্লা দেওয়া আমার পক্ষে অসম্ভব হয়ে দাঁড়ালো। স্মৃতির আমি জানি সামান্যই—কজন হিন্দুই জানে, স্মার্ত পণ্ডিত ভিন্ন? মহাদি যে-সব শাস্ত্রকারদের নাম তিনি বললেন, তার বারো আনাই আমার অজানা। এবং যেটা আমার সবচেয়ে আশ্চর্য লাগলো সেটা এই যে, সর্বদাই তিনি চেষ্টা করছিলেন প্রত্যেক বিধানের পিছনে কি অর্থনৈতিক কারণ থাকতে পারে সেটা খুঁজে বার করার। অন্ততম মূল স্মৃতিস্বরূপ তিনি গোড়াতেই বলেছিলেন, ‘কার্ল মার্কস বলেছেন, “যুগান্তকারী সামাজিক বিবর্তনের পিছনে রয়েছে অর্থনৈতিক কারণ”—কিন্তু সেটা আমি একমাত্র কারণ বলে স্বীকার করি নে; সার্টেনলি, যদিও সেটা দি মোল্ট্‌ ইমপোর্টেন্ট কারণ।’ এই স্মৃতি তিনি বার বার অতি স্কোশলে প্রয়োগ করছিলেন।

সে রাত্রে তিনি যা বলেছিলেন তার সিকিভাগ লিখতে গেলে আমাকে একথানা পূর্ণাঙ্গ থীসিস বানাতে হয়।

শেষ করলেন এই বলে, ‘গুনেছি, আপনাদের মডার্ণ মেয়েরা এখন নাকি তাদের সর্ব পরাধীনতা, দ্রববস্থার জগৎ স্মৃতিকারদের—অর্থাৎ পুরুষদের দোষ দেয়। কিন্তু সম্পূর্ণ দোষ ওঁদের নয়। মেয়েদেরও আছে। সে-কথা আরেকদিন হবে। আইমা নোটিশ দিয়েছেন।’

ইতিমধ্যে আমি একটি গেলাস চেয়ে নিয়ে সেইটে মোজোলে ভরে আইমার জগৎ রান্নাঘরে নিয়ে যেতে বুড়ী প্রাচীন দিনের পদ্ধতিতে দাঁড়িয়ে উঠে ছ’হাতে ছ’দিকের স্কাট সামান্য তুলে কার্টিস করলেন। বললেন, ‘না বাছা, অতখানি না।’ বসার ঘরে এসে মাটিলুডের গেলাসে প্রায় সবখানি ঢেলে দিয়ে ‘স্বাস্থ্য পান’ করলেন।

আমি মাটিলুডেকে বললুম, ‘আপনি না বলছিলেন, আপনি নিঃস্বরটিক? কিন্তু এতক্ষণ ধরে আপনি যে শাস্ত্র-চর্চা করলেন তার প্রত্যেকটি সিদ্ধান্ত তো যুক্তিসঙ্গত প্রতিজ্ঞা, প্রত্যক্ষ ও স্মার্তসঙ্গত অহমানের দৃঢ়ভূমির উপর নির্মাণ

করলেন। এমন কি নিগরসিলের পুনরাবৃত্তি প্রায়দ থেকেও আপনার ধারাবাহিক প্রামাণ্যবিশ্বাস সম্পূর্ণ মুক্ত।’

মাটিল্ডে ম্যান হাসি হেসে বললেন, ‘নিগরসিস, অহুভূতির রোগ। তার হুংভূমি আমাদের হুংপিণ্ডে, স্থতিশাস্ত্র মস্তিষ্ক রাজ্যের নাগরিক।’

তারপর ভেবে বললেন, ‘সেখানেও যে হুংপিণ্ডের নিপীড়ন একেবারে পৌছয় না তা নয়। সেখানেও কিছুটা ‘ইদে ফিক্স’ এসে গিয়ে মস্তিষ্কে নতুন কিছু করতে দেয় না। অর্থাৎ আমি সেই “স্থতিশাস্ত্রে স্ত্রীজাতি” থেকে বেরিয়ে গিয়ে কোনো নতুন কিছুর সন্ধানে লাগতে পারি নে। এই বিষয়ে অত্যন্ত কাঁচা বই বেরলেও, ওটাতে যে কোন তথ্য নেই জেনে শুনেও সেইটেই পড়ি। দেখি তার বক্তব্য কোথায় কোথায় আমার সিদ্ধান্তের সঙ্গে ক্লিক করছে, আর কোথায় কোথায় করছে না। এতে করে কোন্ নবীন জ্ঞান সঞ্চয় হয়, কোন্ চরম মোক্ষপ্রাপ্তি!—আর ওদিকে পড়ে রইল জ্ঞান-বিজ্ঞান-ভুবনের নবাবিস্কৃত থনির নব নব মণি-ভাণ্ডার—অবহেলা অনাদরে। ঠাকুরমাকে এনে দিলুম বড়দিনের নতুন স্কার্ট, জ্যাকেট, বনেট, জুতো। ঠাকুরমা মুখ গুঁজে রইলেন তাঁর স্ত্রী-ধনের সারাদটোগা সিন্দকের ভিতর! সেনিলিটি, ভীষ্মরতি, ইদে ফিক্স!

চলুন—আইমার প্রতি স্থবিচার করতে। এমনিতেই না, সেখানে অতি অবশ্য এসব কথা তুলবেন না।’

আইমার কায়ার বর্ণনা দেব না। স্থশীল পাঠক, তোমার আশী বছরের পাকা-পাটিকা ঠাকুরমা যদি থাকেন তবে তুমি অনায়াসে বুঝে যাবে, এঁরা মিন-নোটিশে, দ্বিপ্রহর রাত্রেও কী ভাষ্যমতীর ভোজবাজি দেখাতে পারেন।

এখানে ‘ভোজ’ আমি ভোজন অর্থেই নিচ্ছি। বিক্রমাদিত্য-মহিষীর ইন্দ্রজালও অবশ্য তাতে রয়েছে। আর আমাদের জনপদ কাহিনীতেও আছে, ভোজরাজহুহিতা কালিদাসকে ভোজ দিয়ে পরিতুষ্ট করতেন।

যে মাসে রাত একটায় রাইনল্যাণ্ডেও বেশ শীত পড়ে। বেরুবার সময় মাটিল্ডে জোর করে আমার স্কন্ধে তাঁর হালকা ম্যানটুলটি চাপিয়ে দিয়েছিলেন।

বার্‌বা রস্‌সার কথা যে আমার মনে ছিল না তা নয়। কিন্তু আমার হোটেল কাছেই।

ভেতুসর্বকন্ডেক-এ নেমেই সামনে পড়ে কাসলের বোটানিক্যাল গার্ডেনের চক্রাকার পরিখা। রেলিং ধরে দাঁড়িয়ে দেখি অসংখ্য কুমুদিনী সৌরভজাল বিস্তার করেছে। চতুর্দিক নিবন্ধুম নীরব। আমাদের গ্রামাঞ্চলের চেয়েও নীরব—কারণ সেখানে বেগুনাবিশ কুহুর, বনের শেয়াল, দস্তী মোরগা—কেউ না

কেউ নিস্তরতা ভাঙবেই। দূরে কাইজার গ্লাংসে দু-চারখানা মোটরের আনাগোনা আছে নিশ্চয়ই, কিন্তু এরা নিরীহ নিদ্রালু ঘুম ভাঙানোর জন্যই যে মোটরে হর্ন থাকে সেটা এখনো জানতে পারে নি।

বুকের ভিতরটা কি রকম মূচড়ে মূচড়ে উঠছে। আমি কবি নই, আর্টিস্ট নই—আমার হৃদয় স্পর্শকাতর নয়, কিন্তু অকালে বিনাদোষে হতবোবনা, কিংবা আমার ছোট বোনের সখী তরুণী মাধুরীর ধানকাপড়, কিংবা রবীন্দ্রনাথের বিধবা মল্লিকা একমাত্র রুগ্ন সন্তানকে জলে বিসর্জন দিয়ে মকর-বাহিনীর কাছ থেকে লক্ষস্বাস্থ্য সন্তানকে ফিরে পাবার আশায় কঙ্কণ-বলয়হীন হাত দুখানি বাড়িয়ে যখন দেখে—দেখে সব মিথ্যা, সব বঞ্চনা—এসব দেখলে কিংবা কবি দেখালে আমার মত মূঢ় জড়ভরতও চট করে দৈনন্দিন জীবনে ফিরে যেতে পারে না।

আমি কি ভালোবাসি নি?—আমার মত অপদার্থ ক্ষণতরে ভালোবাসা পেয়েও ছিল—পথের ভুলে অপদার্থের প্রাণের কূলে বসন্তপবন হঠাৎ কখন এসে যায়, আর ষাবার সময় ছেড়ে যায় তার অঞ্চল থেকে গ্রীষ্মের খরতাপ, রৌদ্রদাহ, তৃষ্ণাবাণ। ইচ্ছা করেই। কিন্তু সে কথা থাক। খুঁটের বদনাম ছিল, তিনি মৃগপ, তিনি নর্তকীকে সাহচর্য দেন। তিনি সব দেখেই বলেছিলেন, ‘কাউকে বিচার করতে যেয়ো না।’ পয়গম্বর বলেছেন, ‘তোমার সবচেয়ে বড় দুশমন তোমার দুই কাঁধের মাঝখানে’—অর্থাৎ তুমি নিজে। তবে কে তোমার প্রতি অবিচার করেছে সে অহুসন্ধানে আপন জানু পানি করো কেন?

এঁর ভিতরকার জলন্ত বহির্শিখা এঁর মুখ আর হাত দুখানিই পুড়িয়ে ফেলল কেন? ঐ দুটিই মানুষের ভিতরকার মানুষকে প্রকাশ দেয়—স্বথ-দ্ব্যর্থ, আশা-নৈরাশ্র, তার জন্ম-মৃত্যু। বিশেষ করে মানুষের হাত দুখানি প্রকাশ করে তার পরিবারের ঐতিহ্যগত স্পর্শকাতরতা, চিন্তাশীলতা কিংবা সে দুটি রসে রসে ভরা। মূঢ় জনের হাত দুখানি কচ্ছপের খোলার মত।

ইনি কি জানতেন, যখন তাঁর বন্ধুর থীসিস তিনি টাইপ করে দিচ্ছিলেন যে, প্রত্যেকটি হরপে ঠোকা দেবার সঙ্গে সঙ্গে তিনি তাঁর আপন কফিন-বাক্সের ডালায় স্বহস্তে একটি একটি পেরেক পুঁতছেন?

স্বামী-সোহাগিনী কালোটা পাগলিনীর মত ছুটে এলেন সম্রাট তৃতীয় নেপোলিয়নের কাছে প্যারিসে, তারপর গেলেন তাঁর ভাণ্ডার প্রবল প্রতাপাধিত অষ্ট্রিয়া-হাঙ্গেরীর সম্রাটের কাছে—পায়ে পড়লেন তাঁদের, ‘তোমরাই আমার স্বামীকে পাঠিয়েছিলে মেকসিকোর সম্রাট করে। আমাকে সামান্য একমুঠো সৈন্য

দাও। আমি তাঁকে বাচাতে পারবো।’

ওদিকে স্বামী মাকসিমীলিয়ান গ্রহর গুনছেন কার্লোটার প্রত্যাবর্তন কিংবা অবধারিত মৃত্যুর জ্ঞাত। দ্বিতীয়টাই হল। থোয়ারেসের আদেশে তাঁকে দাঁড়াতে হল বন্দুকধারী সৈন্যদের সামনে। এমপেরর মাকসিমীলিয়ান ক্ষাত্রধর্মের শেষ আভিজাত্যের প্রতীক—মৃত্যুবেদীতে দাঁড়াবার পূর্বে বন্দুকধারীদের প্রত্যেককে তিনি একটি একটি করে সোনার মোহর দিলেন।

সব খবর কার্লোটা পেলেন, প্যারিস ভিয়েনায় ছুটোছুটির মাঝখানে। তাঁর মাথার ভিতর কি যেন একটা ঘটে গেল। তাঁর চোখে দেখা দিল এক অদ্ভুত ছাতি যার দিকে কেউই তাকাতে পারতো না। পারলে তাঁর সম্মুখ থেকে পালাত।

তারপর দীর্ঘ ষাট বৎসর ধরে তিনি কথা বলতেন ওপারের লোকের সঙ্গে। আর বার বার ফিরে আসতেন ঐ এক কথায় : তাঁর স্বামীকে বলতেন, ‘মাক্সুল, মাক্সুল, সব দোষ আমারই। আমারই সব দোষ।’

আমি বিমূঢ়ের মত কিছুতেই ভেবে পাই নে মানুষের দোষ কোথায়, তার পাপই বা কি পুণ্যই বা কি ?

কী সদাশিব, শাস্ত্র এই বনু শহর। কিন্তু তাই কি ? চেষ্টনাট গাছের ঘন পাতা থেকে ঝরে পড়ল আমার হাতের উপর এক ফোঁটা হিমিকাক্ষ। কার এ অশ্রু ? আমি জানি প্রথম বিশ্বযুদ্ধের পূর্বে খুব কম মেয়েই বিশ্ববিদ্যালয়ে পড়তে আসতো—আদৌ আসতো কি না জানি নে—তাই ছাত্রেরা প্রণয় জমাতো বনু-বালাদের সঙ্গে। তারপর টার্ম শেষ হতেই অনেকেই চলে যেত ভিন্ন যুনিভার্সিটিতে। তাই এ-প্রেমের নাম সেমেন্টার-লীবে বা এক টার্মের প্রণয়। কারো কারো প্রেম অবশ্য অপেক্ষাকৃত দীর্ঘস্থায়ী হত। কিন্তু শেষ পর্যন্ত সবাই আপন আপন অধ্যয়ন সমাপন করে উড়ে চলে যেত এদিক ওদিক। আর পড়ে রইত বনু-বালাদল তাদের অশ্রুজল নিয়ে।

বনের আপন তরুণ দলও এ পরিস্থিতির সঙ্গে সুপরিচিত।

আমার একটি ঘটনা মনে পড়লো। আমার এক বাঙ্কবীকে রাজিবেলা বাড়ি পৌঁছে দিয়ে ঘরমুখো বওয়ানা হয়ে কয়েক পা এগিয়েছি এমন সময় গুনতে পেলুম বাঙ্কবী একতলার দিকে ডাকছে তার ঘুমন্ত ভাইকে নিচের সদর দরজা খুলে দেবার জ্ঞাত। আমার উল্টো দিক থেকে আমার দিকে এগিয়ে আসছে একটি তরুণ। সে ভেবেছে মেয়েটি বুঝি আমাকে ডাকছে, আর আমি লাড়া না দিয়ে চলে যাচ্ছি। আমাকে পাশ করার সময় মিনতি-ভরা মুহূর্তে বললে,

সৈ (৫২)—২৪

‘এত কঠিন হৃদয় হবেন না, হুজার হার (ইয়াং জেন্টলম্যান)।’

সে রাতে বনের গলিঘুঁচি বেয়ে বেয়ে অনেক ঘোরাঘুরি করেছিলুম। মনটা বড় অশান্ত। ভোরের দিকে হঠাৎ রোঁদের একজন পুলিশ আমার সামনে দাঁড়িয়ে বুটের হিলে হিলে ক্লিক করে সেলুট দিল। আমি বললুম, ‘গুট্‌ন আব্‌ট।’

পুলিস বলল, ‘গুড মর্নিং বলাই কালোপযোগী হবে। ভোর হতে চলেছে।’

তারপর গলা নামিয়ে বললে, ‘এই নিয়ে আপনাকে তিনবার জেপ করলুম। ইস্ট ভাস লোস্? এনিথিং রং?’

এ শহরের পুলিশও দরদী। আমি বললুম, ‘না, অনেক ধন্যবাদ।’

বললে, ‘এ রকম ছন্দের মত একা একা রাতভর ঘোরাঘুরি করে কি লাভ? চলো, ঐ বেঞ্চিটায় বসে আমার সঙ্গে একটা সিগারেট খাবে।’

আমি নিজের প্যাকেট বের করলুম। আমার সিগারেট নিতে খুব সহজে রাজী হল না।

বললে, ‘তুমি ভ্যাগাবণ্ড নও, রাস্তাও হারাও নি, এবং চুরিতে যদি হাতখড়ি হয়ে থাকে তবে সে অতি সম্প্রতি। আমি তোমাকে কিছুটা চিনি। কয়েক বছর আগে যখন এখানে ছাত্র ছিলে তখন আমার বীটেই তোমার বাসা ছিল। তারপর কিছুদিন তোমাকে না দেখতে পেয়ে বুঝলুম আর পাঁচটা ফেংলেন্স টম্যাটোর মত (জার্মনরা কেন টোম্যাটোকে faithless বলে, জানি নে) পাশ করে দেশে চলে গেছে। কিন্তু জানো, তোমাকে সে পর্যায়ে ফেলা যায় না। বিশ্বাস করবে না, তুমিই পয়লা বিদেশী যে পরীক্ষা পাশ করার পর চলে গিয়ে আবার ফিরে এসেছে। কিছু মনে করো না, আমি বড় খোলাখুলি কথা বলি। ই্যা, তোমার সেই প্র্যাটিনাম ব্লু বাস্‌বৌ গেল কোথায়? তোমাদের দু’জনার চুল ছিল এই শহরের দুই এক্সট্রিম। সবাই তাকাতো।’

আমি বললুম, ‘ও! মার্গেনে? সে বিয়ে করে ফ্রিজিয়ান দ্বীপে চলে গেছে।’

‘তাই বুঝি ছন্দের মত—?’

আমি ধীরে ধীরে বললুম, ‘না, আজ একটা মেয়ের জীবনকাহিনী শুনে বড় দুঃখ হল। মন শান্ত হচ্ছিল না।’

বললে, ‘সরি।’

সিগারেট শেষ করে শুপো উঠে আমার মুখোমুখি দাঁড়িয়ে বললে, ‘তোমার পার্সনাল ব্যাপারে আমি চুঁ মারতে চাই নে সে তো স্বভঃসিদ্ধ। তাই শুধু বলি এই বন্ শহরে ক্রাইম এতই কম হয় যে, ছুটের দমন অপেক্ষা শিটের পালন

করতে হয় আমাদের—অর্থাৎ পুলিশের—বেশী। আতের সাহায্য করতে গিয়ে কিন্তু আমি বার বার দেখেছি, সত্যকার সাহায্য করা অতি কঠিন, প্রায় অসম্ভব। জর্মনে একটা কথা আছে : মমতায় ভরা এই যে মায়ের শরীর, যে তার বাচ্চার জন্য প্রাণ দিতে প্রস্তুত, সে কি পারে তার মৃত্যু শিশুকে তার মরণে সাহায্য করতে ? এইটুকু হৃদয়ের বাচ্চাকেও মরতে হয় আপন মরণ। যে অজানা পথে যেতে ত্রিশ বছরের জোয়ানও ভয় পায়, আট বছরের শিশুকেও সেই পথে পা দিতে হয়।

কে কার সাহায্য করতে পারে ?

পারেন শুধু মা মেরি।

আবার দেখা হবে, যুদ্ধের হার, শুধু শুধু মন খারাপ না করে হোটলে গিয়ে শুয়ে পড়ো। আর দরকার হলে পুলিশের পুংসির খবর নিয়ো।’

বড় হুশিয়ার পড়লুম। আমার ছাত্রজীবনের ল্যাণ্ড-লেডি এখন থাকেন ব্যুকেবুর্গ নামক ছোট্ট শহরে। তার পাশে একটা গ্যারিসন। তিনি এসেছিলেন বলে, এবং আমার খবর জানতেন বলে আমাকে ফোন করলেন, বললেন জরুরী খবর আছে। তাঁকে লাঞ্চে নিমন্ত্রণ করলুম তাঁর প্রিয় ‘আম্ রাইন’ রেস্টোরাঁয়। সেখানে গিয়ে দেখি, তিনি রাস্তায় দাঁড়িয়ে আছেন। আমার বিষয় প্রকাশ করার পূর্বেই তিনি বললেন, ‘নাৎসিদের গোয়েন্দাগিরি চরমে পৌঁছেছে। এঁদের অনেকেই দূর থেকে শুদ্ধমাত্র ঠোঁটের নড়া থেকে কথা বুঝে নিতে পারে। তাই বাইরেই জরুরী গোপন কথাটা সেরে নি।

‘খবরের কাগজে নামগন্ধ নেই, লার্ক-হুক জানে না, কিন্তু আমরা গ্যারিসনের কাছে থাকি, আমাদের কাছে ট্রুপ মুভমেন্ট লুকানো অসম্ভব। পরশ রাতে প্রায় পঁচিশ হাজার সৈন্য গেছে চেক্-স্লড্ এটেন্ সীমান্তে। লড়াই যদি আচমকা লেগে যায়, তবে আপনি ইণ্ডিয়ান, অতএব ব্রিটিশ, অতএব শত্রু। নজরবন্দী হয়ে থাকবেন। দেশ থেকে টাকা আসবে না। দুঃস্বস্তার চরম। প্রথম বিশ্বযুদ্ধে তাই দেখেছি।’

তাঁর সহপাঠ্য—না বললেও আমি বুঝলুম—ইংরেজ লড়াই হারলে যে তার নিজস্ব আবিষ্কার করা ভাষায় বলে ‘বাহাদুরিকে সাথ হটনা’ (‘বীরস্বের সঙ্গে পলায়ন!’—শোলার পাথর বাটি, ডুববেও ভাসবেও) সেইটি আমার অবলম্বন করা।

বললুম, ‘চলুন, ভিতরে গিয়ে খেতে খেতে চিন্তা করি।’

এ-রেন্ডোরার সঙ্গে ল্যাণ্ড-লেডির নিদেন চল্লিশ বছরের পরিচয়। মালিক, ওয়েস্ট্রেস, সবাই উদ্ধাহ হয়ে তাঁকে অভিনন্দন জানালো।

হঠাৎ যদি এখন আমাকে জর্মনি ত্যাগ করতে হয়, তবে তার পূর্বে মাটিল্ডেকে তাঁর শেষ প্রাণ শুধোবার একটা সুযোগ দিতে হয়।

টেলিফোনে তাঁকে লাঞ্ছের নিমন্ত্রণ জানালুম আর টাপে-টোপে বোঝালুম, আমার বিশেষ প্রয়োজন।

কিরে আসতে ফ্রাউ এশ্ ফিস ফিস করে বললেন, ‘কাউন্টারের পিছনে ঐ ওয়েস্ট্রেসটিকে লক্ষ্য করুন। বোকারী পড়েছিল এক পিচেশের পাল্লায়। একটা গরীব ডাক্তারীর ছাত্র করে ওর সঙ্গে প্রণয়। মেয়েটি পুরো ছ’ বছর ওর থরচা যোগায়। কথা ছিল শেষ পরীক্ষার পর সে তাকে বিয়ে করবে। পরীক্ষা পাসের তিন দিন পরে বদমাইশটা এক খানদানী, ধনী মেডিকেল স্টুডেন্টকে নিয়ে পালিয়ে গিয়ে তাকে বিয়ে করেছে।’

মেজাজটা তেতো হয়ে গেল। আমি যে-সব ঘটনা শুনতে চাই নে সেগুলিই যেন গেস্টাপো ডালকুস্তার মত আমার পিছনে লেগেছে।

এশ্ বললেন, ‘কিন্তু ধন্নি মেয়ে! রেন্ডোরার এই যে মালিক, সে মেয়েটাকে বড় স্নেহ করে। সে তো রেগে তার উকিল ভাইকে ফোন করে বললে, “লাগাও দু-দুটো মোকদ্দমা—একটা ফৌজদারী, একটা দেওয়ানী। ব্যাটাকে আমি জেলে পচাবো, আর ব্যাটার ডাক্তারি লাইসেন্স দিয়ে টয়লেট পেপার বানাবো।” কিন্তু ঐ যে বললুম, ধন্নি মেয়ে, কিছুতেই রাজী হল না কড়ে আঙুলটি পর্যন্ত তুলতে। কী আকাট, কী আকাট মেয়েগুলো!’

আমি কিছু না বলে বিরাট এক পীস কাঁচের দেওয়ালের ভিতর দিয়ে মাটিল্ডের জগৎ পথ চেয়ে রইলুম। দেখা পাওয়া মাত্র বাইরে গিয়ে তাকে সব কথা বললুম।

মাটিল্ডে কিছুমাত্র আশ্চর্য না হয়ে বললেন, ‘আমি অনেক কিছু আজ সকাল বেলা একসঙ্গে গিয়েই জানতে পেরেছি। আমরা সব-কিছুই জানতে পাই। এমন কি, বার্লিনস্থ ফ্রান্সের রাজদূত মসিয়ো ফ্রাঁসোয়া পঁসে পর্যন্ত কিঞ্চিৎ বিচলিত হয়েছেন।

আমাকে একটু ভাবতে সময় দিন।’

খাওয়ার পর হোফ্ গার্ডেনে বেড়াতে বেড়াতে স্থির হল, কাল সকালের গাড়িতে আমি প্যারিস চলে যাব। ফাঁড়াটা কেটে গেলে আমি ফের বন্ চলে আসবো। নইলে—সে তখন দেখা যাবে।

ফ্রাউ এশকে আমরা ম্যানসটার গির্জা অবধি পৌঁছে দিলুম। আচার-নিষ্ঠা রমণী পথে আমার মঙ্গলের জন্ত একটা বাড়তি মোমবাতি কিনলেন—মা-মেরির পদপ্রান্তে জ্বালাবেন বলে।

মাটিল্ডেকে একস্কেজে পৌঁছে দিয়ে বললুম, 'আপনার সঙ্গে ডিনার খাবো। ক'টায় আসবো?'

'পাঁচটার পরে যে-কোনো সময়।'

হিটলারের উপর পিত্তিটা চটে গেল। একটা নিরীহ বঙ্গসন্তানকে তার ছুটিটা আয়ামসে কাটাতে দেয় না। কিন্তু গোস্‌মাটা অবিমিশ্র নয়। একটা অস্ট্রিয়ান ভ্যাগাবণ্ড, যুদ্ধে ছিল মাত্র করপরেল, সে কিনা আমাদের হুশমন মহামান্ন ইংলণ্ডের—যাঁর রাজ্যে স্বর্ঘ্য অন্ত যায় না, (অবশ্য ফরাসীরা বলে, 'ইংরেজকে ভারতীয়দের সঙ্গে অঙ্ককারে ছেড়ে দিতে স্বয়ং "বঁ দিয়ো"—করণাময় সৃষ্টিকর্তাও—সাহস পান না')—এবং তাঁর স্বব্ কনজারভেটিভ গুটিকে প্রায় চার বছর ধরে তুর্কী নাচন নাচাচ্ছে, এ-স্বসমাচারটি কানে এলেই মনে হয়, ইটিকে লিপিবদ্ধ করার জন্ত নয়া নয়া মথি মার্কের প্রয়োজন!

অপর্যাহের এই মধুর আলোতে কার না শরীর অলস আবেশে ভরে যায়। কাইজার প্রাণের ফোয়ারার উপর ক্ষণে ক্ষণে রামধনু লাগছে। পাশে, সেই ১৯৩০ থেকে পরিচয়ের বুডো উইলি দিশী-বিদেশী থবরের কাগজ বেচছে। জার্মান কায়দায় সে 'দি টাইমস'-কে 'টে টিমেস' উচ্চারণ করতো বলে আমরা কোতুক অমুভব করতুম। কাছে এসে কানে কানে বললে, 'সব বিদেশী কাগজ বাজেয়াপ্ত। একটা বাজে কাগজ কি করে এসে গেছে, সঙ্কলের দৃষ্টি এড়িয়ে। আমার মেয়ে পড়ে বললো, প্যারিস লগুনে ধুন্দুমার।' বলে পুট করে আমার পকেটে ঢুকিয়ে দিল কাগজখানা।

নাঃ! এখন পড়ে কি হবে? তার চেয়ে তাকিয়ে থাকবো চেসনাট সারির দিকে, নাকে আসবে বোটানিকসের সুগন্ধ, কানে আসবে পপেলসডফের অভিনিউর কান্ডাবান্সাদের খেলাধুলার শব্দ, কিংবা কারো খোলা জানালা দিয়ে পিয়ানো প্রাকটিস। কিংবা—

পা দুটো লম্বা করে একটা বেঞ্চিতে হেলান দিয়ে দিব্যি ঘুমিয়ে নিয়েছি।

সামনে মাটিল্ডে। অফিস থেকে বাড়ি আসা-যাওয়ার পথ তাঁর এইটেই। বললেন, 'কি স্বপ্ন দেখছিলেন?'

আমি বললুম, 'সেই যে চীনা দার্শনিক বলেছিলেন, "স্বপ্নে দেখলুম আমি

প্রজ্ঞাপতি হয়ে উড়ে বেড়াচ্ছি। জেগে উঠে চিন্তায় পড়লুম, এই যে আমি ভাবছি আমি মানুষ, সে কি তবে প্রজ্ঞাপতির স্বপ্ন? প্রজ্ঞাপতি স্বপ্ন দেখছে, সে মানুষ হয়ে সোনালী রোদে রূপালি বর্নার কাছে বসে চা খাচ্ছে।”

মাটিল্ডে বললেন, ‘স্বপ্নে যদি কিছু একটা হবেই, তবে প্রজ্ঞাপতিটা লক্ষীছাড়া মানুষ হতে যাবে কেন? বরঞ্চ রূপালি বর্ণা হলেই পারে। কত না পাহাড়, কত না সবুজ মাঠ, কত না পাইন বন পেরিয়ে সে হবে প্রশস্ত নদী, তার বুকের উপর দিয়ে ভেসে যাবে নলরাজের রাজহংস, ভরা পালে উড়ে যাবে ময়ূরপঙ্খী, তার বুকে কখনো উঠবে ঝড়ঝঞ্ঝা, কখনো প্রতিবিম্বিত হবে পূর্ণ চন্দ্র। সর্বশেষে সে পাবে তার চরম মোক্ষ পরমা শান্তি-সমুদ্রের সঙ্গে আপন সত্তা মিলিয়ে দিয়ে।’

আমি বললুম, ‘অস্তুত মানুষ এই স্বপ্নই দেখেছে: “নির্ব্বারের স্বপ্নভঙ্গ” — আসলে সেটা কবি রবীন্দ্রনাথের স্বপ্ন।’

‘উত্তর মেঘ ও যক্ষের স্বপ্ন।’

কিছু উত্তর না দিয়ে মনে মনে বললুম, ‘হায় সৃষ্টিকর্তা, প্রেমের ঠাকুর! কোথায় না এ-রমণী এ-সব কথা বলবে তার দয়িতের সঙ্গে, আর কোথায় সে এ-সব বলছে আমার মত কলাগাছকে। ওমর খৈয়াম তাই পৃথিবীর উপর থুথু ফেলতে চেয়েছিলেন।’

মাটিল্ডে কি খবর জানতে চান, সেটা আমি মোটামুটি অঙ্কমান করতে পেরেছি, কিন্তু হায়, আমি তো তাঁকে এমন কিছু বলতে পারবো না, যা শুনে তাঁর বেদনাতার লাঘব হবে। তাই তিনি সেটা না শুধালেই আমি শান্তি পাই। কিন্তু আমি যদি তাঁকে শুধোবার সুযোগ না দি, তবে কি সেটা আমার পক্ষে অসম্ভব হবে না? কাল যাচ্ছি প্যারিস। যদি সত্যি লড়াই লেগে যায়, তবে আমাদের দুজনাতে পুনরায় দেখা-সাক্ষাৎ হওয়ার সম্ভাবনা হৃদয়পরাহত।

যা হয় হবে, আমিই তাঁকে সে সুযোগ দেব।

ব্যালকনিতে লম্বমান হয়েছি দু’খানা ডেক্ চেয়ারে। বললুম, ‘দুজন্যর ভালোবাসা যদি কোনো কমন ইনটারেস্টের চতুর্দিকে গড়ে ওঠে, তবে সেটা হয় বড় প্রাণবন্ত, মধুর ও দীর্ঘস্থায়ী। ব্রাউনিং আর মিসেস ব্রাউনিং দুজনা একে অন্নের মধ্যে মিশে যেতেন কবিতায় কবিতায়। এমন কি, শুদ্ধ বিজ্ঞানও দুজন মানুষকে একই রসের বস্তায় ভাসিয়ে নিয়ে যেতে পারে। আপনার কথা যখনই ভাবি, তখনই মনে পড়ে প্রফেসর ও মাদাম ক্যুরির কথা।’

অনেকক্ষণ চুপ করে থাকার পর তিনি বললেন, ‘আপনার এ-কথাটি কালিদাসও বলে গেছেন। “গৃহিণী, সচিব ইত্যাদি”—অতথানি আশা আমি

কখনো করি নি। এবং আমি আমাদের প্রণয়ের প্রথম দিন থেকেই জানতুম, ডিগ্রী পাওয়ার পরই তিনি চলে যাবেন আপন দেশে—না, দাঁড়ান, জানলুম কিছুদিন পরে। সংস্কৃত পড়বার সময় তিনি মহাভারত থেকেও কিছুটা বেছে নেন। তাতে ছিল কচ ও দেবযানীর উপাখ্যান। আপনি ভাববেন না, তিনি কোনো উদ্দেশ্য নিয়ে ঐ উপাখ্যানটিই আমার জন্য বেছে নিয়েছিলেন। তা হলে হয়তো তাঁর প্রতি অবিচার করা হবে। কিন্তু কি জানি, কে জানে—’

হঠাৎ যেন দিশে পেয়ে বললেন, ‘দেখুন, কাল আপনাকে যে-কথাটা বলে-ছিলুম, সেটা আবার, আরো জোর দিয়ে বালি, আমি নিওরটিক, আমার মন যখন কোনো সিদ্ধান্তে পৌঁছয়, তখন মনে হয়, সেইটেই ঠিক। আবার পরে দেখি, সেটা সম্পূর্ণ মিথ্যা।’

হঠাৎ হাত দিয়ে মুখ ঢেকে বিকৃত কণ্ঠে বললেন, ‘শুধু এই দশ বছরের যজ্ঞা মিথ্যা নয়।’

ক্ষীণ চন্দ্রালোকে দেখি, হু-হাতের ফাঁক দিয়ে বয়ে বেরুচ্ছে চোখের জল। কত বৎসরের চাপা কান্না, কে জানে? এর পূর্বেও তিনি তাঁর বেদনার উল্লেখ করেছেন, কিন্তু চোখ দুটি ছলছল করতেও দেখি নি। আর এ যে-ধারা নেমে এসেছে, এ তো কোনো পরিণত বয়স্ক রমণীর কান্না নয়, এ যে অবুঝ শিশুর কান্নার মত। ইনি যখন শাস্ত্রালোচনা করেন তখন মনে হয়, ইনি আমার পিতার বয়সী, দৈনন্দিন আচরণে মনে হয়, ইনি আমার বড়দিদির বয়সী। আর এখন? এখন দেখি তিনি কাঁদছেন আমাদের পরিবারের সবচেয়ে ছোট, আমার অভিমানিনী ছোট বোনের মত। সে কোনো যুক্তি-তর্ক শোনে না, কোনো সাধনা মানে না। যেন সে এই বিশ্ব-সংসারে একেবারে একা—তার সঙ্গী শুধু তার চোখের জল।

কি আছে বলার, কি যায় লেখা?

কিন্তু তাঁর আত্মসংযম অসাধারণ। বছরের পর বছর চোখের জল চেপে রাখার ফলে শুকিয়ে গেছে তাঁর মুখ আর হাত হুঁথানা। আমার দৃঢ়বিশ্বাস, তাঁর জীবনে এই তাঁর প্রথম ভেঙে পড়া।

তাঁর কান্নার ভিতর দিয়ে তিনি শুধু একটি অল্পযোগ প্রকাশ করেছিলেন। ডিগ্রী লাভের কয়েক দিন পরই তাঁর বন্ধু দেশে ফিরে যান। বন্ স্টেশনে তিনি তাঁকে বিদায় দেন।

তারপর তাঁর কাছ থেকে একখানা চিঠি না, একখানা পোস্টকার্ড না, একটি ছত্র মাত্র না। নববর্ষে, জন্মদিনেও না। সেই যে বন্ স্টেশন থেকে তিনি

বিলীন হলেন, তারপর তিনি বেঁচে আছেন কি না, সে কথাও মাটিলুডে জানান না। মাটিলুডে তাঁকে দু'খানা চিঠি লিখেছিলেন।

আমি জানতুম, এইবারে আমার অগ্নি-পরীক্ষা আসবে, কিন্তু পূর্বেই বলেছি, আমি স্থির করেছিলুম, আমি প্যারিস পালিয়ে গিয়ে সেটা এড়াবো না।

এপার ওপার—যে পারই হোক, হয়ে যাক।

যে-প্রশ্ন তিনি বার বার শুধোতে গিয়ে আশা-আকাঙ্ক্ষার স্বন্দে শুধোতে পারেন নি, আমি নিজের থেকেই তার উত্তর দিলুম।

ধীরে ধীরে বললুম, 'আমি ডাঃ কাণেকে চিনি। চিনি বললে ভুল বলা হবে। সামাজিক অস্থিঠানে লৌকিকতার দু-চারটি কথা হয়েছে মাত্র।'

এবারে আমারও কড়া একটা কিছু খাওয়ার প্রয়োজন হয়েছে। তারই ছল করে ঘরের ভিতরে চলে গেলুম। ইনি এটা সয়ে নিন।

ফিরে এলে মাটিলুডে শুধোলেন, 'বরোদা তো ছোট শহর; উনি নিশ্চয়ই জানেন, আপনিও বনের ছাত্র ছিলেন। সে নিয়ে কোনো কথাবার্তা হয় নি?'

'না, আমি চেষ্টা করেছিলুম, কিন্তু উনি কোনো কোঁতুহলই দেখালেন না। তবে আপনি নিশ্চয় জানেন, উনি কথা বলেন অত্যন্ত কম।'

মাটিলুডে এক ঝটকায় খাড়া হয়ে বসলেন। প্রথমটায় বিশ্বাসে যেন বাক্য-হার। 'কি বললেন আপনি! পাণ্ডুরঙ কথা বলেন কম! আমার সঙ্গে তো অনর্গল কথা বলতেন!'

মনে পড়ল আমার বন্ধু মোহর্যাব ওয়াভিয়ার মস্তব্য। পাণ্ডুরঙ শব্দর কাণে সম্বন্ধে। বললুম, 'যখন দেখলুম তাঁর কোঁতুহল অত্যন্ত কম, তখন আমিও তাঁর সম্বন্ধে কোনো খবর নিই নি। তৎসঙ্গেও তাঁর কথা উঠলে আমার এক বন্ধু বলেছিলেন, আপন জনের মাঝখানে—ঐ যে আপনি বললেন—উনি অনর্গল কথা বলেন।'

মনে হল, মাটিলুডে যেন খানিকটা সাঙ্ঘনা পেলেন। তাতে আশ্চর্য হবার কি? কবি রুমৌর দিকে তাঁর গুরু রাস্তায় তাঁকে ক্রশ করার সময় একবার মাত্র একটুখানি স্মিতহাস্য করেছিলেন। সেইটুকুর অহুপ্রেরণায়ই তিনি রচলেন তাঁর মহাকাব্য।

এইবারে আমার শেষ বক্তব্যটুকু বলার সময় এসেছে।

আমি বললুম, 'মাটিলুডে, ডাঃ কাণের কি করা উচিত ছিল না-ছিল সে জানেন বিধি। হয়তো আপনাকে ষাবার পূর্বে সব-কিছু বুঝিয়ে দিয়ে গেলে ভালো হত, হয়তো না করে ভালোই করেছেন। আপনি যদি নিগরটিকই হয়ে গিয়ে থাকেন

—আমার কিন্তু বিশ্বাস হয় না—তা হলে উনি ঘাই করতেন না কেন, আপনি ভাবতেন, তার উন্টোটা করলেই ভালো হত।

কিন্তু সেটা আসল কথা নয়। আসল কথা এই : কাণে বরোদার রাজ-প্রাসাদের গোপন-বিভাগে কাজ করেন। সেখানকার আইন অনেকটা ফরেন অফিসের মত। জানেন তো, বিদেশিনীকে বিয়ে করাও ওদের মানা। কোনো কোনো ক্ষেত্রে সে-অনুমতিও তারা দেয়—ওদের সিনিকাল বিশ্বাস, বরঞ্চ মানুষ তার স্ত্রীর কাছ থেকে জিনিস গোপন রাখতে পারে, প্রণয়িনীর কাছ থেকে কিছুতেই নয় ; এই তো সেদিন গ্যোয়েবলসের মত প্রতাপশালী মন্ত্রীও এই ধরনের ব্যাপারে হিটলার কঠোর লালিত হয়েছেন। নেটিভ স্টেট মাত্রই চক্রান্তের চাণক্যালয়—আর রাজপ্রাসাদ! সেখানে পরম্পরবিরোধী একাধিক গোপন বিভাগ একে অত্রের বিরুদ্ধে সর্বক্ষণ চক্রান্ত-কর্মে মত্ত। আপনার সঙ্গে পত্রালাপ ধরা পড়তোই এক দিন না এক দিন, এবং তাঁর শত্রুপক্ষ যে সেটা কিভাবে কাজে লাগাতো তার কল্পনাও আমি করতে পারি নে। কাণেকে বৃহৎ সংসার পুষতে হয়—তিনিই একমাত্র উপার্জনক্ষম।’

দাঁড়িয়ে বললুম, ‘এইবারে উঠি। কাল প্রভাতে প্যারিস গমন। হিটলার আমার সব প্রোগ্রাম তছনছ করে দিয়েছেন। সবাইকে আজ রাতেই চিঠি লিখে জানাতে হবে। তার উপর প্যাকিং রয়েছে।’

মাটিল্ডে যেন চিরকালের মত দাঁড়ালেন। আমার কাঁধের উপর হাত রেখে প্রায়াক্ষরে আমার চোখে চোখ রেখে তাকিয়ে রইলেন। আমার মনে হল, আমি যেন তাঁর চোখে একটুখানি জ্যোতি দেখতে পেয়েছিলুম। সত্য জানেন অন্তর্ধামী।

কিন্তু মিথ্যে বলেছিলুম আমি মাটিল্ডেকে। অন্তর্ধামী যেন ক্ষমা করেন। আমি কাণের সাফাই গাই নি। আমি চেয়েছিলুম, মাটিল্ডের বুকের রক্ত দিয়ে গড়া তাঁর বল্লভ যেন ধূলিতলে লুপ্তিত না হয়। মাটিল্ডের জীবন তারই উপর নির্ভর করছে।

প্যারিসে পৌঁছনো মাত্রই শুনি, চেক সীমান্ত সমস্তার সমাধান হয়ে গিয়েছে। হিটলার সৈন্ত অপসারণ করেছেন। আমি আমার জাহাজের প্রিয়ার অহুসন্ধান বেয়লুম না। কারণ, বনে থাকতেই তাঁর রোদনভরা প্রথম চিঠি পাই, ‘আমি এখানে বাঁচবো কি করে? এ যে বড় হৃদয়হীন জায়গা। তুমি এখানে চলে এসো না, ডার্লিং।’

ভ্যাগিস্ আমি ঘাই নি। দু’ দিন পরে দুসরা চিঠি ‘কাল সহকর্মীদের সঙ্গে

গ্রামাঞ্চলে বেড়াতে গিয়েছিলুম। তেরি ইনটারেসটিং! মনে হচ্ছে, এখানে তিন বছর কাটাতে পারবো।’ সাদা চিঠির কাগজে সাদা কালিতে লেখা প্রিয় আর প্রাঞ্জল বাণীটি বুঝতে আমার লহমা-ভর সময়ও লাগে নি। বস্তুত প্রথম চিঠি থেকেই সেটা আমার বুঝে নেওয়া উচিত ছিল। যে বলে, ‘প্যারিস হৃদয়হীন’, সে নিশ্চয়ই সেখানে পৌঁছনো মাত্রই পড়ি-মরি হয়ে, উদ্যম হিয়া নিয়ে হিয়ার সন্ধানে বেরিয়েছিল। ধৃত্ত আমি, এহেন উদারহৃদয়্যার সঙ্গে আমার হাদিক পরিচয় হয়েছিল। ইনি কাণে গোজের নন; নিঃশব্দে, নীরবে মহাশূঙ্খে লীন হন না। প্যারিস ধৃত্ত। মার্কিন প্রবাদ আছে, পুণ্যশীল মার্কিন মাত্রই মৃত্যুর পর জন্ম নেয় প্যারিসে।

আম্মো বেকার দিন কাটাই নি, কারণ, আমার যে কোনো কাজ নেই। করে করে তিন দিনের জায়গায় কেটে গেল দু’ মাস। সর্বনাশ! প্যারিস বড়ই সহৃদয়, কিন্তু দরাজ-দিল নয়। কিপটেমি শিখতে হলে প্যারিসের খাঁটি বাসিন্দাদের সঙ্গে এক ‘সপ্তাহ বাসই যথেষ্ট। শেষটায় ক্য দ্য সমরারের ইণ্ডিয়ান-ক্লাবে জাতভাইদের সর্বনাশ করে তাদের তহবিল তছরূপ করে বিজয়গর্বে বন্ ফিরে এলুম। একদা নেপোলিয়ন যে-রকম প্যারিস থেকে বেরিয়ে হেলায় কলোন-বন্ জয় করেছিলেন।

মাটিল্ডেকে আমার উপর বেশী চাপ দিতে হল না। আমি স্তূড়স্তূড় করে তাঁর স্ল্যাটেই ঢুকলুম।

রবিবারে একসঙ্গে গির্জায় গেলুম।

আইমা দেখি কাণের কাছ থেকে বেশ দু-চারটে ইণ্ডিয়ান ডিশ বানাতে শিখে নিয়েছিলেন। আর মাত্র তিন দিন বাকী। ভেনিস বন্দরে জাহাজ ধরে বোম্বাই পাড়ি দেব। ট্রাভেল আপিসে ভেনিস অবধি ট্রেনের টিকিট কেটে বাড়ি ফিরে দেখি ধুন্দুমার। গলা-কাটা মূর্গীর মত দুই রমণী এদিক ওদিক ছুটোছুটি করছেন।

সম্পূর্ণ অবিশ্রান্ত! কাণে রাজপ্রাসাদের ঠিকানা দিয়ে মাটিল্ডেকে কেবল করেছেন, ভারতীয় ডাক্তারের উপদেশে তিনি কঠিন রোগে আক্রান্ত তাঁর ছেলেকে ইয়োরোপ পাঠাচ্ছেন। মাটিল্ডে তার দেখ-ভালু করতে পারবেন কি না যেন কেবল করে জানান।

মাটিল্ডের মাথা খারাপ হয়ে গিয়েছে। ইতিমধ্যে তিনি কেবলের জবাব তো দিয়েছেনই, এখন বসে গেছেন আরেকটা কেবলের মুশাবিদা করতে। আর আমাকে প্রশ্ন, ছেলেটার বয়স কত, কি ব্যামো হতে পারে, সে নিরামিষাণী কি

না, এবং সব চেয়ে বড় প্রশ্ন সে নামবে কোন্ বন্দরে ? তিনি সেখানে উপস্থিত থাকতে চান, নইলে তাকে দেখবে কে ? মুশাবিহা বন্ধ করে কোন করেন কখনো বা ট্রাভেল আফিসকে কখনো বা তাঁর দপ্তরকে পাওনা ছুটির মঞ্জুরীর জন্য । হঠাৎ সব কিছু বন্ধ করে লেগে যান প্যাক করতে—হয় যাবেন মার্গেই, নয় রোম । সেখান থেকে ইটালিয়ান যে কোনো বন্দরে পৌঁছনো যায় ঘণ্টা কয়েকের ভিতর । নইলে এখান থেকে খবর পেয়ে তিনি ইটালিয়ান বন্দরে পৌঁছতে না পৌঁছতে জাহাজ হয়তো ভিড়ে যাবে সেখানে । ট্রাভেল দফতর অস্তর দেয়, তিনি মানেন না । ইতিমধ্যে তারা পিয়ন মারফৎ পাঠিয়ে দিয়েছে, বোম্বাই-ভূমধ্যসাগরের তাবৎ জাহাজ কোম্পানির টাইমটেবল । আমি সেগুলো অধ্যয়ন করতে লেগে গেলুম গভীর মনোযোগ সহকারে ।

তাঁর দ্বিতীয় কেবুল যাওয়ার পর মাটিল্ডের মনে জাগলো আরেক ঝুড়ি বাস্তব-অবাস্তব প্রশ্ন । তৃতীয় মুশাবিদায় তিনি বসে যান ।

হাত নিঙড়াতে নিঙড়াতে পায়চারি করেন আর বলেন, ‘মাইন গট, মাইন গট’—‘হে ভগবান, হে ভগবান !’

হঠাৎ ছুটে এলেন আমার কাছে । মুখ থেকে শেষ রক্তবিন্দু অন্তর্ধান করেছে । আর্তকণ্ঠে শুধালেন, ‘হঠাৎ যদি যুদ্ধ লেগে যায়, তবে কি হবে ?’ আমি শাস্ত কণ্ঠে বললুম, ‘নিরপেক্ষ সুইটজারল্যান্ডে চলে যাবেন । সেখানে চিকিৎসার কোনো ক্রটি হবে না ।’ যক্ষ্মা হলে যে সেখানেই যেতে হবে সে কথা আর তুললুম না । শুধু বললুম, ‘বরোদার কেবুল মহারাজার অজানতে আসতে পারে না ; আপনি তাঁর সাহায্য পাবেন । জার্মান পররাষ্ট্র দফতর বরোদার মহারাজকে প্রচুর সম্মান করে ।’ তিনি আশ্বস্ত হলেন ।

গভীর রাত অবধি পাশের ঘরে তাঁর মুহূ পায়চারি শুনতে শুনতে ঘুমিয়ে পড়লুম ।

দ্বিতীয় দিন সন্ধ্যাবেলা আমাকে বললেন, তিনি মনস্থির করেছেন, আমার সঙ্গে পনের দিন ভেনিস যাবেন ।

ফেনে উঠেই তিনি হঠাৎ অত্যন্ত শাস্ত হয়ে গেলেন । ভেনিস না পৌঁছনো পর্বন্ত এখন আর কিছু করার নেই ।

গভীর রাত্রে স্লীপিং কোচের স্কীণালোকে তাঁর মুখের দিকে তাকিয়ে দেখি কী প্রশান্ত মমতাময় তাঁর মুখচ্ছবি ! খানিকক্ষণ পরই ইটালিতে ঢুকবো—যে দেশের মাদোন্না-মাতৃমূর্তি সর্ব বিধে সমাদৃত হয় । আমার মনে হল আমার এই মাটিল্ডের মুখে যে মাদোন্নার ছবি ধীরে ধীরে ফুটে উঠছে এ ক’দিন ধরে প্রহরে প্রহরে, সে তো যে কোনো গীর্জার বেদীকে উজ্জ্বল করে দিতে পারে । এ

রমণী গর্ভে সন্তান না ধরেও মা-জননী মাদোন্নাদের ভিতর শাশ্বত আসন পেল।

কেন পাবে না? জাতকে আছে, একদা নিদারুণ দুর্ভিক্ষের সময় এক ভিখারিণী নগরপ্রান্তে খজুর বৃক্ষের অন্তরালে শিশুসন্তান প্রসব করে পৈশাচিক ক্ষুধার উৎপীড়নে গ্রাস করতে যাচ্ছিল তাকে। তারই পাশ দিয়ে যাচ্ছিলেন এক বক্ষ্যা শ্রেষ্ঠিনী, সন্তান কামনা করে মহাকালের মন্দিরে পূজা দিতে। মাতৃস্নেহাতুরা অমনুয় করে নবজাতককে কিনতে চাইলেন। পিশাচিনী অট্টহাস্য করে উত্তর দেয়, তার ক্ষুধা মুহূর্তমাত্র অপেক্ষা করতে পারবে না। বরনারী বললেন, 'তবে তিষ্ঠ; এই যে আমার বক্ষ্যাবক্ষের স্বপুট স্তন, অকর্মণ্য নিষ্ফল এ স্তন কোনো শিশুকে দুগ্ধ যোগাতে পারে নি—এটা আমি খজুরপত্র দ্বারা কর্তন করে তোমাকে দেব। তোমার ক্ষুধা নিবৃত্ত হবে।' পাগলিনী আবার অট্টহাস্যে বললে, 'তুমি জানো না, আপন হাতে আপন মাংস কর্তন করতে কী অসহ-বেদনা, তাই বলছি।' রমণী বাক্যব্যয় না করে কর্তন আরম্ভ করতে না করতেই দরদর বেগে নির্গত হল সেই বক্ষ্যা স্তন থেকে রক্তের বদলে অফুরন্ত মাতৃদুগ্ধ। ভিখারিণী শিশু উভয়েই সে দুগ্ধ পান করে পরিতৃপ্ত হল। অলৌকিক অবিশ্বাস এ ঘটনার কথা শুনে তথাগতের শিষ্যরা তিনজনকেই নিয়ে এলেন তাঁর সামনে। অমিতাভ সানন্দে বললেন, 'মাতৃস্নেহ অলৌকিক ক্রিয়া উৎপাদনে সক্ষম।'

বাঁধতা মাটিল্ডের মুখে দিব্য জ্যোতি দেখা দেবে না কেন?

ভেনিস বন্দরে জাহাজের সিঁড়িতে দাঁড়িয়ে মাটিল্ডে আমার হাত ধরে বার বার অগ্ররোধ করলেন, আমি যেন বোম্বাই পৌঁছেই কেবল করি, ছেলেটি কবে কোন জাহাজে ইয়োরোপ পৌঁচছে। তাঁর চোখে জল, কিন্তু তাতে আনন্দের রেশও ছিল।

বোম্বাই পৌঁছে খবর নিয়ে জানলুম, ছেলেটি চলে গেছে। মাটিল্ডেকে পাকা খবর জানিয়ে দিলুম।

বরোদায় পৌঁছবার মাসখানেক পরে বন্ধু ওয়াডিয়া—তাকে এসব কিছুই বলি নি—কথায় কথায় বললেন, কাণের ছেলেটি কখন যে সমুদ্রে ঝাঁপ দিয়ে পড়ে আত্মহত্যা করেছে কেউ টের পায় নি। খাটের উপর একথানা চিরকুট পাওয়া যায়। অসুস্থ শরীর নিয়ে সে চিরজীবন কারো বোঝা হয়ে থাকতে চায় নি।

আমার মূখ দিয়ে কোনো কথা বেরোয় নি। হা, হতভাগ্য! তুমি জানতেও পারলে না, স্বয়ং মা মেরি তোমার জন্ম বন্দরে দাঁড়িয়ে অপেক্ষা করছিলেন।

আর মাটিল্ডে!

প্রেমের প্রথম ভাগ

সর্বপ্রথমই করজোড়ে নিবেদন, এ অধম মরালিটি ইমমরালিটি কোনো কিছুই প্রচারের জন্ত এই ‘ফরাসী হাণ্ডবুক ফর বিগিনার্স ইন লভ্’ লিখতে বসে নি। অবশ্য স্বীকার করি, আমি প্রাচীনপন্থী কিন্তু সঙ্কে সঙ্কে বলে নিই—যাতে করে আমার প্রতি অবিচার না হয়—মডার্ন কবিতা, ঐতিহাসিক উপন্যাস, ট্রাম-বাস পোড়ানো, পেট-কাটা ব্লাউজ ইত্যাদির বিরুদ্ধে না আছে আমার কোনো অভিযোগ, না চাই আমি দেশের জনসাধারণকে—তন্মধ্যে আমি নিজেও আছি—খৃষ্ট-বুদ্ধ রূপে দেখতে। বিশেষতঃ ঐতিহাসিক উপন্যাস। জনসাধারণে রটে গেছে, আমি নাকি ঐ বস্তুর শত্রু। এটা আমার প্রতি বেদরদ জুলুম। প্রথমত, জনপ্রিয় কোনো জিনিস, অভ্যাস বা আদর্শের শত্রু হতে আমি কিছুতেই সম্মত হই নে। দ্বিতীয়ত, ঐতিহাসিক উপন্যাস লিখতে গেলে পথে যে সব থানাখন্দ পড়ে, সেগুলোর প্রতি লেখকদের দৃষ্টি আকর্ষণ করে আমি তো ঠাঁদের সেবা করে নিজেকে ধন্য মনে করেছি। বস্তুত আমি নিজেই একথানা লিখব বলে স্থির করেছি। তবে নিশ্চয়ই জানি অধুনা যেগুলি জনপ্রিয় তার চেয়ে আমার বই অনেক নিরেস হবে; ভরসা এই, দালদাই বাজারে বেশি বিক্রি হয়, আমারটার কাটাতি সেই কারণেই হবে অধিকতর।

তবে আমার এ ‘ফরাসী হাণ্ডবুক’ লেখার সময় ইতিহাসের শরণ নেব অল্পই। যদিও আমার মনে হয়, পেট-কাটা বা টপ-লেসের নিন্দায় যখন হরিশ মুখুজ্যেরা কলরব করে ওঠেন তখন আধুনিকাদের উচিত একটুখানি ইতিহাসের পাতা উন্টোনো, কিংবা ইতিহাসের বাস্তব নিদর্শনভূমি মিউজিয়মে গমন। জাতকে আছে, একটি জেদী রমণী বসন্তোৎসবে যাবার সময় একটি বিশেষ রকমের দুর্লভ ফুল কামনা করে তার স্বামীকে রাজার বাগানে চুরি করতে পাঠায়। ধরা পড়ে বেচারী যখন শূলে চড়েছে তখন সে তার নিষ্ঠুর অকালমৃত্যুর জন্ত রোদন করে নি। সে উচ্চকণ্ঠে শোক প্রকাশ করছিল এই বলে, ‘আমি মরছি তার জন্ত আমার দুঃখ নেই, প্রিয়ে; আমার ক্ষোভ, তুমি তোমার প্রিয় পুষ্পপ্রসাদন করে যে বসন্তোৎসবে যেতে পারলে না তার জন্ত।’

তা হলে সপ্রমাণ হল, তথাগতের যুগেও রমণী ফ্যাশানের জন্ত এমন ফুলও কামনা করতেন, যেটা শুধু রাজবাড়িতেই পাওয়া যেত, এবং সেটা যোগাড় করার দুঃসাহসিক অভিযানের ফলস্বরূপ তিনি বিধবা হতেও রাজী ছিলেন। এবং শুধু তাই নয়, সে-যুগের স্বামীসম্প্রদায় অতিশয় দার-নিষ্ঠ ছিলেন। প্রিয়র

মনোরঞ্জনার্থে হেলায় প্রাণ বিসর্জন দিতেন। এই দৃষ্টান্ত কি এ-যুগের যুবক-সম্প্রদায়কে আত্মোৎসর্গের স্বর্গীয় পন্থা অবলম্বনে উৎসাহ করবে না ?

অবশ্য পাঠক বলতে পারেন এ ধরনের ঘটনা সাতিশয় বিরল।

সাতিশয় বিরলই যদি হবে তবে আমাদের কবিগুরু ঐ ধরনের উদাহরণই জাতক থেকে নেবেন কেন ?—

‘—বালক কিশোর,

উত্তীয় তাহার নাম, বার্থ প্রেমে মোর

উন্নত অধীর। সে আমার অহুনয়ে

তব চুরি-অপবাদ নিজস্ব লয়ে

দিয়েছে আপন প্রাণ।’

এবং যেন এ-কবিতাতেই প্রোপাগান্ডা কর্ম নিঃশেষ হল না বলে কবি বৃদ্ধ-বয়সে ঐ বিষয় নিয়ে আরো মনোরঞ্জক, আরো চিত্তচাক্ষু্যকর গীতি-নৃত্য-নাট্য ‘শ্রামা’ রচনা করলেন।

এস্থলে উল্লেখ করা প্রয়োজন বোধ করি যে, আমার যতদূর মনে পড়ছে মূল জাতকে গল্পটি একটু অগ্ররকমের। আমার স্মৃতিশক্তি হয়তো আমাকে ঠকাচ্ছে, কিন্তু আমার যেন মনে পড়ছে, উত্তীয়কে কোন কিছু না বলেই তাকে শ্রামা নগরপালের কাছে পাঠায়। তাকে আগের থেকেই শ্রামা বলে রেখেছিল, কিংবা উত্তীয়েরই হাত দিয়ে চিঠি লিখে তাকে জানায়, পত্রবাহককে শুলে চড়াও ; বজ্রসেনকে মুক্তি দাও। এবং বোধ হয় ঘুঘের টাকাও কিছু ছিল, আর সেটাও উত্তীয় তার আপন ভাণ্ডার থেকেই দিয়েছিল—তবৎ ঘটনার কোনো কিছু না জেনেন্তেনেই। আবার মাফ চাইছি, ভুল হতে পারে, শ্রামা বোধ হয় উত্তীয়কে বলে ‘তুমি এই চিঠি ও অর্থ—’ সেটা শ্রামার কিংবা উত্তীয়ের—‘নগরপালকে দিয়ে এলে আমি একান্ত তোমারই হব।’*

পাঠক স্বপ্নেও ভাববেন না, আমি শ্রামা বা পুস্পবিলাসিনীর কার্যকলাপ

* রবীন্দ্রনাথ জাতক, ইতিহাস ও অগ্রান্ত কিংবদন্তীমূলক যে সকল কবিতা, গল্প, উপন্যাস রচনা করেছেন, সেগুলো মূলের সঙ্গে মিলিয়ে তিনি কি কি পরিবর্তন করেছেন, সে সম্বন্ধে প্রামাণিক গবেষণা করে কেউ ডক্টরেট নেন না কেন ?

সম্মতির চোখে দেখছি। আধুনিকাদের অধঃপাতগমনের অহেতুক অভিযোগ কানে এলে আমার এসব দৃষ্টান্ত মনে আসে, এই মাত্র।

তবে এ নিয়ে ভাববার আছে।

যে কালে মুকুব্বীরা মেয়ের বিয়ে ঠিক করে দিতেন, সে সময় ভিন্ন ভিন্ন পরিবারের মুকুব্বীদের ভিতর ভালো বর পাওয়ার জন্ত যে প্রতিদ্বন্দ্বিতা হত না তা নয়। বস্তুত যে কনের সঙ্গে লোভনীয় বরের বিয়ের কথাবার্তা এগিয়ে গেছে তার বিরুদ্ধে নাকি উড়ো চিঠি পর্যন্ত যেত তৃতীয় কল্পাপক্ষ থেকে। আশ্চর্য হবার কিছু নেই। সংগ্রামে আবার নীতি কি! এবং কিছুমাত্র নতুন তথ্য নয় যে, কুরু-পাণ্ডবরা কুরুক্ষেত্র সংগ্রামে যে নীতি অবলম্বন করেছিলেন সে নিয়ে বিশ্বের আলোচনা হয়ে গিয়েছে।

কিন্তু এ যুগে, বিশেষ করে কলকাতা এবং অগ্রাগ্র বড় শহরে অনেক মেয়েকেই বাধ্য হয়ে বরের সন্ধানে বেরতে হয়। এবং বররাও বেরোন কন্টার সন্ধানে। ফলে বিস্তশালী, রূপবতী বা উচ্চশিক্ষিতা যার যেমন অভিরুচি—কনের জন্ত ছোকরাদের প্রতিদ্বন্দ্বিতা লেগে যায়, এবং উন্টোটাও হয়। বোধ হয় স্থলেখক স্ববোধ ঘোষের গল্পেই পড়েছি, তিনটি মেয়ে তিনটি ফুলের তোড়া নিয়ে পাল্লা দেন এক শাসালো বরকে স্টেশনে সৌ-অফ করতে গিয়ে।

এসব বিয়ে যে দেখা মাত্রই দুম্ করে স্থির হয় না সে-কথা বলা বাহ্যিক। কিঞ্চিৎ পূর্বরাগ, প্রেম বা প্রেমের অভিনয়ের প্রয়োজন হয়। কোনো কোনো স্থলে এটাকে কোর্টশিপও বলা হয়। আমাদের দেশে একদা গান্ধর্ব-বিবাহের প্রচলন ছিল। সে বিবাহ হত বিবাহের পূর্বকার প্রণয়ের ভিত্তিতে।

কিন্তু এদেশে এখনো প্রণয়ের কোনো কোড্ নির্মিত হয় নি, অর্থাৎ যুবক-যুবতীতে কতখানি প্রণয় হওয়ার পর ছেলে কিংবা মেয়ে আশা করতে পারে যে এবারে অস্ত্র পক্ষ তাকে বিয়ে করতে প্রস্তুত, এবং তখন যদি সে হঠাৎ তাকে ত্যাগ করে অস্ত্র কাউকে ভালোবাসতে আরম্ভ করে তবে সমাজে তার নিন্দা হয়। ইয়োরোপে মোটামুটি দুটো ধাপ আছে। হুঁজনাতে প্রণয় হওয়ার ফলে যদি ছেলেটা মেয়েটিকে ফরাসীতে ‘আমি’, জার্মানে ‘ক্লেইণ্ডিন্’ (‘গার্লফ্রেন্ড’র চেয়ে এটাকে ঘনিষ্ঠতর বলে ধরা হয়) বলে উল্লেখ করে তার তখনো মোটামুটি বিয়ের দায়িত্ব আসে না। এটা প্রথম ধাপ। কিন্তু ফরাসীতে ‘ক্লিয়াসে’—জার্মানে ঐ একই শব্দ বা ‘ফেরলবট্’ ব্যবহৃত হয়—পর্ষায়ে পৌঁছলে সেটাকে দ্বিতীয় ধাপ বলা হয়। এবং সে সময় যদি যুবক তাকে এনগেজমেন্ট আংটি দেয় (অর্থাৎ মেয়েটি তখন ‘বাগদস্তা’ হল যদিও অর্ধটা কিছু ভিন্ন) তবে সেটা বিয়ের প্রতিশ্রুতি

বলেই ধরা হয়। তারপর সে বিয়ে করতে না চাইলে অনেক স্থলে মেয়েটি আদালতে প্রতিজ্ঞা বা চুক্তিভঙ্গের মোকদ্দমা করে খেসারতি চাইতে পারে। সমাজে বদনাম তো হয়ই। মহাভারতে দ্রুপদী বাগদত্তা ছিলেন বলে পরে শ্রীকৃষ্ণ তাঁকে বিয়ে করলে শ্রীকৃষ্ণের শত্রুপক্ষ তাঁর নিন্দা করে।

এদেশে প্রণয়ের কোনো স্তরেই বোধহয় এরকম আংটি দেবার রেওয়াজ প্রচলিত হয় নি। তবে প্রণয় ঘনীভূত হওয়ার পর (কতটা ঘনীভূত এবং তার চিহ্ন কি, সেটা বলা কঠিন) যদি কোনো পক্ষ অকারণে ‘রণে ভঙ্গ’ দেয়, তবে তার যে বদনাম হয় সেটা স্থনিশ্চিত। ইয়োয়োরোপেও যে-মেয়ে অকারণে একাধিক প্রণয়ীকে পর পর ত্যাগ করে সে ‘জিল্ট’ এই বদনামটি পায়।

নিছক প্রেমের জ্ঞাত প্রেম—বিয়ে করার উদ্দেশ্য কারোরই নেই—এটা বোধ হয় এদেশে বিরল। ইয়োয়োরোপে মোটেই বিরল নয়। ছাত্র, ছাত্রী, মেয়ে কেরানী, ছোকরা এসিসটেন্টের ভিতর এ-জাতীয় প্রেম আকছারই হয়। এ-জাতীয় প্রণয়ের ফলে যদি কোনো কুমারী অন্তঃসত্ত্বা হয়ে যায় তবে কোনো কোনো স্থলে সে যুবকের বিরুদ্ধে খেসারতির মোকদ্দমা আনতে পারে। আমি যতদূর জানি, বিয়ে করতে বাধ্য করাতে পারে না—তবে রাশাতে বোধহয় সম্ভাবনাটি অন্তত পিতার নামটা আইনত পায়, অর্থাৎ জারজ রূপে ঘণার পাত্র হয় না। ইয়োয়োরোপে যদি যুবা প্রমাণ করতে পারে যে, মেয়েটার একাধিক প্রণয়ী ছিল তবে তাকে বা অন্য কাউকে কোনো খেসারতি দিতে হয় না। এক বলশেভিক আমাকে বলেন, এক্ষেত্রে রাশায় সব ক’জনকে খেসারতি ভাগাভাগি করে দিতে হয়।

তবে ইয়োয়োরোপের মেয়েরা যুগ যুগ ধরে প্রেমের মারফতে বিয়ে করেছে বলে অনেক কিছু জানে, এবং আর পাঁচজন বিচক্ষণ বান্ধবীদের কাছ থেকে উপদেশও পায়।

এদেশের তরুণ-তরুণীদের সঙ্গে আমার যোগসূত্র নেই। তবে আমার সব সময়ই মনে হয়েছে আমাদের মেয়েরা বড় অসহায়।

*

*

*

সিরিয়স প্রবন্ধ লিখব বলে আমার আদৌ ইচ্ছা ছিল না। আমি প্রণয়, বিবাহ, লাভ ফর লাভস্ সেক্ ইত্যাদি সম্বন্ধে ফরাসীদের দু-একটি মতামত লিখতে যাচ্ছিলুম মাত্র। এ বাবদে ফরাসীদের অধিকারই যে সব চেয়ে বেশি, সেকথা বিশ্বজন মনে নিয়েছে। লোকে বলে অবাধ অবৈধ প্রেম নাকি ঐ দেশেই সব চেয়ে বেশি। আমি কিছু বলতে নারাজ, তবে একটা কথা জানি। ডিভোর্স বা লয়চ্ছেদ ফরাসীরা নেকুনজরে দেখে না। পারিবারিক শান্তি ও শিশুদেহ

ভবিষ্যৎ সম্বন্ধে তারা বড়ই সচেতন। স্বামী-স্ত্রী দুজনাই কিঞ্চিৎ অসংযমী হলে ফরাসী সমাজ সয়ে নেয়, কিন্তু তারা একে অন্তর্ভুক্ত করে চাইলে সমাজ অসন্তুষ্ট হয়।

ইয়োৰোপের উন্নত দেশগুলো যে-স্থলে গিয়ে পৌঁচেছে আমরাও একদিন সেখানে গিয়ে পৌঁছব, এ-কথা আমি বিশ্বাস করি না (অবশ্য তার অর্থ এ নয় যে, আমি ইয়োৰোপের প্রেম তথা বিবাহ-পদ্ধতির নিন্দা করছি। বস্তুত বাইরের অল্প সভ্যতা অল্প ঐতিহ্যের মানুষ হয়ে আমার পক্ষে ইয়োৰোপীয় সভ্যতা বিচার করতে যাওয়াটা খুব যুক্তিসঙ্গত নয়। যারা আমার চেয়ে বহু উর্ধ্বে-উঠে প্রকৃত সত্য দেখতে পান তাঁরাই বোধহয় অনাসক্তভাবে আপন দেশ ও বিদেশ সম্বন্ধে মতামত প্রকাশ করবার অধিকার ধরেন)। এদেশের ঐতিহ্য তাকে প্রেম বিবাহ প্রভৃতি ব্যাপারে অল্প প্যাটার্ন বানাতে শেখাবে—এই আমার বিশ্বাস।

*

*

*

যে ফরাসী যুবতী কয়েকটি তরুণীকে হাসিঠাট্টার ভিতর দিয়ে সদুপদেশ দিচ্ছিলেন তাঁর কথাগুলো শুনে আমি আমোদ অহুভব করছিলুম। তরুণীদের ভাবভঙ্গি-কথাবার্তা থেকে স্পষ্টই বোঝা যাচ্ছিল তাঁরা যুবতীটিকে প্রেমের ভূবনে রীতিমত 'সাকসেসফুল' বা বিজয়িনী বলে মনে করছিলেন। তিনি খাচ্ছিলেন কন্ডাক ও চেসার, অতি ধীরে মন্থরে। অর্থাৎ সামান্য কয়েক ফোটা কন্ডাক পান করে সঙ্গে সঙ্গে অল্প গেলাস থেকে এক ঢোক জল। এই জল কন্ডাককে chase করে নিয়ে যায় বলে একে বলে 'চেসার'। যুবতীটি যে পান বাবদে শুধু সমজদার তাই নয়, আমার মনে হল তিনি এ বাবদে পরিপূর্ণ আত্মকর্তৃত্বও বজায় রাখেন।

লম্বা হোল্ডারে সিগারেট ধরিয়ে, উর্ধ্বপানে ধূঁয়ের একসারি চক্কর চালান করে বললেন, 'লেয়েঁ ব্লুমের কেতাবখানা মন দিয়ে পড়ো। বিবাহ সম্বন্ধে তিনি অনেক খাটি কথা বলেছেন।' ব্লুম একদা ফ্রান্সের প্রধানমন্ত্রী ছিলেন এবং তিনি তাঁর বইয়ে বলেন, প্রেম, যৌনজীবন সম্বন্ধে অনভিজ্ঞ যুবক-যুবতীর বিবাহ সাধারণত তাদের জীবনে দীর্ঘকালব্যাপী দাম্পত্য সুখশান্তি দিতে পারে না। উচিত, উভয় পক্ষেরই এ-সব বিষয়ে কিঞ্চিৎ অভিজ্ঞতা সঞ্চয় করার পর বিয়ে করা। বলা বাহুল্য, এ বই প্রকাশিত হলে ইংলণ্ডের অনেকেই এটাকে 'শকিং' 'গর্হিত' বলে নিন্দা করেছিলেন।

স্মন্দরীটি ব্লুমের মূল বক্তব্য প্রাঞ্জল ভাষায় পেশ করে বললেন, 'দেখো, আমি নিজে বিশ্বাস করি, নারী-পুরুষ দুই যুগ্মদান শক্তি, একে অন্তের শক্তি—'

একটি তরুণী কক্ষের ঢোক গিলতে গিয়ে মারাত্মক বিষম খেয়ে বললে, 'আপনি

এ কি কথা বলছেন! কবি দুর্গা এখনো আপনার কথা ভুলতে পারেন নি—আপনি তাঁকে বিদায় দেওয়ার পরও। এখনো তাঁর মুখে ঐ এক মন্ত্র : আপনার মত প্রাণ-মন, সর্বহৃদয়, সর্বশ্ব দিয়ে এরকম আত্মহারা হয়ে কেউ কখনো ভালো-বাসতে পারে নি।’

যুবতী স্মিত হাসভরা চোখে তরুণীর দিকে তাকিয়ে বললেন, ‘বেচারী আত্রে! তোমার এখনো অনেক-কিছু শেখবার বাকি আছে। আমি আর্টিস্ট। আমি যা-ই করি নে কেন, সেটাকে পরিপূর্ণতার চরমে পৌঁছিয়ে দিয়ে করি। যখনই ভালোবেসেছি, ‘আত্মহারা’ হয়েই ভালোবেসেছি। কিন্তু, ভার্টিং, ইহুদিও কি তার ব্যবসা আহার নিদ্রা ত্যাগ করে আত্মহারা হয়ে ভালোবাসে না? তাই বলে মে কি তার মুনাকার কথা ভুলে যায়? যে ব্যবসাকে সে আপন প্রিয়র চেয়েও বেশি ভালোবাসে তাকে সে অকাতরে বিসর্জন দেয় না, যদি দেখে সেটা দেউলে হয়ে যাওয়ার উপক্রম?

তাই বলছিলুম, পুরুষ রমণীর শত্রু। যে কোনো পুরুষ আমাকে ‘আত্মহারা’ হয়ে ভালোবাসলেও একদিন সে আমাকে অকাতরে বিসর্জন দিতে পারে—আমি যে-রকম ম’সিয়ো দুর্গাকে দিয়েছিলুম। অবশ্য আমি শ্রাডিষ্ট নই, তাই তাকে ড্রপ করার সময় যতদূর সম্ভব মোলায়েমভাবে সেটা সম্পাদন করি—তত্পরি বলা তো যায় না, কখন কাকে আবার প্রয়োজন হয়!’

আরেকটি তরুণী বললে, ‘কিন্তু দান্তে—?’

মাদাম বললেন, ‘ওঁর সঙ্গে আমার পরিচয় হয় নি—যদিও ওঁর কাব্য আমার প্রেমপত্রে কাজে লেগেছে। ঐ ধরনের মানুষ আমি দেখি নি। তবে এইটুকু বলতে পারি, যারা কারো বিরহে বা মৃত্যুতে দীর্ঘদিন ধরে আপস-আপসি করে সেটা শুধু তাদের আত্মস্তরিতা। নিজের কাছে স্বীকার করতে চায় না যে, এই-বারে তার অস্ত্র ব্যবসা ফাঁদা উচিত। মনস্তত্ত্বে ওদের বলা হয় ম্যাজোজিকিষ্ট—নিজকে নিজে কষ্ট দিয়ে স্থখ পায়। ঐ যে-রকম অনেক সর্বত্যাগী অনাহারে থেকে স্থখ পান! তোমার আমার স্বাস্থ্য আছে, ক্ষুধা আছে, আমরা নর্মেল। খাওয়া যখন রয়েছে তখন উপোস করবো কোন্‌ হুখে?’

‘তবে কি একনিষ্ঠ প্রেম বলে কিছুই নেই?’

‘কী উৎপাত! কে বললে নেই? নিশ্চয়ই আছে। যখন যাকে ভালো-বাসবে তখন তার প্রতি একনিষ্ঠ হবে, আত্মের ভাবায় আত্মহারা হবে। একাধিক জনের সঙ্গেও অক্লেশে একনিষ্ঠ হওয়া যায়। ঐ তো আমার এক বন্ধু ছিলেন লিয়োঁতে। সেখানে মাঝে মাঝে উইক-এণ্ড করতে যেতুম। চমৎকার কথাবার্তা

বলতে জানেন। বাড়িটিও সুন্দর। প্যারিসে প্রতি বৃহস্পতিবারে আমার স্ক্যাটে আসতেন আরেক বন্ধু। উনি বিবাহিত। অল্প সময় সুযোগ পেতেন না। তা ছাড়া চাকরির উন্নতির জন্ত অফিসের এক বৃদ্ধ কর্তার সঙ্গে তাঁর মোটরে মাঝে মাঝে বেরুতে হত। তিনি আবার ভয়ানক ভীতু। যদি কেউ দেখে ফেলে! তাই রাত্রে মোটরে করে শহর থেকে দূরে যেতে হয় তাঁর সঙ্গে। এদের প্রত্যেককে যদি একনিষ্ঠভাবে না ভালোবাসি তবে—ঐ যে বললুম পুরুষ মাত্রই শত্রু—সে শত্রু ধরে ফেলবে না আমার ভারসেটাইলিটি—বহুমুখী প্রতিভা? শুনেছি, এবং বিশ্বস্তস্বত্রেই, যে রসরাজ কবি, যোদ্ধা, ঔপন্যাসিক, শাসনকর্তা দাচুন্দজিয়ো একসঙ্গে একগুণা সুন্দরীর সঙ্গে একনিষ্ঠ প্রেমের উচ্চাঙ্গ সাধনা করেছেন, তিনি একই সময়ে চারজনকে যে চার সিরীজ প্রেমপত্র লিখেছেন, তার প্রত্যেকটি অতিশয় অরিজিনাল মাধুর্যময় কবিত্বপূর্ণ—কোনো সিরীজের সঙ্গে কোনো সিরীজের সাদৃশ্য নেই। প্রত্যেকটি বসন্ত আপন সিরীজ পেয়ে ধরা হয়েছেন।’

তারপর আরেক তরুণীর দিকে তাকিয়ে বললেন, ‘স্বাজান্, তুমি এ লাইন ছেড়ে দিয়ে তাড়াতাড়ি বিয়ে করে ফেল। পল্ আর মাসে’ল তোমাকে একই সময়ে ভালোবাসতো; আর তুমি মাত্র দুটোকে সামলাতে পারলে না? হায়! প্যারিস কোথায় এসে পৌঁচছে? আর ডার্লিং স্বাজান্, তুমি নাকি জানতেও না, পল্ আর মাসে’ল উভয়েরই তখন আরেক প্রস্তু প্রিয়া ছিল!’

স্বাজান্ তাজ্জব্ব মেনে বললো, ‘তাই নাকি? ম’ দিয়ে!’

নানেং বললে ‘ডিভাইড এ্যাণ্ড রুল? দ্বিধা করে সিধা রাখো?’

মাদাম বললেন, ‘ও! তা কেন? মেনাজ্ আ ত্রোয়া (menage a trois = management by three) যদিও এখন ফ্রান্সে একটু আউট অব ডেট—তবু তিনজনে মিলেমিশে থাকাকাটা তো ট্রায়েল পেতে পারে, কিন্তু সব সময়ই মনে রাখতে হবে, শান্তিভঙ্গ যেন না হয়, নো স্কাণ্ডাল, প্রীজ! আর ডুয়েল, খুন, আত্মহত্যা এগুলো তো বর্বরতার চরম—ভুল বললুম, বর্বরদের ভিতর এসব অপ্রিয় ঘটনা প্রায় কখনোই ঘটে না। এগুলো ঘটলে মনের অশান্তি খানিকটে হয় বটে, কিন্তু তার চেয়ে মারাত্মক বদনাম ছড়ায় ভবিষ্যতের বিয়ের বাজারে। অবশ্য এমন কোনো বদনাম নেই যেটা আস্তে আস্তে মুছে ফেলা যায় না। এবং কোনো কোনো স্থলে একাধিক পুরুষ আকৃষ্ট হয় ‘ফাম্ ফাতাল্’ (fatal woman), ‘বিপজ্জনক রমণী’র প্রতি।’

ইনি তাঁদেরই একজন কি-না সেটা জানবার কোতূহল আমার পক্ষে স্বাভাবিক।

ইতিমধ্যে তার কণ্ঠ্য শেষ হয়ে গিয়েছে দেখে গুটিতিনেক তরুণী একসঙ্গে ওয়েটারকে ডাকলে। যুবতী রাজ-রাজেশ্বরীর মত ঝাঁ হাতখানা দিয়ে যেন বাতাসের একাংশ ছুঁটুকরো করে অসম্মতি জানানেন, বললেন, ‘সুইচ অফ্‌ ইউ, কিন্তু জানো তো আমার সোনার খনিতে এখন ডবল শিফ্টে কাজ চলছে। দ্বিতীয় শিফ্টায় আমি অবশ্য অনেকখানি সাহায্য করি। এমনিতেই আমি এক গাদা টাকার কুমিরকে চিনতুম, এখন আমার ‘মারী’ (স্বামী) প্রতি রাতেই দু-একটি নয়া নয়া বাঘ-ভাল্লুক শিকার করছেন আমাকে তাদের সঙ্গে আলাপ করিয়ে দিয়ে।—তোমরা বরঞ্চ শ্যামপেন খাও।’

তরুণীদের একাধিক জন আনমনা হয়ে ভাবলে তাদের জীবনে এ সূদিন আসবে কবে?

হঠাৎ যেন বিজয়িনীর একটি গভীর তত্ত্বকথা মনে পড়লো। গম্ভীর হয়ে বললেন, ‘কিন্তু, যাদুয়া, একটি কথা মনের ভিতর ভালো করে গেঁথে নিয়ে। রুম এটা বলেন নি। সর্বপ্রেমের চরম গতি যখন পতিলাভ তখন সে-পথে নামবার আগে একটি মোক্ষম তত্ত্ব ভুললে চলবে না। রুম বলেছেন, প্রথম ইদিক-উদিক প্রেম এবং ফ্যাকটস অফ্‌ লাইফ সম্বন্ধে কিঞ্চিৎ অভিজ্ঞতা সঞ্চয় করার পর, ইংরিজিতে পুরুষের বেলা যাকে বলা হয় ‘বুনো ভুট্টা বপন’—সেইটে হয়ে গেলে পর বিয়ে করবে। তা হলে একের অন্তরে প্রতি সহিষ্ণুতা হবে অনেক বেশি, একে অন্যকে সাহায্য করতে পারবে অনেক বেশি—দাম্পত্য জীবন তাই হবে দীর্ঘকালব্যাপী ও মধুর। রুমের উদ্দেশ্য অতিশয় মহৎ এ-বিষয়ে কেউ সন্দেহ করবে না। আমি তো নিশ্চয়ই করবো না, কারণ তিনি অতিশয় নীতি-বাগীশ—’

কোরাস উঠলো তাবৎ তরুণী কণ্ঠে, ‘কি বললেন, মাদাম?’

কণামাত্র বিচলিত না হয়ে মহিলাটি ধীরে স্বস্থে আরেকটি সিগারেট ধরিয়ে দৃঢ়কণ্ঠে প্রতিটি শব্দ উচ্চারণ করে বললেন, ‘কট্টর নীতিবাগীশ, ধর্মভীরু, আচারনিষ্ঠ এবং ছিন্নভিন্ন উদ্দেশ্যহীন ফরাসীসমাজকে নৈতিক দৃঢ়ভূমিতে প্রতিষ্ঠিত করার জন্য ব্যগ্র। তিনি ইহুদি, এবং অনেকেই যে রকম তাঁর ইহুদি-ভ্রাতা ক্রয়েটকে ভুল বোঝে, এঁর বেলাও তাই হয়েছে। আমি তাঁকে ব্যক্তিগতভাবে চিনি এবং জানি তিনি নীতি, মরালিটিতে অতিশয় আস্থাবান। কিন্তু তিনি বিশ্বাস করেন, প্রাচীন নীতি পরিবর্তন করে—বরং বলবো সেটাকে পরিপূর্ণভাবে কার্যকরী ও কল্যাণময়ী করে সম্পূর্ণতর করে তোলবার জন্য নবীন নীতির প্রয়োজন। তিনি সেইটে প্রবর্তন করতে চান। কিন্তু এই নবীন নীতি প্রবর্তন

করতে পারি শুধু আমরা ফরাসীরাই। ঘেরকম আমরাই সর্বপ্রথম ফরাসীবিজ্ঞোহ করে সাম্য মৈত্রী স্বাধীনতা প্রবর্তন করি। ইয়োরোপের অগ্ন্যন্ত দেশ, এমন কি জার্মনিরও লাগবে এ নীতি গ্রহণ করতে অন্তত একশ বছর। তারা তো এখনো গণতন্ত্রটাই রপ্ত করতে পারেনি। আর যেসব দেশ ধর্ম উপাদান করেছে—যেমন প্যালেস্টাইন, আরবদেশ, ইণ্ডিয়া, এরা এ নীতি কখনো গ্রহণ করতে পারবে না, আর যদি করে তবে তাদের সর্বনাশ হবে।’

আমি মনে মনে সম্পূর্ণ মায় দিলুম। এবং যোগ দিলুম, হয়তো চীন পারবে।

‘কিন্তু একটা প্র্যাকটিকাল উপদেশ আমি দিই। বিয়ের পূর্বের সর্ব অভিজ্ঞতা যেন বিবাহিত পুরুষের সঙ্গে হয়। তার প্রথম কারণ তারা প্রবীণতর, পকতর। তাদের কাছে শুধু প্রণয় নয়, জীবনের মূল্যবান আরো অনেক-কিছু শেখা যায়। কিন্তু খবরদার, আহাম্মকের মত কক্থনো তাকে বলবে না, তোমার বউকে ডিভোর্স করে আমাকে বিয়ে করো। এক্সপেরিমেন্টের ইদুরকে আকাট মূর্থও বিয়ে করে না।

আরেকটা কারণ বললে তোমাদের তরুণ-হৃদয়ে হয়তো একটু বাজবে।

ঐ বিবাহিতদেরই হু’পয়সা রেস্তু থাকে। বনে-বাদাড়ে ঘুরে ঘুরে আর সেফ হাওয়া খেয়ে খেয়ে জীবনের কোনো অভিজ্ঞতাই সঞ্চয় হয় না। সেটা হয় জনসমাজে। ক্লাব, “রেস্তোরাঁ”, অপ্‌রা, জুয়োর কাসিনো, রেস, রিভিয়েরা-সুইজারল্যান্ড ভ্রমণ, এগুলো না করলে, না চষলে কোনো এলেমই হয় না, যেটা তোমার ভবিষ্যৎ স্বামী ও দাম্পত্য-জীবনে কাজে লাগবে।

আরেকটা সুবিধে, বলা তো যায় না, তিনি যদি মাত্রা সামলাতে না পেরে তোমাকে বিয়ে করতে চেয়ে বসেন, তুমি তখন অতিশয় ব্রীড়া সহকারে বলতে পারবে, “আমি চাই নে যে আপনার স্ত্রীকে ডিভোর্স করে আপনি একটি পরিবার নষ্ট করুন।”

এবং শেষ সুবিধে, যেদিন তুমি কেটে পড়তে চাইবে, সেদিন স্বচ্ছন্দে বলতে পারবে, “আমারও তো সংসার পাততে হবে, আমারও তো সমাজের প্রটেকশন দরকার”, তারপর ব্লাশ করে বলবে, “আমিও তো, আমিও তো মা হতে চাই।”

কি বলবো পাঠক, সে যা অনবদ্য অভিনয় করলেন সেই বিবাহিতা যুবতীটি—আহা, যেন বোল বছরের তরুণীটি, ভাজা মাছটি উন্টে খেতে জানেন না। ধন্য নটরানী প্যারিস, ধন্য তোমার অভিনয়, ধন্য তোমার নব মরালিটি! সাথে কি

লোকে বার বার বলে, ‘সী প্যারিস এ্যাও ডাই’। প্যারিস দেখার পর পৃথিবীতে দেখবার মত আর তো কিছু থাকে না।

তবে আমার অহুয়োধ, অগ্রাগ্র বহু বস্তু নির্মাণ করার সময় ফ্রান্সে আইনত যেমন ছাপ মারতে হয়, ‘নট্ ফর এক্সপোর্ট’—‘বিদেশে চালান নিষিদ্ধ’, এই নব মরালিটির উপরও যেন তেমনি ছাপটি সযত্নে মারা হয়।

তবে আমি এটি আমদানি করলুম কেন? বুঝিয়ে বলি। বিদ্বদ্ধা যুবতীটি যা খুঁটিয়ে খুঁটিয়ে বলেছিলেন আমি তার সহস্রাংশের একাংশও বলি নি। আমি শুধু সেটুকুই বলেছি, যেটুকু আপনার জানা থাকলে যদি কখনো প্যারিসের ঐ নব মরালিটিটি এদেশে চোরাবাজার দিয়ে বা স্মাগলড্ হয়ে চলে আসে তবে যেন তৎক্ষণাৎ সেটি চিনতে পারেন।

চার্লি চ্যাপলিন এই কর্মটি করেছিলেন। অনেকেই তার ‘মঁসিয়ো ভেরুত্’ ছবি দেখেছেন। চ্যাপলিনের পূর্বেও তার সময়ে ইয়োরোপের কোনো কোনো দার্শনিক সাড়স্বর প্রচার করেন, জীবনসংগ্রামে বেঁচে থাকার জ্ঞান মানুষ যেন সর্বাত্ম প্রয়োগ করে সর্ব প্রতিদ্বন্দ্বীকে ‘অর দ্য কঁবা’—দরকার হলে খতম করে দেয়। সেই হাস্যাস্পদ দর্শনের বেকুব চরম পরিণতি প্রমাণ করার জ্ঞান চ্যাপলিন দেখান কি-ভাবে একজন লোক একটার পর একটা ধনী প্রাপ্তবয়স্ক রমণীকে বিয়ে করে তাকে স্বকৌশলে খুন করে অর্থ সঞ্চয় করতে থাকে। কিন্তু খুনের কৌশলটি ছবিতে দেখান নি।

আমিও বিদ্বদ্ধা প্যারিসিনীর আসল অন্তর্ভূত রহস্য সযত্নে গোপন রেখেছি।

মত্তপন্থা ওরকে মধ্যপন্থা

মত্তপান ভালো না মন্দ সে নিয়ে ইয়োরোপে কখনো কোনো আলোচনা হয় না—যেমন তাস খেলা ভালো না মন্দ সে-নিয়েও কোনো তর্কাতর্কি হয় না। কিন্তু এ-কথা সবাই স্বীকার করেন যে মাত্রাধিক মত্তপান গর্হিত এবং অত্যন্ত বিপজ্জনক—যে রকম তাস খেলাতে মাত্রাধিক বাজী রেখে, অর্থাৎ সেটাকে নিছক জুয়ো খেলায় পরিণত করে সর্বস্ব খুঁয়ে দেওয়া নিশ্চয়ই অমুচিত।

এ ছুটো ব্যসন যে আমি একসঙ্গে উত্থাপন করলুম সেটা কিছু এলোপাতাড়ি নয়। কুরান শরীফে এ-ছুটিকে একসঙ্গে উল্লেখ করে বলা হয়েছে, এ ছুটির উৎপত্তি-স্থল স্বয়ং শয়তান। তৎসঙ্গেও ইদানীং পূর্ব পাকিস্তানের একখানি দৈনিকে আলোচনা হচ্ছে, মাত্রা মেনে, অতিশয় সাবধানে কিংবা স্বাস্থ্যলাভের

জগৎ সামান্য মত্তপান করা শাস্ত্রসম্মত কিনা ? এ বিষয়ে উৎকৃষ্ট আলোচনার জগৎ যতখানি মুসলিম শাস্ত্রজ্ঞান থাকা উচিত আমার সেটি নেই। এবং শাস্ত্র ছাড়া লোকাচার, দেশাচার নামক প্রতিষ্ঠান আছে। উভয় বাঙলার এই দুটি আচারে মত্তপান নিষিদ্ধ। বরঞ্চ পশ্চিম বাঙলার কোনো কোনো জায়গায় তাড়ির প্রচলন আছে—পূর্ব বাঙলায় সেটাও নেই, অন্তত আমার চোখে পড়ে নি।

মোদা কথা এই যে, ভারতবর্ষের শিক্ষিত সমাজে এবং অধিকাংশ অশিক্ষিত সমাজে মত্তপান নিয়ে যে আলোচনা হয় সেটা নীতির দৃষ্টিবিন্দু থেকে, এ্যাজ এ প্রিন্সিপল। অর্থাৎ হিন্দুর কাছে গোমাংস খেমন আত্মস্তিক ভাবে বর্জনীয়—অতি সামান্য অংশ খাওয়াও মহাপাপ—মুসলমানের কাছে শূকর মাংসও সেইরূপ। তাই এদেশে মত্তপান ঠিক সেই রকমই বর্জন করতে হবে কি না সেই প্রশ্নটা মাঝে মাঝে ওঠে।

ইতিমধ্যে ঔষধের মাধ্যমে অনেকেই সেটা প্রতিদিন পান করছেন—জানা-অজানায়। বেশীর ভাগ টনিকেই পনেরো, সতেরো পার্সেন্ট এলকহল থাকে। একটি তরুণ এলকহলের তত্ত্ব না জেনে আমাকে এক বোতল টনিক দিয়ে বললে, ‘অত্যুৎকৃষ্ট টনিক, শ্রুত ! খাওয়ার সঙ্গেই মাথাটা চিম চিম করে, শরীরে বেশ ফুঁতির উদয় হয়।’ আমি মনে মনে বললুম, ‘বটে ! ফুঁতিটা টনিকে ওষুধ থেকে না ঐ ১৭ পার্সেন্ট মদ থেকে সেটা তো জানানো না বৎস ! অর্থাৎ পুচ্ছটি উন্মোচন করে—ইত্যাদি।’ কারণ টনিক বজ্জিত ১৭ পার্সেন্ট এলকহল সমন্বিত যে-কোনো মত্ত পান করলেই মাথাটা চিম চিম করে শরীরে বেশ ফুঁতির উদয় হয়।’

ভলতেয়ারের একটি ‘আপ্তবাক্য’ এত বেশী সুস্বাদ, এত বেশীবার মনে পড়ে যে সেটা আবার বললে পাঠক যেন বিরক্ত না হন। ভারতীয় জ্ঞান-বিজ্ঞানের যখন অতি সামান্য কিছুটা ইউরোপে পৌঁচেছে তখন এক শ্রেণীর কুসংস্কারবাদী বলতে আরম্ভ করলো, ভারতবাসীরা মস্তের জোরে অসম্ভবকে সম্ভব করতে পারে। ঐ সময় এদেরই একজন ভলতেয়ারকে শুধায়, ‘মস্তোচ্চারণ করে একপাল ভেড়া মেরে ফেলা যায় কিনা ?’ ভলতেয়ার একটু বাঁকা হেসে বললেন, ‘নিশ্চয়ই। তবে খাতে কোন গোলমাল না হয় তার জগৎ আগের থেকে পালটাকে বেশ করে সঁকো খাইয়ে দিয়ো।’

এই হচ্ছে আসল তত্ত্ব কথা—সঁকোটাই সত্য ; মত্তটা থাকলে ভালো, না থাকলে নেই।

ঠিক তেমনি ঐ যে টনিকের কথা একটু আগে বললুম, তার ঐ ১৭ পার্সেন্টটাই সত্য ; বাকি যে সব ওষুধ-বিষুধ আছে সেগুলো থাকলে ভাল—

ইত্যাদি।

ঠিক তেমনি ছেলে বাড়িতে নিজের চেষ্টায় পরিশ্রম করে যেটুকু শেখে সেইটেই সেকো, সেইটেই ১৭ পার্সেন্ট এলকহল। তারই জ্বারে ছেলে পরীক্ষা পাস করে—আমরা মাস্টাররা ক্লাসে যা পড়াই সেটা মস্তোচ্চারণের মত ; থাকলে ভালো, না থাকলে নেই।

এই যে দেশটা চলছে সেটা জনসাধারণের শুভ বা অশুভ বুদ্ধি দ্বারা—সরকার যেটা আছে, সেটা মস্তোচ্চারণের মত। এবং আজকাল তো আকছারই সেই মস্তোচ্চারণও ভুলে ভুলে ভর্তি। থাক আর না। বুদ্ধ বয়সে জেলে গিয়ে শহীদ হতে চাই নে।

ইয়োরোপীয়রা টনিকের অবাস্তুর মস্তোচ্চারণ অর্থাৎ গুয়ুধটা বাদ দিয়ে শুধু এলকহলটাই খায়, তবে ১৭ পার্সেন্টের মত কড়া করে নয়। কেউ খায় স্টাউট, কেউ খায় পোর্ট।

প্রাচ্যে ইহুদি, ক্যাথলিক ও পার্সীদের ধর্মামুষ্ঠানেও কিঞ্চিৎ মত্তের প্রয়োজন হয় বটে, কিন্তু যাজক সম্প্রদায়ের সকলেই অত্যধিক মত্তপানের বিরুদ্ধে প্রচারকার্য করে থাকেন।

গল্পচ্ছলে প্রচলিত আছে :

দ্বিপ্রহর রাত্রে এক ধার্মিক যুবক
নিদ্রা যায় ; ঐ তার একমাত্র শখ।
একমাত্র স্থখ তার ঐ নিদ্রা বটে,
—পিতা তার বৃদ্ধ অতি, কখন কি ঘটে।
ভগিনীটি বড় হল, বিয়ে দেওয়া চাই
দিবারাত্রি খাটে, আহা, গোনে কড়ি পাই।
যৌবনেই লোলচর্ম হল অস্থি-সার
নিদ্রাতেই ভোলে তাই নির্দয় সংসার ॥

আপনারা তো আর ‘কেছা সাহিত্য’ পড়েন না। হায়, আপনারা জ্ঞানেন না, আপনারা কি নিধি হারালেন ! ‘বিভাসুন্দর’ পড়ে যখন আনন্দ পান, তখন কেছা সাহিত্যে নিশ্চয়ই পাবেন।

আমার নিজের বিশ্বাস কেছা সাহিত্যের অমুপ্রেরণাতেই বিভাসুন্দরের সৃষ্টি। তা সে যাক।

এবারে কেছাটাই শুনুন :

এই কেচ্ছা শোনে যেবা এই কেচ্ছা পড়ে
 উত্তম চাউল পাবে রেশনে না ল'ড়ে ।
 বারো আনা দরে পাবে কিলোর ইলিশ
 সরিষার তেল পাবে না সয়ে গর্দিশ ।
 দেড়টি টাকায় কিলো শোনো পুণ্যবান
 খুশীতে ভরপুর হবে জমীন আসমান ॥

এ সংসারে যে মেলা পাপ মেলা হুঃখ সে বিষয়ে কারো মনে কোনো সন্দেহ নেই । কিন্তু এগুলো আসে কোথা থেকে ? সেমিতি—অর্থাৎ ইহুদি, খৃষ্টান, মুসলিম গুরুরা বলেন শয়তান মানুষকে কুপথে নিয়ে গিয়ে পাপ হুঃখের সৃষ্টি করে । পক্ষান্তরে ভারতীয় তিনটি ধর্মেরই বিশ্বাস পূর্বজন্মের অর্জিত পাপপুণ্যের দরুন এ জন্মেও স্বঃখহুঃখ দেখা দেয়—কাজেই হিন্দুধর্মে শয়তানের প্রয়োজন নেই । একদা কিন্তু এই হিন্দু ধর্মেরও শয়তান জাতীয় একটি অস্তিত্বের আবির্ভাব হয়ে উপযুক্ত প্র্যাকটিসের অভাবে লোপ পায় ।

নল দময়ন্তীর উপাখ্যান যদিও মহাভারতে স্থান পেয়েছে তবু আমার বিশ্বাস মূল গল্পটি বৈদিক যুগেও প্রচলিত ছিল । গ্রীক দেবতা প্রমিথিয়ুস চোঙা বা নলের ভিতর করে আগুন চুরি করেন ; নলরাজও ইন্দ্র প্রজ্বলনে হুঃচতুর ছিলেন । স্বয়ং দেবতার প্রমিথিয়ুসের শক্রতা করেন । নলের শত্রুতা করে স্বয়ং দেবতার দময়ন্তীর স্বয়ংবয়ে উপস্থিত হন—নলকে তাঁর বলভা থেকে বঞ্চিত করার জন্তে ।

এই নলের শরীরে পাপ কলিরূপে প্রবেশ করেন । এই কলিই আর্ষধর্মে শয়তানের অপজিট নাষার । মনে করুন সেই শয়তান বা কলি ঐ নিদ্রিত যুবকটির সামনে দিল দেখা :

হঠাৎ দেখিল মর্দ সম্মুখে শয়তান
 নিদ্রা তার সঙ্গে সঙ্গে হৈল খানখান ।
 শয়তানের হাতে হেরে ভীষণ তরবার
 আকাশ-পাতাল জুড়ে ফলাটা বিস্তার ।
 ত্রিনয়ন, কণ্ঠে তার নৃমুণ্ডের মালা
 জিহ্বা তার রক্তময় যেন অগ্নি ঢালা ।

ইটি আসলে কথকতা । অতএব তাবৎ বক্তব্য ছন্দে দিলে রসভঙ্গ হয় ।

যুবক বেতস পত্রের গ্রায় কস্ত্রমান ।

শয়তান হুকার দিয়ে বললে, 'আজ থেকে স্বর্গ-মর্ত্য আমার পরিপূর্ণ দখলে এসেছে । তোকে আমি এই তরবারি দিয়ে দুই টুকরো করবো । তার পূর্বে

আমার শুব গেয়ে নে।’

যুবা কাঁদতে কাঁদতে বললে, ‘আমার মরতে কোন আপত্তি নেই, কিন্তু আমি মরে গেলে আমার বৃদ্ধ পিতার জন্তে কে অন্ন আহরণ করবে? আমাকে তুমি নিষ্কৃতি দাও।’

শয়তান ক্ষণতরে চিন্তা করে বললে, ‘তোমাকে ছাড়তে পারি এক শর্তে। তুমি তোমার পিতাকে হত্যা করো। তাহলে তোমার সমস্যাও সমাধান হয়।’ শয়তান অট্টহাস্য করে উঠলো।

পুত্র আর্ত ক্রন্দন করে বললে, ‘অসম্ভব! সম্পূর্ণ অসম্ভব!

পিতা মোরে জন্ম দিল বাল্যোত্তে আরাম

কেমনে হইব আমি নেমকহারাম!’

‘নেমকহারাম’ শুনে শয়তানের ক্রোধ চরমে পৌঁছেছে। কারণ সে একদা আল্লার সঙ্গে নেমকহারামী করেছিল হিতাহিত জ্ঞানশূন্য হয়ে—‘হিত’ অবশ্য শয়তানের ধারণা অহুযায়ী যেটা হিত—বললে, ‘তা হলে তুমি তোমার ভগিনীকে ধর্ষণ করো।’

যুবা এবারে আর কোনো উত্তর দিল না। সে মৃত্যুর জগ্ন প্রস্তুত হল।

কিন্তু শয়তানের এ ব্যবস্থা মনঃপূত হবে কেন? সে চায় যুবাকে দিয়ে পাপ করাতে। তাই অগ্ন ট্যাকটিক অবলম্বন করে বললে, ‘তোমাকে শেষ মুক্তির উপায় দিচ্ছি। এই নাও, এক পাত্র মত্ত পান করো।’

যুবা ভাবে :

মত্ত পান মহা পাপ সর্ব শাস্ত্রে কয়

এ পাপ করিলে গতি নরকে নিশ্চয়।

যাইব নরকে আমি নাহি কোনো ডর

শয়তানের শর্ত হীন, পাপিষ্ঠ, বর্বর।

অনিচ্ছায় সে করলে মত্ত পান। তারপর কাহিনীটি সংক্ষিপ্ত।

মত্তপান করে পরিপূর্ণ মত্তাবস্থায় পাপপুণ্যজ্ঞানহীন যুবা শয়তানের ঐ ‘হীন পাপিষ্ঠ বর্বর’ কর্ম দুটি করে ফেলল।

কাহিনীটি সর্বত্র বলা চলে না। কিন্তু যে মহাজন এটির কল্পনা করেন তিনি স্পষ্টত কাউকে ছেড়ে কথা বলতে চান নি, কোনো পাপ স্পেয়ার করতে চান নি। পৈশাচিক বীভৎস রস সৃষ্টি করে সর্ব মানবের হৃৎকন্দরে ভগবানের ভয় প্রবেশ করাতে চেয়েছিলেন।

এ তো গেল এক পক্ষ। অন্য পক্ষ কি বলেন, তার অহুসন্ধান আমি বহুকাল ধরে করে আসছি। কারণ আরব তথা অন্যান্য প্রাচ্যভূমিতে এ তথ্য সর্ববাদি-সম্মত যে, হেন কাহিনী এ পৃথিবীতে নেই যার বিপরীত গাথাও নির্মিত হয় নি। সেটিও পেয়েছি।

কিছুকাল পূর্বে টুরিজম-প্রসার সংস্থার আমি সদস্য হয়ে যাই—আমার একমাত্র ‘গুণ’ যে, কোন দেশই আমাকে দীর্ঘকাল সহ করতে পারে না বলে আমি সে-দেশ থেকে সংক্ষেপে বিতাড়িত হই, ফলে আমার বহু দেশবাস, বহু দেশদর্শন হয়। এসব দেশের দেওয়ানি আদালতে দেউলৈদের যে লিস্ট টাঙানো থাকে তার প্রত্যেকটিতে আমার নাম পাবেন। যদি কোনোটিতে না পান তবে বুঝে নেবেন সে দেশে আমি নাম ভাঙিয়েছিলুম। বস্তুত আমি কোনো দেশের, কি স্বদেশের কি বিদেশের, কারো কাছে অশ্বলী থেকে মরতে চাই নে।

সেই টুরিজম সংস্থার এক মিটিংএ জর্নৈক সজ্জন সভারস্তেই বলেন, ‘ভদ্র-মহোদয় ও মহিলাগণ, কর্মসূচী আরম্ভ করার পূর্বেই আমার একটি বক্তব্য নিবেদন করি।

প্রবাদ আছে, মূর্গী-ঘরে যদি স্থাল ঢুকতে দাও, তবে সকালবেলার মম্লেটটির আশা ত্যাগ করেই ক’রো। তাই যদি দেশ থেকে মত্তপান একদম কোঁটিয়ে বের করে দাও, তবে ইয়োরোপীয় টুরিস্টের আশা ক’রো না; সে মম্লেটটি আমাদের প্লেট থেকে অন্তর্ধান করবে। অতএব, আপনারা এবং আপনাদের সরকার স্থির করুন, আপনারা টুরিজম চান, না দেশকে মত্তহীন করতে চান। আমার কাছে ছই-ই বরাবর।’

ভারী স্পষ্ট বক্তা। ওদিকে মুরুব্বীদের অনেকেই গাঙ্গীটুপি পরিহিত। এটাও চান ওটাও চান, কিন্তু কি করে উলঙ্গ ভাষায় বলেন, মদটা না হয় থাক। ওঁদের মতলব, এমন এক অভিনব কোঁশল বের করা, যার প্রসাদে আঙা না ভেঙেও মম্লেট বানানো যায়! অতএব এসব ক্ষেত্রে যা উইদাউট ফেল্ করা হয় তাই সাব্যস্ত হল। পোস্টপোন করো।

মিটিঙের শেষে আমাদের জগ্ন লাঞ্চের ব্যবস্থা ছিল। আমি শক্তিত হয়ে পালাবার চেষ্টা করেছিলুম। সরকারী পয়সায় লাঞ্চকে আমি লাঞ্ছনা নাম দিয়েছিলুম। ওদের ডিনারকে অনেকে সাপার বলতেন। আমি বলতুম suffer : সংক্ষেপে ছপুরে লাঞ্ছনা, রাতে suffer.

আমার অবস্থা দেখে সেই স্পষ্টভাষী বক্তা আমাকে সন্তর্পণে গাধা-বোটের মত টেনে টেনে করিডরে বের করে দে ছুট—ভদ্রতা বাঁচিয়ে। সেই হোটেলের

তার কামরা ছিল। সেখানে বসে আমার হাতে মেহু এগিয়ে দিলেন। উৎকৃষ্ট আহাৰাদি এল। তার পূৰ্বে জিন এল, বিয়ার এল। তিনি খেলেন সামান্য়ই।

বললেন, ‘যত সব আদিখ্যেতা। কোনো জিনিসে একটা ক্লিয়ার পলিসি নেই। বিশ্বমুদ্র লোক মদ খেয়ে রাস্তায় গড়াগড়ি দিক, এটা কেউই চায় না। ফ্রান্সের মত এলকহলিজম একটা সমস্তাৰুপে দেখা দিক, সেটাও কেউ চায় না। অথচ ইংরেজ—তথা তাবং ইয়োরোপীয়রা—বিজনেস পাকাপাকি করে দুপুর বেলা ‘বারে’ দাঁড়িয়ে।’

আমাকে বললেন, ‘তুনেছি আপনি সাহিত্যিক। একটা ঐ মতীফের (ধরনের) গল্প শুনবেন?’

আমি বললুম ‘আলবৎ, একশ বার।’

‘হরপার্বতী সাইকল জানেন?’ অৰ্থাৎ তাঁদের নিয়ে জনসাধারণের গল্প? তারা যে একে অত্ৰের সঙ্গে বাজী ধরেন?

এটা তারই একটা।

হরপার্বতী শূন্তমার্গে উড়ে যাচ্ছেন। আকাশ থেকে দেখতে পেলেন ঝাঁকে ঝাঁকে পুণ্যার্থী গঙ্গাস্নান করছে। পার্বতী তাই দেখে মুহু হাস্ত করলেন।

শিব বললেন, ‘কি হল?’

পার্বতী খিলখিল করে হেসে বললেন, ‘এবারে তোমার নরকের পথ বন্ধ হল। বিষ্ণু বহুকাল ধরে যমের ঐ পশ্চিমের বাড়িটা চাইছিলেন সেটা পেয়ে যাবেন। বেচারা যম! জানো, যমের সহোদর উকিল ডাক্তারদের পসার কমে গেলে তাদের কি অবস্থা হয়?’

‘পসার কমবে কেন?’ শিব শিবনেত্র হয়ে শুধোলেন।

কোঁতুকে হাসিলা উমা কটাক্ষে লক্ষিয়া হর পানে। বললেন, ‘কে আর যাবে নরকে? দেখছ না, তামাম দুনিয়ার লোক হৃদমুদ্র হয়ে গঙ্গাস্নান করছে। সবাই হবে নিম্পাপ। নরকে যাবে কে? তোমাকে বলি নি পই পই করে ঐ গঙ্গাটাকে তাড়াও।’ আমার হোস্টটি গল্প ধামিয়ে শুধালেন, ‘জানেন বোধহয়, গঙ্গা হলেন পার্বতীর সতীন!’

‘গঙ্গা তরঙ্গিনী, শিবের শিরোমণি।’

হোস্ট বললেন, ‘শিব এই গঙ্গাস্নানের কথা শুনে নিশ্চিন্ত হয়ে বসলেন,—কিন্তু তার পূৰ্বেই

‘হর প্রতি প্রিয়ভাবে কন হৈমবতী,

বৎসরের ফলাফল থাক্ পশুপতি।’

যমের রাজত্ব যাবে এইটুকু জানি
অমৃত-রেশন-শপও স্বর্গ নেবে মানি ।
ভেজাল না হয় শুধু এই লাগে ভয়
স্বর্গের হাউসিং লাগি চিন্তা মহাশয় ।’

থুড়ি ! আর কথকতা নয় । আমার হোস্ট এ-পদ্ধতি অবলম্বন করেন নি ।

শিব কঙ্কেটা রথের স্টারগার্ড-এ (আকাশে মাড্-এর পরিবর্তে আকছারই নক্ষত্র চূর্ণ উড়ে এসে রথটা ধূলিময় কবে বলে ওটা স্টারগার্ড) কঙ্কেটা ঠুকে ঠুকে সাফ করতে করতে বললেন, ‘কিছু ভয় নাই, ডার্লিং । যারা স্নান করছে তারা এর পুণ্যফলে বিশ্বাস করে না ।’

পার্বতী তাজ্জব মেনে বললেন, ‘সে কী ! তাবৎ পুরাণে যে পষ্ট লেখা রয়েছে । এখন তো ছাপাও হচ্ছে, বেতারেও প্রচার হয়, যে-পণ্ডিত নেহরু—’

শিব তখনো ইণ্ডিয়ার উপরে । ডিফেন্স অব ইণ্ডিয়া আইনের কথা ভেবে তাড়াতাড়ি বললেন, ‘আমার কথা বিশ্বাস করো আমি প্রমাণ করতে পারি ।’

যথারীতি হু’জনাতে বাজী ধরা হল—সূর্যোদয় থেকে সূর্যাস্তের ভিতর শিব প্রমাণ করবেন, গঙ্গাস্নান যারা করে তারা মা-গঙ্গার কল্যাণে নিষ্পাপ হল বলে বিশ্বাস করে না ।

অতি প্রত্যাষে বাজীর চুক্তিমত পার্বতী রাজরাজেশ্বরীর মহিমাময় সজ্জা পরে কিন্তু অংশিয় বিষণ্ণ বদনে বসলেন গঙ্গাতীরে । আর তাঁর কোলে মাথা রেখে লম্বা হয়ে শুয়ে রইলেন শিবঠাকুর—তাঁর সর্বাঙ্গে গলিত কুষ্ঠ !

গঙ্গাস্নান সেরে উঠে এ দৃশ্য দেখে প্রথম ব্রাহ্মণ অবাক । কৌতূহল দমন না করতে পেরে দরদী কণ্ঠে শুধালো, ‘মা, এ কি ব্যাপার !’

নিখুঁত ক্ষুদ্র দুটি নাসারন্ধ্র দিয়ে উষ্ণতম দীর্ঘশ্বাস ফেলে পার্বতী বললেন, ‘বাবা, আমার কপাল । দেখতেই তো পাচ্ছেন, আমার স্বামীর অবস্থা । তবে ভগবানের দয়ায় এক গণৎকারের সঙ্গে দেখা । সে তাঁর হাত দেখে বলেছে, কোন নিষ্পাপ পুরুষ তাঁকে স্পর্শ করা মাত্রই তিনি সম্পূর্ণ সুস্থ হয়ে যাবেন ।’

ব্রাহ্মণ কাঁচুমাচু হয়ে ‘হ্যাঁ মা, তা মা’, বলে বাৎ মাছটির মত মোচড় মেরে হাওয়া ।

পার্বতী তো বজ্রাহত । লোকটা এইমাত্র গঙ্গাস্নান করে নিষ্পাপ হয়ে মা গঙ্গার কোল থেকে বেরিয়ে এল । তার মুখেও দয়ামায়ার চিহ্ন । তবে কি—তবে কি গঙ্গাস্নানে তার বিশ্বাস— ! শিব যুহু হাস্য করলেন ।

কিছুক্ষণ পরেই আরেক স্নান-সমাপ্ত দ্বিজ । কথোপকথন পূর্ববৎ । বাৎ

মাছের মোচড়টিও তখন। পার্বতী দিশেহারা। ভোলানাথ আশ্রদেশ বিস্তীর্ণ করলেন।

চললো যেন প্রাশেসন। পার্বতীর গলা থেকে একই রেকর্ড বেজে চললো। ফল একই। ধূর্জটি গঙা দুই হাই তুলে পদ্মনাভ স্বরণে এনে ঘুমিয়ে পড়লেন। দেবসমাজে এই হলো ঘুমের বড়ি সনোরিল।

করে করে বেলা দ্বিপ্রহর। ভেঙে গেছে প্রভাতের হাট, কোলাহল থেমে গেছে, জনপদবাট পায়হীন। গঙ্গাতীরও ভূতনাথের শ্মশানসম নিজ্জন।

অপরাহ্ন। পার্বতীর ক্লান্তি এসে গেছে। বললেন, ‘নন্দীকে ডাকো, বাড়ি যাই। আমি হার মানলুম।’

শিব বললেন, ‘সন্ধ্যা অবধি থাকার কথা। তাই হবে।’

এ তো কলকাতা নয় যে বাবুরা হাওয়া খেতে সঙ্কেবেলা গঙ্গাতীরে আসবেন। কাগ-কোকিলও সেখানে আর নেই।

এমন সময় ক্ষীণ কনে দেখার মিলোয় মিলোয় আলোতে দূর থেকে দেখা গেল এক ইয়ার-গোছ নটবর। ডান হাত দিয়ে তুড়ি দিতে দিতে গান গাইছে, ‘লে লে শাকী, ভর দে পেয়ালা।’ বাঁ বগলে হাফ-পাট। বদনটি তার প্রফুল্ল। আপন মনে গান গাইতে গাইতে এদিক পানেই আসছে।

আসন্ন সন্ধ্যায় নিজ্জন গঙ্গাতীরে অপরূপ সুন্দরী দেখে সে থমকে দাঁড়ালো। আপন মনে ‘মাইরি’ বলতে না বলতে হঠাৎ তার চোখ গেল সিঁথির সিঁদুরের দিকে। মাতাল যে কখন আচম্বিতে অকারণ পুলকে নেচে ওঠে, আর কখন যে সঙ্গে সঙ্গে হঠাৎ লজ্জা পেয়ে মাটির সঙ্গে মিশে যায়—সেটা পাকা ভুড়ির ভুড়িও আগভাগে বলতে পারে না। এবং মাতালের পুলক এবং কুঠা দুইই তখন পৌঁছয় চরমে, হাফাহাফি সঙ্কিস্থলের বেনের পথই যদি সে নেবে তবে তো সে নর্মাল! বোতলে পয়সা বরবাদ করবে কেন?

মাতালের কোতুহল হল। তহুপরি সঙ্গে সঙ্গে তার ধর্মবুদ্ধিও জাগ্রত হল। মেয়েটাকে সাবধান করে দেওয়া উচিত। এই ভরসঙ্কেবেলায়—

কুঠায় যেন আপন পাঞ্জাবির ভিতর মায় পা দুখানা, সর্বশরীর লুকিয়ে নিয়ে বললে, ‘মা, এই অবেলায়, আপনি, এখানে, জানেন না, কি বলবো, কিন্তু কেন?’

পার্বতী মাতাল দেখে প্রথমটায় সঙ্কুচিত হয়ে ঘাড়টা একটু ঘুরিয়ে নিয়েছিলেন। মাতাল কিন্তু মাটির দিকে তাকিয়ে রইল ঠায় দাঁড়িয়ে। কী আর করেন জগন্মাতা পার্বতী? আর বলাও তো যায় না, মাতাল! কখন রঙ বদলায়।

থেমে থেমে বললেন তাঁর হৃদয় কাহিনী হৃদয়তর নির্ধারকরূপে।

সঙ্গে সঙ্গে মাতালের মুখে উৎসাহ আর আনন্দের ছাতি। হাসিও চাপতে পারে না।

কোন গতিকে বললে, ‘হায় রে হায়, এই সামান্য বিষয় নিয়ে মা, তোমার দুর্ভাবনা! তুমি এক লহমা বসো তো মা শান্ত হয়ে।’

তারপর বললে, ‘চতুর্দিকে কিন্তু চোর-চোঁটার পাল। হেঁ হেঁ—মা, কিছু মনে করো না, ঐ যে রইল বোতলটা তার উপর আধখানা চোখ রেখো।’

বিড়বিড় করে আপন মনে বললে, ‘এই মাঘের শীতের ভরসঙ্কেবেলা চানটা না ধরিয়ে ছাড়লে না। মহামূল্যবান নেশাটাও মেরে যাবে দড়কছা। তা আর কি করা যায়!’

ঝপ্ করে গঙ্গায় এক ডুব মেরে উপরে উঠে খপ্ করে ধরলে শিবের চ্যাঙখানা।

বজ্রিশ নয় যেন চৌষট্টিখানা দাঁত বের করে বললে, ‘হল মা-জননী? এই সামান্য জিনিসটের জন্তে তুমি এতখানি ব্যাকুল হয়ে গিয়েছিলে? ছিঃ মা, তোমার বিশ্বাস বড় কম!’

মাঝ গাঙ্গের দিকে তাকিয়ে বললে, ‘ঐটে কি তোমাদের নৌকো? কে যেন ডাকছে? আমি তা হলে আসি। আমার আবার বেতো শরীর। পেন্নাম হই মা, বাবাজী সেবে তো উঠলো—এবারে একটু—ইয়ে মানে সাবধানে—।’

লাঞ্চ শেষ হয়ে এসেছে। সোফায় বসে সিগার ধরিয়ে হোস্ট বললেন, ‘দেশ বোর্ন-ড্রাই হোক কিংবা উচ্ছলে যাক—আমার কিচ্ছুটি বলার নেই। কিন্তু হু’ একটা মাতাল না থাকলে ডেয়ারিং কাজ করবে কে?’

আমারও নিজের কিচ্ছুটি বলার নেই। আমি হু’পক্ষেরই বক্তব্য নিবেদন করলুম মাত্র।

আমি পক্ষ নেবই বা কেন? এক পক্ষ বলছেন আমাকে ড্রাই করে ছাড়বেন, অন্য পক্ষ বলছেন, আমাকে ভিজিয়ে দেবেন। হু’পক্ষেই দারুণ লড়াই।

দুটো কুকুর যদি এক টুকরো হাড়ি নিয়ে লড়াই করে, হাড়িটা তো তখন কোনো পক্ষে যোগ দিয়ে লড়াই করে না!

শ্রীচরণেশ্বর

কতকগুলো খেলা প্রায় সব দেশের ছেলেমেয়েরাই খেলে। যেমন মনে করো, কানামাছি কিংবা লুকোচুরি। আবার মনে করো সঁতার কাটা ;—সাহারার মরুভূমিতে, কিংবা মনে করো খুব বড় শহরে, যেখানে নদী পুকুর নেই, সেখানে যে সঁতার কাটাটা খুব চালু হতে পারে না, সেটা অনায়াসেই ধরে নেওয়া যেতে পারে। জল আছে অথচ সঁতার কাটাটা লোকে খুব পছন্দ করে না, তাও হয়। শীতকালে ইয়োরোপের সব নদী-পুকুর জমে বরফ হয়ে যায় না, তবু সেই পাথর-ফাটা শীতে কেউ পারতপক্ষে জলে নামতে চায় না—সঁতারের তো কথাই ওঠে না।

খেলাধূলো তাই নির্ভর করে অনেকটা দেশের আবহাওয়ার উপর। কিছু না কিছু জল প্রায় সব দেশেই আছে, তাই কাগজ বা পাতার ভেলা সবাই জলে ভাসায়। কিন্তু যে দেশে ঝামাঝ-ঝম্‌ বৃষ্টি নেমে আজিনা ভরে গিয়ে চতুর্দিকে জল ঠে-ঠে করে না, সে দেশের ছেলে-মেয়েরা আর দাওয়ায় বসে আজিনার পুকুরে কাগজের ভেলা ভাসাবে কি করে? অথচ ভেলা-ভাসানোর মত আনন্দ কম খেলাতেই আছে। রবীন্দ্রনাথ পর্যন্ত বুড়ো বয়সে ছেলেবেলার কথা ভেবে গান রচেন :

পাতার ভেলা ভাসাই নীরে

পিছন পানে চাইনে ফিরে।

আর ছেলেমেয়েদের জন্ত ‘শিশু ভোলানাথ’র এ-কবিতাটি তোমরা নিশ্চয় জানো :

দেখছ'না কি নীল মেঘে আজ

আকাশ অঙ্ককার ?

সাত-সমুদ্র তেরো-নদী

আজকে হব পার।

নাই গোবিন্দ, নাই মুকুন্দ,

নাইকো হরিশ খোঁড়া—

তাই ভাবি যে কাকে আমি

করব আমার ঘোড়া।

কাগজ ছিঁড়ে এনেছি এই

বাবার খাতা থেকে,

নৌকো দে-না বানিয়ে—অমনি

দিস, মা, ছবি এঁকে ।

রাগ করবেন বাবা বুঝি

দিল্লী থেকে ফিরে ?

ততক্ষণ যে চলে যাব

সাত-সমুদ্র-তীরে ।

ভারী চমৎকার কবিতা ! কিন্তু বাকীটা আর বললুম না । যাদের পড়া নেই, তারা যেন ‘শিশু ভোলানাথ’খানা খোলে, এই হচ্ছে আমার মতলব ।

তা সে কথা যাক । বলছিলুম কি, আবহাওয়ার উপর খেলাধুলো অনেকটা নির্ভর করে । আমাদের দেশ জলে ভর্তি, বিশেষ করে পূর্ব বাঙ্গলা, তাই আমাদের খেলাধুলো জমে ওঠে জলের ভিতরে বাইরে । তেমন শীতের দেশে বরফ পড়ে বিস্তর, আর তাই নিয়ে ছেলেদের খেলাধুলোর অন্ত থাকে না । ‘ধুলো’ বলা অবশিষ্ট ভুল হলো, কারণ বরফে যখন মাঠ-ঘাট, হাট-বাট সব কিছু ছেয়ে যায়, তখন তামাম দেশে এক রস্তু ধুলোর সন্ধান আর পাওয়া যায় না ।

কাবুলে যখন ছিলুম, তখন জানলা দিয়ে দেখতুম, ছেলেমেয়েরা সকাল থেকে পেঁজা বরফের গুঁড়ো হাতে নিয়ে টেলা পাکیয়ে একে ওকে ছুঁড়ে মারছে, সে টিল ছোঁড়ার সঙ্গে সঙ্গে চট করে সরে যাবার চেষ্টা করছে । যদি তাগমাকি লেগে গেল তবে তুমি ওস্তাদ ছেলে, হাতের নিশান ভালো, হয়তো একদিন ভালো বোলার হতে পারবে । আর না লাগলেও তা নিয়ে ভাবনা করা চলবে না, কারণ ততক্ষণে হয়ত তোমার কানে এসে ধাঁই করে লেগেছে আর কারো ছুঁড়ে মারা গোলা । কানের ভিতর থানিকটা বরফের গুঁড়ো ঢুক গিয়ে কানের ভিতরকার গরমে গলতে আরম্ভ করেছে । ভারী অস্বস্তি বোধ হয় তখন—মনে হয়—যেন কেউ হুড়হুড়ি দিচ্ছে । তখন খেলা বন্ধ করে কান সাফ করার জন্ত দাঁড়াতে হয় । আর ছোঁড়াছুঁড়ির মধ্যখানে ও একম ধারা দাঁড়ানো মানেই আর পাঁচজনের তাগ হওয়া । মাথা নীচু করে যতক্ষণ তুমি কান সাফ করছো, ততক্ষণে এ-দিক, ও-দিক, চতুর্দিক থেকে গোটা দশেক গোলাও খেয়ে ফেলেছ ।

তা বয়েই গেল । বরফের গোলা যত জোরেই গায়ে এসে লাগুক না কেন, তাতে করে চোট লাগে না । গায়ে লাগার সঙ্গে সঙ্গেই গোলা চুরমার হয়ে যায় । কিছুটা বরফের গুঁড়ো অবশিষ্ট জামা-কাপড়ে লেগে থাকে । তা সেটা হাত দিয়ে ঝেড়ে ফেললেই হয়—না হলে গরম জামা কাপড়ের ওম লেগে থানিকক্ষণ বাদে বরফ গলে গিয়ে কাপড় ভিজিয়ে দেবে ।

নৈঃ (৫ম)—২৬

বরফ জমলেই এ খেলা জমে উঠতো। আর আমি কাজকর্ম ধামাচাপা দিয়ে জানালার কাছে গিয়ে বসতুম।

এ খেলায় সত্যিকার গুস্তাদ ছিল একটি সাত-আট বছরের ছেলে। খেলার মধ্যখানে সে এমনি চর্কিবাজির মত ঘুরত যে তার গায়ে গোলা ছোঁড়ে কার সাধি। আর আমাদের দেশের পাকা লেঠেলের মত সে একাই জন আষ্টেককে অনায়াসে কাবু করে ফেলত। ভারী মিষ্টি চেহারা, পাকা আপেলের মত টুকটুকে দু'টি গাল, নীল চোখ, আর সেই ছ'চোখে যেন ছনিয়ার মত দুইমি বাশা বেঁধে বসে আছে। নাম ইউসুফ, পাশের বাড়িতে থাকে, আর তার বাপ আমাদের কলেজের কেরানী। আমাকে পথে পেলে সেলাম করে কিন্তু সসম্মত সেলামের সময়ও চোখের দিকে তাকালে মনে হত ছেলেটা কোনো এক নতুন দুইমির তালে আছে। যদি জিজ্ঞেস করতুম, 'কি রকম আছিস?' তাহ'লে এক গাল হেসে কি একটা বলত, যার কোনো মানে হয় না। কিন্তু সেই হাসির ফাঁকে ফাঁকেও আমি স্পষ্ট দেখতে পেতুম কোনো একটা দুইমির স্বেযোগ পেলে সে আমাকেও ছাড়বে না।

সে-ই একদিন বাড়ি বয়ে এসে সোৎসাহে খবর দিয়ে গেল, আমি তাদের ইস্কুলে বদলি হয়ে এসেছি। তার চোখে মুখে হাসি আর খুসী। কিন্তু তার চেয়েও বড় কথা, আমি তার চোখে যেটি লক্ষ্য করলুম সেটি হচ্ছে "এইবার আসুন শ্র, আপনাতে আমাতে এক হাত হয়ে যাবে।" আমি যে খুব ভয় পেলুম তা নয়, কারণ ছেলেবেলায় আমিও কম দুই ছিলাম না।

ওদের ইস্কুল বড় অদ্ভুত। পাঁচ-ছ' বছরের ছেলেদের ক্লাস ওয়ান থেকে আই-এ ক্লাসের ছেলেরা একই বাড়িতে পড়ে। তাই সেটাকে পাঠশালা বলতে পারো, হাইস্কুল বলতে পারো, আর কলেজ বললেও বাধবে না। আমি বদলি হলুম কলেজ বিভাগে—ফাস্ট' আর সেকেন্ড ইয়ারের ছেলেদের ইংরিজি পড়াবার জন্ত। এ ছ' ক্লাস পড়িয়ে আমার হাতে মেলা সময় পড়ে থাকত বলে একদিন প্রিন্সিপাল অছরোধ করলেন, আমি যদি ম্যাট্রিক ক্লাসের ছেলেদেরও ইংরিজি পড়াই তবে বড় উপকার হয়। আমি থানিকটে ভেবে নিয়ে বললুম, তার চেয়ে আমাকে বরঞ্চ ক্লাস ওয়ানে পড়াতে দিন। আসছে বছর ওদের সঙ্গে সঙ্গে আমাকেও প্রোমোশন দেবেন—অর্থাৎ আমি টু'তে পড়াব, তার পরের বছর থ্রী'তে। এই করে করে যাদের কলেজে টেনে নিয়ে আসতে পারব তাদের ইংরিজি জ্ঞান থেকে বৃদ্ধিতে পারবো আমি ভালো পড়াতে পারি কি না। প্রিন্সিপাল তো কিছুতেই মানেন না; বলেন, 'সে কি কথা! আপনি পড়াবেন

ক্লাস ওয়ানে !’ আমার প্রস্তাবটার তত্ত্ব বুঝতে তাঁর বেশ খানিকটা সময় লাগল। কাবুলী প্রিন্সিপালের বুদ্ধি—থাক, গুরুজনদের নিন্দে করতে নেই।

ওদিকে ক্লাস ওয়ানে হৈ হৈ রৈ রৈ। কলেজ বিভাগের অধ্যাপক আসছেন ক্লাস ওয়ানে পড়াতে !

আমার তখন আদপেই মনে ছিল না ইউসুফ ক্লাস ওয়ানে পড়ে। প্রথম দিন ক্লাসে ঢুকতেই দেখি, সে ঘরের মাঝখানে দাঁড়িয়ে সবাইকে কি যেন বোঝাচ্ছে। অমুমান করলুম, প্রতিবেশী হিসেবে সে আমার সম্বন্ধে যেটুকু জানে সেটুকু সকলকে সগর্বে সদস্তে জানিয়ে দিচ্ছে। আমার চাকর আবদুর রহমানের সঙ্গে ইউসুফের আলাপ পরিচয় ছিল। আর আবদুর রহমান ভাবতো তার মনিবের মাথায় একটুখানি ছিট আছে। আবদুর রহমান যদি সেই স্মৃতিবরটি ইউসুফকে দিয়ে থাকে, আর সে যদি ক্লাসের সবাইকে সেই কথাটি জানিয়ে দেয়, তবেই হয়েছে !

ক্লাসে মাষ্টার ঢুকলেই কাবুলের ছেলেরা মিলিটারি কায়দায় সেলুট দেয়— আফগানিস্তান মিলিটারি দেশ। আমি ক্লাসে ঢুকতেই ইউসুফ তড়াক করে স্পারি গাছের মত খাড়া হয়ে মিলিটারি সেলুটের জুকুম হাঁকল। তার পর খুশীতে ডগমগ হয়ে আপন সীটে গিয়ে বসল।

পাঁচ মিনিট যেতে না যেতেই ইউসুফ উঠে দাঁড়ালো। ‘বাইরে যেতে পারি, স্তর ?’ আমি বললুম, ‘যা, কিন্তু দেখ, আমি বাইরে যাওয়া-যাওয়ি জিনিসটা মোটেই পছন্দ করি নে। যাবি আর আসবি।’ ‘নিশ্চয় স্তর।’ বলে আরেকটা মিলিটারি সেলুট হুঁকে বেরিয়ে গেল।

এক মিনিট যেতে না যেতে ইউসুফ ফিরে এল। তাই তো, ছেলেটা তা হলে অতটা হুটু নয়। কিন্তু আরো তিন মিনিট যেতে না যেতে আমার ভুল ভাঙ্গলো। ইউসুফের পাশের ছেলেটা পড়ার মাঝখানে হঠাৎ চোঁচিয়ে বলল, ‘স্তর, আমার পকেট ভিজে গিয়েছে,—এই ইউসুফটা আমার পকেটে বরফের ঢেলা রেখেছিল।’ ইউসুফ আরো চোঁচিয়ে বলল, ‘না স্তর, আমি রাখি নি।’ ছেলেটা আরো চোঁচিয়ে বলল, ‘আলবাৎ তুই রেখেছিস।’

ইউসুফ বলল, ‘তোর ডান পকেট ভেজা, আমি তো বাঁ দিকে বসে আছি।’ ছেলেটা বলল, ‘তুই না হলে বরফ আনল কে ? তুই তো এক্ষুনি বেরিয়ে গিয়েছিলি।’

হট্টগোলের ভিতর আমি যে তাবৎ তর্কাতর্কি স্পষ্ট শুনতে পেয়েছিলুম তা নয় কিন্তু কথা কাটাকাটিটা মোটের উপর এই রকম ধারায়ই চলেছিল। বিশেষ করে শেষের যুক্তিটা আমার মনের উপর বেশ জোর দাগ কাটল। ইউসুফ না

হলে বরফের টেলা আনল কে ? আর বরফ তো আগের থেকে ঘরে এনে জমিয়ে রাখা যায় না—গলে যায় ।

রাগের ভান করে কড়া হুকুম দিলুম, 'ইউসুফ, তুই বেকির উপর দাঁড়া ।'

ইউসুফ বিন্দুমাত্র আপত্তি না করে তড়াক করে পলটনি কায়দায় বুট দিয়ে খটাস করে শব্দ করে বেকির উপর দাঁড়িয়ে ফের সেলুট দিল । পূর্বেরই বলেছি আফগানিস্তান মিলিটারি দেশ—ছোট ছেলেরা পর্যন্ত পলটনি জুতা পরে আর হুকুম তামিল করার সময় পলটনি সেলুট ঠোকে ।

ভাবলুম, ইউসুফ আমাদের দেশের ছেলের মত 'বসি, স্তর ?' বলে অশ্রু নয় করবে । আদপেই না । চাঁদপানা মুখ করে ঠায় দাঁড়িয়ে রইল । শেষটায় আমিই হার মানলুম । বললুম, 'বস্ । আর ও রকম করিস নে ।' ইউসুফ আরেকবার সেলুট জানিয়ে বসে পড়ল ।

বাড়ি ফেরার সময় বুঝতে পারলুম, সব দেশের খেলাধুলা যে রকম আবহাওয়ার উপর নির্ভর করে, ছুটুমিটাও ঠিক সে রকম অনেকটা আবহাওয়ার উপর নির্ভর করে । আমাদের দেশের ছেলেরা বরফের গুঁড়ো পাবে কোথায় যে তাই নিয়ে ছুটুমি করবে ?

তারপর দু' তিন দিন ইউসুফ ঠাণ্ডা । ভাবলুম প্রথম দিনের সাজাতে হয়তো ইউসুফের আক্কেল হয়ে গিয়েছে । আর জ্বালাতন করবে না ।

আমাদের দেশ গরম, তাই ঘরে ঘরে পাথার ব্যবস্থা থাকে । কাবুল ঠাণ্ডা, তাই সেখানে ক্লাসে ক্লাসে আগুন জ্বালাবার ব্যবস্থা । একদিন ক্লাসে ঢুকে দেখি ঘরভর্তি ধুঁয়া, আর চিমানির আগুন নিভে গিয়েছে ।

ছেলেরা কাশছে আর ইউসুফ পাতলুনের দুই পকেটে হাত পুরে অত্যন্ত বিষণ্ণ নয়নে তাকিয়ে আছে । দেশে টানা পাথার দড়ি ছিঁড়ে গেলে যে রকম চাপরাসীর সন্ধানে ছেলে পাঠানো হয় আমি তেমনি বললাম, 'চাপরাসীকে ডাকো ।' ইউসুফকে পাঠানো আমার মতলব ছিল না । কিন্তু সে চট করে 'এক্সনি ডাকছি স্তর' বলে ছট করে বেরিয়ে গেল । থামাবার ফুরসৎ পেলুম না ।

মিনিট তিনেক পরে এলেন খুদ্দা গিল্পিপাল । মুখে কেমন ঘেন একটু বিরক্তি । বললেন, 'আপনি নাকি আমাকে ডেকে পাঠিয়েছেন ?' আমি তো অবাক !

'সে কি কথা ! আমি আপনাকে ডেকে পাঠাবো কেন ? আমার দরকার হলে আমি নিজেই তো আপনার কাছে যেতে পারি । আমি তো ডেকে পাঠিয়েছি চাপরাসীকে, আগুন নিভে গিয়েছে বলে ।' গিল্পিপালের মুখ থেকে

বিরক্তির ভাব কেটে গিয়ে দেখা গেল রাগ। ইউসুফের দিকে ফিরে বললেন, 'তবে তুই আমাকে ডাকলি কেন?'

ইউসুফ তার ড্যাভড্যাভে চোখ হরিণের মত করণ করে বলল, 'আমি তো সুনলুম, প্রিন্সিপাল সায়েবকে ডেকে নিয়ে আয়। তা কি জানি ওঁর ফার্সী আমি ঠিক বুঝতে পারি নি হয়তো।' প্রিন্সিপাল ইউসুফকে দুই ধমক দিয়ে চলে গেলেন।

কি ঘড়েল ছেলে রে বাবা! আমি বিদেশী বলে যে খুব ভালো ফার্সী বলতে পারি নে তার পুরো স্বেযোগ নিয়ে সে আমাকে এক দফা বোকা বানিয়ে দিল।

ততক্ষণে চাপরাসী এসে আগুন জালাবার চেষ্টা করছে কিন্তু কিছুতেই আগুন জ্বলতে চায় না। ঘর আরো ধুঁয়োয় ভরে গিয়েছে। ছেলেরা কাশতে আরম্ভ করেছে, কারো কারো চোখ দিয়ে জল বেরুচ্ছে, আমার তো প্রায় দম বন্ধ হবার উপক্রম। চাপরাসী ততক্ষণে হার মেনে চলে গিয়েছে বুড়ো চাপরাসীর সম্মানে—সে যদি কিছু করতে পারে। ইউসুফ বলল, 'শ্র, জানলাগুলো খুলে দিই?' আমি বললুম, 'দাঁও।' দম বন্ধ হয়ে তো আর মারা যেতে পারি নে।

এক মিনিটের হু-হু করে ঠাণ্ডা হাওয়া ঘরের ভিতর ঢুকে আমাদের হাড়ে হাড়ে কাঁপন লাগিয়ে দিল। পড়াবো কি, আর পড়বেই বা কে? আমাদের দেশে যে রকম ভয়ঙ্কর পরমের দিনে ক্লাসের পড়ার দিকে মন যায় না, কাবুলে তেমনি দারুণ শীতের মাঝখানে পড়াশোনা করা অসম্ভব। হাতের আঙ্গুল জমে গিয়েছে, কলম ধরতে পারছি নে, বইয়ের পাতা ওন্টানো যায় না। ছেলেরা ততক্ষণে আবার আপন আপন দস্তানা পরে নিয়েছে—আর দস্তানা-পর্য হাতে লেখা, পাতা ওন্টানো, এসব কাজ আদপেই করা যায় না।

ততক্ষণে বুড়ো চাপরাসী এসেও হার মেনেছে। কিন্তু লোকটা বিচক্ষণ। খানিকক্ষণ চেষ্টা দেওয়ার পর বলল, 'ধুঁয়ো উপরের দিকে না উঠে ঘর ভরে দিচ্ছে। মনে হচ্ছে ধুঁয়ো বেরোবার চোঙা কেউ বন্ধ করে দিয়েছে।'।

তদারক করে দেখা গেল বুড়ো ঠিক কথাই বলেছে। চোঙার ভিতরে, উপরের দিকে হাত চালানোতে বেরিয়ে এল একটা ক্যানাস্তার টিন, ছেঁড়া কঙ্কল দিয়ে জড়ানো। বোঝা গেল, বেশ যত্নের সঙ্গে, বুদ্ধি খরচ করে চোঙাটি বন্ধ করা হয়েছে, যাতে করে ধুঁয়ো উপরের দিকে না গিয়ে সমস্ত ক্লাস ভরে দেয়।

আমি হুঙ্কার দিয়ে বললুম, 'চোঙা বন্ধ করল কে?'

সমস্ত ক্লাস এক গলায় বলল, 'নিশ্চয়ই ইউসুফ। আর কে করতে যাবে?'

ইউসুফের দুশমন গোলাম রহুল বলল, 'আমি যখন ক্লাসে ঢুকি তখন ইউসুফ ছাড়া আর কেউ ক্লাসে ছিল না। নিশ্চয়ই ও করেছে।'

ইউসুফ বলল, 'আমি যখন ক্লাসে ঢুকলুম তখন গোলাম রহুল ছাড়া আর কেউ ক্লাসে ছিল না। নিশ্চয়ই ও করেছে।'

গোলাম রহুল চটে গিয়ে বলল, 'মিথোবাদী!'

ইউসুফ মুক্করীর স্বরে বলল, 'এই, শ্রুর সামনে গালমন্দ করিস নে।'

কি জ্যাঠা ছেলে রে বাবা! বললুম, 'তুই এদিকে আয়।'

কুইক মার্চে সামনে এসে সেলুট দিল। আমি বললুম, 'তোকে ভালো রকমের সাজা দেওয়া উচিত। আজকে সমস্ত ক্লাসের পড়া নষ্ট করেছিস। ঢোক গিয়ে টেবিলের তলায়। চূপ করে সেখানে বসে থাকবি, আর কথাটি কয়েছিস কি তোর গলা কেটে ফেলব।'

সুড় সুড় করে টেবিলের তলায় গিয়ে ঢুকল।

কাবুলের ক্লাসে মাস্টার মশায়দের টেবিল বিলিতি কায়দায় বানানো হয়। অর্থাৎ তার তিন দিক ঢাকা। শুধু মাস্টার যে দিকে বসেন সেদিকটা খোলা। মনে করো খুব বড় একটা প্যাকিং কেসের ডালাটা খুলে নিয়ে তাই দিয়ে টেবিল বানাও আর খোলা দিকটায় পা ঢুকিয়ে দিয়ে বাজটা দিয়ে টেবিলের কাজ চালাও। আমি ঠিক তেমনি ভাবে ব'সে, আর ইউসুফ চূপ করে ভিতরে। নড়নচড়ন নট কিছুর।

মনে হল ইউসুফের তা নিয়ে কোন খেদ নেই; কারণ পঞ্চাশ মিনিটের পিরিয়ডের প্রায় আধঘণ্টা সে ধুঁয়ো, প্রিন্সিপাল, আর চাপরাসী দিয়ে বরবাদ করে দেবার বিমলানন্দ আপন মনে রসিয়ে রসিয়ে উপভোগ করছে।

আমি ছেলেদের পড়াভূম মুখে মুখে। চেষ্টায়ে বলতুম I go, সমস্ত ক্লাস আমার পরে বলত I go, আমি বলতুম We go, ক্লাস বলত We go, এ রকম ধারা you go, you go, কিন্তু Rahim goes, Karim goes, তারপর হকার দিয়ে বলতুম Rahim and Karim go-o-o-o-o।

ওদিকে ইউসুফ চূপচাপ। জিজ্ঞেস করলুম—'তুই বলছিস না কেন রে?' বাজের অথবা টেবিলের, যাই বলো—ভিতর থেকে ইউসুফের গলা শোনা গেল, 'ও তো আমি জানি।' আমি বললুম, 'বলে যা।' সে সমস্ত কনজুগেশনটা ভুল না করে গড় গড় করে আবৃত্তি করে গেল। হঁ! ছেলেটা শয়তান বটে, কিন্তু পড়াশোনায় ভালো।

ঘটা পড়লো। বললুম, 'ইউহুফ বেরিয়ে আয়।' হুডুং করে বেরিয়ে এল। বললুম, 'বল আর ককুথোনো করবি নে।' কি যেন একটা বিড় বিড় করে বলল, ঠিক বুঝতে পারলুম না।

ততক্ষণে ক্লাস ডিসমিস করে দিয়েছি বলে সে একটা ছোটাসে ছোট। সেলুট সেরে ডবল মার্চ করে বেরিয়ে গিয়েছে। তখন বুঝতে পারলুম, হুটুমি করবে না এ প্রতিজ্ঞা করতে সে নারাজ, তাই তাড়াতাড়ি কেটে পড়েছে।

রেজিস্টার, বই, খড়ি, ডাস্টার গুছিয়ে নিয়ে যেই দাঁড়াব বলে টেবিলের তলা থেকে পা টেনে আনতে গিয়েছি অমনি হু'পা-ই আটকা পড়ে গেল। কি ব্যাপার! ঘাড় নিচু করে দেখি, আমার হু'জুতোর দুই ফিতে একসঙ্গে বাঁধা।

কি করে হল? এ তো বড় তাজ্জব! অবশি, বুঝতে সময় লাগল না। আমার অভ্যাস পা হু'খানি একজোড় করে বসার। ইউহুফ তারই সুবিধে নিয়ে অতি আন্তে আন্তে ফিতের গিঁঠ খুলে হু'ফিতে অর্থাৎ দুই জুতো একসঙ্গে বেঁধে দিয়েছে! আর সে এমনি মোলায়েম কায়দায় যে, আমি কিছুই টের পাই নি!

আমি হার মানলুম।

বাড়ি ফেরার পথে দূর থেকে দেখি, বাড়ির দেউড়ির সামনে ইউহুফ আমার চাকর আব্দুর রহমানকে হাত-পা নেড়ে কি সব বোঝাচ্ছে, আর বিরাট-বপু আব্দুর রহমান সর্বাঙ্গ ছলিয়ে হেসে কুটিকুটি। আমাকে দেখেই ইউহুফ চটপট চম্পট।

পরদিন কলেজ যাবার সময় আব্দুর রহমান জুতোর ফিতে বাঁধতে বাঁধতে বলল, 'এক রকম বোতামওলা বুট ফিতেওলা জুতোর চেয়ে ভাল।'

আমি চটে গিয়ে বললুম, 'বস্ বস্, আর জ্যাঠামো করতে হবে না।'

পুচ্ছ (প্র) দর্শন

কুকুর মানুষের প্রাণ বাঁচিয়েছে—এ-তথ্য কিছু নূতন নয়। কিন্তু কুকুরের কাটা লেজের অবশিষ্ট চার আঙুল পরিমাণ একটা ছ' ফুট লম্বা তাগড়া জোয়ানকে বাঁচিয়েছে—এটা অবিশ্বাস্য। কিন্তু যে-ব্যক্তি এ ঘটনাটির বর্ণনা আমাকে দেন, তিনি অনেকের কাছেই সুপরিচিত এবং তাঁরা সকলেই সানন্দে শপথ করতে প্রস্তুত হবেন যে, শ্রীযুত বিনায়ক রাও শিবরাম মসোজীকে কেউ কখনো মিথ্যা-ভাষণ করতে শোনেন নি।

আমার শুধু স্কোভ যে, বিনায়ক রাও যখন আমাকে প্রাণ্ডুক্ত ঘটনার সঙ্গে

বিজ্জড়িত তাঁর হিমালয় ভ্রমণ বর্জন করে যান, তখন আমার হৃদয় কল্পনাদৃষ্টি দিকচক্রবালে এতটুকু আভাস দেখতে পায় নি যে, আমার মত নগণ্যজনও একদিন বাঙলা সাহিত্যের সংস্পর্শে আসবে; নইলে সেদিন আমি সাতিশয় শ্রদ্ধা ও যত্নসহকারে বিনায়ক রাওয়ের ভ্রমণকাহিনীটি সবিস্তার লিখে রাখতুম। কারণ, আমাদের পরিচিত জন নিত্য নিত্য মানসসরোবর দর্শনে যায় না; তাও পিঠে মাত্র একটি ছাভারশাক নিয়ে। পরবর্তী যুগে আমাদের এক মারাঠা দম্পতি বলেন যে, মানসরোবরে (না মানস সরোবরে তাই আমি জানি নে) যাবার পথে ডাকাতের ভয় আছে বলে তাঁরা সঙ্গে সেপাইশাস্ত্রী নিয়ে যান।

বিনায়ক রাও শ্রীযুত নন্দলালের শিষ্য এবং শিক্ষাশেষে তিনি গুরু নন্দলালের সহকর্মীরূপে কলাভবনের সহকারী অধ্যক্ষের পদ গ্রহণ করেন। নন্দলাল যেরকম দেব-দেবীর ছবি আঁকতেন, বিনায়ক রাও তেমনি ভারতীয় দৃষ্টিবিন্দু থেকে ভারতীয় বাতাবরণে, ভারতীয় বেশভূষায় মাদম্মা মা-মেরির একাধিক ছবি এঁকে দেশে-বিদেশে খ্যাতি অর্জন করেন। ইয়োরোপীয় চিত্রকরদের মাদম্মা দেখে দেখে আমরা ভুলে গিয়েছিলুম যে, মা-মেরি প্যালেস্টাইন-বালা এবং প্যালেস্টাইন প্রাচ্যভূমি। বিনায়ক রাওয়ের একখানি উৎকৃষ্ট মাদম্মা কিছুদিন পূর্বেও এলগিন রোডের একটি গির্জার শোভাবর্ধন করতো।

তিনি যে চিত্রকর ছিলেন, তার উল্লেখ করছি আমি অল্প কারণে। আর্টিস্ট মাত্রেরই অন্ততম প্রধান গুণ যে, তাঁরা কোনো বস্তু প্রাণী বা নৈসর্গিক দৃশ্য দেখলেই সঙ্গে সঙ্গে তার নিজস্ব বৈশিষ্ট্যগুলো (ক্যারেকটারিস্টিক) লক্ষ্য করেন এবং ঠিক সেইগুলো মাত্র কয়েকটি আঁচড়ে প্রকাশ করতেই আমাদের কাছে রূপায়িত বিষয়বস্তু প্রাণবন্ত হয়ে ধরা দেয়। ভ্রমণ-কাহিনী বর্ণনার সময় বিনায়ক রাও দৃশ্যের পর দৃশ্য মাত্র কয়েকটি ক্যারেকটারিস্টিক শব্দের দ্বারা প্রকাশ করতেন, আর সঙ্গে সঙ্গে আমি হিমালয়ের গিরি-পর্বত-ভূষার-ঝঙ্কা চট্টি-কাফেলা সব যেন স্পষ্ট চোখের সামনে দেখতে পেতুম। সেটা এখানে এখন আমার পক্ষে ফুটিয়ে তোলা অসম্ভব কারণ আমি কোনো অর্থেই আর্টিস্ট নই।

বিনায়ক রাওয়ের গভীর বন্ধুত্ব ছিল এক জাপানী ভদ্রলোকের সঙ্গে—নাম খুব সম্ভব ছিল—এতকাল পরে আমার সঠিক মনে নেই—হাসেগাওয়া। পাঁচ ফুটের বেশী দৈর্ঘ্য হয় কি না হয়, কিন্তু তাঁর প্রত্যেকটি পেশী ছিল যেন ইম্পাতের স্প্রিং দিয়ে তৈরি। প্রায় কিছু না খেয়েই কাটাতে পারতেন দিনের পর দিন এবং বীরভূমের ১১০ ডিগ্রীতেও তাঁর মুখে কোনো ভাবের পরিবর্তন দেখা যেত না। বিনায়ক রাওয়ের সঙ্গে তাঁর আরেকটা বিষয়ে ছিল ছব্বছ মিল, ছুঁনাই

অত্যন্ত স্বল্পভাবী। হাসেগাওয়াই প্রস্তাব করেন মানসসরোবরে যাওয়ার।

আমার আজ মনে নেই, কোন্ এক সীমান্তে গিয়ে ঐ পুণ্যসরোবরে যাবার জন্ত প্যারমিট নিতে হয়। বিনায়ক রাও আমাকে বললেন, ‘সব সরকারই বিদেশীদের ভরায়, ভাবে ওরা গুপ্তচর, কি মতলব নিয়ে এসেছে, কে জানে। ওসব জায়গায় তো যায় মাত্র দু’ধরনের লোক। তীর্থযাত্রী, আর যেটুকু সামান্য ব্যবসা-বাণিজ্য আছে তার সঙ্গে সংশ্লিষ্ট কারবারী লোক—এরা যায় কারাভান বা কাঞ্চেলার দল বানিয়ে। আমি খুঁটান, হাসেগাওয়া বৌদ্ধ; মানসসরোবর আমাদের কারোরই তীর্থ হতে পারে না। তবু ফর্মে লিখে দিলুম তীর্থযাত্রী, নইলে প্যারমিট অসম্ভব। হাসেগাওয়া বললেন, “আমরা গা-ঢাকা দিয়ে রইব, যতদিন না প্যারমিট পাই, পাছে আমাদের স্বরূপ না ধরা পড়ে। ইতিমধ্যে তোমাকে মাউন্টেনীয়ারিং বা পাহাড় চড়ার আর্টে তালিম দেব।” বিনায়ক রাও বললেন, ‘আমি তো মনে মনে হাসলুম। হাসেগাওয়ার তুলনায় আমি তো রীতিমত পাসলওয়ান। আমি পাহাড় চড়ি চড় চড় করে—ও আবার আমায় শেখাবে কি? কিন্তু ভুল ভাঙল প্রথম দিনই। পাশেই ছিল একটা ছোটখাটো পাহাড়। সেইটে দিয়েই হল আমার প্যাকটিস শুরু। হাসেগাওয়া আমাকে পই পই করে বাব বাব বললেন, “কনে-বউটির মত চলি চলি পা পা করে ওঠো, নইলে আগেের পস্তাবে।” আমি মনে মনে বললুম, দুস্তোর তোর পা পা। চড় চড় করে উঠতে লাগলুম চড়াই বেয়ে—বাঘের শব্দ পেলে বাদর ঘে-ধরনে সৌন্দর্যবনে স্তম্ভরী গাছ চড়ে। উত্তম প্রস্তাব। কিন্তু মশাই, ঘণ্টাটাই পরে দেখি অবস্থা সঙ্গীন। আর যে এক কদমও পা চলে না। ভিরমি যাবার উপক্রম। সম্পূর্ণ অনিচ্ছায় আমি বসে পড়লুম একটা পাথরের উপর। ঘণ্টাটাক পরে হাসেগাওয়া আমাকে পাস করলেন, আমার দিকে তাকিয়ে একটু মুছ হেসে। তিনি চুড়ায় উঠলেন। আমি বসে বসে দেখলুম। নোমে এলেন। বিশ্বাস করবেন না, সৈয়দসাহেব, আমার আত্মাভিमानে লাগল জোর চোট।’

আমি বললুম, ‘দাক্ষিণাত্যের তীর্থ আল্লামলাইয়ের রমন মহর্ষির নাম শুনেছি নিশ্চয়ই। তিনি অরুণাচলম পাহাড়ের উপর কাটান চল্লিশ না পঞ্চাশ বছর কিংবা ততোধিক। পাহাড়াটা কিছু মারাত্মক উঁচু নয় কিন্তু ঝড়ে-বাদলায়, গরমে-ঠাণ্ডায়, কখনো বা অত্যন্ত অস্বস্থ দুর্বল শরীর নিয়ে তাঁকে দিনে অন্তত একবার করে ওঠানামা করতে হত। এক পুণ্যশীলা গ্রামের মেয়ে তাঁর জন্ত প্রতিদিন খাবার নিয়ে আসতো পাহাড়ের তলায়, যেখানে আজকের দিনের আশ্রম। তিনিও আমাদের ঐ চলি চলি পা পা-র উপদেশ দিয়েছেন, খুব ভালো

ক'রে বুঝিয়ে দিয়ে। তারপর বলো।'

বিনায়ক রাও বললেন, 'পরদিন আরেকটা পাহাড়ে চেষ্টা দিলুম। সব জেনে- শুনেও আমার কিন্তু ঐ কনে-চাল কিছুতেই রপ্ত হচ্ছিল না। আর হাসেগাওয়া প্রতিদিন আমার দিকে তাকিয়ে য়ুহু হেসে পাস্ করতেন ও জিততেন লজ্জাকর মাজিন রেখে।

'আমরা দিনের পর দিন গুহর গুনছি—পারমিট আর আসে না, ওদিকে আমরা জনমানবহীন পাহাড়গুলো চড়ছি আর ভাবছি, আত্মগোপন করেছি উত্তমরূপেই। কিন্তু ইতিমধ্যে সীজন যে বেশ এগিয়ে গিয়েছে। আর বেশী দেরি হলে তো বরফ পড়তে আরম্ভ করবে।

'শেষটায় এক বড়কর্তার কাছে ডাক পড়ল। তাঁর প্রাসাদে উঠে দেখি, ইয়া আল্লা। তার সেই উঁচু টিলার স্ট্যাণ্ডের উপর খাড়া জোরদার টেলিস্কোপ। আমরা যখন অস্ট্রিচ পাখীর মত বালুতে মাথা গুঁজে আত্মগোপনের আত্মপ্রসাদ অনুভব করছি, ইনি তখন প্রতিদিন নিৰ্ঝঙ্কাতে আমাদের প্রতিটি পাহাড় ওঠা পর্যবেক্ষণ করেছেন এবং কোঁতুহলী হয়ে আমাদের সম্বন্ধে সর্বসংবাদ সংগ্রহ করেছেন। বেশ রসিয়ে রসিয়ে আত্মোপাস্ত বললেন। আমাদের মুখ শুকিয়ে গেল—ইন্তেক যে-জাপানী বদন অনুভূতি প্রকাশে সম্পূর্ণ অনভ্যস্ত ও অনিচ্ছুক সেটিও কিঞ্চিৎ বিকৃত হল।

'কিন্তু বুখাই আতঙ্ক; আমরা খামোখাই ঘামের ফোঁটায় কুমীর দেখছিলুম। আমাদের অদৃষ্ট সুপ্রসন্ন। বড়কর্তা সর্বসংবাদ শুনে আমাদের অভিযানাকাজ্ঞা প্রসন্নতর দৃষ্টিতে আশীর্বাদ করেছেন। কারণ, আমরা ধর্ম বা অর্থ কোনোটাই সঞ্চয় করতে যাচ্ছি না—আমরা আসলে তীর্থযাত্রী নই, আর ব্যবসায়ী তো নই-ই। তবে তখনো জানতুম না, আরেকটু হলেই অনিচ্ছায়, অন্তত আমার, মোক্ষলাভটা হয়ে যেত।'

আমি বললুম, 'ধর্ম, অর্থ, মোক্ষ তিনটির তো জমা-খরচ হল, আর কাম?'

মসোজী বললেন, 'রাম, রাম।' ওর মত প্যুরিতান আমি কোনো মঠ, কোনো মনাস্টেরিতে দেখি নি।

তারপর বিনায়ক রাও আমার চোখের সামনে একটার পর একটা ছবি এঁকে যেতে লাগলেন। কত না বনস্পতি, অজানা-অচেনা বিহঙ্গের সঙ্গে প্রথম পরিচয়, আন্দোলিত উপত্যকার উপর ক্রোশের পর ক্রোশব্যাপী দোহুলামান ফুলের বহা, পার্বত্য-নদী, জলপ্রপাত, অত্রংলেশী পর্বত, পাতাললম্পর্শী অন্ধকূপ, সংকটময় গিরি-সংকট, পাহাশালা, চট্ট, পার্বত্য ভ্রমণদের জিহ্বানিষ্ফলগর্ভক তৎসঙ্গে ঘন ঘন

বৃদ্ধজুষ্ঠয় আন্দোলন দ্বারা অভিবাদন, দুর্গন্ধময় স্নেহজাতীয় পদার্থসহ চা-পানের নিমন্ত্রণসহ অতিথি সংকার। আরো এত সব বিজ্ঞাতীয় বস্তু ও কল্পনাতীত অভিজ্ঞতার বর্ণনা দিয়েছিলেন যে, সেগুলোর নির্ঘণ্ট মাত্র দিতে হলে প্রচুর অবকাশ ও প্রচুরতর পরিশ্রমের প্রয়োজন। যেতি বা এবমিনেবল স্লোম্যান সন্মুখে যে-সব কাহিনী বর্ণন করেছিলেন শুধু সেগুলো শিকের হাঁড়িতে সন্মুখে তুলে রেখেছি : অস্বদেশীয় সম্পাদক ও প্রকাশকদের শেষশয্যায় সেগুলো তাঁদের রসিয়ে রসিয়ে শুনিয়ে শুনিয়ে তাঁদের শেষ যাত্রাটি বিভীষিকাময় করে দেবার জন্তে !

বিনায়ক রাও বললেন, 'ক্রমে ক্রমে আমরা লক্ষ্য করলুম, পাহাড় থেকে নেমে আসছে সবাই, উপরের দিকে যাচ্ছে না কেউই। চট্টির পর চট্টি দেখি হয় জনমানবহীন—দরজা-খা-খা করছে কিংবা তালাবন্ধ—সমস্ত শীতকালভর এখানে তো আর কেউ আসবে না।

'আমরা চড়াইয়ের দিকে শেষ কাফেলাও মিস্ করেছি।

'কিন্তু হাসেগাওয়ার ঐ একটি মহৎ সঙ্গুণ যে, কোনো সিদ্ধান্ত নেওয়ার অত্যন্ত প্রয়োজন না হওয়ার পূর্বে তিনি ঐ নিয়ে মাথা ঘামান না।

'আমরা যতই উপরের দিকে উঠছি, ততই রাস্তা এবং চট্টি জনবিরল হতে লাগলো। শেষটায় আমরা ঘণ্টার পর ঘণ্টা চলার পরও কাউকে নেমে আসতে দেখি না—ওঠার তো প্রস্নই ওঠে না। তখন দেখি এক পরিত্যক্ত চট্টির সামনে একজন সাধু বসে আছেন। সন্ধ্যা হয়-হয়। মোক্ষম শীত পড়েছে কিন্তু সাধুজী কোঁপিনিসার। সর্বান্তে ভস্মও মাথেন নি কিংবা অস্ত্র কোনো ব্যবস্থারও প্রয়োজন-বোধ করেন নি। অথচ দেহটির দিকে তাকালে মনে হয়, এইমাত্র প্রচুর তেল ডলাইমলাই করে স্নান সেরে উঠেছেন—গা বেয়ে যেন তখনো তেল ঝরছে। আমাদের সঙ্গে চাপাতি ও শুকনো তরকারি ছিল। সাধুজীকে তার থেকে হিন্তে দিলুম। তিনি কোনো প্রকারের বাক্যালাপ না করে খেলেন। আমরাও কোনো প্রশ্ন শুধালুম না। পরের দিন ভোরবেলা দেখি, তিনি তখনো সেখানে ঠায় বসে। আমরা তাঁকে প্রণাম করে রাস্তায় নামবার সময় মনে হল এই যেন সর্বপ্রথম তাঁর চোখে ভাবের পরিবর্তন দেখা গেল—সে পরিবর্তনে যেন আমাদের প্রতি আশীর্বাদ রয়েছে। রাস্তায় নামার পর হাসেগাওয়া বললো, 'আমরা দুশ্চিন্তা গেছে। আমাদের যখন উনি চড়াইয়ের পথে যেতে বারণ করলেন না, তখন মনে হচ্ছে, আমাদের যাত্রা সফল হবে।

'হিমালয়ের অস্ত্রতম এই রহস্যের সমাধান এখনো হয় নি। এইসব একাধিক

সন্ন্যাসী সমস্ত শীতকালটা এসব জায়গায় কাটান কি করে? পাঁচ-সাত হাত বরফ এখানে তো জমেই—সেখানে না আগুন, না কোনো প্রকারের খাত্ত। এক চট্টাওলা আমাকে পরে বলেছিল, বরফের তলায় নাকি একরকমের লতা গজায়। তারই রস নাকি এদের খাত্ত, বস্ত্র, আগুন—সব।

‘আর হাসেগাওয়া তুলে যাচ্ছে, একটার পর একটা ছবি। এই গিরি অভিযানে বেরুবার তার অত্যন্ত প্রধান উদ্দেশ্য—যত পারে, যত রকমের হয়, ফোটোগ্রাফ তোলা। দাঁড়ান, আপনাকে বইখানা দেখাই।’

বিনায়ক রাও নিয়ে এলেন চাউস এক ফোটোগ্রাফের বই। মলাটের উপরকার ছবি দেখেই আমার বুকে বাকি রইল না যে, এই বই জাপানী। জার্মানরাও বোধহয় এরকম প্রিন্ট করতে পারে না। কে বলবে এগুলো রক থেকে তৈরি! মনে হয় কণ্টাক্ট প্রিন্ট!

বিনায়ক রাও বললেন, ‘জাপানে ফিরে গিয়ে হাসেগাওয়া তাঁর তোলা ছবির একটি প্রদর্শনী দেখান। সে-দেশের রসিক-বেরসিক সর্বসম্মতিক্রমে এই সফল ফোটোগ্রাফির প্রথম বিশেষ পুরস্কার পায়।’

ছবি বোঝাবার জন্য এ-বইয়ে টেক্সট অত্যন্ত। আমার বড় বাসনা ছিল বইখানা যেন ভারতের বাজারেও জাপানীরা ছাড়ে। কিন্তু ঠিক তখনই মার্কিন হিরোশিমার উপর এটম বোমা ফেলেছে। পরবর্তীকালে আমি আবার কঁহা কঁহা মুল্লুকে চলে গেলুম।

এ-বইখানা আনাতে কিন্তু আমার অসুবিধা সৃষ্ট হল। বিনায়ক রাও বই আনার পর আর বর্ণনা দেন না। শুধু বলেন, ‘এর পর আমরা এখানে এলুম’ বলে দেখান একটা ফোটো, ফের দেখান আরেকটা অনবদ্য ছবি। কিন্তু এখন আমি সেসব ছবির সাহায্য বিনা তাঁদের যাত্রাপথের গান্ধীর্থ, মাধুর্য, বিশ্বাস, সঙ্কট, চিত্র-বর্ণন করি কি প্রকারে! পাঠক, তুমি নিরাশ হলে, আমি নিরুপায়।

বিনায়ক রাও, হাসেগাওয়া তোমার ও আমার পরম সৌভাগ্য যে, ওঁরা দুজনা পথিমধ্যে একটি কাফেলা পেয়ে গেলেন—এবং অবিশ্বাস্য, সেটা যাচ্ছে উপরের দিকে। এদের ভিতর আছে তীর্থযাত্রী ও অল্পবিস্তৃত ব্যবসায়ী। এই শেষ কাফেলা। নানা কারণে এদের বড় বেলাই দেরি হয়ে গিয়েছে বলে ব্যবসায়ীদের মনে শঙ্কা, বরফ-নামার পূর্বে এঁরা পাহাড় থেকে নামতে পারবেন কিনা। তীর্থযাত্রীদের মনে কিন্তু কোনো প্রকারের দুশ্চিন্তা নেই। এ-ধরনের তীর্থদর্শনে যারা বেরয়, তারা ঘরবাড়ির মোহ, প্রাণের মায়ী সবকিছু জ্বালালি দিয়েই সমুখপানে পা ফেলে। পথিমধ্যে মৃত্যু, মানসে মৃত্যু, গৃহ-প্রত্যাভর্তন না

করা পর্যন্ত যেখানেই মৃত্যু হোক না কেন, তাঁরা আশ্রয় পাবেন ধূর্জটির নিবিড় জটীর মাঝখানে—যে-জটা হিমালয়ের চূড়ায় চূড়ায় সৃষ্টির প্রথম প্রভাত থেকে চিরজাজ্জল্যমান।

আর কাফেলার ঐসব ক্ষুদ্র ক্ষুদ্র ব্যবসায়ীদের কথা চিন্তা করলে মনে হয়, কি বিচিত্র দ্বন্দ্বময় পরস্পরবিরোধী কার্যকলাপ এদের জীবনে। যে-প্রাণরক্ষার জন্তু এরা দুটি মুঠি অন্ন উপার্জন করতে এসেছে এখানে, সেই প্রাণ তারা বিস্ব করছে প্রতি দিন, প্রতি বৎসর! হুবহু সার্কাসের স্টাণ্ট খেলাড়িদের মত—প্রাণধারণের জন্তু যারা প্রাণ নিয়ে ছিনিমিনি খেলে প্রতি সন্ধ্যায়!

তা সে যাক। এ-লেখাটি এখন সংক্ষিপ্ত করি। কারণ, হিমালয়ের বর্ণনাই যখন দিতে পারছি নে, তখন হিমালয় নিয়ে কাহিনী বলা শিবহীন দক্ষষ্ণু এবং যত্বপি হিন্দু পুরাণের সঙ্গে পরিচয় আমার ঘনিষ্ঠ নয়, তবু এটুকু জানি, সে প্রলয়-কাণ্ড ঘটেছিল এই হিমালয়েই—দক্ষালয়ে।

আমি অরসিক। হঠাৎ শুধালুম, ‘বিনায়ক রাও! তোমরা খেতে কি?’

‘শেষের দিকে পথে যেতে যেতে—‘পথ’ বললুম বটে কিন্তু আমি আপনারা পথ বলতে যেটা বোঝেন, সেটাকে অপমান করতে চাই নে—আমার শ্বেনদৃষ্টি থাকতো কিসের উপর জানেন? শকুনি, শকুনি—আমি তখন সাক্ষাৎ শকুনি। শকুনি যেমন নির্মল নীলাকাশে ওড়ার সময়ও তাকিয়ে থাকে নিচে ভাগাড়ের দিকে, আমিও তাকিয়ে থাকতুম নিচের দিকে। কোথাও যদি ভারবাহী যাক পশুর এক চাবড়া গোবর পেয়ে যাই। সে-ঘুঁটেতে আগুন ধরিয়ে ধূঁয়ের ভিতর নাড়াচাড়া করি, চেপে ধরি, দু হাত দিয়ে চড়চাপড় মেরে তৈরি করা এবড়ো-খেবড়ো রুটি—গুজরাতীতে যাকে বলে রোটলা, কাবুলী নানের চেয়েও তিন ডবল পুরু। কিন্তু সেই ডাঁশা রুটিই মনে হত সাক্ষাৎ অমৃত—ওলড্ টেস্টামেন্টের বিধিদত্ত মাস্না, যার স্বাদ আজো ইহুদিকুল ভুলতে পারে নি।’

বিনায়ক রাও বললেন, ‘পঙ্কুও ঈশ্বরপ্রসাদাৎ গিরি লঙ্ঘন করে—এটা মানসে পৌঁছে জন্মের মত উপলব্ধি করলুম। হাসেগাওয়ার দর্শনই ঠিক—পঙ্কু বাধ্য হয়েছে এগোয় অতি ধীরে-মহুৱে, তাই শেষ পর্যন্ত পৌঁছে যায় মানসসর্বোবরে। পঙ্কুর কাছে যা বিধিদত্ত, স্তম্ভ মাহুৱকে সেটা শিখতে হয় পরিশ্রম করে।’^১

১ চেকোক্লোভাকিয়ার পাহাড়-পর্বত হিমালয়ের তুলনায় নগণ্য। সেখানে পাহাড় চড়তে গিয়ে শ্রীযুক্ত মোহনলাল গঙ্গোপাধ্যায়ের যে অভিজ্ঞতা হয় সেটি এখানে তুলে দেবার লোভ সম্বরণ করতে পারলুম না।

বিনায়ক রাও ভেবে নিয়ে বললেন, 'হ্যাঁ, সত্যোত্তরে স্নান করেছিলুম। আমার জীবনের মহামূল্যবান অভিজ্ঞতার ভিতর এটা আমার চিরকাল মনে থাকবে।'

'সর্বাক্ষ জুড়িয়ে গেল—না? পুণ্যান্নান তো বটে।'

বিনায়ক রাও শিউরে উঠলেন, 'বাপরে বাপ! জলে দিয়েছি বাঁপ আর সঙ্গে সঙ্গে মেরেছি পারের দিকে লাফ। সেদিন আকাশ ছিল পরিষ্কার। দ্বিপ্রহরের সেই উগ্র রোদ্দে আমি ঘণ্টাটুক ছুটোছুটি করেছিলুম শরীরটাকে গরম করার জন্তে। ছুটেছি পাগলের মত দু-হাত ঘুরিয়ে ঘুরিয়ে পা-দুটো ছুঁড়ে ছুঁড়ে আছাড় মেরে মেরে। তারপর ক্লান্ত হয়ে থামতে বাধ্য হয়েছি। ফাঁসির লাশের মত জড় বেরিয়ে গিয়েছে হাঁপাতে হাঁপাতে। ফের ছুটতে হয়েছে গা গরম করার জন্ত। গা আর কিছুতেই গরম হয় না। সে কী যন্ত্রণাভোগ!'

আমি বললুম, 'তুনেছি, গত যুদ্ধে যেসব এয়ার পাইলট শীতকালে ইংলিশ-চ্যানেলের জলে পড়েছে, তাদের কেউই কুড়ি মিনিটের বেশী বাঁচে নি।'

বিনায়ক রাও বললেন, 'লোকে বলে, অগ্নিপরীক্ষা! আমি বলি শীতের পরীক্ষা।'

'হ্যাঁ, আফ্রিকাবাসীরাও বলে—Heat hurts, cold kills.'

বিনায়ক রাও বললেন, 'হাসেগাওয়া প্রাণভরে ছবি তুললেন। তারপর প্রত্যাবর্তন। অগ্র পথ দিয়ে।

মিরেক (একজন পাহাড়-বন-বিভাগের চৌকিদারকে) শুধোলে, 'আচ্ছা, আপনি এত আস্তে চলছেন কেন?'

প্রশ্ন শুনে চৌকিদার হোঃ হোঃ করে খুব খানিকটা হেসে নিলেন। তারপর বললেন—'শুধুন। বহু বছর, চল্লিশেরও উপর, বনের পথে, পাহাড়ে রাস্তায় নানান গতিতে হেঁটেছি। কখনও জোরে কখনও ধীরে। আপনাদের মত আগে হাঁটতুম, আরো জোরে হাঁটতুম। লাকিয়ে বাঁকিয়ে পাহাড়ে উঠে তার পর হাঁপাতুম। হাত-পা ছড়িয়ে ঘালের উপর শুয়ে জিরিয়ে নিতুম, তারপর আবার চলতুম। কাজের তাগিদে কখনো সারাদিন হাঁটতে হয়েছে, কখনও সারারাত। কিন্তু এই যে এখনকার আমার চলার গতি দেখছেন, এ হচ্ছে বহুদিনের বহু সাধনার পর আবিষ্কৃত। এ গতিতে চললে কখনও ক্লান্তি আসবে না শরীরে। বত দূর-দূরান্তরে বনান্তরে যান না কেন, যাত্রার শুরুতে যেমন শরীর তাজা তমনিই থাকবে। চরণিক, প্রথম (বেঙ্গল) সংস্করণ, পৃ ১১৩।১৪।

‘চলেছি তো চলেছি, তারপর এল আমাদের কঠিনতম সংকট। আমাদের একটা গিরিসংকট পেরুতে হবে। এবং এটা পৃথিবীর অন্ততম সর্বোচ্চ গিরি-সংকট। সমুদ্রতট থেকে বারো হাজার ফুট উচুতে না বাইশ হাজার আমার মনে নেই। এবং একটুখানি যাওয়ার পরই আরম্ভ হয় চড়াইয়ের পর চড়াই। ক্যারাতানের এক ব্যবসায়ী আমাকে বলেছিল, যেসব তীর্থযাত্রী মারা যায়, তাদের অধিকাংশই মরে এইখানে।

‘ক্রমেই বাতাসের অক্সিজেন কমে আসছিল। অতিকষ্টে আমরা ধীরে ধীরে এগুচ্ছি। এমন সময় চোখে পড়ল একটা লোক অকাতরে ঘুমুচ্ছে ‘পথের’ এক-পাশে। কাছে এসে বুঝলুম, মৃতদেহ! এবং সম্পূর্ণ অবিকৃত মৃতদেহ। এ-বছরে মরেছে, না গেল বছরে বুঝতে পারলুম না। কারণ, আমি শুনেছিলুম, উপরে-নিচে বরফ থাকে বলে মড়া পচে না।

‘এর পর আরো কয়েকটা। আমি মাত্র একবার একজনের মুখের দিকে তাকিয়েছিলুম, আহা! সে কী শান্ত, প্রশান্ত, নিশ্চিন্ত মুখচ্ছবি। মায়ের কোলে ঘুমিয়ে-পড়া শিশুর মুখেও আমি এরকম আনন্দভরা আত্মসমর্পণের ছবি দেখি নি।

‘ইতিমধ্যে আমার দৃষ্টি গেল অতদিকে। দেখি, আমাদের দলের একজন বৃদ্ধ তীর্থযাত্রী অনেকখানি পিছিয়ে পড়েছে। কারো সেদিকে জ্রঞ্জেপ পর্যন্ত নেই। আমি জানতুম, এবং হাসেগাওয়াও আমাকে বুঝিয়ে দিয়েছিলেন, এখানে বলবান যুবা পুত্রও হাত বাড়িয়ে মাতাকে পর্যন্ত সাহায্য করতে পারে না। কারো শরীরে একবিন্দু উদ্ভূত শক্তি নেই যে, সে সেটা অস্ত্রের উপকারে লাগাবে। সামান্য দুটি কথা বলে যে সাহস দেবে সে শক্তিও তখন মাহুষের থাকে না। আমার মনে হল, হালকা একটি পালক দিয়েও যদি কেউ আমাকে ঠোকা দেয় আমি হুমড়ি খেয়ে পড়ে যাবো।

‘আমি খুব ভালো করেই জানতুম, কাফেলা কারো জ্ঞাত অপেক্ষা করে না; করলে সমস্ত কাফেলা মরবে। আমাদের যে করেই হোক সন্ধ্যা নাগাদ সামনের আশ্রয়স্থলে পৌঁছতে হবে।

‘এমনিতেই আমাদের প্রত্যেকেরই ছিল শব্দগতি। আমি সেটাও কমিয়ে দিলুম ঐ বৃদ্ধকে সঙ্গ দিতে। হাসেগাওয়া বুঝতে পেরেছে। আমার দিকে রহস্যভরা নয়নে সে তাকাল। আমি ইঙ্গিতে জানালুম, সে যেন তার গতি লক্ষ্য না করে।’

এখানে আমি সামান্য একটি তথ্যের উল্লেখ না করলে কর্তব্যবিচ্যুতি হবে।

বিনায়ক রাওয়ের মত পরদুঃখকাতর মানুষ আমি এ-জীবনে কমই দেখেছি, এবং একেবারেই দেখি নি পরোপকার গোপন রাখতে তাঁর মত কৃতসঙ্কল্প জন। প্রভু যীশুর আদেশ 'তোমার বাঁ হাত যেন না জানতে পারে তোমার ডান হাত কি দান করলো' এরকম অক্ষরে অক্ষরে পালন করতে আমি কোনো খুঁটান অখুঁটান কাউকে দেখি নি। কাফেলার বৃদ্ধের প্রাতি তাঁর দরদ গোপন রাখতে পারলে তিনি নিশ্চয়ই তাই করতেন—এ সত্য আমি কুরান স্পর্শ করে বলতে রাজী আছি। কিন্তু এটা গোপন রাখলে তাঁর মূল বক্তব্য একেবারেই বিকলাঙ্গ হয়ে যেত বলে তিনি যতটা নিতান্তই না বললে নয়, সেইটুকুই বলেছিলেন।

বিনায়ক রাও সোদনের স্বরণে একটুখানি হাস ফেলে বললেন,—“বৃদ্ধকে আমি বলবো কি—স্পষ্ট দেখতে পেলুম, সে আপ্রাণ চেষ্টা করছে যেন কাফেলা থেকে সে বিচ্ছিন্ন না হয়ে পড়ে। এই যে আমি তার তুলনায় শক্তিশালী, আমারই থেকে থেকে মনে সন্দেহ হচ্ছিল, আমিই কি পৌঁছতে পারবো গন্তব্যস্থলে? তখন হৃদয়ঙ্গম করলুম, এখানে এ-সঙ্কট থেকে নিষ্কাত পাবার জ্ঞাত শারীরিক বলের প্রয়োজন আছে নিশ্চয়ই, কিন্তু তার চেয়েও বেশী প্রয়োজন মানসিক বলের। এবং এ বৃদ্ধের সেটা যেন আর নেই। তীর্থদর্শন হয়ে যাওয়ার পর ফেরার মুখে অনেকেই সেটা হারিয়ে ফেলে—কারণ তখন তো সামনের দিকে আর কোনো উদ্দেশ্য নেই, আর কোনো চরম কাম্য বস্তু নেই। ফিরে তো যেতে হবে আবার সেই সংসারে, তার দিনযাপনের প্রাণ-ধারণের স্থানির ভিতর।

‘আমার মনে হচ্ছিল আমি নিজে যেন সম্ভরণে অক্ষম, আরেক সম্ভরণে অক্ষম জনকে সাহায্য করার নিখল প্রচেষ্টা করছি। তবু বললুম, “আরেকটুখানি পরেই উৎরাই। চলুন।” এই সামান্য কটি শব্দ বলতে গিয়েই যেন আমার দম বন্ধ হয়ে এল।

‘বুড়ো আমার দিকে তার ঘোলাটে চোখ তুলে তাকিয়ে হঠাৎ কি যেন দেখতে পেল। অতি কষ্টে ধীরে ধীরে বললে, “বাবু, তোমার বোতল থেকে একটু শরাব।”

বিনায়ক রাও বললেন, ‘আমি জীবনে কখনো শরাব স্পর্শ করি নি; আমার বৃকের পকেটে ছিল চ্যাপ্টা বোতলে জল।

‘কোনো গতিকে বললুম, “জল।” বুড়ো বিশ্বাস করে না। কাতর নয়নে তাকায়।

‘আন্তে অতি আন্তে বুড়ো এগোচ্ছে ঐ শরাবের আশায়।

‘এইভাবে খানিকক্ষণ চললো। হঠাৎ বৃষ্টি বৃড়ো লক্ষ্য করেছে কাক্কেলা একেবারেই অন্তর্ধান করেছে। কাঁপতে কাঁপতে বৃড়ো বলল, “জিরোবো।” আমি শুদ্ধকণ্ঠে যতখানি পারি চৈচিয়ে বললুম, “না, না।” আমি জানি, এ জিরোনোর অর্থ কি। এই বসে পড়ার অর্থ, সে আর উঠে দাঁড়াবে না। তার মনে হবে এই তো পরমা শান্তি—আরাম, আরাম। আর শেষ নিশ্বাস চলে পড়বে।

‘বৃড়ো তার শেষ ক’টি কথা বললে যার অর্থ, এক ঢোক শরাব পেলে সে হয়তো সঙ্কট পেরুতে পারবে। আমার দিকে হাত বাড়ালো। আমি আর কী করি? দিলুম বোতল। সে টলতে টলতে বসে পড়ল। এ কী সর্বনাশ! তারপর বোতল মুখে দিয়ে যখন দেখল সত্যি জল, তখন আমার দিকে শেষবারের মত তাকিয়ে কাৎ হয়ে শুয়ে পড়লো।

‘এই শরাবের আশাতেই সে এতক্ষণ আমার সঙ্গে সঙ্গে কোনো গতিকে এসেছে। এবারে শেষ আশা বিলীন হতে সে চলে পড়লো।

* * *

‘চলেছি তো চলেছি। কতক্ষণ চলার পর উৎরাই আরম্ভ হয়েছিল, কখন যে উপত্যকায় নেমেছি সেগুলো আমার চৈতন্যসত্তা যেন গ্রহণ করে নি।

‘সম্মুখে এলুম হঠাৎ বরফপাতের সঙ্গে সঙ্গে। অতি হালকা চাদরের মত কি যেন নেমে এল। তবু সম্মুখপানে খানিকটা দেখা যায়। ঈষৎ দ্রুততর গতিতে চলতে আরম্ভ করলুম। কয়েক মিনিট পরেই বরফপাত থেমে গেল। আমি স্বস্তির নিশ্বাস ফেললুম। তারপর সামনের দিকে তাকিয়ে ভয়ে আতঙ্কে আমি হৃদয়ঙ্গম করলুম, একটুখানি বেশী আগেই স্বস্তির নিশ্বাস ফেলে বসেছি।

‘সামনে উপত্যকা, এবং এইমাত্র যে বরফপাত হয়ে গেল তারই “কল্যাণে” মুছে গেছে কাফেলার পদচিহ্ন। এবং সঙ্কটটাকে যেন তার বীভৎসতম রূপ দেবার জন্য সামনে, ধীরে ধীরে, নেমে আসছে কুয়াশার জাল—দিনের আলো ম্লান হয়ে গেছে।

‘তারই ভিতর দিয়ে লক্ষ্য করলুম, আরেকটু সামনে একটা পাথরের টিলা। সেখানে পৌঁছে আমাকে যেতে হবে হয় বাঁয়ে নয় ডাইনে। কিন্তু মনস্থির করি কি প্রকারে? বরফের উপর যে কোনো চিহ্নই নেই। তবু আমার মনে যেটুকু দিক্-বিদিক জ্ঞান ছিল সেটা পরিষ্কার বললে, যেতে হবে বাঁ দিকে।

‘এমন সময় হঠাৎ কুয়াশার ভিতর যেন একটু ছিদ্র হল, এবং তার ভিতর দিয়ে এক মুহূর্তের তরে, যেন বিদ্যুৎ খেলে গেল, দেখি একটা কুকুরের ইঞ্চি-তিনেক লেজ, বাঁ করে ডান দিকে মোড় নিল, কুকুরটাকে কিন্তু দেখতে

পেলুম না—’

আমি আশ্চর্য হয়ে বললুম, ‘কুকুর ! কোথাকার কুকুর ? কুকুরের কথা তো এতক্ষণ কিছু বলাো নি !’

‘ও । সত্যি ভুলে গিয়েছিলুম । ঐ কুকুরটা থাকতো একটা চট্টিতে । আমার সে চট্টিতে, ঝুটির জন্তু আটকা পড়ে, দিন তিনেক ছিলুম । ঐ সময় আমি ওটাকে সামান্য এটা সেটা খেতে দিয়েছি । সে-চটি ছাড়ার খানিকক্ষণ পরে দেখি, তিনি আমার পিছু নিয়েছেন । বিস্তর হাই-হুই করে পাখর ছুঁড়েও তাকে চট্টিতে ফেরত পাঠাতে পারলুম না ।’

আমি বললুম, ‘এই তো সেই জায়গা যেখানে যুধিষ্ঠিরের সারমেয় তাঁকে ত্যাগ করতে চায় নি ।’

মলোজী বললেন, ‘এসব কেন, কোনো কুকুরেরই লেজ কাটা উচিত নয় ; তবু কে যেন বেচারীর বাচ্চা বয়সে তার লেজ কেটে দিয়েছিল । আমি দেখতে পেলুম সেই টুকরোটুকু, ষেটুকু অবশিষ্ট ছিল । এবং সেটা মোড় নিল ডানদিকে ।

‘আমার অভিজ্ঞতা, আমার পর্যবেক্ষণ, আমার বিচারশক্তি সব—সব—আমাকে চিৎকার করে বলছিল, “বা দিকে বা দিকে মোড় নাও” আর অতি স্পষ্ট যদিও অতিশয় ক্ষণভরে আমি দেখলুম, কুকুরটার লেজ মোড় নিল ডান দিকে ।

‘আমি নিজের বুদ্ধিবৃত্তির চেয়ে কুকুরটার লেজকেই বিশ্বাস করলুম বেশী ।

‘কুকুরটাকে কিন্তু তখনকার মত আর দেখতে পেলুম না ।

‘ঘন্টাটাক পরে চট্টিতে পৌঁছলুম । হাসেগাওয়া বললেন, আমি বুড়োর জন্তু অপেক্ষা করার পর থেকেই কুকুরটা ক্রমাগত পিছিয়ে পড়ছিল । শেষটায় সে অদৃশ্য হয়ে যায় ।’

আমি শুধালুম, ‘আর বা দিকে মোড় নিলে কি হত ?’ প্রশ্নটা জিজ্ঞেস করেই বুঝলুম আমি একটা ইডিয়ট ।

বিনায়ক হেসে বললেন, ‘তাহলে আপনি আপনার বন্ধু বিনায়ককে আর—’

আমি বললুম, ‘বাট বাট’ ।^২

২ বিনায়ক রাও আমাকে তাঁর মানস-গমন কাহিনী বহু বৎসর পূর্বে বলেছিলেন । এখন কেতাবপত্র খেঁটে লুপহোল্গুলো যে পূর্ণ করা যেত না তা নয়, কিন্তু আমার কেমন ধেন মনে হল এই খাপছাড়া খাপছাড়া অসম্পূর্ণ পাঠটাই সত্যের নিকটতর থাকবে ।

মটরাজনের একলব্যত্ব

বধা নামার সঙ্গে সঙ্গেই পদ্মার উপর দিয়ে পূর্ববৈয়া বায়ু বইতে আরম্ভ করে না। সে হাওয়া আসে তার দিন আঠেক পরে। কিন্তু তখনই সাড়া পড়ে যায় বন্দরে বন্দরে মাঝি-মহল্লায়। হালের বলদ পালের গরু বিক্রি করে তারা তখন কেনে নৌকোর পাল। পুরনো পালে জোড়াতালি দিয়ে যেখানে চলে যাওয়ার আশা, সেখানে চলে কাঁথার ছুঁচ আর মোটা সূতো। তার পর আসবে ঝোড়ো বেগে পূব হাওয়া। দেখ্ তো না দেখ্, নারায়ণগঞ্জী নৌকো পৌছে যায় রাজশাহী। বিশ্বাস করবেন না, শ্রোতের উজ্জানে, তর তর করে।

আমিও বসে আছি হাল ধরে, পাল তুলে—হাওয়া এই এল বলে। নোঙ্গর নিই নি। এই শেষ যাত্রায় যেতে হয় এক ঝটকায়। কোথাও থামবার ছকুম নেই।

নাতি ডাবাটি এগিয়ে দিয়ে বললে, 'দাদু, তামুক খাও।'

হাওয়ার আশায় বসে থাকার প্রতিটি মুহূর্ত আনন্দ-আবেশে ভরে যায়।

নাতি বললে, 'দাদু, সারাজীবন ধরে পদ্মার উজ্জান-ভাটা করলে। কত লোকের সঙ্গেই না তোমার দোস্তী হল। বাড়িতে থেকে থেত-খামার করে দোকানপাট চালালে তো অতশত লোকের সঙ্গে তোমার ভাবসাব হত না—আর বিদেশীই বা কিছু কম। কই কই মুন্সুরের বং-বেবংয়ের চিড়িয়া। আমারে কও, তাদের কথা।'

শ্রীযুত গান্ধুলীর পাহাড় ভ্রমণের অভিজ্ঞতা একটু আগেই ফুটনোটে উল্লেখ করেছি। মোরাভিয়ার পাহাড় তেমন কিছু উঁচু নয়, কিন্তু বরফের ঝড়ে কিংবা নিছক ক্লাস্তিবশতঃ পর্যটকের মরণবরণ একই পদ্ধতিতে হয়। গান্ধুলিমশাই লিখছেন :

'সেবারে দুটি স্নোভাক ছেলে প্রাড্‌য়েটের চূড়ায় এসে হাজির হল। তখন খুব বরফ পড়ছে। (সেখানকার) কাফিথানায় এক চুল জায়গা নেই—যত রাজ্যের লী-চালক সেখানে এসে জমেছে। এই দুই স্নোভাক ছেলে দাঁড়িয়ে দাঁড়িয়ে দু পেয়ালা গরম দুধ খেয়ে বেরিয়ে গেল। কোথায় যাচ্ছ জিজ্ঞেস করায় তারা জবাব দিলে—চেভের্নে সেডলো।

বরফ পড়লেও দিনটা মোটামুটি পরিষ্কার ছিল। কিন্তু ছেলে দুটি বেরিয়ে যাবার খানিক পরেই হঠাৎ কুয়াসা এসে চারিদিক ছেয়ে ফেললো। তারপর এই কুয়াসা কাটল না, ছেলে দুটিও ফিরে এল না। এদিকে অন্ধকার নেমে এল

আমি পদ্মা নদীর মাঝি নই। কিন্তু আমার জীবনধারা বয়ে গেছে পদ্মার চেয়েও দেশদেশান্তরে। কত না অদ্ভুত অদ্ভুত পরিস্থিতি, কত না বিচিত্র চরিত্রের সঙ্গে পরিচয় হয়েছে। এখন পাল তুলে ওপারে যাবার মুখে ভাবছি, এঁদের কারো কারো সঙ্গে আপনাদেরও পরিচয় করিয়ে দি। কারণ এঁদের সম্বন্ধে অল্প কেউ যে মাথা ঘামাবে সে আশা আমার কম—প্রচলিতার্থে এঁরা দেশের

আর তারই সঙ্গে ঘন তুষারপাত শুরু হয়ে গেল।

কাফিখানার মালিক উদ্বিগ্ন হয়ে বিদেশী ছেলে দুটিকে খোঁজবার জন্তে কয়েকজনকে পাঠালেন। তারা শী নিয়ে কোমরে টর্চ বেঁধে বেরিয়ে পড়ল। কিন্তু রাত্রে অন্ধকারে ঐ ঘন তুষারপাতের মধ্যে যাবে কোথায়? যাবেই বা কি করে? বিশেষ কিছু লাভ হল না। তারা ফিরে এল। কিন্তু ছেলে দুটি আর ফিরল না।

পরদিন সকালবেলা বরফের উপর রোদ পড়ে যখন চারিদিক ঝলমল করে উঠল, তখন দেখা গেল রাত ভোর এত বরফ পড়েছে যে ছেলে দুটি যদি কোথাও মরেও পড়ে গিয়ে থাকে তাদের দেহ খুঁজে বার করবার কোনো উপায় নেই। আশপাশের যত কুটির যত গ্রাম আছে সব জায়গা থেকে যখন খবর এল যে ছেলে দুটি কোথাও পৌঁছয় নি তখন বোঝা গেল এই অঞ্চলের বরফের মধ্যে তাদের সমাধি হয়েছে।

সারা শীতকাল ছেলে দুটি তাদের অজানা সমাধির মধ্যে রইল শুয়ে। তারপর যখন প্রথম বসন্তের হাওয়ায় বরফ গলতে আরম্ভ করল তখন তাদের অবিকৃত দেহ আবিষ্কার হয় এই জঙ্গলের মধ্যে। আশেপাশে অনেকগুলো আধপোড়া দেশলাই-এর কাঠি ছড়ানো।

বরফের মধ্যে পথ হারিয়ে যাওয়ার এই হচ্ছে বিপদ। ঠাণ্ডায় জমে যাওয়ার মত হলে যে ক্লান্তি আসে সে বড় ভয়ানক ক্লান্তি। দু-চারটে দেশলাই জ্বলে কি তাকে ঠেকিয়ে রাখা যায়? দেহ মন চোখ সমস্ত ঘূমে জড়িয়ে আসে। হঠাৎ শীতের অহুভূতি আর থাকে না। মনে হয় বরফেরই কবল জড়িয়ে শুয়ে পড়ি। তখন মনে হয় জেগে থাকার চেষ্টা করার মধ্যেই যত অস্বস্তি যত কষ্ট! ঘুমিয়ে পড়াই হচ্ছে আরাম! তারপর একবার সেই ঘূমের কোলে কেউ টলে পড়লে, সে ঘুম আর ভাঙে না। বরফের মধ্যে মৃত্যুকে ঠিক জীবনের অবলান বলা যায় না—এ ঘেন এক গভীর স্বপ্নি।’

কুতুবমিনার নন। অথচ আমার বিশ্বাস এঁরা যদি সত্যিই এম্বিশাস্ হতেন তবে আজ আমার মত অখ্যাত জনের কাঁধে এঁদের সঙ্গে আপনাদের পরিচয় করিয়ে দেবার ভার পড়তো না, আর পড়লেও সেটা আমি গ্রহণ করতুম না। কারণ এঁদের আমি ভালোবেসেছিলুম এঁরা লাওৎসের চেলা বলে। তাঁরই উপদেশ মত এঁরা জীবনের মধ্য-পথ অবলম্বন করেছিলেন। পাঁচজনের সঙ্গে মিলে মিশে, আপন প্রতিভা যতদূর সম্ভব চাপা রেখে গোপনে গোপনে তার পরিপূর্ণ বিকাশ দেবার চেষ্টা করেছেন। বাধা পড়লে লড়াই দিতেন মোক্ষম, কিন্তু সর্বক্ষণ এঁদের চরিত্রে একটা বৈরাগ্য ভাব থাকতো বলে মনে মনে বলতেন, ‘হলে হল, না হলে নেই।’

কিন্তু আমাকে একটু সাবধানে, নাম পরিচয় ঢেকে চেপে লিখতে হবে। পূর্বেই ইঙ্গিত দিয়েছি এঁরা জীবন-সভাস্থলে প্রধান অতিথির আসনে বসে ফুলের মালা পরতে চান নি, তাই পাঠক সহজেই বুঝে যাবেন, কারো লেখাতেও তাঁরা হামলেট, রঘুপতি হতে চান না—আমার নান্টিপরিচিত লেখাতেও না।

মনে করুন তার নাম নটরাজন। তার পিতা ছিলেন পদস্থ সরকারী কর্মচারী, আশা করেছিলেন ছেলেও তাঁর মত চারটে পাস দিয়ে একদিন তাঁরই মত বড় চাকরি করবে। অত্যাশা আশা করেন নি, কারণ নটরাজন ক্লাসের পয়লা নম্বরী না হলেও প্রোমোশন পেত অক্লেশে, আর একটা বিষয়ে ইন্সুলের ভিতরে বাইরে সবাইকে ছাড়িয়ে যেত অবহেলে। ছবি আঁকাতে। তার অঞ্চলে এখনও দেওয়ালে রঙিন ছবি আঁকার (ম্যুরাল) রেওয়াজ আছে। তারই ওস্তাদ পটুয়ারী স্বীকার করতেন, নটরাজনের চতুর্দশ পুরুষে যদিও কেউ কখনো ছবি আঁকেন নি—তাঁরা খানদানী, পটুয়া হতে যাবেন কোন্‌ দুঃখে—এ ছেলে যেন জন্মেছে তুলি হাতে নিয়ে। শুধু তাই না—প্রথম বিশ্বযুদ্ধের শেষের দিকে এদেশে যখন হরেক রকম রঙের অভাব চরমে পৌঁচেছে তখন নটরাজন দেশের কাদামাটি কাঁকর পাথর ফুলপাতা থেকে বানাতে আরম্ভ করলো নানা রকমের রঙ। এটা ঠিক আর্টিস্টের কাজ নয়—এর খানিকটে কেমিস্ট্রি বাকিটা ক্রাক্‌টম্যান্‌শিপ। পটুয়ারী নটরাজনকে প্রায় কোলে তুলে নিলেন। তখন তার বয়েস বারো-তেরো।

রবিবর্মী তার অঞ্চলেরই লোক। ওঁর ছবি কিন্তু নটরাজনকে বিশেষ বিচলিত করে নি। হঠাৎ একদিন সে দেখতে পেল নন্দলালের একখানা ছবি। জঘন্ট রিপ্ৰজাক্‌শন্—রেজিস্ট্রেশন এতই টালমাটাল যে মনে হয় প্রিন্টার তিনটি বোতল

টেনে তিনটে রঙ নিয়ে নেচেছে।

নটরাজন কিন্তু প্রথম ধাক্কাই স্তম্ভিত। দ্বিতীয় দর্শনে রোমাঞ্চিত। মধ্য রজনী অবধি সে ছবিটার দিকে একদৃষ্টে তাকিয়ে রইল।

নটরাজন ছিল অসাধারণ পিতৃভক্ত। তার ভবিষ্যৎ সম্বন্ধে পিতা কি আশা পোষণ করেন সে তা জানতো। কি করে তাঁকে বলে যে সে তার গুরুর সন্ধান পেয়ে গিয়েছে; সর্বস্ব ত্যাগ করে তাঁর পদপ্রান্তে তাকে যেতেই হবে। তত্পরি কোথায় মালাবার আর কোথায় শাস্তিনিকেতন!

পিতাই লক্ষ্য করলেন তার বিষন্ন ভাব। পিতাপুত্রের মধ্য ছিল—দূরত্ব নয়। সব শুনে বললেন, ‘বাধা পথে যে চলে না তার কপালে দুঃখ অনেক। কিন্তু আপন পথ খুঁজে নেওয়ার অধিকার থেকে বঞ্চিত হওয়ার দুঃখ আরো বেশী। তোমার উপর আমার আশীর্বাদ রইল।’

অসহযোগ আন্দোলনের প্রথম যুগ। যারা ‘গোলামী-তালিম’ চায় না, তারা যাবে কোথায়? বিশ্বকবি কবিগুরু যেন বিধির আদেশে ঠিক ঐ শুভলগ্নেই শাস্তিনিকেতনে তাদের জন্ম নীড় নির্মাণ করেছিলেন—যত্র বিশ্ব ভবত্যেক নীড়ম্। দূর সিদ্ধি, মালাবার, গুজরাত, মহারাষ্ট্র, আসাম থেকে ছেলেমেয়ে আসতে লাগলো—দলে দলে নয়, একটি দুটি করে।

যারা এল তাদের মধ্যে দু-চারটি ছিল লেখাপড়ায় বিত্তোদ্যোগ, বাপ-মাতা-খাদ্যাদানো বিশ্ববকাটে। বিশ্বভারতীই তো বিশ্ববকাটেদের উপযুক্ত স্থান, ঐ ছিল তাদের দৃঢ় বিশ্বাস! আসলে এরা ছিল কোনো কোঁশলে ইস্কুল থেকে নাম কাটাবার তালে। অসহযোগের সহযোগিতায় তারা সে কর্মটি করলো নিশান উড়িয়ে দামামা বাজিয়ে।

বলা বাহুল্য আমি ছিলুম এই দলের।

হিন্দী-উর্দুতে বলে ‘পাঁচো উলিয়া ঘীমে’ আর গর্দন ডেগমে’—অর্থাৎ ‘পাঁচ আঙুল ঘিয়ে আর গর্দনটাও হাঁড়ায় ঢুকিয়ে ভোজন।’ আমরা যে ভূমানন্দ—ভূমা, বিশ্বপ্রেম, অমৃতের পুত্র এসব কথা তখন ছিল আমাদের ভালভাত—আমাদের মধুরতম স্বপ্নেও কল্পনা করতে পারি নি, এখানে এসে দেখি সে-অমৃত উপচে পড়ছে। সে যুগে বিশ্বভারতীর প্রথম নীতি ছিল, আমি অক্ষরে অক্ষরে তুলে দিচ্ছি: ‘The system of examination will have no place in Visvabharati, nor will there be any conferring of degrees.’ !!

বন্ধি চাটুঘ্যের কল্পনাশক্তি বড়ই দুর্বল। তিনি রচোছিলেন,

‘ছাত্রজীবন ছিল সুখের জীবন

যদি না থাকিত এগজামিনেশন।’

বিশ্বভারতী বন্ধিমের সে স্বপ্ন মূর্তমান করেছিল।

এবং ধর্মতঃ স্রাস্রাতঃ প্রাণুক্রনৌতির পিঠ পিঠ আসে : যেখানে পরীক্ষা নেই সেখানে ক্লাসে উপস্থিত হওয়া না-হওয়া ছাত্রের ইচ্ছাধীন। অতএব রেজিস্ট্রি নেই, রোল-কল্ নেই !

আমাদের অভাব ছিল মাত্র একটি—উৎকৃষ্ট নিকৃষ্ট যা-ই হোক—চায়ের দোকান। তাই ছিল ঘরে ঘরে স্টোভ আর চায়ের সরঞ্জাম।

সত্যকুটিরের বারান্দায় মোড়ার উপর বসে শুনি ভিতরে স্টোভের শব্দ। কেশবগরের মণি গাঙ্গুলী চা বানাচ্ছে। সামনে, গৌরপ্রাঙ্গণ পেরিয়ে, লাইব্রেরির বারান্দায় ঈশং প্রাণচাঞ্চল্য আরম্ভ হয়েছে। বৈতালিকের মূলগায়ন শ্রীযুক্ত অনাদি দস্তিদার (পরবর্তী যুগে খ্যাতিপ্রাপ্ত রবীন্দ্রসঙ্গীতজ্ঞ) ও দোহারদের ফুল রায় গান বাছাই করছেন। পূজনীয় বিধু-ক্ষিত-হরি একটু পরেই আসবেন।

তখনকার দিনে প্রথা ছিল, যারা গত চব্বিশ ঘণ্টার ভিতর এই প্রথম আশ্রমে এসেছে তারা ভোরের বৈতালিকে উপস্থিত হত। আমাদের দলটা ‘গুডি গুডি’দের তুলনায় ছিল সংখ্যালঘু। অবশ্য আমরা দম্ভভরে গুরুদেবকেই উদ্ধৃত করে বলতুম, ‘The rose which is single need not envy the thorns which are many. কিন্তু তকে তকে থাকতুম, দল বাড়াবার জন্ত।

হঠাৎ চোখ পড়লো নয়। মালের দিকে। দূর থেকে মনে হল চেহারাটা ভালোই—ভালোমাহুষ। জানলা দিয়ে ভিতরের গাঙ্গুলীকে বললুম, ‘এসেছে রে’। গাঙ্গুলী এক ঝলক তাকিয়ে নিয়ে গান ধরলে,

‘শুনে তোমার মুখের বাণী

আসবে ছুটে বনের প্রাণী—’

অর্থাৎ বিশ্বভারতীর ডাক শুনে বনের প্রাণীরা এসে জুটেছে।

ইনিই হলেন আমাদের নটরাজন।

ছপুরবেলা খাওয়ার পর তাকে গিয়ে শুধালুম, ‘টেনিস খেলতে জানো?’ বড়ই গাঁইয়া—মাস ছয় পূর্বে আম্মো ছিলুম, এবং বললে পেত্যয় যাবেন না, এখনো আছি—হকচকিয়ে ‘ইয়েস ইয়েস, নো নো, ইয়েস ইয়েস’ বললে। ‘র্যাকেট নেই? কুছ পরোয়া ভী নেই, আমারটা দোব’খন।’ এরপর জাব হবে

না কেন ?

তবে লাভ হল না। কলাভবনের ছাত্র। আমাদের সঙ্গে দেখাসাক্ষাৎ হয় কম। তবে দেখলুম, বাউতুলে স্বভাব ধরে। তখন তখন স্কেচ বই নিয়ে খোয়াইডাডার ভিতর ডুব মারে। সাঁওতাল গ্রাম থেকে ডিম কিনে এনে গোপনে বে সেদ্ধ করে খাওয়া যায়—আশ্রম তখনো নিরামিবাশী—সেটা ওকে শিখিয়ে দিলুম। সে তো নিত্য নিত্য খোয়াই পেরিয়ে সাঁওতাল গায়ে যায়—তার পক্ষে ডিম যোগাড় করা সহজ।

কিন্তু ঐ গোবেচারা পারা ছোড়াটা পেটে যে কত এলেম ধরে সেটা অন্তত আমার কাছে ধরা পড়লো অল্পদিনের ভিতর। আমাকে একটা চেয়ারে বসিয়ে অনেকক্ষণ অবধি এদিক থেকে, ওদিক থেকে, এগিয়ে পিছিয়ে পর্যবেক্ষণ করে তুললো ছুটি ফোটো। পরে প্রিন্ট দেখে আমার চক্ষুস্থির। এ যে, বাবা, প্রফেশনালেরও বাড়া! এবং আজ আমি হুহুরের দেবতা বিশ্বকর্মাণে সাক্ষী মেনে বলছি, পরবর্তী যুগে কি বার্লিন কি লণ্ডন কেউই টেকনিকালি আমার এমন পারফেক্ট ছবি তুলতে পারে নি—এবং স্বরণ রাখবেন, নটরাজনের না ছিল কৃত্রিম আলো বা স্টুডিও।

এরপর যা দেখলুম সে আরো অবিশ্বাস্য। নটরাজনের অগ্রতম গুরু প্রথম মেয়ের বিয়ে। কোথায় গয়না গড়ানো যাবে সেই নিয়ে আলোচনা হচ্ছিল। স্বল্পভাবী নটরাজন অনেকক্ষণ ধরে চুপচাপ শোনার পর বললে, ‘আমাকে মাল-মশলা দিন। আমি করে দিচ্ছি।’ সবাই অবাক; ‘তুমি শিখলে কোথায়?’ বললে ‘শিখি নি, দেখেছি কি করে বানাতে হয়।’ নন্দলাল চিরকালই এ্যাড-ভেঞ্চার-একস্পেরিমেন্টের কলহাস। দিলেন হুকুম, ‘ঝুলে পড়।’

বিশ্বকর্মাণে জানেন শ্রাকরার যন্ত্রপাতি কোথেকে সে যোগাড় করলো, কি কৌশলে কাজ সমাধা করলো। গয়না দেখে কে কি বলেছিলেন সেটা না বলে শুধু সবিনয় নিবেদন করি, হিন্দু বিয়েতে বরপক্ষ আকছারই সহিষ্ণুতায় যুধিষ্ঠিরের সঙ্গে পারা দিতে আসেন না—তারা পর্যন্ত পঞ্চমুখে গয়নার প্রশংসা করেছিলেন।

নটরাজনের অগ্রাগ্র গুণ উপস্থিত আর উল্লেখ করছি না। তার পরবর্তী ঘটনা বোঝার জন্য একটি গুণকীর্তন করি। এতেক বর্ণপরিচয় স্পর্শ না করে শুধু কান দিয়ে সে শিখেছিল অদ্ভুত সড়গড় চলতি বাঙলা। আমাকে শুধু গোড়ার দিকে একদিন শুধিয়েছিল, ‘বাঙলার কি কোনো স্ট্যাণ্ডার্ড উচ্চারণ নেই? উচ্চারণে উচ্চারণে যে আসমান জমীন ফারাক? কোনটা শিখি?’

শান্তিনিকেতনে তখন ছিল নিরঙ্কুশ ‘বাঙাল’ রাজত্ব। ‘গাচটা বাদরের’

বদলে ‘পাস্টা বাদর’ হামেশাই ঝোপঝাড় থেকে ‘বেয়িয়ে পড়ার’ বদলে ‘বেড়িয়ে পরতো’, অবিড়াম ঝড় ঝড় বাড়ি-ধাড়ার মাঝখানে। আমি নটরাজনকে বললুম, ‘আর যা করু করু, দোহাই আল্লার, আমার উচ্চারণ নকল করিস্ নি। আমি বাঙালন্ত বাঙাল—খাজা বাঙাল। আর করিস নি গুরুদেবের। তাঁর ভাষা, তাঁর উচ্চারণ তাঁর মুখেই শোভা পায়। করবি তো করু তোর গুরু নন্দলালের উচ্চারণ। বাঙলায় এম. এ. পাশ ধুরন্ধররাও ওরকম সরল চলতি বাঙলা বলতে পারে না।’

তার পর ঝাড়া বিশটি বছর আমাদের ছুজনাতে দেখাসাক্ষাৎ হয় নি, চিঠি-পত্রও না। এই বিশ বৎসরের ভিতর বাঙলা দেশে থাকলে পৌষ মেলায় কখনো-সখনো শান্তিনিকেতন গিয়েছি। ওর সাক্ষাৎ পাই নি। সত্যি বলতে কি, ওর কথা প্রায় ভুলেই গিয়েছিলুম। শুধু কেউ কখনো অচলিত গান

জগপতি হে

সংশয় তিমির মাঝে

না হেরি গতি হে—

গাইলে মনে পড়তো নটরাজন ওর সুরটা বড় দরদভরা করুণ সুরে বাঁশীতে বাজাতে।

১৯৪৭ সাল। স্বরাজ যখন পাকা ফলটির মত পড়ি পড়ি করছে ঐ সময়ে আমি একদিন বাঙ্গালোরের এক রেস্টোরাঁয় বসে কফি খাচ্ছি। দেখি, তিনটি প্রাণী ঢুকে এককোণে আসন নিল। একজন চীনা কিংবা জাপানী ছোট্টখাটো এক মুঠো মেয়ে, দ্বিতীয়া স্বর্ভোলা তরুণী—খুব সম্ভবত তামিল—এবং সঙ্গে এক কে ? নটরাজন ! চেহারা রক্তির বদলায় নি। শুধু কপালটি আরো চওড়া হয়েছে, চুলে বোধ হয় অতি সামান্য একটু পাক ধরেছে। আমার চেহারা বদলে গেছে আগা-পাশ-তলা কিন্তু আর্টিস্ট নটরাজনকে ফাঁকি দিতে হলে প্রাস্টিক সার্জারি করাতে হয়, এবং চোখ দুটো ‘আই-ব্যাঙ্কে’ জমা দিতে হয়। নটরাজন আমাকে দেখা মাত্র উঠে এসে আমাকে তার টেবিলে নিয়ে গিয়ে মহিলাদের সঙ্গে আলাপ করিয়ে দিলে। তামিলটি লেডি ডাক্তার, বিধবা, প্র্যাকটিস করেন, এবং জাপানীটি তাঁর স্ত্রী। শুধালাম, ‘তুমি আবার জাপান গিয়েছিলে না কি ?’ সেই মুখচোরা নটরাজন মুখ-চোরাই রয়ে গেছে। বললে ‘অনেক বছর কাটিয়েছি।’

সেদিন আর বেশী কথাবার্তা হল না। শুধু বললে, শহরের তিন মাইল দূরে

ফাঁকা জায়গায় সেরামিকের ছোটখাটো কারখানা করেছে, বাড়িও। আমাকে শনিবার দিন উইক-এণ্ড করতে সেখানে নিয়ে যাবে। আমার ঠিকানাটা টুকে নিল।

এস্থলে বলে রাখা কর্তব্য বিবেচনা করি, আমি কুমোরের হাঁড়িকুড়ি থেকে আরম্ভ করে সেরামিক, পর্সেলিন, গ্লেকজড পটারি, ফাইন্স এসবের কিছুই জানি নে। শুধু এইটুকু জানি যে স্টোনওয়ার পাথরের জিনিস নয়—সেটা আমরা যাকে তামচিনি বলি, মেয়েরা যে সব বোয়ামে আচার-টাচার রাখেন। এটা উল্লেখ করার প্রয়োজন হল এই কারণে যে সেই সন্ধ্যায় এক বন্ধুকে নটরাজনের কথা তুলতে তিনি বললেন, ‘সেরামিক বাবদে ও যা জানে না, সেটা জানার কোনো প্রয়োজন নেই। বিগেস্ট একস্পার্ট ইন দি ফিল্ড। এখানকার সরকারী সেরামিক ফ্যাক্টরির বড় কর্তা।’

শনির সন্ধ্যায় নটরাজন আমাকে তার বাড়িতে নিয়ে গেল। তার বউ একটি-মাত্র কথা না বলে যা যত্ন-আত্তি করলে সেটা দেখে বুঝলুম কেন চীন-জাপানে প্রবাদ প্রচলিত আছে ‘চীনা খাও আর জাপানী জ্বী—স্বর্গ-স্বথ : চীনা জ্বী আর জাপানী খাও—নরক ভোগ।’ জাপানী জ্বীজাতির মত কর্মঠ, শাস্ত, সেবাপরায়ণ রমণী নাকি ইহসংসারে নেই।

আহারাদির পর নটরাজনের জ্বী বললেন, ‘দুই বন্ধুতে কথাবার্তা বলুন।’

নানা কথা হওয়ার পর আমি বললুম, ‘জাপানের কথা কও।’

নটরাজন সে রাতে কিছুটা বলেছিল, পরে আরো সবিস্তার।

বললে, ‘শান্তিনিকেতন ছাড়ার পর আমার ধারণা হল যে আর্টসের চেয়ে ক্রাফ্টসেই আমার হাত খোলে বেশী।’

আমি বললুম, ‘সে আর বলতে! সেই যে, গয়না বানিয়েছিলে!’

বললে, ‘সে কথা আর তুলো না। হাত ছিল তখন বড় কাঁচা। তা সে যাক। নানা ক্রাফ্টস শিখলুম অনেক জায়গায়। শেষটায় চোখ পড়লো পর্সেলিনের দিকে। সামান্য কিছুটা শেখার পরই বুঝলুম, এ একটা মারাত্মক ব্যাপার, একটা নতুন জগৎ, এর সাধনায় আস্ত একটা জীবন কেটে যায়। মেলা কেতাবপত্র ঘেঁটে আবিষ্কার করলুম যে, যদিও চীন এই কর্মে একদা সর্বশ্রেষ্ঠ ছিল, ড্রেসডেনও একদা অনেকখানি এগিয়ে গিয়েছিল, এখন কিন্তু জাপান এর রাজা।

ঘটি-বাটি বিক্রি করে চলে গেলুম জাপান।

টোকিয়ো পৌঁছানোর কয়েকদিন পরেই দেখি আমার ল্যাণ্ডলেডি চীনামাটি

নিয়ে নাড়াচাড়া করছে। তার কাছ থেকে খবর পেলুম, পর্সেলিন অর্থাৎ চীনা-মাটির বাসনকোসন, কাপ-সসার বানানো এদেশে কুটিরশিল্পও বটে। সে কি করে হয়! যে মাটি দিয়ে পর্সেলিন তৈরী হয় তার থেকে বালু আর অগ্ন্যান্ন খাদ সরাবার জন্তু ব্যাপক বিস্তৃত ব্যবস্থা করতে হয় অনেকখানি জায়গা নিয়ে—আমি এখানে, বাঙালোরে এসে করেছি, কিন্তু ঠিক ওংরাচ্ছে না, এখানকার মাটি ভালো নয়—থরচাও বিস্তর। ল্যাণ্ডলেডি বললে, বাজারে রেডিমেড কাদা বিক্রি হয়। আমি ল্যাণ্ডলেডিকে বললুম, সে না হয় হল, কিন্তু পোড়াবে (fire করবে) যে, তার জন্তে কিল্ন ফারনেস (পাঁজা) পাবে কোথায়?’

আমি বাধা দিয়ে নটরাজনকে বললুম, ‘আমাদের কুমোররা—’

বললে, ‘হায়, হায়! ঐ টেম্পারেচারে মাটির হাঁড়িকুড়ি হয়। গ্রেজড্ পটারির—এ দেশের সব বস্তুই তাই—জন্তু আরো টেম্পারেচার তুলতে হয়, আর কমসে কম দু হাজার ফারেনহাইট না হলে—’

আমি বললুম, ‘থাক, থাক। ওসব আমি বুঝবো না।’

বললে, ‘হ্যাঁ সেই ভালো। তার পর খবর নিয়ে গাজেমুড়ো অবধি ওকিবহাল হয়ে গেলুম। নিজের চাই শুধু একটা পটারস ছইল—কুমোরের চাক। বাজার থেকে রেডি-মেড কাদা এনে তাতে চড়িয়ে বানাবে যা খুশী। সেগুলো ভেজা থাকতে থাকতেই তার উপর আঁকবে ছবি—নিজস্ব আপন অল্পপ্রেরণায়, এবং একই ছবি দুসরা সেটে আবার নকল করবে না, যে রকম খাস পেণ্টাররা একই ছবি দু’দুবার আঁকেন না। ছবি আঁকা শেষ হয়ে গেলে সেগুলো ঠেলায় করে নিয়ে যাবে কিল্নওয়ার কাছে। বহু লোকের কাছ থেকে এক রাশ জমা হলে তবে সে ফায়ার করবে, নইলে খর্চায় পোষায় না। তবে মোটামুটি বলে দেয় কবে এলে তোমার মাল তৈরী পাবে। মাল খালাসীর সময় দেবে তার মজুরী। তার পর তুমি তোমার মাল পর্সেলিনের দোকানে দিয়ে আসতে পারো—তার বিক্রি করে তাদের কমিশন নেবে—কিংবা তুমি ঠেলা ভাড়া করে তার উপর মাল সাজিয়ে ফেরি করে বেড়াতে পারো।’

আমি বললুম, ‘ব্যবস্থাটা উত্তম বলতে হবে। তার পর?’

‘জিনিসটা যে এত সরল সহজ করে এনেছে জাপানীরা সেটা আমি জানতুম না। সেইদিনই সব-কিছু ষোগাড় করে লেগে গেলুম কাজে। টেকনিকেল ছোটো একটা সামান্য জিনিস ল্যাণ্ডলেডির করার ধরন থেকে অনায়াসে শিখে নিলুম। আর এ ব্যাপারে তো এই আমার পয়লা হাতেখড়ি নয়। আর কাপ, পটে আঁকার মত ছবির বিষয়বস্তু নিয়েও আমার কোনো হুঁতাবনা ছিল না।

মাল যখন সমুচা তৈরী হল, তখন কিছুটা দিলুম দোকানে, আর ঠেলা নিয়ে ফেরি করতে কার না শখ যায় ?

ভারতীয় বলে সর্বত্রই পেলুম অকুপণ সৌজ্ঞ্য ও সাহায্য। তুমি জানো কিনা জানি নে, এ শতাব্দীর গোড়ার দিকে এক ভবঘুরে জাপানী না জানি কি করে ভাসতে ভাসতে পৌঁছয় তোমাদের ঢাকা শহরে। ভাবতেই কি রকম মজা লাগে—হুনিয়ার সব জায়গা ছেড়ে ঢাকা। তবে ঐ চিরসবুজের দেশ—আমারও দেখা আছে—তাকে এমনি মুগ্ধ করলো যে, সে সেখানে একটা সাবানের কারখানা খুললো এবং শেষটায় একটা হিন্দু মেয়েকে বিয়েও করলো। বাপ মাকে দেখাবার জন্ত একবার নিয়ে গেল তার বউকে জাপানে। ‘বুদ্ধের দেশের মেয়ে জাপানে এসেছে’ খবরটা দেশময় ছড়িয়ে পড়ল মুখে মুখে। সেই অজ পাড়াগাঁ রাতারাতি হয়ে গেল জাপানের তীর্থভূমি। হাজার হাজার নরনারী লাইন দিয়ে দাঁড়িয়ে গেল সেখানে কন্ঠার দর্শনাভিলাষে। ভাবো, মেয়েটার অবস্থা। ঘণ্টার পর ঘণ্টা তাকে বসতে হল পদ্মাসনে, আর নতনয় জাপানীদের লাইন তাকে প্রণাম করে পাণ্ডুঅর্ধ দিয়ে নিজেদের ধন্য মনে করলো।’

আমি বললুম, ‘মহিলাটি ঢাকায় ফিরে তাঁর জাপান-অভিজ্ঞতা বাঙলায় লেখেন, বড় সবিনয় ভাষায়। আমি পড়েছি। সে তো এলাহি ব্যাপার হয়েছিল।’

‘হবে না ? আমার আমলে আমাদের রাসবিহারীবাবু ছিলেন জাপানীদের সাক্ষাৎ দেবতা। ভারতবর্ষ থেকে জাপানে যে কেউ আসুক না কেন—এমন কি ইংরেজও—তার কাগজপত্র যেত ওঁর কাছে। তিনি ‘না’ বললে পত্রপাঠ আগন্তকের জাপান ত্যাগ ছিল অনিবার্য। আর গুরুদেবের কাছ থেকে কেউ চিঠি নিয়ে এলে রাসবিহারীবাবু তাকে সমাজের সর্বোচ্চদের সঙ্গে আলাপ করিয়ে দিতেন। বৈশাখী পূর্ণিমায় বুদ্ধের জন্মদিনে তাঁর বাড়ি থেকে প্রসাদ বিতরণ হত—কিউ দাঁড়াতো মাইল দুয়েক লম্বা। সিঁড়া না আমাদের দেশের কি একটা খাবার—জাপানীদের কাছে রোমান্টিক এবং হোলি।

আমি অবশ্য পারতপক্ষে মাতৃভূমির পরিচয় দিতুম না।

তবু বিক্রি হতে লাগলো প্রচুর। তার কারণ সরল। পাত্রে গায়ে অজানা ডিজাইন, নবীন ছবি—তা সে ভালো হোক আর মন্দই হোক—সস্তারেরই চিন্ত-চাঞ্চল্য এনে দেয়। তারই ফলে আমি পরমানন্দে দিন কাটাতে লাগলুম। ফেরি-টেরি আর করি নে—নিতাস্ত হু’মাসে ছ’মাসে এক আধ দিন—রোমান্সের জন্ত। করে করে দু বছর কেটে গেল।

একদিন ঐ ঠেলা গাছের ছায়ায় দাঁড় করিয়ে আমি জিরোচ্ছি, এমন সময় এক থুরথুরে অতিবৃদ্ধ জাপানী খানদানী সামুরাই—অন্তত আমার তাই মনে হল—থমকে দাঁড়ালেন ঠেলার সামনে। কিন্তু ঐর মুখে দেখি তীব্র বিরক্তি। পুরু পরকলার ভিতর দিয়ে ক্ষণে তাকান আমার দিকে, ক্ষণে ঠেলার মালের দিকে। জাপানীরা অসহ্য রকমের অসম্ভব ভদ্র; অসম্ভব কিছুতেই প্রকাশ করতে চায় না। ঐর কিন্তু ধৈর্যের বাধ যেন টুটে গেল। বিড়বিড় করে বলতে লাগলেন, ‘এসব কি? এসব কি করেছ? যাও, যাও, ওস্তাদ ওসিমার’ কাছে। তোমাকে আর কেউ বাঁচাতে পারবে না।’ তার পর আমাকে পাশ কাটিয়ে যেতে যেতে বললেন, ‘এ রকম সুরেলা গলা নিয়ে কি বিশ্রী বেসুরা গান!’

আমি বাড়িতে এসে মাথায় হাত দিয়ে বসে পড়লুম। সত্যিই তো, আমি এ দু বছরে নূতন শিখেছি কি? কাদা কি করে তৈরী করতে হয় কিল্ন কি করে জালাতে হয়—অন্য সব বাদ দিচ্ছি—কিছুই তো শিখি নি। দেশে ফিরলে ওগুলো আমায় করে দেবে কে? আর বাসনকোসনের শেপে, ছবিতে নিশ্চয়ই মারাত্মক ত্রুটি আছে, নইলে রাস্তার বুড়ো গুরুকম খাণ্ডা হল কেন?

চিন্তা করতে করতে মনে পড়লো শান্তিনিকেতন মন্দিরে গুরুদেবের একটা সারুমনের কথা। সোনার পাত্রে সত্য লুকানো রয়েছে—সবাই পাত্র দেখে মুগ্ধ, ভিতরে হাত দিয়ে খোঁজে না, সত্য কোথায়। আমার হয়েছে তাই। এখানে কাঁচা পয়সা’কামিয়ে আমি অবহেলা করেছি সেরামিকের নিগূঢ় তত্ত্ব।

কিন্তু আর না।

ওস্তাদ ওসিমা সম্বন্ধে খবর নিয়ে কিন্তু বিশেষ ভরসা পেলুম না। তিনি বাস করেন এক অজ্ঞ পাড়াগাঁয়ে, এবং গত দশ বছর ধরে কোনো শাগরেদ নিতে রাজী হন নি। তবে সবাই একবাক্যে বললেন, গুরুকম গুণী এখন তো কেউ নেইই; সেরামিকের ইতিহাসেও কমই জন্মেছেন।

যা হয় হবে কুল-কপালে। সব জিনিসপত্র বিক্রি করে দিয়ে, একফালি বিছানা আর একটি স্টুটকেন নিয়ে পৌঁছলুম সেই গাঁয়ে, খুঁজে বের করলুম ওস্তাদের বাড়ি।

জাপানী ভাষা কিন্তু আমি বাড়লার মত স্বক্কু কান দিয়ে শিখি নি। প্রথম দিন থেকে রীতিমত ব্যাকরণ অভিধান নিয়ে—তোমরা যে রকম আশ্রমে শাস্ত্রী

১ বর্তমান লেখক ওস্তাদের নাম ভুলে যাওয়াতে অন্ত্যান্ত কাল্পনিক নামের সঙ্গে ওসিমার আশ্রয় নিল।

মশায়ের কাছে সংস্কৃত—’

আমি বললুম, ‘ধাক্, ধাক্।’

‘ওস্তাদের ঘরে ঢুকে, মাটিতে মাথা ঠেকিয়ে তাঁকে প্রণাম করে অতিশয় বিনয়, ততোধিক বশ্যতা প্রকাশ করে তাঁর শিষ্য হওয়ার ভিক্ষা চাইলুম।

যেন বোমা ফাটলো ; ‘বেরিয়ে যাও এফ্‌নি, বেরোও এখান থেকে।’

আমি ভয়ে ভয়ে এসেছিলুম সত্যি, কিন্তু এরকম পদাঘাত প্রত্যাশা করি নি।

আরম্ভ করলুম কাকুতিমিনতি, সূদূর ইণ্ডিয়া থেকে এসেছি, আমি হতো দেব ইত্যাদি। আর শুধু মাটিতে মাথা ঠেকাই।

অনেকক্ষণ পর তিনি অতিশয় শাস্ত সংঘত কণ্ঠে বললেন, “আমি কি করি না করি সে-কথা কাউকে বুঝিয়ে বলার প্রয়োজন বোধ করি নে। তবু তোমাকে বলছি—বিদেশী বলে। আমার কাছে লোক এসে ছুঁচার মাস তালিম নিয়ে পালিয়ে গিয়ে রটায় তারা আমার শিষ্য। কিছুই তারা শেখে নি—আর আমার নাম ভাঙিয়ে খায়। তাই আমি প্রতিজ্ঞা করেছি আর কোনো শিষ্য নেব না”।’

আমি বললুম, ‘নটরাজন, বরোদার ওস্তাদ গাওয়াইয়া ফইয়াজ খানও হুবহু ঠিক একই কারণে তাঁর জীবনের শেষের দিকে আর কোনো চেলা নিতেন না।’

নটরাজন বললে, ‘ওঁদের দোষ দিই নে, কিন্তু আমার দিকটাও তো দেখতে হবে। আমি আমার ওস্তাদকে অনেক বোঝাবার চেষ্টা করলুম, আমি ওরকম কোনো কুমতলব নিয়ে আসি নি। তিনি অটল অচল, নির্বাক।

কি আর করি! বারান্দায় গিয়ে বসে রইলুম বিছানাটার উপর দেয়ালে হেলান দিয়ে—আমি না-ছোড়-বান্দা, জীবনমরণ আমার পণ।

ঘণ্টাখানেক পর ওস্তাদ বাড়ি থেকে বেরিয়ে কোথায় চলে গেলেন—আমাকে দেখে সঙ্গে সঙ্গে চোখ ফিরিয়ে নিলেন। আমি এক লম্ফে ঘরের ভিতর ঢুকে তাঁর চাকরকে খুঁজে বের করে বললুম, “দাদা, এখন তুমিই আমার একমাত্র ভরসা। তুমি আমার সাহায্য করো।” সে আগেই গুরুর সঙ্গে আমার বাক্যলাপ শুনেছিল। তাকে বথশিশের লোভও দেখালুম। তার অহুমতি নিয়ে ওস্তাদের সব ক’খানা ঘরে লাগালুম ঝাঁট, ঝাড়াই-পোছাই, খুঁটিয়ে খুঁটিয়ে তন্ন তন্ন করে। গামলার জল পাটালুম, রঙতুলি গুছিয়ে রাখলুম, জামা-কিমোনো ভাঁজ করলুম, বিছানা দুরুস্ত করলুম। তারপর ফের বারান্দায়, বিছানার উপর। ওস্তাদ ঘণ্টাখানেক পরে ফিরে এসে দরজার সামনে এক লহমার তর্রে একটু থমকে দাঁড়ালেন। কিন্তু নির্বাক। এবার চাকরকে চাকেরে ঝুঁকুশ দিলেন।

আমি আড়াল থেকে লক্ষ্য করলুম। ঘণ্টাখানেক পরে খেয়ে শুতে গেলেন। আমি গায়ের যে একটি মাত্র খাবারের দোকান ছিল সেখানে শুটকি-ভাত খেয়ে এলুম। ওস্তাদ ঘুম থেকে উঠে চায়ের জন্ম হাঁক দিতেই আমি রান্নাঘর থেকে চায়ের সরঞ্জাম এনে মেঝেতে হাঁটু গেড়ে বসে চা তৈরী করে কাপ এগিয়ে দিলুম। তিনি তখন আমার দিকে পিছন ফিরিয়ে ভেজা পাত্রে ছবি আঁকছিলেন। পেয়াল হাতে নিয়েই ঘাড় ফিরিয়ে একবার ভ্রুকুটি-কুটিল নয়নে আমার দিকে তাকালেন। কিন্তু নির্বাক। এরপর আমি রঙ গুলে দিতে লাগলুম। যাই বলো, যাই কও—আমিও আর্টিস্ট। কখন কোন্ রঙের দরকার হবে আগের থেকেই বুঝতে পারি। তাঁকে অপেক্ষা করতে হয় না। তিনি নির্বাক।

সে রাত্রে আমি বারান্দাতেই ঘুমিয়েছিলুম। কিন্তু ঐ এক রাত্রিই।

ভোর থেকেই লেগে গেলুম চাকরের কাজে। তার পরের দিন। ফের পরের দিন। চাকরটা এখন আর তাঁর ঘরেই ঢোকে না। তিনি নির্বাক।

আমি দু বেলা হোটেলে গিয়ে শুটকি-ভাত খাই, আর রাত্রে চাকরের পাশে শুই।

বিশ্বাস করবে না, এই করে করে প্রায় একমাস গেল। তিনি নির্বাক।

মাসখানেক পরে একরাত্রে আমি আমার ইচ্ছা আর কিছুতেই দমন করতে পারলুম না। যা দেখেছি সেইটে কাজে লাগাবার অদম্য কামনা আমার ঘুম তাড়িয়ে দিয়েছে। অতি চুপিসাড়ে ওস্তাদের পটার্স হুইলের পাশে বসে একটা জাম-বাটি তৈরি করতে লাগলুম তন্ময় হয়ে। হঠাৎ পিঠের উপর একটা বিরশি সিকার কিল আর হুকার।

“কোন্ গর্দভ তোমাকে শিখিয়েছে গুরুকম ধারা বাটি ধরতে? কোন্ মর্কট তোমাকে শিখিয়েছে গুরুকম আঙুল চালাতে? প্রত্যেকটি জিনিস ভুল। যেন ইচ্ছে করে যেখানে যে ভুলটি করার সেটা মেহনত করে করে শিখেছ। হটো ইহাঁসে!”

গুরু প্রথম নিজে করলেন। কী বলবো ভাই, তাঁর দশটি আঙুল যেন দশটি নর্তকী। প্রত্যেকটির ফাংশন যেন ভিন্ন ভিন্ন, নাচে আপন আপন নাচ। তারপর আমাকে বসিয়ে আমার হাতে হাত ধরে গুরু করলেন গোড়ার থেকে। আর শুধু বলেন, “হা আমার অদৃষ্ট, এসব গলদ মেরামত করতে করতেই তো লেগে যাবে পাঁচটি বছর!”

এই আমার প্রথম পাঠ। ভোর অবধি চলেছিল।

সকালবেলা চা খেতে খেতে শান্ত কর্তে বললেন, “ভুল প্র্যাকটিস বে কী

মারাত্মক হতে পারে তার কল্পনাও তোমার নেই। তোমার ঘর কাঁট দেওয়া, রঙ গোলা থেকে আমি অহুমান করেছিলুম তোমার হাত আছে, কিন্তু অসম্ভব খারাপ রেওয়াজ করে করে তার যে সর্বনাশ করে বসে আছো সেটা জানলে প্রথম দিনই পুলিশ ডেকে তোমাকে তাড়িয়ে দিতুম। এখন দেখি, কি করা যায়। এও আমার এক নতুন শিক্ষা! তোমাকে নেব দুই শর্তে। প্রথম, আমি অহুয়তি না দেওয়া পর্যন্ত তুমি তোমার কাজ জনসাধারণকে দেখাতে পারবে না। দ্বিতীয়, আমি অহুয়তি না দেওয়া পর্যন্ত তুমি শিক্ষা ক্ষান্ত দিয়ে পালাতে পারবে না।”

আমি বুদ্ধের নামে শপথ করলুম।

তারপর, ভাই, আরম্ভ হল আমার পিঠের উপর র‍্যাঁদা চালানো। একই কাজ একশ’ বার করিয়েও তিনি তৃপ্ত হন না—আর মোস্ট এলমেণ্টারি টাস্ক। সঙ্গীতের উপমা দিয়ে বলতে পারি, এ যেন স্ত্রেফ ‘সা রে গা মা পা ধা নি সা, সা নি ধা পা মা গা রে সা। সা রে গা মা পা ধা নি—’

আমি বললুম, ‘বোমা পড়ে জাপানী!’

নটরাজন অবাক হয়ে বললে, ‘সে আবার কি?’ আমি বললুম, ‘সিলেটে গত যুদ্ধে প্রথম জাপানী বোমা পড়ার সঙ্গে সঙ্গে গ্রাম্য কবি রচেন,

সা রে গা মা পা ধা নি

বোমা পড়ে জাপানী

বোমার মধ্যে কালো সাপ

বিটিশে কয় বাপ রে বাপ!’

নটরাজন বললে, ‘আমার অবস্থা তখন ব্রিটিশের চেয়েও খারাপ। তারা তো পালিয়ে বেঁচেছিল, আমার যে পালাবারও উপায় নেই। তবে গুরু এখন বাধ্যয়। চা খেতে খেতে, বেড়াতে যেতে যেতে ফাইয়ঁস-পর্সেলিনের গুহৃতম তত্ত্ব বোঝাতেন, কিন্তু রেওয়াজের বেলা সেই প্রাণবাতী সা রে গা মা।

পাক্কা দেড়টি বছর পরে পেলুম দ্বিতীয় পাঠ!

ইতিমধ্যে দেখি, এ-দেশের ব্যাপারটাই আলাদা! অনেক দিন একটানা পাত্র গড়ে তার উপর ছবি এঁকে যখন এক ডাঁই তৈরী হল তখন গুরু কিল্‌নে সেগুলো ঢুকিয়ে করলেন ‘ফায়ারিং’। ইতিমধ্যে পটারির সমঝদারদের কাছে নিমন্ত্রণ গেছে, অমুক দিন অমুকটার সময় তাঁর পটারির প্রদর্শনী। টাউস টাউস মোটর চড়ে, গ্রাম্যপথ সচকিত করে এলেন লক্ষপতিয়া। তাঁরা চা খেলেন। সার্ড করলুম। সবাই ভাবলেন আমি বিদেশী চাকর। একজন একটু কোঁতুল

দেখিয়েছিলেন, গুরু সেটা অঙ্করেই বিনাশ করলেন। তার পর ঠুঁদের সামনেই কিল্‌ন থেকে পটারি বের করা হল। পাঁচ শ থেকে আরম্ভ করে, এক এক সেট হু'হাজার তিন হাজার টাকায় সব—সব বিক্রি হয়ে গেল। দেশে, বিলেতে মাহুষ যে রকম ছবি, মূর্তি কিনে নিয়ে আপন কলেক্‌শন বানায়।

তার পর আন্তে আন্তে অহুমতি পেলুম পাত্রেয় গায়ে ছবি আঁকবার। পুরো এক বছর ধরে পাত্র গড়ি, ছবি আঁকি কিন্তু কিল্‌নে ঢোকবার অহুমতি পাই নে। ভেঙে ফেলতে হয় সব। সে কী গব্বয়জ্ঞা!

এমন সময় এল গুরুর আরেকটা প্রদর্শনী। আমি গোপনে গুরুর ভাইয়ের সঙ্গে আমার একটা কাপ এক কোণে রেখে দিলুম। ডিজাইন দিয়েছিলুম পার্শিয়ান। আমাদের দেশে তো সেবামিকের ঐতিহ্য নেই, আর পার্শিয়ান ডিজাইন জাপানে প্রায় অজানা।

চায়ের পর কিল্‌ন খোলার সময় প্রায় একই সময়ে সকলের দৃষ্টি পড়ে গেল আমার কাপটার উপর। আমি আশা করেছিলুম ওটা আমি গোপনে সরিয়ে নিতে পারবো। আমি তখন ছোঁ মেরে সেটা সরিয়ে করলুম পলায়ন। ঠুঁদের ভিতর তখন আরম্ভ হয়ে গিয়েছে আমার কাপ নিয়ে নীলাম। গুরু বলবার ঘরে এসে আমাকে ডাকলেন। আমি এসে মাটিতে মাথা ঠেকিয়ে প্রণাম করে তাঁর পায়ের কাছে কাপটি রাখলুম। তখন তাঁরা বুঝলেন, এটা কার কাজ। গুরু শ্মিত হাস্তে ঠুঁদের সবকিছু বয়ান করে বললেন, “শিগগিরই ওর আপন প্রদর্শনী হবে। আপনারা কে কি চান অর্ডার দিয়ে যান।”

ওয়া চলে গেলে আমি সব বুঝিয়ে গুরুর কাছে মাফ চাইলুম। তিনি প্রসন্ন বদনে বললেন, “হু-চার মাসের ভিতর এমনিতেই হ’ত। তোমাকে কিছু বলি নি।”

আমি কাজে লেগে গেলুম। গুরু আপন কাজ বন্ধ করে দিয়ে পই পই করে তদারকি করলেন আমার প্রত্যেকটি পদক্ষেপ বা অঙ্গুলিচালনা।

নিমন্ত্রণ-পত্র বেরুলো তাঁর নামে। আমার প্রথম প্রদর্শনী। গুরু বললেন, “তোমার একটা ফটো ছেপে দাও চিঠিতে।”

নটরাজন বললে, “দাঁড়াও, সে চিঠির একটা কপি বোধহয় বউয়ের কাছে আছে।” তাঁকে স্মরণ করা হলে তিনি নিয়ে এলেন একটা এ্যালবাম। তাতে মেলা প্রেস-কাটিংস। নটরাজনের প্রদর্শনীর রিভিউ। নিমন্ত্রণপত্রে তাক্‌জ্ব হয়ে দেখি ফটোতে নটরাজনের মাথায় খাল পাঠান পাগড়ি! আমি বললুম, ‘এ কি?’ বললে, ‘তাই, জাপানীরা ঐ পাগড়িটাই চেনে। ওঠা হলেই ইন্ডিয়ান!’

আমি শুধালুম, 'তারপর !'

'প্রদর্শনী হল। গুরু মন্দিরটার মত প্যাখম তুলে ঘোরাঘুরি করলেন। বেবাক্ মাল বিক্রি হয়ে গেল। কাঁড়া কাঁড়া টাকা পেলুম। কাগজে কাগজে রিভিউ বেরলো।'

নটরাজনের স্ত্রী বললেন, 'তিনি জাপানের অন্ততম সেরা আর্টিস্ট বলে স্বীকৃত হলেন।'

নটরাজন বললে, 'সে সব পরে হবে। আমার মস্তকে কিন্তু সাতদিন পরে সাক্ষাৎ বজ্রাঘাত। চাঁদের আলোতে ঝরনাতলায় চুকচুক করে সাকে খেতে খেতে গুরু বললেন, "এইবারে বৎস, তোমার ছুটি। টোকিওতে গিয়ে আপন পসরা মেলা।"

আমি আর্তকণ্ঠে বললুম, "গুরুদেব, আমার যে কিছুই শেখা হয় নি।"

গুরু বললেন, "বৎস, শেখার তো শেষ নেই। কিন্তু গুরুর কাছ থেকে তালিম নেবার একটা শেষ থাকে। তোমাদের ইস্কুল-কলেজেও তো শেষ উপাধি দিয়ে বিদায় দেয়। তখন কি আর গুরু শোনে তোমার মিনতি যে, তোমার কিছুই শেখা হয় নি ? আমি যে সব ছন্দ পুরুষায়ক্রমে পেয়েছি তার প্রত্যেকটি তোমাকে শিখিয়েছি। এবারে আরম্ভ করো সাধনা।"

আমার সব অমুনয়-বিনয় ব্যর্থ হল। বললেন, "মাঝে মাঝে এসো ; তোমার কাজ দেখে আলোচনা করবো। নির্দেশ দেবো না, আলোচনা করবো।"

আমি পরের দিন আমার সঞ্চয়ের সব অর্থ গুরুর পদপ্রান্তে রাখলুম— গুরুদক্ষিণা। তিনি একটি কড়িও স্পর্শ করলেন না। অনেক চেষ্টা দিলুম। আবার তিনি নির্বাক ! সেই প্রথম দিনের মত।'

বেশ খানিকক্ষণ কি যেন একটা ভেবে নিয়ে নটরাজন বললে, 'এর সঙ্গে কিন্তু একটা সাইড-ড্রামাও আছে।'

'সেটা কি ?'

মুচকি হেসে বললে, 'তার কন্ডার—'

মিসেস উঠে বললেন, 'আমি চললুম।' তিনি সঙ্গে সঙ্গে হাওয়া।

নটরাজন বললে, 'তার কন্ডার পাণিগ্রহণের অহুমতি চাইলুম।'

আমি বললুম, 'সে কি ! এর তো কিছু বলো নি !'

'বললুম তো, সে অস্ত্র নাট্য। আরেক দিন বলবো।'

'গুরু কি বললেন ?'

‘হু হাত দিয়ে জড়িয়ে ধরে প্রাণভরে আশীর্বাদ করলেন। বললেন “আমার দুর্ভাবনার অন্ত ছিল না যে আমার গুণী মেয়ে কোনো আনাড়ির হাতে পড়ে, যে সেরামিকের রস জানে না। তোমরা দুজনতে আমার ঘরানা বাঁচিয়ে রাখবে, সমৃদ্ধ করবে।” আমার স্ত্রী সত্যি ভালো কাজ করতে পারে।’

*

*

*

পরের দিন শুধালুম, ‘দেশে ফিরে কি করলে?’

দীর্ঘশ্বাস ফেলে বললে, ‘আমি জানতুম এদেশে অলঙ্ঘ্য বাধাবিধি। কাদা-কিলনের কথা বাদ দাও, আমার হ্যাণ্ডপেণ্টেড অরিজিনাল জিনিস পাঁচশ’ হাজার টাকা দিয়ে কিনবে কে? এদেশে তো এসব কেউ জানে না,—ভাববে আমি পাগল, একটা টি-সেটের জন্য পাঁচশ’ টাকা চাইছি। এদেশে জাপানী ক্রকারি আসে মেশিনে তৈরী মাস্-প্রোডাকশন্। আমার তো প্রতি মাসে অন্তত সাতশ, হাজার টাকা চাই। জাপানে প্রতি মাসে পাঁচ-সাত হাজারও কামিয়েছি।’

আমি বললুম, ‘এ কী ট্রাজেডি! যা শিখলে তার সাধনা করতে পেলে না?’

হেসে বললে, ‘আমি কি পয়লা না শেষ? বিদেশ থেকে উত্তম সায়ান্স শিখে এসে কত পণ্ডিত উপযুক্ত স্বল্পপাতির অভাবে এদেশে শুকিয়ে মরে! আর ষারা ছবি আঁকে? তাদেরই বা ক’জনের অল্প জোটে? তাই একটা চাকরি নিয়েছি—দেখি, অবসর সময়ে যদি কিছু—’

আমি উৎসাহের সঙ্গে বললুম, ‘তোমার চাকরিটা তো ভালো। তোমাদের সেরামিক ফ্যাক্টরি গুনেছি, ভারতের সর্বোত্তম। সবচেয়ে বেশী টেম্পারেচর তুলতে পারে তোমাদের কিলনে।’

অট্টহাস্য করে নটরাজন বললে, ‘ইন্সুলেটর! ইন্সুলেটর! লক্ষ লক্ষ, কোটি কোটি! টেলিগ্রাফের খুঁটির মাথায় সাদা মুণ্ডটা দেখেছ? আমার বানাই সেই মাল। অষ্টপ্রহর তাই বানিয়েও বাজারের খাঁই মেটাতে পারি নে। কোম্পানির ওতেই লাভ, ওতেই মুনাফা। আর দয়া করে ভুলো না, হরেক রকম ইন্সুলেটর সেরামিক পর্যায়েই পড়ে! হা-হা হা-হা, যেমন দেয়ালে যে বঙ লাগায় সেও পেণ্টার, অবন ঠাকুরও পেণ্টার!’

ইন্সুলেটর হে, ইন্সুলেটর !!

বুড়ো-বুড়ী

‘চিঠি নাকি, বাবাজী আজান?’

‘বিলক্ষণ, মসিয়ো...প্যারিস থেকে এসেছে।’

চিঠিখানি যে খুদ প্যারিস থেকে এসেছে তাই নিয়ে সাদা-দিল্ বাবাজী আজানের চিন্তে রীতিমত দেমাক।...কিন্তু আমার না। কে যেন আমায় বলে দিচ্ছিল, এই যে জঁ্যা জাক্ রুসো সরগীর প্যারসিনী বলা নেই কওয়া নেই, সাত সকালে হঠাৎ আমার টেবিলের উপর এসে অবতীর্ণ হলেন, ইনি আমার পুরো দিনটারই সর্বনাশ করবেন। ঠিক। তুল করি নি : বিশেষ না হয় দেখুন :

‘আমার একটু উপকার করতে হবে, দোস্ত। তোকে এক দিনের তরে তোর ময়দা-কল বন্ধ করে সঙ্গে সঙ্গে এইগুইয়ের যেতে হবে...এইগুইয়ের বড় গণ্ডগ্রাম, তোর গুথান থেকে পাঁচ ছ কোশ—কিছু না, বেড়াতে বেড়াতে পৌঁছে যাবি। পৌঁছে অনাথাত্রয়ের খোঁজ নিবি। আশ্রমের ঠিক পরের বাড়িটা একটু নিচু, জানলা-খড়খড়ি ছাই-রঙা, বাড়ির পিছনভাগে একটুখানি বাগান। কড়া না নেড়েই ঢুকে পড়বি,—দরজা হামেহাল খোলা থাকে—আর ঘরে ঢুকেই আচ্ছা জোরসে চৈচিয়ে বলবি, “সজ্জনদের পেনাম জানাই ! আমি মরিসের বন্ধু...” তখন দেখতে পাবি এক মুঠো সাইজের ছোট্ট একজোড়া বুড়ো-বুড়ী, ওঃ ! সে কী বুড়ো ! বুড়ো, তার চেয়েও বুড়ো, আত্মিকালের বুড়ো-বুড়ী তাঁদের বিরাট আরাম কেন্দ্রার গর্ভ থেকে তোর দিকে হাত তুলে ধরবেন, আর তুই তখন তাঁদের আমার হয়ে আলিঙ্গন করবি, চুমো খাবি, তোর সর্ব হৃদয় দিয়ে, যেন গুরা তোরই। তার পর সবাই মিলে গাল-গল্প আরম্ভ হবে ; গুনরা হুদু আমার সম্বন্ধেই কথা কইবেন, আর কিছুটি না, হুদু আমার কথা ; হাজার হাজার আবোল-তাবোল বকে যাবেন, তুই কিন্তু হাসবি নি...হাসবি নি কিন্তু, বুঝেছিস ?...এঁরা আমার ঠাকুন্দা, ঠাকুমা, ওঁদের আগাপাস্তলা প্রাণ একমাত্র আমি—এবং আমাকে দশ বছর হল দেখেন নি...দশ বছর—দীর্ঘকাল ! কিন্তু করি কি বল ! আমি—প্যারিস আমাকে জাবড়ে ধরে আছে ; ওঁদের ? ওঁদের আটকে রেখেছে বুড়ো বয়স... এঁদের যা বয়স, আমাকে দেখবার জ্ঞান রওয়ানা হলে পথিমধ্যে চালানী মালের মত টুকরো টুকরো হয়ে যাবেন...কিন্তু আমার কপাল ভালো, তুই তো ভাই, হোথায় আছিস, বেরাদর আমার, ময়দাকলের মালিক’—তোকে আদর-প্যার করে

১ আসলে দোদে নিজঁনে বাস করার জ্ঞান একটি অতিবৃদ্ধ পরিত্যক্ত মিল ভাড়া করেছিলেন, প্রায় বিনামূল্যে।

বেচারী বুড়ো-বুড়ীরা আনন্দ পাবে, যেন আমারই এ্যাটুথানিকে চুমো-চামা খাচ্ছে...আমি অনেক বার আমাদের কথা ওঁদের বলেছি, এবং আমাদের গভীর বন্ধুত্ব সম্বন্ধেও, যেটি কি না....’

জাহান্নামে যাক বন্ধুত্ব! ঠিক আজকের সকালটাতেই আবহাওয়াটি হয়েছে চমৎকার, কিন্তু বাউণ্ডলের মত যত্র-তত্র চর্কিবাজি খাওয়ার মত আদপেই নয়। একে তো বইছে জোর হাওয়া, তত্পরি রৌদ্রটিও চড়চড়ে কড়া—প্রভাস অঞ্চলের খাঁটি দিন যাকে বলে। আমি ঠিক করে বসেছিলুম, হুটি পাহাড়ের টিপির মধ্যখানে শুয়ে শুয়ে সমস্ত দিনটা কাটিয়ে দেব ছবছ একটি গিরগিটির মত, স্থূর্ঘালোক পান করতে করতে আর পাইন গাছের মর্মর গান শুনতে শুনতে—এমন সময় এল ঐ লক্ষ্মীছাড়া চিঠিটা...কিন্তু করা যায় কি কও? মিলটা বন্ধ করলুম অভিসম্পাত দিতে দিতে, চাবিটা রেখে দিলুম বেরালটার আসা-যাওয়ার ছোট্ট গর্তটার ভিতর। লাঠিটা, পাইপটি—বাস, নাবলুম রাস্তায়।

বেলা প্রায় দু’টোর সময় পৌঁছলুম এইগুইয়েরে। গাটা খাঁ খাঁ করছে, সবাই খেত-খামারে। ধুলোয় ঢাকা এলুম গাছে ঝিল্লি ঝিঁঝিঁ করছে যেন নিজের খোলামাঠের মধ্যখানে। অবিজ্ঞি সরকারী বাড়িটার সামনের চত্বরে একটা গাধা রোদ পোয়াচ্ছিল বটে, আর গিজের সামনের কোয়ারার একপাল পায়রাও ছিল, কিন্তু অনাথাশ্রমটি দেখিয়ে দেবার মত কেউই ছিল না। কিন্তু কপাল ভালো, হঠাৎ আমার সামনে যেন পরীর মত আত্মপ্রকাশ করলে এক বুড়ী। ঘরের সামনের এক কোণে উপু হয়ে বসে চরকা কাটছিল। শুধালুম তাকে। আর পরীটিরও ছিল দৈবীশক্তি। কড়ে আঙ্গুলটি তুলে দেখাতে না-দেখাতে তৎক্ষণাৎ চোখের সামনে যেন মন্ত্রবলে আমারই সামনে দাঁড়িয়ে উঠলো অনাথা-শ্রমটি!...বিরাত, ভারিক্কি, কালো কুঠিবাড়ি। বেশ দেমাকের সঙ্গে তার দেউড়ির উপরের পাশটে লাল রঙের প্রাচীন দিনের ক্রুশ—চতুর্দিকে আবার দু’হস্তর লাতিনও দেখিয়ে দিচ্ছে! ঐ বাড়িটার পাশেই দেখতে পেলুম আরেকটি ছোট্ট বাড়ি। ছাইরঙের খড়খড়ি, পিছনে ছোট্ট বাগানটি...তদুত্তেই চিনে গেলুম, কড়া না নেড়েই ঢুকে পড়লুম।

আমার বাকী জীবন ধরে আমি সেই দীর্ঘ করিডরটি দেখব; মন্দ-মধুর ঠাণ্ডা, শাস্ত-প্রশান্ত, দেয়ালগুলো গোলাপী রঙের, খড়খড়ির ভিতর দিয়ে দেখি বাগানটি যেন স্বচ্ছ রৌদ্রালোকে অল্প অল্প কাঁপছে, আর শানিগুলোর উপর ফুলপাতার জড়ানো বেহালার ছবি আঁকা। আমার মনে হল আমি সেদেই যুগের প্রাচীন সম্রাট দরবারখানায় পৌঁছে গিয়েছি।...করিডরের শেষপ্রান্তে, ডানদিকে, আধ-

ভেজানো দরজার ভিতর দিয়ে আসছে দেয়াল-ঘড়ির টিক্-টাক্ শব্দ, আর একটি শিশু—ইজুলের বাচ্চার গলার শব্দে—প্রতি শব্দে থেমে থেমে পড়ছে : ত—খন... সেণ্ট...ইরেনে^২...চিংকা...র...করে...বললেন...আমি...প্রভুর...ঘেন...গম... শব্দ...আমাকে...ময়দা...হতে...হয়ে...ঐ...সব...পদ্মদের...দাঁতের...পিষণে...। আমি ধীরে ধীরে য়ুহ পদে সেই দরজার দিকে এগিয়ে গিয়ে ভিতরের দিকে তাকালুম।

শান্ত, অর্ধ দিবালোকে, ছোট্ট একটি কামরার ভিতর, গভীর একটা আরাম-কেদারার ভিতর ঘুমুচ্ছেন এক অতি বৃদ্ধ। গোলাপী ছোট্ট দুটি গাল, আজুলের ডগা অবধি সর্ব শরীরের চামড়া কৌচকানো, মুখ খোলা, হাত দুটি দু'জাম্বর উপর পাতা। তাঁর পায়ের কাছে নীল পোশাক পরা ছোট্ট একটি মেয়ে—মাথায় নানদের মত টুপি, অনাথাত্মের মেয়েদের পোশাক পরা—সাম্বী ইরেনের জীবনী পড়ছে—বইখানা আকারে তার চাইতেও বড়। এই অলৌকিক পুরাণ পাঠ যেন সমস্ত বাড়িটার উপর ক্রিয়া চালিয়েছে। বৃদ্ধ ঘুমুচ্ছেন তাঁর আরাম-কেদারায়, মাছিগুলো ছাতে, ক্যানারি পাখিগুলো এই হোথায় জানলার উপরে তাদের খাঁচায়। প্রকাণ্ড দেয়াল-ঘড়িটা নাক ডাকাচ্ছে—টিক্, টাক্, টিক্, টাক্। সমস্ত ঘরটাতে কেউই জেগে নেই—সুন্দুমাঙ্গ খড়খড়ির ভিতর যে এককালি সাদা, সোজা আলো এসে পড়েছে তার ভিতর ভর্তি জীবন্ত রশ্মি-কণা—তার নাচছে তাদের পরমাণু নৃত্যের চক্রাকারের ওয়াল্ট্‌স্...এই ঘরজোড়া তন্দ্রালসের মাঝখানে সেই মেয়েটি গভীর কণ্ঠে পড়ে যাচ্ছে : সঙ্কে...সঙ্কে...ছুটো...সিংহ...লাফ...দিয়ে...পড়ল...তাঁর...উপর... এবং...তাকে...উদর...সাং...করে...ফেলল...ঠিক ঐ মুহূর্তেই আমি ঘরে ঢুকলুম। স্বয়ং সেণ্ট ইরেনের সিংহ ছুটোও ঐ সময়ে সে-ঘরে ঢুকলে এতখানি বিহ্বলতার স্তম্ভন সৃষ্টি করতে পারতো না। সে-ঘেন রীতিমত নাটকীয় আচমকা আবির্ভাব! বাচ্চাটা ডুকরে উঠলো, বিরাট কেতাবখানা পড়ে গেল, ক্যানারি পাখিগুলো জেগে উঠলো, দেয়াল-ঘড়িটা ঢং ঢং করে উঠলো, বুড়ো প্রায় লাফ দিয়ে উঠে পড়লেন—একেবারে হকচকিয়ে গেছেন—আর আমিও কেমন ঘেন বোকা বনে গিয়ে চৌকাঠে থমকে গিয়ে বেশ একটু জোর গলায় বলে উঠলুম :

‘সুপ্রভাত, সজ্জনগণ! আমি মরিসের বন্ধু!’

২ কেউ যদি পান, আমাকে দয়া করে জানাবেন কি? আগের থেকেই ধন্তবাদ দিচ্ছি।

আহা ! আপনারা যদি তখন তাঁকে দেখতে পেতেন—যদি দেখতে পেতেন, বেচারী বুড়াকে দেখতে পেতেন ! দুই বাছ প্রসারিত করে আমাকে আলিঙ্গন করতে, আমার হাত দুখানা ধরে ঝাঁকুনি দিতে এগিয়ে এলেন, আর স্বরময় উত্তেজিত হয়ে ছুটোছুটি লাগিয়ে শুধু বলেন,

‘হে দয়াময়, হে দয়াময় !’...

তাঁর মুখের সব কৌচকানো চামড়া হাসিতে ভরে উঠেছে। আর তোতলাচ্ছেন,

‘আ মসিয়ো,...আ মসিয়ো...’

তার পর কামরার শেষ প্রান্তে ডাক দিতে দিতে গেলেন :

‘মামেং !’

একটা দরজা খুলে গেল। করিডরে যেন একটা ইহুরের পায়ের শব্দ শোনা গেল...ঐ যে মামেং ! ঐ এক ফোঁটা বুড়ী—কী যে স্নন্দর দেখাচ্ছিল—মাথায় গিঁট বাঁধানো বনেট, পরনে কারমেলিট নান্দের ফিকে বাদামী রঙের পোশাক, হাতে নক্শা-কাটা রুমাল—আমাকে সেই প্রাচীন দিনের কায়দায় অভিনন্দন জানানোর জন্তে...ওঁদের দেখলেই কিন্তু বুকটা দরদে ভরে আসে, দুজনারই চেহারা একই রকমের ! বুড়োর মাথার চুল বদলে দিয়ে বুড়ীর বনেট তাঁর মাথায় পরিয়ে দিলে তাঁকেও মামেং নাম দেওয়া যেত !...শুধু সত্যিকার মামেংকে নিশ্চয়ই তাঁর জীবনে চোখের জল ফেলতে হয়েছে অনেক বেশী, আর তাঁর সর্বাঙ্গের চামড়া কুঁকড়ে গিয়েছে আরো বেশী। বুড়োর মত ওঁরও সঙ্গে অনাথাশ্রমের একটি ছোট্ট মেয়ে, পরনে অগ্র মেয়েটার মতই পোশাক, বুড়ীর সঙ্গে সর্বক্ষণ থাকে, কক্থনো তাঁর সঙ্গে ছাড়ে না—অনাথাশ্রমে আশ্রয়প্রাপ্ত দুটি বাচ্চা মেয়ে এই দুই বুড়ো-বুড়ীকে যেন আশ্রয় দিয়ে রক্ষণ করছে—এর চেয়ে হৃদয়স্পর্শী যেন আর কিছুই কল্পনা করা যায় না।

ধরে ঢুকতে ঢুকতে বুড়ী আমাকে গভীর সম্মান-অভিবাদন জানাতে আরম্ভ করছিলেন, কিন্তু বুড়ো একটি শব্দ দিয়েই তাঁর সম্মান-অভিবাদন কেটে হু’-টুকরো করে ফেললেন :

‘এ তো মরিসের বন্ধু...’

সঙ্গে সঙ্গে বুড়ী কাঁপতে লাগলেন, কঁদে ফেললেন, রুমালখানা হারিয়ে ফেললেন, মুখ রাঙা হয়ে গেল, টকটকে লাল, বুড়োর চেয়েও বেশী লাল...হার্য, বুড়ো-বুড়ী ! এঁদের সর্ব শিরায় আছে মাত্র একটি ফোঁটা রক্ত, আর সামান্ততম অহুত্বের পরশ লাগলেই সেই ফোঁটাটি মুখে এসে পৌঁছে যায়।

‘শিগ্গির, শিগ্গির—চেয়ার নিয়ে এস’...বুড়ী তাঁর বাচ্চাটিকে বললেন।

‘জানলাটা খুলে দাও’—বুড়ী তাঁর বাচ্চাটিকে হুকুম দিলেন।

তার পর ছ’জনাতে আমার ছ’ বাছ ধরে খুট খুট করে হেঁটে নিয়ে চললেন জানলার কাছে। সেটা পুরো খুলে দেওয়া হয়েছে যাতে করে ওরা আমাকে আরো ভালো করে দেখতে পান। আমরা এগিয়ে গেলুম আরাম-কেন্দারার কাছে। আমি বললুম তাঁদের দুজনার মাঝখানে চেয়ারে। মেয়ে দুটি আমাদের পিছনে। তার পর আরম্ভ হল সওয়াল :

‘কি রকম আছে সে? কি করে সে? এখানে আসে না কেন? স্থখে আছে তো?’

এটা, ওটা, সেটা—কত শত কথা। ঘণ্টার পর ঘণ্টা।

আর আমি? তাঁরা আমার বন্ধুবাবদে যে সব প্রশ্ন শুধোচ্ছিলেন সেগুলোর উত্তর আমার সর্বশ্রেষ্ঠ সাধ্যমত খুঁটিয়ে খুঁটিয়ে তো দিলুমই—যেগুলো জানা ছিল; আর যেগুলো জানা ছিল না সেগুলো নির্লজ্জভাবে বানিয়ে বানিয়ে। আর বিশেষভাবে অবশ্যই কিছুতেই স্বীকার করলুম না যে তার ঘরের জানলাগুলো ঠিকমত বন্ধ হয় কি না সেটা যে আমি লক্ষ্য করি নি, কিংবা তার ঘরের দেয়ালের কাগজগুলো কোন্ রঙের!

‘তার ঘরের দেয়ালের কাগজগুলো কোন্ রঙের?...নীল রঙের ঠাকুমা, হাকা নীল—আসমানী রঙের—ফুলের মালার ছবি আঁকা।...’

‘—তাই না?’ বুড়ী একবারে গদগদ। তারপর স্বামীর দিকে তাকিয়ে বললেন, ‘সোনার চাঁদ ছেলেটি!’

বুড়ী সোৎসাহে যোগ দিলেন, ‘সোনার চাঁদ ছেলে।’

আর আমি যতক্ষণ কথা বলছিলুম, তাঁরা একে অল্পের দিকে তাকিয়ে ক্ষণে মাথা নাড়িয়ে সম্মতি জানাচ্ছিলেন, ক্ষণে সামান্য শ্মিতহাস্য করছিলেন, ক্ষণে চোখে চোখে তাঁর মারছিলেন, ক্ষণে একে অল্পকে ঠিক ঠিক বুঝতে পারার ইঙ্গিত দিচ্ছিলেন—কিংবা বুড়ী আমার একটু কাছে এসে আমায় বলেন,

‘আরেকটু জোরে কণ্ঠ...ভালো করে শুনতে পায় না ও।’

আর উনিও, ‘আরেকটু চেষ্টা, লক্ষ্যটি!...উনি সব কথা ভালো করে শুনতে পান না...’

আমি তখন গলাটা একটু চড়াই; দুজনাই তখন একটুখানি শ্মিতহাস্যে আমাকে ধন্যবাদ জানান। আর তাঁদের লেই হাঙ্গা কিকে শ্মিতহাস্যভরা দৃষ্টি আমার দিকে এগিয়ে দিয়ে তাঁরা যেন আমার চোখের নিভৃতভম গভীরে খুঁজে

দেখবার চেষ্টা করেন তাঁদের মরিসের ছবি ; আর আমার হৃদয়ও যেন আমার বন্ধুর ছবি তাঁদের চোখে দেখে একেবারে গলে যায়—আবছা-আবছা, ঘোমটা-ঢাকা, ধরা-ছোঁয়ার বাইরে, যেন অনেক দূরের থেকে, কুয়াশার ভিতর দিয়ে সে আমার দিকে তাকিয়ে মুহু মুহু হাসছে ।

*

*

*

হঠাৎ বুড়ো তাঁর আরাম-কেদারার গভীর থেকে হকচকিয়ে উঠলেন :

‘আমার কি মনে পড়লো, মামেং...সে বোধহয় এখনো ছপূরের খাবার খায় নি !’

আর মামেং আর্ত হয়ে শূণ্যে তুলে দিয়েছেন হাত দুখানা :

‘এখনো খায় নি !...হে দয়াময়, হে ভগবান !’

আমি ভাবলুম, এখনও বৃষ্টি মরিসের কথাই হচ্ছে ; তাই তাঁদের বললুম যে, তাঁদের যাহু মরিস ছপূর হতে না হতেই খানার টেবিলে বসে যায়—তার চেয়ে দেরি সে কস্মিনকালেও করে না । কিন্তু না, এবারে উঠেছে আমার কথা । আর আমি যখন স্বীকার করলুম যে আমি তখনো থাই নি, তখন যে ধন্দুমার আরম্ভ হল সেটা সত্যি দেখবার মত ।

‘শিগ্গির শিগ্গির নিয়ে এসো । ছুরি কাঁটা সব—ও বাচ্চারা ! টেবিলটা ঘরের মধ্যখানে নিয়ে এস । রবারের টেবিলক্লথ, ফুলের নক্সাদার বাসন-প্লেটগুলো ! আর অত হাসাহাসি না করলেও আমাদের চলবে, বুঝলে ! আর জলদি, জলদি, প্রীজ !’

আমার মনে কণামাত্র সন্দেহ নেই, তারা জলদি জলদিই করেছিল ! তিনখানা পেলেট ভাঙতে যতখানি সময় লাগার কথা তার পূর্বেই টেবিল, খাবার-দাবার, সব তৈরী ।

‘শামান্স একটু ভালো-মন্দ নাশতা বই আর কিছু নয়’—আমাকে টেবিলের দিকে নিয়ে যেতে যেতে মামেং বললেন । ‘শুধু তোমাকে একলা-একলিই খেতে হবে । আমরা ? আমরা সকাল বেলাই খেয়ে নিয়েছি ।’

বেচারী বুড়ো-বুড়ী ! যে কোনো সময়েই ওঁদের শুধোও না কেন, ওঁদের সব সময়েই ঐ এক উত্তর, তাঁরা সকাল সকালই খেয়ে নিয়েছেন ।

মামেংয়ের দেওয়া নাশতা—দুধ, খেজুর আর একখানা আন্ত ‘পাই’ ; ঐ দিয়ে কিন্তু মামেং আর তার ক্যানারি পাখীগুলোর নিদেন আটদিনের খাওয়া-দাওয়া চলে যায়...তাই ভাবো দিকি নি, আমি একাই তাবৎ মালের শেষ কথাটুকু খেয়ে ফেললুম !...আর টেবিলের চতুর্দিকে সে কী ‘কেলেঙ্কারি’ ! জুড়ে দুই

নীলাধরী একে অন্তর্ভুক্ত করে কল্লুইয়ের গুঁতো মেয়ে ফিস্‌ফিস্‌ করছিল, আর খাঁচার ভিতরে ক্যানারিগুলোর ভাব, যেন মনে মনে বলছে, 'দেখেছ! এ কেমন ভয়ঙ্কর! গোটা পাইটাই খেয়ে ফেললে!'

কথাটা সত্যি। আমি প্রায় সমস্তটাই বেথেয়ালে খেয়ে ফেলেছি—কারণ আমি তখন ঐ শান্ত শীতল ঘরটার চতুর্দিকে তাকিয়ে দেখছি সেখানে কেমন যেন প্রাচীন দিনের সৌরভ ভাসছিল...বিশেষ করে দুটি ছোট্ট খাট থেকে আমি আমার চোখ কিছুতেই ফেরাতে পারছিলুম না। প্রায় যেন ছোট্ট দুটি শিশুদের দোলনা। আমি কল্পনা করতে লাগলুম—সকালে, অতি ভোরে বুড়ো-বুড়ী ঝালর-লাগানো পর্দাঘেরা খাটের গভীরে শুয়ে। ভোর তিনটে বাজলো। ঐটেই সব বুড়ো-বুড়ীর জেগে ওঠার সময়।

—ঘুমুচ্ছে, মামেং ?

—না গো।

—কি বলা, মরিস ছেলেটি বড় লক্ষ্মী—না ?

—সে আর বলতে, বড্ড লক্ষ্মী ছেলে !

আর স্বল্পমাত্রা একটির পাশে আরেকটি, বুড়ো-বুড়ীর ছোট্ট দুটি খাট দেখে আমি ওদের দুজনার মধ্যে পুরোপুরি একটি কথাবার্তা কল্পনা করে নিলুম...

ইতিমধ্যে ঘরের অন্তপ্রান্তে, আলমারির সামনে একটা ভীষণ নাটকের অভিনয় চলছিল। ব্যাপারটা হয়েছে কি, ঐ আলমারির সখচেয়ে উপরের থাকে রয়েছে এক বোয়াম লিক্যোর-ব্রাণ্ডিতে মজানো চেরি। এটা দশ বৎসর ধরে মরিসের জন্তু অপেক্ষা করছে। এখন সেটাকে নামাতে হবে যাতে করে আমি এটার উন্মোচন-পর্ব সমাধা করতে পারি। মামেত্তের সর্ব অল্পনয় উপেক্ষা করে বুড়ো স্বয়ং লেগে গেছেন সেটাকে পাওয়ার প্রচেষ্টায়। ভয়ে আড়ষ্ট বউ—আর উনি একটা চেয়ারের উপর দাঁড়িয়ে চেষ্টা করছেন সেটাকে পাড়তে... পার্থক্য, যেখানে আছো সেখান থেকেই ছবিটি দেখতে পাবে : বুড়ো কাঁপছেন, ঝুলে পড়ে লম্বা হবার চেষ্টা করছেন, ক্ষুদ্রে নীলাধরী মেয়ে দুটি চেয়ারটাকে জাবড়ে ধরে আছে। পিছনে মামেং হাঁপাচ্ছেন—হাত দুটি হৃদিকে মেলে ধরেছেন, আর এ সব-কিছুর উপর ভাসছে যুহু হৃগন্ধি নেবুর সৌরভ খোলা। আলমারির ভিতর থেকে, থাকে থাকে সাজানো কাপড়ের ডাঁই থেকে।

অবশেষে, অশেষ মেহশতের পর, সেই স্বপ্রসিক্ত বোয়ামটি আলমারি থেকে বের করা হল, আর তার সঙ্গে টোলে টোলে ভর্তি একটি রূপোর 'মগ'-পাত্র। গেলাস—মরিস যখন ছোট্ট ছিল সেই আমলের। গেলাসটি চেঁচি দিয়ে আমার

জন্ম কানায় কানায় ভর্তি করা হল; মরিস এই চেঁরি খেতে কতই না ভালোবাসতো! চেঁরি আর ত্রাণ্ডি ভরতে ভরতে বুড়ো খুশ-খানা-সমঝদারের মত আমার কানে কানে বললেন :

—‘বুঝলে হে, তোমার কপাল ভালোই বলতে হবে, হ্যাঁ, তোমার কথাই কইছি, এখন যা খাবে...আমার গিন্নীই এটি তৈরী করেছেন...খাসা জিনিস খাবে এখন।’

হায়রে কপাল! ওঁর গিন্নী এটি তৈরী করেছেন সত্যি, কিন্তু চিনি দিতে গেছেন বেবাক ভুলে! তা আর কি করা যায় বলো! বুড়ো বয়সে কি আর মাহুঘের সবকিছু মনে থাকে! বেচারী মামেং আমার, সত্যি বলতে কি তোমার চেঁরিগুলো অখাণ্ডের একশেষ; হলে কি হয়, আমি চোখের পাতাটি পর্যন্ত না নাড়িয়ে তলানি অবধি সাফ করে দিলুম।

*

*

*

খাওয়া শেষ হওয়ার পর আমি উঠে দাঁড়ালুম ওঁদের কাছ থেকে বিদায় নেবার জন্য। ওঁরা অবশি সত্যি খুশী হতেন যদি আমি আরো কিছুক্ষণ থাকতুম, যাতে করে ওঁরা লক্ষ্মী ছেলে মরিস সম্বন্ধে আরো কথা বলতে পারেন, কিন্তু বেলা তখন ঢলে পড়েছে, মিলটাও দূরে—বিদায় নিতেই হয়।

আমার সঙ্গে সঙ্গে বুড়োও উঠে দাঁড়িয়েছিলেন।

—‘মামেং, আমার কোটটা!...আমি ওকে চত্বর অবধি পৌঁছে দিয়ে আসি।’

সত্যি বলতে কি, মামেং মনে মনে দ্বিধা বোধ করছিলেন, বেশ একটু শীত পড়েছে, এ সময় আমাকে চত্বর অবধি পৌঁছে দেওয়াটা ঠিক হবে কি না; কিন্তু সেটা মুখের ভাবে প্রকাশ করলেন না। শুধু শুনতে পেলুম, ঝিঝকের বোতামগুলো, সোনালি নস্ত্রি রঙের চমৎকার ফ্রক্-কোটটি পরিয়ে দিতে দিতে লক্ষ্মী ঠাকুরমাটি কর্তাকে নিচু গলায় শুখোলেন,

‘তোমার ফিরতে দেরি হবে না তো?—কেমন?’

বুড়ো একটু জুঁজুমির মুচকি হাসি হেসে বললেন,

‘—হেঁ, হেঁ!...কি জানি...হয় তো বা...’^৩

৩ ঘোঁবনে যে ফুঁতিফাঁতি করতে গিয়ে আর পাঁচজনের মত মাঝে-মাঝে দেয়িতে বাড়িতে ফিরতেন, মামেং বকাঝকা করতেন, এটাতে ঠাট্টা করে তারই ইঙ্গিত।

একে অন্তের দিকে তাকিয়ে হাসলেন, ওঁদের হাসতে দেখে বাচ্চা ছুটি হাসলে, আর খাঁচার কোণে বসে ক্যানারি ছটোও তাদের আপন চঙে হাসলে... নিতান্ত তোমাকেই বলছি, পাঠক, আমার মনে সন্দেহ হয়, ঐ চেরি-ব্রাণ্ডির গন্ধে ওরা সবাই বোধহয় একটুখানি বে-এক্কেয়ার হয়ে গিয়েছিলেন।

ঠাকুরদা আর আমি যখন রাস্তায় নামলুম তখন অন্ধকার হব-হব। একটু দূরের থেকে পিছনে পিছনে নীলপোশাকী ছোট্ট মেয়েটি আসছিল ওঁকে ফেরার সময় সঙ্গে করে নিয়ে আসবার জন্ত—বুড়ো ওঁকে দেখতেও পান নি। তিনি সগর্বে আমার বাহু ধরে চলছিলেন যেন কতই না শক্তসমর্থ মন্দা জোয়ান। মামেং ভরপুর হাসিমুখে দোরে দাঁড়িয়ে এসব দেখছিলেন, আর আমাদের দিকে তাকিয়ে এমনভাবে খুশীতে মাথা নাড়ছিলেন যেন ভাবখানা এই ‘ঘা-ই বলো, ঘা-ই কণ্ড,—আমার বুড়া এখনও তো দিব্য চলাফেরা করতে পারে।’^৪

কোষ্ঠী-বিচার

আমি তো রেগে টং।

মুসলমান বাড়িতে সচরাচর গণংকার আসে না, যদিও শুনেছি ঔরঙ্গজেবের মত গোঁড়া মুসলমান, হিটলারের মত কট্টর বিজ্ঞান-বিশ্বাসীরা নাকি রাশিকুণ্ডলী মাঝে-মাঝে দেখে নিতেন। আমাদের বাড়িতে গণংকার এসেছিল। তা আশ্চর্য। মেয়েরা জটলা পাকিয়েছিল। তা পাকাক। কাউকে রাজরাণী, কাউকে রাজেশ্বরী, কাউকে ডাক্তার হওয়ার আশা দিয়ে গিয়েছে—তা দিক, তাতেও আমার আপত্তি নেই। আমি রাগে টং হলাম যখন শুনলুম, পাশের বাড়ির আট বছরের মেয়ে মাধুরীলতা, আমার বোনের ক্লাসফ্রেন্ড, সেও নাকি এসেছিল এবং গণংকার বলেছে, তার কপালে বাল-বৈধব্য আছে।

বাল-বৈধব্য তার কপালে থাকতেও পারে, নাও থাকতে পারে—আমি জানব কি করে, আর গণংকারই বা জানবে কি করে? আর যদিও ধরেও নিই গণংকার জানতোই, তবে সে বরাহমিহির সেটা বলতে গেল কেন মেয়েটাকে—ঐ আট বছরের ফুলের মত মেয়েটিকে?

এই দৈববাণীর ফল আরম্ভ হল পরের দিন থেকেই।

মাধুরী শুরু করল ছুনিয়ার ফুলে ব্রত-উপবাস, পূজা-পারণা। ইতু, বেঁচু

হেন দেবতা নেই যে সে খুঁজে খুঁজে বের করে বাড়িতে তার পুজো লাগায় নি । তার বাড়িতে ছিলেন আমাদের দেশে সব চাইতে নামকরা নিষ্ঠাবতী ঠাকুরমা— তিনি পূৰ্ব্ব অতিষ্ঠ হয়ে উঠলেন, মাধুরীর পুজোপাটের ঠেলায় ।

এসবের অর্থ অতি সরল । অতিশয় প্রাঞ্জল । মাধুরী ত্রিলোকবাসী সৰ্বদেব, সৰ্বমানব, এমন কি সৰ্ব ভূতপ্রেতকেও প্রসন্ন রাখতে চায়, যাতে করে তাঁরা তাকে বাল-বৈধব্যের হাত থেকে ঠেকিয়ে রাখেন ।

কিন্তু মাধুরীর মুখের হাসি শুকিয়ে গিয়েছিল—আমার রাগ সেইখানটাতে । তার সর্বচেষ্টা, সৰ্ব অস্তিত্বে মাত্র একটি চিন্তা ; তাকে আমৃত্যু বাল্য-বৈধব্য বয়ে বেড়াতে হবে । এবং সে নাকি হবে শতায়ু ! তার বাপ ঠাকুরা তাকে অনেক বোকাবার চেষ্টা করেছিলেন, কিন্তু সে তখন শুধু তার ভাগর চোখ দুটি মেলে তাকাতো, কোন কথা বলত না ; স্পষ্ট বোঝা যেত আর সাস্থনাবাগী, স্তোকবাক্য, তত্ত্বকথা তার মনের উপর কোন দাগ কাটছে না ।

মাধুরী তেমন কিছু অসাধারণ সুন্দরী ছিল না । তবে ইঁা, তার চোখ দুটির মত চোখ আমি আর কোথাও দেখি নি । সেই চোখ দুটিতে তার আট বছর বয়সে যে মধুর হাসি আমি দেখতে পেয়েছিলুম সেটি আর কখনো দেখি নি । তার রঙ ছিল শ্রাম । কিন্তু মাধুরীে ভরা । তাই সব সময়ই মনে হত, এ মেয়ের নাম মাধুরী সার্থক । সে সুন্দর নয়, মধুর । মধু তো আর গোলাপ ফুলের মত দেখতে সুন্দর হয় না ।

ষোল বছর বয়সে মাধুরীর বিয়ে হল । কুলীন ঘরের মেয়ে । সে-দিক দিয়ে অন্ততঃ সবাই লুফে নেবে । ছেলেটি বিলেত-ফের্তা ইঞ্জিনীয়ার । মাদ্রাজে কর্ম করে । মাধুরীকে দেখে ওদের বাড়ির সকলেরই পছন্দ হয়েছে । আমি তখন বিদেশে ।

আমার বোন মাধুরীকে বড় ভালবাসতো । তাই আমাকে লেখা তার চিঠি ভর্তি থাকত মাধুরীর কথায় । পুজোপাট তার নাকি বিয়ের পর আরো অসম্ভব রকম বেড়ে গিয়েছে । মাদ্রাজে গিয়ে পেয়েছে আরেক নতুন সেট দেবদেবী । ওঁয়ারা তো ছিলেনই, ওঁয়ারাও এসে জুটলেন । ইঁা, বলতে ভুলে গিয়েছিলুম, শুকুরবারে শুকুরবারে মসজিদে শির্গা পাঠাতেও মাধুরীর কামাই যেত না ।

বোন লিখেছিল, মাধুরীর স্বামীটি নাকি পয়লা নম্বরের বৈজ্ঞানিক, দেবদ্বিজে আদৌ ভক্তি নেই । মাধুরীর পালপার্বণের ঘটা দেখে সে নাকি রক্ত-রস করত, সেই পালপার্বণের আদিখ্যেতার—তার ভাষায়—কারণ শুনে নাকি হাসাহাসি করেছিল তার চেয়েও বেশী । তবে ছেলেটি খানদানী ঘরের ভদ্রছেলে ছিল বলে

এসব কথা তুলে মাধুরীর মনে কষ্ট দিতে চাইত না।

কিন্তু মোদা কথা—বোন লিখেছিল—মাধুরী স্বামী, মাধুরী স্বামী-সোহাগিনী।
যাক্। চিঠি পেয়ে ভারী খুশী হলুম।

তার ছ' মাস পরে বজ্রাঘাত।

মাত্রাজে যুদ্ধের সময়, একসম্প্রদায় না বোমাপাতের ফলে মাধুরীর স্বামী
আপিসের চেয়ারের উপরই প্রাণত্যাগ করে।

সেদিন আপিস যাবার সময় সে নাকি মাধুরীকে বলে গিয়েছিল, 'তোমরা
বাঙালীরা বড্ড ঢিলে। সময়ের কোন জ্ঞান নেই। আমি বাড়ি ফিরবো সাড়ে
পাঁচটায়। তোমাকে যেন তৈরী পাই। দশ মিনিটের ভিতরে যেন বেরতে
পারি। সিনেমা তোমার জন্তু অপেক্ষা করবে না।'

মাধুরী পাঁচটা থেকে তৈরী হয়ে বসে ছিল। কে জানে, কোন্‌ শাড়ীখানা
পরেছিল? সেই হলদে রঙেরটা? যেটা আমি তাকে প্রেজেন্ট করেছিলুম—ওর
রঙের সঙ্গে সুন্দর মানাতো বলে? থাক্ ওসব। মোহনীয়া গল্প শোনাতে আমি
আসি নি। সমস্ত ব্যাপারটাই এমনি ট্রাজিক যে তার উপর অলঙ্কার চাপাতে
ইচ্ছে করে না।

ছ'টা বাজলো, সাতটা বাজলো—করে করে রাত এগারোটা হল। মাধুরী
তার স্বামীকে এই প্রথম অনপনুচ্চুয়েল হতে দেখল—এবং এই শেষ।

আর পাঁচজন বাঙালীই প্রথম দুর্ঘটনার খবর পান। তাঁরা রাত এগারোটার
এসে মাধুরীকে খবরটা দেন। সঙ্গে এসেছিলেন মাধুরীর এক বান্ধবী—ধর্ম্যে তাঁর
বিশ্বাস অবিচল ছিল বলে মাধুরীর সঙ্গে সখ্য হয়। তিনি খবরটা ভাঙেন। কি
ভাষায়, সোজাসৃজি না আশকথা-পাশকথা পাড়ার পর, জানি নে। তবে শুনেছি,
মাধুরী একসঙ্গে এতজন লোককে রাত এগারোটার সময় বাড়িতে আসতে দেখেই
কেঁদে উঠেছিল।

মাধুরী কলকাতায় ফিরে এল।

এখানেই শেষ? গণ্যকারের কথাই ফলল? তাও নয়।

মাত্রাজ ছাড়ার পূর্বে মাধুরী তার সখীকে তার কোষাকোষী আর সব
পুজোপাটার জিনিসপত্র তার হাতে তুলে দিয়ে বলে, সমুদ্রে ডুবিয়ে দিতে। মাধুরী
বলে নি—কিন্তু সখী বললেন, 'ও বলতে চেয়েছিল, এত করেও যখন দেবতাদের
মন পেলুম না, তখন তাদের সঙ্গে সম্পর্ক রেখে আমার আর কি হবে? আমার
তো অল্প আর কোনো জিনিসের প্রয়োজন নেই।'

কিন্তু এখানেই শেষ নয়।

কলকাতায় ফিরে মাধুরী চাকরি নেয়। বস্তিতে করপারেশনের ইন্সুলে। সেখানে তার বসন্ত হয়। তার বোনঝি—ভাস্কর—বললে, ‘ওয়ান বিগ্ ব্লার্ভ—করবার কিছু নাই।’

সে শতাব্দী হয়ে বাল-বৈধব্যের যন্ত্রণা উপভোগ করে নি। মাত্র পঁচিশ বছর বয়সে সে গত হয়। পরোপকারে প্রাণ দেয়। সে জিন্নবাসিনী, অমর্ত্যলোকে অনন্ত স্বামী-সোহাগিনী।

একটি অনমিত নাম : বনবিহারী মুখোপাধ্যায়

‘স্বর্গীয়’ লিখতে গিয়েই কলম থেমে গেল; এমন কি ক্ষণজন্মা, পুরুষসিংহ বনবিহারী মুখোপাধ্যায় ‘পরলোক’ গমন করেছেন,—এটা লিখতেও বাধো-বাধো ঠেকছে, কারণ বনবিহারী স্বর্গ, পরলোক, আত্মার অস্তিত্বে বিশ্বাস করতেন না।

বনবিহারীর পূর্ণাঙ্গ জীবনী লেখা প্রায় অসম্ভব, কারণ চাকরিজীবনে তাঁকে বাধ্য হয়ে আজ পাকশী, কাল মৈমনসিং, পরশু বগুড়া করতে হয়েছে—এবং অসময়ে বেকসুর বদলি হলেও তিনি হয়তো প্রতিবাদ জানাতেন, কিন্তু কর্তৃপক্ষের কাছ থেকে কোনো মেহেরবাণী চাইতেন না। বনবিহারী এ জীবনে কারো কাছ থেকে কোনো ‘ফেবার’ চান নি, এবং ভগবানের কাছ থেকে অতি অবশ্য, নিশ্চয়ই না। চাকরি থেকে অবসর নিয়ে তিনি সর্বপ্রথম কোথায় যান জানি নে, কিন্তু তার পরই চলে যান দেয়াতুনে। সেখানে বেশ কয়েক বৎসর একটানা হোটেলে বাস করার পর হঠাৎ চলে যান—বিশ্বাস করুন আর না-ই করুন, আন্দামান। স্বৈচ্ছায় এবং অতিশয় প্রসন্ন চিত্তে। বলা বাহুল্য, সেখানে রোমান্সের সন্ধানে যান নি। কাব্যে, সাহিত্যে তিনি কতখানি রোমাণ্টিসিজম বরদাস্ত করতেন বলা কঠিন, কিন্তু সংসার-জীবনে তিনি রোমাণ্টিসিজমের পিছনে দেখতে পেতেন, make belief, সত্য থেকে আত্মগোপন, এস্কেপিজম এবং ভগ্নামি এবং এর সব কটাকেই তিনি অত্যন্ত ভ্রুকুটিকুটিল নয়নে তিরস্কার জানাতেন। তারপর হঠাৎ একদিন তিনি আবার ভারতে ফিরে এলেন। বৃদ্ধ বয়সে তাঁর বাসস্থান পরিবর্তন আমাকে বড় পীড়া দিত। তাই তাঁকে অহুরোধ জানালুম, তিনি যেন দয়া করে আমার সঙ্গে বসবাস করেন। উত্তম হক মধ্যম হক, আমি মোগলাই, বিলিতি কিছু কিছু বাঁধতে পারি; সে সময়ে আমার বাসস্থানটি ছিল প্রশস্ত ও নির্জনে—খাশানের কাছে অবস্থিত। আমার নিজস্ব বই তো ছিলই, তদুপরি তাঁর পরিচিত একটি লাইব্রেরি কাছেই ছিল। অবশ্য সর্বপ্রধান প্রলোভন ছিলেন

তঁার কনিষ্ঠ ভ্রাতা শ্রীযুক্ত বিনোদবিহারী মুখোয্যে। তঁার বাগাও নিকটে। এই ভাইটিকে বনবিহারী আপন হাতে মাহুয করেন এবং সে ঘেন ধর্ম, ঈশ্বর, পরকাল, উপাসনা ইত্যাদি সর্বপ্রকার সংস্কার থেকে মুক্ত থাকে সেজন্ত কোনো ব্যবস্থার ক্রটি করেন নি। বিনোদবিহারীর ডাক নাম 'নস্ত'। বনবিহারী তাঁকে ডাকতেন 'নাস্তিক' বা 'নাস্তে'। আমার বাড়িতে এসে বাস করলে তিনি যে তঁার নাস্তিকে অক্লেশে দু'বেলা দেখতে পাবেন সেইটেতে বিশেষ জোর দিয়ে আমি আমার চিঠিতে নিবেদন জানিয়েছিলুম। বিনোদবিহারী প্রায় দশ বৎসর পূর্বে তঁার চোখের জ্যোতি সম্পূর্ণ হারিয়ে ফেলেন; তাই তঁার পক্ষে অগ্রজ সন্নিধানে যাওয়া কঠিন ছিল।

আমি কণি আশা নিয়েই আমন্ত্রণ জানিয়েছিলুম, কারণ আমি তঁার কৃতবিত্ত, বিস্তশালী, পিতৃভক্ত পুত্রকে উত্তমরূপেই চিনি। তঁার শত কাতর অহুরোধ সত্ত্বেও তিনি পুত্রের গৃহে স্থায়ীভাবে বসবাস করতে রাজী হন নি। আমার আশা ছিল, আমি তঁার কেউ নই, তিনি জানতেন যে আমি ধর্মে, সৃষ্টিকর্তায় বিশ্বাসী একটা আস্ত জড়ভরত হওয়া সত্ত্বেও তাঁকে অবিচল ভক্তি করি, এবং দাসের মত সেবা করবো; বিশ্বসংসার নিয়ে তঁার যত রকমের সমালোচনা, ব্যঙ্গবিদ্রূপ আমি সহাস্ত বদনে শুনেছি এবং শুনবো এবং তর্কযুদ্ধ করার মত লোকের অভাব হলে আমাকে দিয়েও কিছুটা কাজ চলবে—তিনি জানতেন, আমার জীবন কেটেছে 'তুলনাত্মক ধর্ম' চর্চায়।

তিনি এলেন না সত্য, কিন্তু আমাকে একটি অতিশয় প্রীতিপূর্ণ (তিনি সেটিমেণ্টের আতিশয্য এতই অপছন্দ করতেন যে, সেফ্‌সাইডে থাকার জন্য সেটা বাক্যে, পত্রে সর্বত্র বর্জন করতেন) পত্র লিখে জানালেন, 'তোমার নিমন্ত্রণ মনে রইল, সময় হলেই আসবো।'

আমার ক্ষোভ-শোকের অন্ত নেই যে তঁার সময় আর হল না। মনকে এই বলে সান্ত্বনা দি, আমি কে যে তিনি আমার সেবা গ্রহণ করে আমাকে ধন্ত করতেন।

শেখার্দীন পর্যন্ত, এত সব ঘোরাঘুরির মাঝখানেও সর্বত্র তাঁকে সঙ্গ দিয়েছেন তঁার ভ্রাতা শ্রীযুক্ত বঙ্কবিহারী। বনবিহারীর অধিকাংশ লেখাই ছাপাখানা পর্যন্ত পৌঁছত না। প্রকাশিত হলে ফাইলে রাখতেন না, নিতান্ত অন্তরঙ্গ বন্ধুকেও বলতেন না, 'অমুক কাগজে আমার লেখা বেরিয়েছে, পড়ে দেখো।' তঁার পরিপক্ব যৌবনে কিন্তু তিনি আমাদের মত বালকদের প্রতি সদয় ছিলেন। সম্পূর্ণ, অসম্পূর্ণ বহু লেখা তিনি সোৎসাহে আমাদের পড়ে শুনিয়েছেন।

এখনো যা-কিছু আছে তাই নিয়ে শ্রীযুত বঙ্কবিহারী প্রামাণিক নিবন্ধ লিখতে পারবেন। কোন্ লেখা কোন্ উপলক্ষে লেখা হয়েছিল, কোন্ ব্যঙ্গচিত্র আঁকবার সময় কাকে তিনি মনে মনে সামনে দাঁড় করিয়েছিলেন, কিভাবে সমাজের কোন্ গুপ্ত পাপাচার তিনি আবিষ্কার করেছিলেন, এর বেশীর ভাগই একমাত্র তাঁরই জানার কথা। এবং চিকিৎসা-শাস্ত্রের এত বড় পণ্ডিত, অধ্যাপক ঐ বিষয়ে কখনো কিছু লেখেন নি এটা কেমন জানি বিশ্বাস করতে অস্বীকার হয়। আমি নিজে জানি, ছাত্রদের দুই ধরনের ব্যাণ্ডেজ শিখিয়ে তাদের নাম বলে, দোষগুণ আপন অভিজ্ঞতা ও পর্যবেক্ষণ দিয়ে খাটাই করার পর একটা তৃতীয় ব্যাণ্ডেজ হয়তো শেখালেন। কোনো বুদ্ধিমান ছেলে হয়তো লক্ষ্য করলো এটার নাম তিনি বলেন নি ; শুধোলে পর বলতেন, 'ওঃ ছাটু ওয়ান ? ওটা ব্যাণ্ডেজ আ লা বনবিহারী' (তিনি নিজের চেষ্টায় হৃদয় ফরাসী শিখেছিলেন ও উচ্চারণটিও তাঁর চমৎকার ছিল। আমি ফরাসী শিখতে আরম্ভ করেছি জেনে তিনি আমাকে মপাসাঁ পড়ে শুনিয়েছিলেন ; নতুবা নিতান্ত বাধ্য না হওয়া পর্যন্ত বনবিহারী আপন বৃহৎ ক্ষুদ্র সর্বকৃতিত্বই লুকিয়ে রাখতেন)।

বনবিহারী সম্বন্ধে প্রামাণিক কিছু লেখা প্রায় অসম্ভব। কারণ প্রায় অসম্ভব শুধুমাত্র তাঁর প্রকাশিত লেখা ও ব্যঙ্গচিত্র যোগাড় করা। বেনামে ছদ্মনামে তো লিখেছেনই, তদুপরি নিজের সৃষ্টির প্রতি তাঁর কোন প্রকারের মোহ ছিল না বলে সেগুলোকে তাদের গ্রাফা সম্মান দেবার জন্য তিনি কোনো চেষ্টা তো করতেনই না, উন্টে নিতান্ত অজানা অচেনা কাগজে প্রায়ই বাছাই বাছাই লেখা ছাপিয়ে দিতেন। এবং আমার জানতে সত্যই ইচ্ছে করে, তিনি তাঁর লেখার জন্তে কখনো কোনো দক্ষিণা পেয়েছেন কিনা।

উপস্থিত আমি শুধু তাঁর ব্যক্তিগত পরিচয়ের একটি অতি ক্ষুদ্র অংশ নিবেদন করছি ; যদি কোনো দিন তাঁর প্রকাশিত রচনা ও ছবির দশমাংশের এক অংশও যোগাড় করতে পারি তবে তাঁর জীবন-দর্শন সম্বন্ধেও কিছু পেশ করার ভরসা রাখি। অথবা হয়তো তখন দেখব, তাঁর জীবন-দর্শন ছিল যে, মাহুষের পক্ষে কোনো প্রকারের শাস্ত্র জীবনদর্শনে পৌঁছনো সম্পূর্ণ অসম্ভব, কারণ শাস্ত্র বলে কোনো বস্তু, ধারণা বা আদর্শ এ-সংসারে আদপেই নেই।

'ভ্যানিটি অব্ ভ্যানিটিজ—অল ইজ ভ্যানিটি' বাইবেলের এই আশুবাণী তাঁর মুখ দিয়ে বলাতে আমার বাধা, কারণ নাটকীয় ভঙ্গিতে কোনো জিনিসই প্রকাশ করাতে তাঁর ছিল ঘোর আপত্তি। কারণ এসব ভঙ্গি, স্টাইল, পোজ থেকে উদ্ভূত হয় ধর্মগুরুর দঙ্গল—এবং বনবিহারীর ক্ষুদ্র ধারণা ছিল যে তাঁদের সম্বন্ধে

আমরা যত কম সুনতে পাই ততই ভালো। বলার মত বিশেষ কিছু তো নেই—
হয়তো বলতেন বনবিহারী—তাহলে বলতে গিয়ে অত ধানাইপানাই কেন ?

বৃষের মত স্বচ্ছ, আজাহুলখিত বাহু—এসব শাস্ত্রসম্মত লক্ষণ দিয়ে বিচার
করলে বনবিহারী নিশ্চয়ই সুপুরুষের পর্যায়ে পড়তেন না ; তৎসত্ত্বেও বলি,
বনবিহারীর মত অসাধারণ বুদ্ধিদীপ্ত, তেজস্বান্ সুপুরুষ আমি দেশ-বিদেশে অতি
অল্পই দেখেছি। বাঙালী ফর্সা রঙ পছন্দ করে, কিন্তু বনবিহারীর গৌরবর্ণ আমি
অল্প কোনো বাঙালীর চর্মে দেখি নি। বলা বাহুল্য যে সে বর্ণ ইংরেজের ধবলকুষ্ঠ
স্বৈত নয়। গৌর হয়েছে সে বর্ণে ছিল কৃষ্ণের স্মৃতি। তপ্তকাক্ষন তো সে
নয়ই, ‘টান্দের অমিয়াসনে চন্দন বাটিয়া’ও সে বর্ণ মাজা হয় নি। নদীয়ার
গোঁসাঁইকে আমি দেখি নি, কিন্তু তাঁকে কল্লনায় দেখতে গেলে তাঁর অঙ্গে আমি
বনবিহারীর বর্ণ চাপাই। তাঁর চুল ছিল কটা। আমি একদিন তাঁকে
বলেছিলুম, ‘ঋগ্বেদে না কোথায় যেন অগ্নির দাড়িকে রক্তবর্ণ বলা হয়েছে ;
আপনি দাড়ি রাখলে সেটা ক্রমে ক্রমে রক্তবর্ণ ধারণ করবে।’ আমার সভ্যই
মনে হ’ত, কেমন যেন এক অলৌকিক প্রক্রিয়ায় কি যেন এক এ্যাটাভিজমের
ফলে তিন হাজার বৎসর পর আর্থ ঋষি গোঁড়দ্বিজের গৃহে আবির্ভূত হয়েছেন।
বনবিহারী তাঁর স্বভাবসিদ্ধ তর্কজাল বিস্তার করে পর্যায়ক্রমে, অপ্রমত্ত চিন্তে যে-
সিদ্ধান্তটি সুপ্রতিষ্ঠিত করলেন তার অর্থ : যারা বলে বাঙালীর গায়ে কিঞ্চিৎ
আর্থরক্ত আছে এটা তাদের ভ্রম—যারা বলে বাঙালী পরিপূর্ণ আর্থ—তাদের
ভ্রমের চেয়েও মারাত্মক দুঃস্থবুদ্ধিজাত ভ্রম।

ঐ সময়ে আমি রেনার খুঁট-জীবনী পড়ি অধ্যাপক হিড্জিভাই মরিসের
কাছে।^১ প্রথম অধ্যায়েই তিনি লিখেছেন ‘যে লোক মাহুঘে মাহুঘে পার্থক্য
ঘোচাবার জন্য সর্বাধিক প্রচেষ্টা দিয়েছেন (অর্থাৎ খুঁট) তাঁর ধমনীতে কোন্
জাতের রক্ত প্রবাহিত সে অনুসন্ধান করতে যাওয়া অসুচিত।’ বনবিহারী সমস্ত
জীবন ধরে বিস্তার অক্লান্ত জিহাদ লড়েছেন, কিন্তু বর্ণ বৈষম্য চোখে পড়লেই তিনি
নিকাশিত করতেন তাঁর শানিততম তরবারি। এস্থলে বলে রাখা ভালো,
বনবিহারী তাঁর জিহাদ চালাতেন হৃদয়হীন যুদ্ধাঙ্গের মত। তাই সত্যের
অপলাপ না করে অনায়াসে বলতে পারি, তাঁর মত মিলিটেট নাস্তিক এ-দেশে
তো কখনই জন্মায় নি, বিদেশেও নিশ্চয়ই মুষ্টিমেয়। ‘পীসফুল কো-এগ্জিক্সটেনস্’

১ ইনি পার্সী দস্তুর (বাজক) সম্প্রদায়ের লোক ; খ্রীষ্টত প্রবর্তনাথ বিনী
এঁর লক্ষ্যে লিখেছেন। ‘ববৌজনাথ ও নাস্তিকনিকৈতন’ পৃ. ১২৫।

নীতিটি তিনি আদর্শেই বরদাস্ত করতে পারতেন না। তিনি ছিলেন হাসপাতালের ভিতরে বাইরে সর্বত্রই, এবং টুয়েন্টি ফোর আওয়ার্স ভিউটির সার্জন। তাঁর বক্তব্য, 'তোমার পায়ে হয়েছে গ্যাঙ্রীন, সেটা আমি কেটে ফেলে দেব। গ্যাঙ্রীনের সঙ্গে আবার পীসফুল কো-এগজিষ্টেন্সেন্স কি?' কিন্তু পাঠক ভুলে কণতরেও ভাববেন না, বনবিহারী অসহিষ্ণু ছিলেন। এর চেয়ে বৃহত্তর, হীনতর মিথ্যা ভাষণ কিছুই হতে পারে না। 'তুমি আন্তিক। তোমার মস্তিষ্ক থেকে আমি সেই অংশ ছুঁই দিয়ে কেটে ফেলব। কিন্তু তোমার প্রতি আমি অসহিষ্ণু হব কেন? বস্তুত চিকিৎসক বলে আমার সহিষ্ণুতা অনেক বেশী। তোমার পরিচিত কারো সিফিলিস হলে তুমি শুধু সিফিলিস না, সেই লোকটিকেও বর্জন করো। আমি সিফিলিস দূরীভূত করি, কিন্তু সে হতভাগ্যকে তো দূর দূর করে দূরীভূত করার চিন্তা আমার স্বপ্নেও ঠাই দিই না। প্লেগ এলে তুমি এ শহরের নাগরিকদের বিষবৎ বিবেচনা করে তাদের বর্জন করো; আমি তা করি নে।' এবং আমি ব্যক্তিগতভাবে শপথ করতে রাজী আছি এটা তাঁর বাগানফালন নয়। কাব্যে আমরা বাক্ ও অর্থের সমন্বয় অমূল্যমান করি, জীবনে করি বাক্ ও কর্মের। এ দুটির সমন্বয় বনবিহারীতে প্রকৃতিগত ছিল। বলতে বাচ্ছিলুম 'বিধিদত্ত', কিন্তু তাঁর আত্মাকে ক্ষুদ্র করতে চাই নে। আবার ভুল করলুম, তিনি আত্মাতে বিশ্বাস করতেন না, কাজেই হাওয়ার কোমরে রশি বাঁধার মতই তাঁর আত্মাকে নিপীড়িত করার সম্ভাবনা।

বনবিহারী তাঁর বাল্যবয়সের অধিকাংশটা কাটান তাঁর মাতামহের সঙ্গে। দুর্ভাগ্যক্রমে আমি তাঁর নাম ভুলে গিয়েছি কিন্তু সেটা বের করা কঠিন হবে না। এই মাতামহটি ছিলেন গত শতাব্দীর ধনুর্ধর, অপরাধিত দার্শনিক এবং নৈয়ায়িক। যে দ্বিজেন্দ্রনাথ প্রাচ্য পাশ্চাত্য উভয় দর্শনে ছিলেন সে যুগের চুড়ামণি, তিনি ছিলেন তাঁর নিত্যশ্রাব্য সখা। যে দ্বিজেন্দ্রনাথের গৃহে বঙ্কিমাদি মনোবিগণ আসতেন তত্ত্বালোচনার জন্ত সেই দ্বিজেন্দ্রনাথ গিয়েছেন দিনের পর দিন এই নৈয়ায়িকের অপরিহার্য পথের ক্ষুদ্রতর গৃহে। দ্বিজেন্দ্রনাথ ছিলেন এমনই আপন-ভোলা সাদা দিলের মানুষ যে তর্কে বিরক্তির সঞ্চার হলে তাঁর কণ্ঠ তপ্ততর ও উচ্চতর হতে আরম্ভ করত—বনবিহারীর মাতামহ এ তথ্য জানতেন বলে সেটা আদৌ গায়ে না মেখে পূর্বের চেয়ে ক্রীণতর কণ্ঠে মোক্ষমতর যুক্তি পেশ করতেন। খাওয়ার বেলা গড়িয়ে যায়—দ্বিজেন্দ্রনাথ সে সন্ধ্যা বেহুঁশ। শেষটায় বেলা প্রায় তিনটায় উত্তেজিত হয়ে আসন ত্যাগ করে বলতেন, 'ঝকঝক, ঝকঝক, এসব লোকের সঙ্গে তর্ক করা; আমি চললুম এবং এই

আমার শেষ আসা।’ বনবিহারীর মাতামহ ক্রীণকণ্ঠে বলতেন, ‘গিন্নী পুঁই-চচ্চড়ি রেঁধেছিল।’ অটহাস্য করে দ্বিজেন্দ্রনাথ টেনে টেনে বলতেন, ‘সেটা আগে বললেই হ’ত, আগে কইলেই হ’ত।’ তারপর বারান্দায় প্রতীক্ষমাণ তাঁর ‘গার্জেন’কে বলতেন (মহর্ষিদেব এই আপন-ভোলা যুবরাজের জন্য একটি তদারকদার নিযুক্ত করে রেখেছিলেন), ‘যাও, বাড়ি থেকে দাঁত নিয়ে এসোগে।’ শুধু খাবার সময়ই তিনি বাঁধানো দাঁত ব্যবহার করতেন। আমার ভাবতে বড় কৌতুক বোধ হয় যে, প্রিন্স দ্বারকানাথ ঠাকুরের জ্যেষ্ঠতম দৌহিত্র বাড়ির কোর্মা-কালিয়া ছেড়ে অনাড়ম্বর নৈয়ায়িকের অপরিচরিত বারান্দায় পিঁড়িতে বসে পুঁই-চচ্চড়ি চিবোতে চিবোতে উচ্চকণ্ঠে পাড়া সচকিত করে তার অরূপণ প্রশস্তি গেয়ে চলেছেন।

পরদিন ‘নাউ-চিঙড়ি’! ‘নাউ’—লাউ না!

এ ধরনের একাধিক বিচিত্র বিষয় আমি ছেলেবেলা থেকেই শুনে আসছি প্রাপ্ত বিনোদবিহারী মহাশয়ের কাছ থেকে।

দ্বিজেন্দ্রনাথ তাঁর স্মৃতিস্তম্ভ প্রবন্ধরাজিতে মাত্র দু’জন দার্শনিক পণ্ডিতের নাম প্রকার সঙ্গ সপ্রশংস চিত্তে উল্লেখ করেছেন যারা দার্শনিক ও তত্ত্ববিদের গুরুভার কর্তব্য আপন আপন স্বক্ষে অনায়াসে তুলে নিতে পারেন; এঁদের একজন ‘পুঁই-চচ্চড়ি’-রসিক দার্শনিক—বনবিহারীর মাতামহ। এবং তাঁর সম্বন্ধে বলি, সে যুগে পিরিলি ঠাকুররা অগ্রাগ্রা ব্রাহ্মণদের কাছে অপাণ্ডিত্য ছিলেন।

বিশ্বস্তস্বত্রে অবগত আছি, বনবিহারী বাল্য বয়সে অত্যন্ত নিষ্ঠাবান ব্রাহ্মণ ছিলেন। মেডিকেল কলেজের ছাত্রাবস্থায়ও স্বর্ধোদয় থেকে প্রারম্ভ পূজা-অর্চনা শেষ করতে করতে কোনো কোনো দিন ক্লাসের সময় পেরিয়ে যেত। এটাতে আমার সামান্য বিস্ময় লাগে, কারণ আমি যে কয়টি প্রাচীনপন্থী নৈয়ায়িককে চিনি তাঁদের সকলেই পূজা-অর্চনা সম্বন্ধে ঈর্ষ উদাসীন ছিলেন। আমার আপন গুরু পথে যেতে যেতে বারোয়ারি সরস্বতী প্রতিমা দেখে নাসিকা কুঞ্চিত করে বলেছিলেন, ‘ন দেবায়, ন ধর্মায়।’ অর্থাৎ হিন্দুশাস্ত্রে (অবশ্য তিনি স্মৃতি জ্ঞানতেন অত্যন্তই এবং সেজন্ত তাঁর কণামাত্র ক্ষোভও ছিল না) এ রকম পূজোর কোনো ব্যবস্থা নেই বৌদ্ধ ধর্মে (‘ন ধর্মায়’-এর ধর্ম এখানে ‘ধর্ম শরণং গচ্ছামি’ থেকে নেওয়া) তো থাকার কথাই নয়। সঙ্গ সঙ্গ হয়তো সরস্বতীর যে ‘কুথ্যতি’ (হয়তো অমূলক) আছে সেটা তাঁর স্মরণে আসতো। তা সে যাক। কারণ আমার ধর্মের স্মরকীদের ও খৃষ্টান মিস্টিকদের ভিতরও ক্রিয়াকর্মের প্রতি কিঞ্চিৎ অনাসক্তি লুক্কায়িত রয়েছে।

অকস্মাৎ একদিন বনবিহারী নাস্তিকরূপে সমাজে আত্মপ্রকাশ করলেন ও শুধু শাস্ত্রীয় ক্রিয়াকর্ম (রিচুয়েল) নয়, শঙ্করাচার্যের নিষ্ঠুর ব্রহ্ম থেকে হাঁচি টিক্‌টিকির বিরুদ্ধে ভীত কর্কশ কণ্ঠে মারমুখো জিহাদ ঘোষণা করলেন। খৃষ্টান মিশনারী পর্যন্ত তাঁর বিশ্বাসের দৃঢ়তা, উদ্দীপনা এবং যুদ্ধং দেহি মনোভাব দেখলে বিশ্বাসের সঙ্গে পরাজয় স্বীকার করতো। এই যে সামান্য আমি, আমার বয়েস তখন কত হবে? ষোলগোছ,—আমাকে পর্যন্ত প্রথম দর্শনের পাঁচ মিনিটের ভিতর, কলার অভাবে কুর্তার গলার মুরী ধরে শুধোলেন, ‘তুমি ঈশ্বর মানো?’

আমি ভীত কণ্ঠে বললুম, ‘আজ্ঞে আমার বিশ্বাস দৃঢ় নয়, অবিশ্বাসও দৃঢ় নয়।’ আমি তখন জানতুম না, এই উক্তরই চার দশক পরে কলকাতার ‘মডার্ন মহিলাদের ভিতর ফ্যাশন হয়ে দাঁড়াবে।

তিনি তীক্ষ্ণ দৃষ্টিতে আমার দিকে তাকিয়ে বললেন, ‘বিশ্বাস দৃঢ়ই হক, আর শিথিলই হক, সেইটে কিসের উপর স্থাপিত আমাকে বুঝিয়ে বলো।’

কী যুক্তি দেব আমি? যেটাই পেশ করি, সেটাই বুঝে যাওয়ার মত ফিরে আসে ফের আমারই গলায়। ইতিমধ্যে আমার জন্ম উত্তম মমলেট, ষোলের শরবৎ এসেছে—দুপুর অবধি তর্ক চালালে অবশ্যই পুঁই-চচ্‌ড়ি আসতো!

আমি রণেভঙ্গ দিতে চাইলেও তিনি ছাড়েন না। আমি যে ধর্মের ‘অধর্ম’ পথে চলেছি সেইটে তিনি সপ্রমাণ করতে চান, সর্বদৃষ্টিকোণ থেকে, সর্বদৃষ্টিবিন্দু থেকে। এবং আমার সব চেয়ে বিশ্বাস বোধ হল যে, আমি যে ক’জন ইয়োহান্নাসীয় নাস্তিক দার্শনিকের নাম জানতুম—অবশ্য অত্যন্ত ভাঙ্গা-ভাঙ্গা ভাবে—তাঁদের কাছ থেকে বনবিহারী ঈশ্বরত্ব, ধর্মত্ব যুক্তি আহরণ করলেন না। বিস্তর তর্কজাল বিস্তৃত করার পর, মাঝে মাঝে তিনি সেগুলো সাম্‌ আপ্‌ করতেন, এ-দেশী পরিভাষায় সুত্ররূপে প্রকাশ করতেন সংস্কৃত শ্লোক উদ্ধৃত করে! এই প্রথম আমার গোচরে এল যে, আর্থাবর্তের মত ধর্মাবর্তের দেশেও অসংখ্য নাস্তিক প্রচলিত ধর্মমতের বিরুদ্ধে বহুযুগ পূর্বেই বিদ্রোহ ঘোষণা করে গিয়েছেন।

সেদিন আমি বড়ই উপকৃত হয়েছিলুম। ঈশ্বরবিশ্বাসে যে-সব বাতিল যুক্তি আছে সেগুলো থেকে মুক্ত হয়ে আমি ঈশ্বর সন্ধানে সত্য যুক্তি ও নিজস্ব অভিজ্ঞতা সঞ্চয়ের কথা চিন্তা করলুম। কিন্তু আমার কথা থাক।

পাঠক, আপনি মোটেই ভাববেন না, বনবিহারীর প্রধান সংগ্রাম ছিল ঈশ্বরের বিরুদ্ধে। তাঁর সংগ্রাম ছিল জড়তা, কুসংস্কার, ধর্মের নামে পাপাচার, সামাজিক অনাচার, তথাকথিত অপরাধীদের প্রতি অসহিষ্ণুতা, রাজক সম্রাটদের শোষণ, চিন্তা না করে বাঁধা পথে চলার বদ অভ্যাস, মহরমের

তাজিয়ার সামনে কুমড়া-গড়াগড়ি, ঘোন সম্পর্কের উপর তথাকথিত শালীনতার পর্দা টেনে আড়ালে আড়ালে কুমারী ও বিধবার সর্বনাশ, অশিক্ষিত ব্রাহ্মণের অকারণ দত্ত, অত্রাহণের অহেতুক দাস্ত্রমনোবৃত্তি, তথাকথিত সত্যরক্ষার্থে সত্য গোপন, স্বার্থাঘেষণে বিদেশীর পদলেহন ও অজ্ঞানুকরণ কিন্তু যেখানে সে মহৎ সেটাকে প্রচলিত ধর্মের দোহাই দিয়ে বজ্রন, বৎসরের পর বৎসর, প্রতি বৎসর রুগ্না অর্থমুতা স্ত্রীকে গর্ভদান করে তার কাতর রোদন অমুনয়-বিনয় পদদলিত করে তাকে অবশ্রুস্তাবী অকাল-মৃত্যুর দিকে বিতাড়ন এবং সঙ্গে সঙ্গে সমাজে, ধর্মসভায় সচ্চরিত্র সজ্জন খ্যাতি অজ্ঞান (বলা বাহুল্য চিকিৎসক হিসাবে ঠিক এই ট্র্যাজেডি তাঁর সামনে এসেছে বহু, বহুবার), গণিকালয় থেকে একাধিকবার বিবিধ মারাত্মক ব্যাধি আহরণ করে নিরপরাধ অর্ধাঙ্গিনীর শিরায় শিরায় সেই বিষ সংক্রামণ, একবার একটি মাত্র ভুল করার জন্ত অমৃতপ্তা রমণীকে ব্ল্যাকমেল করে তাকে পুনঃ পুনঃ ব্যভিচার করাতে বাধ্যকরণ—

হে ভগবান ! এ যে অফুরন্ত ফর্দ ! কিন্তু আমার দৃঢ় বিশ্বাস, বনবিহারীর সিকি পরিমাণ প্রকাশিত—অপ্রকাশিতের হিসেব নিচ্ছি নে এবং অধিকাংশ লেখাই যে তিনি ছিঁড়ে ফেলতেন সেও বাদ দিচ্ছি—গল্প পণ্ড ব্যঙ্গচিত্র সংগ্রহ করে কেউ যদি তাঁর জিহাদের লক্ষ্য বিষয়গুলো সংকলন করেন তবে এ-স্থলে আমার প্রদত্ত নির্ঘণ্টের চেয়ে বহুগুণে বৃহত্তর ও কঠোরতর হবে ।

কৌ নিদারুণ ব্যঙ্গ, বিতুষণ ও ঘৃণার সঙ্গে তিনি অন্তায় আচরণ, ভণ্ড কাপুরুষতাকে আক্রমণ করতেন সে তাঁর গুণগ্রাহী পাঠকমাত্রই জানেন । ভাষার শাণিত তরবারি তাঁর হাতে বিদ্বাৎবহি বিচ্ছুরণ করতো এবং এই মরমিয়া মোলায়েম আ মরি বাঙলা ভাষাও যে কতখানি বহির্গতা সে তত্ত্ব উদঘাটিত হ'ত বনবিহারীর অদম্য, নিঃশঙ্ক আঘাতের পর আঘাত থেকে । প্রত্যেক শব্দ প্রত্যেকটি বর্ণ বিশুদ্ধ যুক্তির উপর দণ্ডায়মান । শাস্ত্র ভাঙতে যখন যুদ্ধ ঘোষণা করেছেন তখন শাস্ত্রের দোহাইয়ের তো কথাই ওঠে না, তিনি বিজ্ঞানের দোহাইও দিতেন না । কোনো কিছুই অজ্ঞান নয়, কোনো সত্যই শাস্ত্র নয় ; অতএব প্রত্যেকটি সমস্তা নূতন করে ঘাচাই করে দেখতে হবে, এবং এই সাধনা চলবে আমৃত্যু ।

ঈশ্বর-বিশ্বাসকে যে তিনি গোড়াতেই আক্রমণ করেছিলেন তার অর্থ এই নয় যে তিনি এই বিশ্বাস by itself, per se অন্তান্ত সংস্কারের চেয়ে বেশী বিপজ্জনক বলে মনে করতেন । তাঁর ধারণা জয়েছিল—এক সেটা বিস্তর অহুসঙ্কাম ও গবেষণা করার পর, যে—এই বাংলা দেশে যত প্রকারের সামাজিক, অর্থনৈতিক

অজ্ঞায় অবিচার হচ্ছে, যা কিছু নারীর ন্যায় অধিকার ও পরিপূর্ণ বিকাশের অন্তরায় হচ্ছে,—আর ধর্মের নামে অনাচার শোষণের তো কথাই নেই—এ সব-কিছু হচ্ছে ঈশ্বরের দোহাই দিয়ে ।২

যে-সব কুসংস্কারের বিরুদ্ধে বনবিহারী লড়াই দিতেন তাদের বিরুদ্ধে কি অস্ত্র বাঙালী লড়ে নি ? নিশ্চয়ই লড়েছে। বর্ণবৈষম্য, আহারে-বিহারে স্ব স্ব সঙ্গীর্ণ গত্তী নির্মাণ, ধর্মের নামে অধর্মচর্চা—শাস্তাধিকার থেকে জনগণকে বঞ্চিত করে তাদের কুসংস্কারে নিমজ্জিত রাখা, বিধবা, স্বামী পরিত্যক্তাকে হুস্থ স্বাভাবিক জীবন থেকে বঞ্চিত করা, ধর্মত্যাগীকে পুনরায় স্বধর্মে প্রত্যাবর্তন করার পথ চিরতরে রুদ্ধ করে দেওয়া ইত্যাকার বহু বহু সংস্কার আচার দূর করার জন্য চৈতন্য সংগ্রাম দেন ও সর্বজনীন বৈষ্ণব ধর্ম প্রচার করেন। রামমোহন, বিজ্ঞানাগর, বিবেকানন্দ এঁরা এবং আরো অনেকে মুক্ততা, কুসংস্কার ও একাধিক পাপাচারের বিরুদ্ধে সংগ্রাম করেছেন। এঁদের তুলনায় বনবিহারীকে চেনে কে ?

কারণ বনবিহারী অস্ত্র পন্থা অবলম্বন করেছিলেন।

প্রাগুক্ত সকলেই দেশ-দশকে পাপচিন্তা-পাপাচার থেকে মুক্ত করার জন্য শাস্ত্রের অর্থাৎ ধর্মের শরণ নিয়েছেন। বনবিহারী মানবিকতার শরণ নেন। প্রচলিত ধর্মও তাঁর শত্রু। একমাত্র ধর্মের moral, ethical যেটুকু পরীক্ষা-নিরীক্ষার ধোপে টেকে সেইটুকু গ্রহণ করা যেতে পারে।

বঙ্কিমচন্দ্র বিজ্ঞানাগরকে একথানা চিঠিতে যা লেখেন তার নির্ধাস ছিল এই, শাস্ত্র মেনে হিন্দু তার সামাজিক জীবন যাপন করে না। সে মানে লোকাচার, দেশাচার। বিজ্ঞানাগর যদি সর্বশাস্ত্র দিয়েও হ্যার্থহীন নিরঙ্কুশ সপ্রমাণ করেন যে, বিধবা-বিবাহ শাস্ত্রসম্মত, শাস্ত্রসিদ্ধ তবু হিন্দু সে-মীমাংসা গ্রাহ্য না করে আপন লোকাচার দেশাচার আগেরই মত মেনে নিয়ে বিধবার বিয়ে দেবে না। “অতএব বিজ্ঞানাগরের উচিত যুক্তি জ্ঞায় ও মানবিকতার (এই ধরনেরই কিছু, আমার সঠিক মনে নেই, তবে মোক্ষা, reasonএর উপর নির্ভর করা, শাস্ত্রের উপর না করে) উপর নির্ভর করা।

২ তাই তাঁর নিজস্ব মৌলিক করমূল্য বা ডাক্তারি প্রেসক্রিপশন ছিল :—

ভগবান আমাকে বুদ্ধি দিয়েছেন। (এই স্বতঃসিদ্ধটি আন্তিকরা স্বীকার করেন ও বনবিহারী এটা উপস্থিত তর্কস্থলে মেনে নিচ্ছেন) সেই বুদ্ধি বলছে, “ভগবান নেই”।

∴ ভগবান বলছেন, “ভগবান নেই”।

বিভাগসাগর উত্তরে কি লিখেছিলেন, আদৌ উত্তর দিয়েছিলেন কি না সেটা বহু অল্পসন্ধান করেও আমি খুঁজে পাই নি।^৩ কিন্তু তিনি যে বঙ্কিমের উপদেশ গ্রহণ করেন নি, সে কথা কারো অবিদিত নেই। হয়তো তিনি ভেবেছিলেন, শাস্ত্রের সাহায্যে হয়তো বা কিছু কার্যোদ্ধার হবে, যুক্তিতর্ক দিয়ে কিছুই হবে না। বিভাগসাগর আপন দেশবাসীকে বিলক্ষণ চিনতেন।

অতএব প্রাপ্ত রামমোহনাদি সকলেই লুথার জাতীয় সমাজ ও ধর্মসংস্কারক। যে বাইবেল পোপ মানেন, খৃষ্টান মাত্রই মানে—সেই বাইবেল দিয়েই তিনি সুপ্রতিষ্ঠিত করলেন যে প্রত্যেক মানুষেরই বিধিদ্ভুক্ত অধিকার আছে—আপন বুদ্ধি অনুযায়ী বাইবেল থেকে বাণী গ্রহণ করে আপন জীবন চালনা করার; ‘চিরন্তন, অজান্ত’ কোনো পোপকে স্বীকার করার প্রয়োজন নেই। তলস্তয়, গান্ধী এই সম্প্রদায়ের।

ভলতেয়ার এ পথ স্বীকার করেন নি। তিনি নির্ভর করেছিলেন যুক্তি (রীজন), শুভবুদ্ধি (মোটিমুটি কমন সেন্স), মানবতা ও ইতিহাসের শিক্ষার উপর। তাঁর কমনসেন্স ও ইতিহাসের উপর বরাত মানার একটা উদাহরণ দি। দক্ষিণ ভারতের হিন্দুরা ধর্মোদ্ধ হয়ে যে প্রথম খৃষ্টান মিশনারী সিন টমাসকে আক্রমণ করে হত্যা করেছিল বা পশ্চাৎকাবিত হলে পর তিনি গুহাগহ্বরে বিলীন হয়ে যান, সেই কিংবদন্তী অস্বীকার করে আলোচনা করতে গিয়ে ব্যঙ্গের স্বরে ভলতেয়ার বলছেন, যে হিন্দুর পরধর্মে সহিষ্ণুতা সম্বন্ধে আমরা বহুকাল ধরে বহু পর্ঘটকের কাছ থেকে শুনে আসছি, সেইটে হঠাৎ অবিশ্বাস করতে কাণ্ডজ্ঞানে (কমন সেন্সে) বাধে। এ দেশের বনবিহারী ভলতেয়ার—কিন্তু তিনি ভলতেয়ারের শিষ্য নন।

তবে জনসাধারণ বনবিহারীকে চেনে না কেন? তার সর্বপ্রধান কারণ, বনবিহারী নিজেকে কখনো সংস্কারক, যুগান্তকারী মহাপুরুষরূপে দেখেন নি। হয়তো তিনি ভাবতেন, উচ্চাসনে দগুণ্যমান হয়ে অনলবর্ষী ভাষণের সাহায্যে জনসাধারণকে উত্তেজিত করে, কিংবা ভাবালুতার বজ্রায় দেশকে ভাসিয়ে দিয়ে কোনো দীর্ঘস্থায়ী স্ফূট পরিবর্তন আনা যায় না। কিংবা হয়তো স্বভাবসিদ্ধ আন্তরিক বিনয়বশতঃ (সামান্য পরিচয়ের ন’সিকে লোক ভাবতো, তাঁর মত দস্তী গবী ত্রিসংসারে বিবল—বিশেষতঃ লোকটা যখন স্বয়ং ঈশ্বরকে তাঁর যুগযুগাধিকৃত স্বর্গীয় সিংহাসন থেকে সরাতে চায়।) তিনি পেভেট্টেলে আরোহণ করতে

৩ কেউ যদি পান, আমাকে দয়া করে জানাবেন কি? আগের থেকেই ধর্মবাদ দ্বিচ্ছিন্ন।

চাইতেন না, কিংবা হয়তো তিনি নৈরাশ্রবাদী ছিলেন। তা সে যা-হোক, আমরা যে তাঁর মত কিংবা তাঁর চেয়েও শক্তিশালী লোকের জন্ম এখনো প্রস্তুত হই নি সে বিষয়ে আমি নিঃসন্দেহ।

কিন্তু কেন ?

বনবিহারী তো এমন কিছু নূতন কথা বলেন নি যা ভারতে কেউ কখনো বলে নি। স্থির হয়ে একটু ভাবলেই ধরা পড়বে ভারতবর্ষের চিন্তা-জগৎ (ধর্ম-শাস্ত্র-নীতি-আচার-ঐতিহ্য-কলা-জ্ঞানবিজ্ঞান) কি দিয়ে গড়া।

১। সনাতন হিন্দুধর্ম ২। বৌদ্ধধর্ম ৩। জৈনধর্ম ৪। দর্শনের মধ্যে নিরীশ্বর সাংখ্য ৫। চার্বাক প্রভৃতি লোকায়ত মতবাদ।

প্রথমটি বাদ দিলে বাকি চারটি চিন্তাধারাতেই ঈশ্বরের অস্তিত্ব স্বীকার করা হয় না, এবং অধিকাংশ ক্ষেত্রেই বার বার সাবধান-বাণী প্রচারিত হয়েছে, তোমার স্বথ-শান্তি, তোমার পরমাগতি সম্পূর্ণ তোমারই হাতে ; দৃশ্য এবং অদৃশ্য কোনো লোকেই এমন কোনো অলৌকিক শক্তি নেই যে তোমাকে কোনো প্রকারে কণামাত্র সাহায্য করতে পারে। এই চিন্তাধারা আদৌ অর্বাচীন নয়। বৈদিক যুগে দেবদেবীদের উদ্দেশ্যে যখন যাগযজ্ঞহোমপশুবলি সর্বত্র স্বীকৃত, ঋষিকবিগণ যখন তাঁদের উদ্দেশ্যে সবিষ্ময়ে অপৌরুষেয় মন্ত্র উচ্চারণ করছেন, তখন তার সঙ্গে সঙ্গে শুনে পাচ্ছি আরেকটি দ্বিধাজড়িত কণ্ঠ, আরেক সত্যাত্মবোধী প্রশ্ন জিজ্ঞেস করছেন—ধন্য হোক সে প্রশ্ন, ধন্য হোক তার জন্ম-লগ্ন—‘তাহলে কোন্ দেবতাকে আমি স্বীকার করবো ?’ এই প্রশ্ন থেকেই আরম্ভ হল, চরম সত্যের—আলটিমেট রিয়েলিটির—অহুসঙ্কান। এই প্রশ্নের দুটি উত্তর পাওয়া যাচ্ছে পরবর্তী আরণ্যক-উপনিষদের যুগে—বেদান্তের মূল সূত্র সব-কিছুই ব্রহ্ম, এই তিন ভুবন আনন্দময় ব্রহ্ম থেকে উদ্ভূত। দ্বিতীয় সম্পূর্ণ বিপরীত উত্তর জন্ম নেয় ঐ সময়েই, হয়তো তার পূর্বেই, এবং সবল কণ্ঠে ধ্বনিত হয় লোকায়ত মতবাদে এবং তারও পরে তীর্থঙ্করদের কণ্ঠে, বুদ্ধদেবের কণ্ঠে—দেবদেবীতে পরিপূর্ণ অনাস্থা প্রকাশ করে মানুষকে সৃষ্টির কেন্দ্ররূপে স্বীকার করা। এরই চরম বিকৃতরূপ—চার্বাকের মতবাদ, যে মতবাদ নৈতিক দায়িত্বে পর্যন্ত বিশ্বাস করে না।

বৌদ্ধধর্ম এ-দেশ থেকে লোপ পেয়েছে, কিন্তু সে মতবাদ সম্পূর্ণ বহিষ্কার করা সম্ভব হয় নি। তর্কযুদ্ধে পরাজিত কোনো এক সাংখ্যতীর্থ বোধ হয় বৌদ্ধবৈরাগী শঙ্করাচার্য সম্বন্ধে বক্রোক্তি করেছিলেন, বৌদ্ধদর্শনের সঙ্গে যে এতখানি সন্ধি করেছে যে, সে মতবাদ আত্মসাৎ করতে তার বাধে নি, তাকে প্রচ্ছন্ন বৌদ্ধ বলবো, না তবে কি বলবো ?

আর নিরীশ্বর জৈনরা তো, এখনো ভারতবর্ষে বাস করেন।

নিরীশ্বর সাংখ্যের চর্চা করেন এখনো বহু পণ্ডিত : ধর্মের মতে ঈশ্বর প্রমাণভাবে অসিদ্ধ।

নৈয়ায়িকরা কোন্ পন্থায় ?

এবং এদেশের সহজিয়ারা সৃষ্টিকেন্দ্র করেছেন মাহুশকে : ‘সবার উপরে মাহুশ সত্য, তাহার উপরে নাই।’

পূর্বেই বলেছি, বনবিহারী ভলতেয়ারের শিষ্য নন। তিনি ভলতেয়ারের শিষ্য এ-কথা তাঁর সামনে বললে তিনি নিশ্চয়ই ছেড়ে আসতেন। অবশ্যই বলতেন, ভলতেয়ার যদি দেখেন যে তাঁর মতবাদ আমার মতবাদের সঙ্গে মিলে যাচ্ছে তবে তিনি গর্ব অহুভব করতে পারেন ; আমার তাতে কি ? আবার তাঁকে যদি বলা হ’ত, তিনি ঐতিহ্যগত বৌদ্ধ-জৈন-সাংখ্য দর্শন প্রচার করছেন তবে তিনি নিশ্চয়ই আরো মারমুখো হতেন। নিশ্চয়ই বলতেন, ‘চুলোয় যাক্ (“জাহান্নমে” যাক্”, নিশ্চয়ই বলতেন না, কারণ যে জায়গা নেই, সেখানে কোনো মতবাদকে পাঠিয়ে বনবিহারী অবশ্যই সঙ্কট হতেন না !) তোমার সাংখ্য জৈন মতবাদ ; পিছন পানে তাকাও কেন ? নিজের বুদ্ধি, নিজের যুক্তি, নিজের রেশনালিটির উপর নির্ভর করতে পারো না ? কপিল-জ্ঞানের ঠাকনা ছাড়া বুদ্ধি দাঁড়ানো যায় না ? তুমি আছ, আমি আছি—বাস্। আমরা বের করে নেব ন্যায় আচরণ কি ? আর রাগ কোরো না, আমি আমারটা বহুপূর্বেই একাই বের করে নিয়েছি।’

ডন্ কুইকসটের সঙ্গে বনবিহারীর মাত্র একটা বিষয়ে পার্থক্য। বিস্তর মধ্যযুগীয় রোমান্টিক কাহিনী পড়ে পড়ে ডনের মাথা গরম হয়ে যায়। তিনি ভাবলেন তিনি সে যুগের শিভালরাস্ নাইটদের একজন।^৫ ব্যস্, আর যাবে

৪ জাহান্নম এসেছে হীক্স গেহানেস থেকে ;

বলা উচিত দুটো শব্দই কগ্নেট। এই গেহানেস প্যালেস্টাইনের ভ্যালি অব ডেথ্—ভৌগোলিক উপত্যকা।

৫ এ যুগের ভাইসচ্যান্সেলর হাস্‌লান স্‌ত্ৰাওয়ার্‌র্দী যখন লাটসাহেবকে বীণা-কল্যাণীর হাত থেকে বাঁচান তখন তাঁকে রাতারাতি (অর্থাৎ এক night নাইটে-ই) নাইট (knight) করা হয়। সেই উপলক্ষ্যে তাঁর ব্রাতুষ্পুত্র (?) শহীদ স্‌ত্ৰাওয়ার্‌র্দী একটি অতুলনীয় কবিতায় বলেন, ‘মধ্যযুগে ড্র্যাগনের (রাক্ষস) হাত থেকে কুমারী উদ্ধার করে বীরপুরুষ নাইট হতেন। এ যুগে কুমারীর হাত থেকে ড্র্যাগনকে রক্ষা করে মাহুশ নাইট হয়।’

কোথায়। দ্বিধিক-জ্ঞানশূন্য হয়ে একাকী, সম্পূর্ণ একা তিনি খোলা তলওয়ার হাতে আক্রমণ করলেন জলযন্ত্রকে (উইণ্ড মিলকে)।

তারও বহু পরে যিনি এ-যুগের সর্বশেষ নাইট বলে নিজেকে প্রচার করেন তিনি ফীল্ড মার্শাল হেরমান্ গোয়িঙ—হ্যার্নবেগ মোকদ্দমায়। তাঁর কৃতিত্ব : জার্মানিতে তিনিই সর্বপ্রথম কনসানট্রেশন ক্যাম্প স্থাপনা করেন (অবশ্য তার বহু পূর্বে ইংরেজ করেছিল বোয়ার-যুদ্ধে দক্ষিণ আফ্রিকায়) এবং আইষমানের ইহুদি-হননে তাঁর সম্মতি ছিল। নিহত ইহুদিদের ভিতর লক্ষাধিক কুমারী কন্যাও ছিল।

বনবিহারী কপিল-জীন-চাৰ্বাক পড়ে পড়ে ডনের মত মাথা গরম করেন নি। ধীরস্থির মনে চিন্তা করে, মীমাংসায় পৌঁছে তিনি আক্রমণ করলেন বঙ্গদেশের জগদল জাদ্যকে। এখনো তাঁর মাথা কতখানি ঠাণ্ডা সেটা বোঝা যায় এর থেকে যে, তখনো তাঁর ঠোঁটে হাশ্ব-বাক্স-বস—তাঁর নব-প্রকাশিত নাস্তিক্য প্রচারকামী পত্রিকা 'বেপরোয়া'র (বাঙলা দেশে এ ধরনের কাগজ বোধ হয় এই প্রথম আর এই শেষ) প্রথম সংখ্যায় প্রথম 'war song'-এ তিনি বললেন,

‘টলবো না কো অতুস্বার আর বিসর্গের

ঐ ছব্বায়ে

কিংবা দেখে টিকির খাড়া সঙ্গীন !’

সে পত্রিকায় কি না থাকতো ? ধর্ম, দর্শন, নীতিশাস্ত্র থেকে আরম্ভ করে সাহিত্য, চিত্র—এস্টেক পদপিপিরি মাদুলি, হাচি-টিকটিকি। এর পূর্বে তিনি 'ভারতবর্ষে' ব্যঙ্গচিত্রসহ বঙ্গজীবনবৈচিত্র্য তাবলো পদ্ধতিতে প্রকাশ করেছেন : তার একটি ছিল কেরানী—লোলচর্ম অস্থিসার জীর্ণবেশ 'ক্লক-কেশ কেরানীর ছবির নিচে ছিল,

‘চাকরি গেল, চাকরি গেল, চাকরি রাখা

বিষম দায়

ঐ গো, বুঝি ন’টা বাজে, ঐ গো বুঝি

চাকরি যায় !

বিজলি-বাতির ফাহুল হেন ঠুনকো

মোদের চাকরি ভাই !

ফট করে সে ফাটে, কিন্তু ফাটার শব্দে

চমকে যাই !’

সর্বশেষে কেরানী যেন বৈষ্ণব, কবিরাজ, ডাক্তার, মহামান্ত্র শ্রীযুত

বনবিহারী মুখোপাধ্যায়কেই বাদ্য করে বলছে (উইথ এ টুইস্টেড আইরিশ স্টাইল)—

‘ভরা পেটে ছুটতে মানা ? চিবিয়ে খাওয়া স্বাস্থ্যকর ?

চাকরি আগে বাঁচাই দাদা, প্রাণ বাঁচানো সে তারপর ।’

রবীন্দ্রসৃষ্টির সঙ্গে আমি ঈষৎ পরিচিত । রবীন্দ্ররসিকদের রচনা আমি পড়েছি । অধুনা ‘রবীন্দ্রায়ণ’ও (অত্যাৎকৃষ্ট প্রবন্ধ সংকলন, তত্‌পরি অভুলনীয় সম্পাদন) অধ্যয়ন করেছি । তারপরও বলবো, মুক্তকণ্ঠে বলবো, বনবিহারীর মত রবীন্দ্রসৃষ্টির চৌকশ সমঝদার আমি দ্বিতীয়টি দেখি নি । তাই আজ পর্বস্ত রবীন্দ্রনাথের যে সব বিরুদ্ধ সমালোচনা বেরিয়েছে, তার মধ্যে বনবিহারীর সমালোচনাই সর্বোৎকৃষ্ট । পক্ষান্তরে রবীন্দ্রনাথের অন্য সমালোচকদের প্রতি তিনি ছিলেন হাড়ে হাড়ে চটা । বিরক্তি ভরা কণ্ঠে বলতেন, ‘রসসৃষ্টির পথে যত সব অবাস্তুর বস্তু নিয়ে বর্বরশ্রু শক্তিকর ! রবীন্দ্রনাথ নাকি নগ্ন ঘোঁনের অশ্লীল ছবি আঁকেন—তা তিনি আঁকেন নি । আর যদি আঁকেনই বা, তাতেই বা কি ? এ সব তো সম্পূর্ণ অবাস্তুর—রসসৃষ্টি হলেই হল ! রবীন্দ্রনাথের রূপক নাকি অস্পষ্ট ! তা হলে চশমা নাও—ওঁকে দোষ দিচ্ছে কেন ?’

তার পর বুঝিয়ে বলতেন, ‘দে আর অল বার্কিং আপ দি বং ট্রী’—অর্থাৎ বেরালটা উঠেছে একটা গাছে, আর কুকুরগুলো যেউ যেউ করছে অন্য গাছের গোড়ায় ।

সত্যেন দত্তকে আজকের দিনে লোক আর স্মরণে আনেন না ; অথচ তিনি যখন সবে আসরে নেমেছেন, সেই সময় থেকেই বনবিহারী তাঁর প্রশংসা গেয়েছেন । সেই সত্যেন দত্তই যখন এই শতাব্দীর দ্বিতীয় শতকে মাঝে মাঝে অহুপ্রাস ও ছন্দের ম্যাজিকের (জাগ্‌লারি) ‘কেরদানি’ দেখাতেন, তখন বনবিহারী অতিষ্ঠ হয়ে ‘বেপরোয়া’তে অপ্রিয় সমালোচনা করেন । আমরা তখন তাঁকে বলি, ‘এগুলো নিছক একস্পেরিমেন্ট জাতীয় জিনিস ; আপনি অত সিরিয়াসলি নিচ্ছেন কেন ?’ আরেক টিপ নশ্রু নিয়ে—এইটাই ছিল তাঁর একমাত্র বদঅভ্যাস, আর ঐ করে করে করেছিলেন তাঁর কণ্ঠস্বরের সর্বনাশ—বললেন, ‘তা হলে ছাপানো কেন ? যে প্রচেষ্টা রসের পর্ষায়ে ওঠে নি সেটা প্রকাশ করে বিড়ম্বিত হওয়ার কি প্রয়োজন ?’

বিজ্ঞেজ্ঞনাথের পৌত্র, রবীন্দ্রনাথের গানের ভাণ্ডারী দিনেজ্ঞনাথও বলতেন,

শতং বদ

মা লিখো

শতং লিখো

মা ছাপো।

*

*

*

আরো বহু স্মৃতি বার বার মনে উদয় হচ্ছে। একদা দুরারোগ্য রোগের অসহ যন্ত্রণা থেকে নিষ্কৃতি পাবার পথ তিনি আমাকে দেখিয়ে দেন। রিটারার করার বহু পরে তিনি একবার কলকাতায় এসে কি করে খবর পান আমি অমুহু। বিশ বছর ধরে আমাদের দেখাসাক্ষাৎ নেই। তিনি খবর পাঠালেন। সব শুনে বললেন, 'এ রোগ সারে না—তবু তুমি পরেশ চক্রবর্তীর কাছে যাও। আমি বহু ছেলে পড়িয়েছি—সব ব্লাকো। ঐ একটি ছেলের আক্কেলবুদ্ধি ছিল। বিলেত থেকে ও নিয়ে এসেছে এ টু জেড বিস্তার ডিগ্রী।' আমি তাঁর কাছে গেলে সে ডাক্তার বলেন, 'গুরু এই প্রথম আমাকে একটি রোগী পাঠালেন। কি বলেছেন উনি? এ রোগ সারে না? না, সারে।' তিনি আমাকে সম্পূর্ণ স্বস্থ করে দিয়েছিলেন। এক্সপেরিমেন্ট করে করে নয়। প্রথম ওষুধ দিয়েই। কিন্তু সে আরেক কাহিনী। এবং সবচেয়ে সস্তাপের কথা, এই কৃতবিদ্য চিকিৎসক অল্প বয়সে গত হন।

*

*

*

৫ই জুলাই বনবিহারী পঞ্চভূতে লীন হন।

সাহিত্যিকশ্রেষ্ঠ 'বনফুল' তাঁর সম্বন্ধে 'দেশ' পত্রিকার ১৫ই আশ্বিন সংখ্যায় অতি অল্প কয়েকটি কথা বলেছেন, কিন্তু হৃদয়ের অন্তস্তল থেকে, এবং তার প্রত্যেকটি শব্দ যেন আমার বুকের উপর হাতুড়ি পিটছে। আমি এই নাতিদীর্ঘ প্রবন্ধে যা প্রকাশ করতে সক্ষম হই নি, তিনি অল্প কথাতেই সেটি মূর্তমান করেছেন।

"বঙ্গ সাহিত্য-ভাণ্ডারে তাঁর (বনবিহারীর) দান চিরকাল অগ্নান হয়ে থাকবে। রাজনৈতিক সামাজিক কোনও অত্যাচার সঙ্গ্রে কখনও তিনি রফা করেন নি। অনবদ্য তীক্ষ্ণ ভঙ্গিতে সে-সবের বিরুদ্ধে সাহিত্যিক প্রতিবাদ তিনি করে গেছেন। সেকালের ভারতবর্ষ, বঙ্গবাণী, শনিবারের চিঠি, বেপরোয়া প্রভৃতি সাময়িক পত্রিকাগুলির পৃষ্ঠায় তাঁর কীতি এখনও মণি-মুক্তার মতো ঝলমল করছে। মানুষ হিসাবে তিনি ছিলেন অনমনীয় দুর্বীর প্রকৃতির লোক। কখনও কারো অত্যাচার সহ্য করতে পারেন নি। স্মৃত্যং কারও সঙ্গ্রে তিনি মানিয়ে চলতে পারেন নি, কারো সঙ্গ্রে তাঁর বনে নি। এজ্ঞে শেষ জীবনে প্রায় একা একা নিঃসঙ্গ জীবনযাপন করতে হয়েছে তাঁকে। অতিশয় বিচক্ষণ

চিকিৎসক ছিলেন। সিভিল সার্জন হয়ে বগুড়া থেকে রিটার্নার করেন।... পৃথিবীতে নিখুঁত মানুষ নেই, নিখুঁত মানুষের সন্ধানেই তাঁর সারা জীবন কেটেছে। কিন্তু কোথাও সে মানুষ পান নি। নিঃসঙ্গ জীবনই কাটাতে হয়েছে তাঁকে। তাঁর একটি ভাই তাঁকে ছাড়েন নি। বন্ধুবিহারীই শেষ পর্যন্ত ছিলেন তাঁর সঙ্গে। শেষে তিনি নিজের ঠিকানাও কাউকে জানাতেন না। গত ৫ই জুলাই তিনি মারা গেছেন।”

বনফুলই তো চেনে বনবিহারীকে। আর এই ‘বনবিহারী’ নাম সার্থক দিয়েছিলেন তাঁর গুরুজন! জনসমাজে বাস করেও তিনি যেন সারাজীবন ‘বনেই’ ‘বিহার’ করলেন।

আমার আর মাত্র দুটি কথা বলার আছে।

বনবিহারী যে হিন্দু-সমাজ ও বাঙালীর কঠোর সমালোচনা করে গিয়েছেন তার কারণ এই নয় যে, তিনি এই দুটিকেই পৃথিবীর নিকৃষ্টতম বলে মনে করতেন। তিনি নিজেকে প্রফেট বা রিকর্মার বলে মনে করতেন না। কাজেই বিশ্বভুবনের তাবৎ জাতি দূর করার ভার আপন স্বত্বে তিনি তুলে নেন নি। এমন কি তাঁর হাতের আলোটিও তিনি উচু করে তুলে ধরেন নি। সে-আলো তাই পড়েছিল মাত্র তাঁর আশপাশের সমাজ, ধর্ম, রাজনীতি, সাহিত্যের উপর। তারই মলিনতাটুকু তিনি দেখিয়ে গিয়েছেন মাত্র। তবুও আমার মনে হয়েছে, তিনি রবীন্দ্রনাথের ‘জ্যাঠামশাই’ ও রবীন্দ্রের ‘জ্যা ক্রিস্তফ’-এর সমন্বয়—কোনো কোনো ক্ষেত্রে। ‘জ্যা ক্রিস্তফ’ বনবিহারীর অগ্ন্যতম প্রিয় পুস্তক (ডাক্তার হয়েও—সিরিয়াস ডাক্তাররা সাহিত্যচর্চার সময় পান কম—তিনি সম্পূর্ণ নিজের সাধনায় বিশ্বসাহিত্যের কতখানি আয়ত্ত করেছিলেন সেটা বোঝাবার চেষ্টা করবো না)।

আজ তিনি জীবিত নেই, তাই বলবার সাহস পাচ্ছি, তিনি বাঙালীকে ভালোবাসতেন। তাঁর জীবিতাবস্থায় একথা বললে তিনি বোধ হয় আর আমার মুখ দর্শন করতেন না। বাঙালী বলতে তিনি হিন্দু—বিশেষ করে তথাকথিত নিম্নশ্রেণীর হিন্দু—মুসলমান, ইলিয়ট রোড অঞ্চলের এ্যাংলো-ইণ্ডিয়ান, সকলকেই বুঝতেন।

এইবারে আমার শেষ বক্তব্যটি নিবেদন করি। এ কথাটি তাঁর জীবিতাবস্থায় বললে তিনি হুনিশ্চিত রামদা নিয়ে আমার পশ্চাক্ষেপে ধাবমান হতেন।

ইংরিজিতে বলে—“মিষ্ট অব্ হিউমেন কাইওনেস্।”

অনিচ্ছায় বলছি, কিন্তু এতলে বলার প্রয়োজন, আমি বিস্তর দেশ-বিদেশ

দেখেছি। বহু সমাজসেবী, হাসপাতাল চালক মিশনারি, রেডক্রসের একনিষ্ঠ সেবক কর্মী সর্বভাগী মহাজন, স্ত্রীলিঙ্গাদের বিভীষিকাময় রক্তাক্ত রণাঙ্গন-প্রত্যাগত সাজ্জনকে আমি চিনি। বনবিহারীর হৃদয়ের অতিশয় গোপন কোণে যে ভুবন-জোড়া স্নেহমমতার ভাণ্ডার ছিল—সে রকম তো আর কোথাও দেখলুম না। সেই স্নেহমমতাই তাঁর আপন স্বত্বশাস্তি হরণ করেছিল। সেই বেদনাবোধই তাঁকে উত্তেজিত করতো খড়্গ ধারণ করে অস্ত্রায়, অসত্য, অত্যাচার, অবিচারের বিরুদ্ধে সংগ্রাম করতে।

এই স্নেহমমতা তিনি এমনই সঙ্কোপনে রেখেছিলেন যে, অধিকাংশ লোকই তাঁর কঠোর ভাষা, তীব্র কণ্ঠ, নির্মম বাঙ্গ শুনে বিভ্রান্ত হয়েছেন। বনবিহারীর সেজ্ঞ কণামাত্র ক্ষোভ ছিল না। তাঁর সহানুভূতি তিনি রাখতেন আরো গোপন করে।

আমরা বোধ হয় অত্যন্ত সহিষ্ণু। কিংবা যথেষ্ট ইতিহাস পড়ি নি। নইলে সোক্রাতেস খৃষ্টের জন্ম একদা যে ব্যবস্থা করা হয়েছিল বনবিহারীর জন্ম সেটা করা হ'ল না কেন?

কিন্তু এই অল্পভূতিগত অভিজ্ঞতা গড়ে প্রকাশ করা যায় না।

বনবিহারীর প্রয়াণ উপলক্ষ্যে 'বনফুল' যে সনেটটি লিখেছেন সেটি উদ্ধৃত করি :—

‘বনবিহারী মুখোপাধ্যায়’

পাষাণে আঘাত হানি, অসি তীক্ষ্ণধার
চূর্ণ-বিচূর্ণ হ'ল? কঙ্কর কটক
জয়ী হ'ল বিক্ষত করিয়া বার বার
বলিষ্ঠ পথিক-পদ? ধূর্ত ও বঞ্চক
সাধুরে লাস্তিত করি' বিজয়-কেতন
আশ্ফালন করিল আকাশে? অঙ্ককার
গ্রাসিল কি রবি? না—না—নতি-নিবেদন
করি' পদে উচ্চকণ্ঠে কহি বারংবার
নহে ব্যর্থ, পরাজিত, হে বহি-কমল
তমোহরী, হে প্রদীপ্ত মশাল-বর্তিকা,
অগ্নি তব অনিবার্য, চির-সমুজ্জল,
অনবচ্ছিন্ন অপকল্প উদ্ভব-মুখী শিখা।

মহাপ্রস্থানের পথে বিগত অর্জুন
অজ্ঞাগারে যেথে গেছে শরপূর্ণ তুণ।

অদৃষ্টের রাজরস

আওরেকজেব মারা যাওয়ার সঙ্গে সঙ্গেই তাবৎ ভারতবর্ষে লেগে গেল ধুমুয়ার।
বাদশাহ হবেন কে ?

এস্থলে স্মরণ করিয়ে দি যে, আর্য এবং একাধিক আর্যের জাতির মধ্যে প্রথা—রাজার মৃত্যু হলে তাঁর জ্যেষ্ঠ পুত্র বিনা বাধায় সিংহাসনে বসেন। কিন্তু তুর্কমানিস্তানের মোগলদের ভিতর এরকম কোনো ঐতিহ্য ছিল না। তাদের ছিল ‘জোর যার মুল্লুক তার’। আরবদের ভিতর গোড়ার দিকে এই একই প্রবাদ অমুযায়ী প্রেসিডেন্ট (খলীফা) নিযুক্ত হতেন, তবে ‘জোরের’ বদলে সেখানে ছিল চরিত্রের, শৌর্যবীর্যের, জ্ঞান-বিজ্ঞানের শ্রেষ্ঠত্ব। তাই বলা হ’ত, ‘সর্বশ্রেষ্ঠ ব্যক্তি হবেন খলীফা,—হন-না তিনি হাবশী (নিগ্রো)।’ এবং সেটাও ঠিক করা হ’ত গণভোট দিয়ে।

তাই মোগল রাজা মারা যাওয়া মাত্রই, কিংবা তিনি অথর্ব অসমর্থ হয়ে পড়লেই লেগে যেত রাজপুত্রদের মধ্যে যুদ্ধবিগ্রহ। কোনো কোনো সময় রাজার নাতিরাও এবং অন্য বাজে লোকও এই লড়াইয়ের লটারিতে নেবে যেতেন। অবশ্য রাজরক্ত না থাকলে তাঁর সন্তাট হবার সম্ভাবনা থাকতো না। পাঠকের স্মরণ থাকতে পারে, ফররুখসিয়াদের রাজত্বের শেষের দিক থেকে মুহম্মদ শাহ বাদশা রঙীলার সিংহাসনারোহণ পর্যন্ত সিদ্ধ দেশের সৈয়দ ভ্রাতৃত্ব দিল্লীতে সিংহাসনের সব ক্ষমতা কেড়ে নিয়েছিলেন। রাজার পর রাজাকে তাঁদের হাতে পুতুলের মত নাচতে হয়েছে। কিন্তু খ্যাতি, শক্তি, অর্থবলের মধ্যাহ্নগগনে থাকাকালীনও তাঁদের কারো তখৎ-ই-তাউসে বসবার ছঃসাহস হয় নি। সৈয়দ পয়গম্বরের বংশধর,—তিনি সম্মান পাবেন মসজিদে, মস্তবে, মাদ্রাসায়—রাজসভায় কবিরূপে, ঐতিহাসিকরূপে—সমাজে গুরুরূপে, কিন্তু মোগল রাজবংশের রক্ত তাঁদের ধমনীতে ছিল না বলে দিল্লীর হিন্দু-মুসলমান তাঁদের বাদশাহ-সালারূপে কিছুতেই এঁদের স্বীকার করতো না। ঠিক ঐ একই কারণে মারাঠা ও ইংরেজ দিল্লীর সিংহাসনে বসতে চায় নি। সিপাহ বিদ্রোহ চূর্ণবিচূর্ণ না করা পর্যন্ত ইংরেজ স্বয়ং মহারানী ভিক্টোরিয়াকে ভারতের অধীশ্বরী বলে ঘোষণা করবার সাহস পায় নি। এবং সেটাও করেছিল অতিশয় সতয়ে।

রাজা বা সার্বভৌম আমীরের মৃত্যুর পর যুবরাজদের ভিতর ভ্রাতৃত্বের মারফতে কে সবচেয়ে শক্তিশালী সেটা বের করা তুর্কমানিস্তানের ছোট ছোট প্রদেশে প্রবল বিপর্যয়ের সৃষ্টি করে না। কিন্তু ভারতের (এবং অনেক সময় কাবুল কান্দাহার গজনির উপরও দিল্লীর আধিপত্য থাকতো) মত বিরাট দেশে এ প্রকারের যুদ্ধ বিকট অরাজকতা ও দীর্ঘকালব্যাপী অশান্তির সৃষ্টি করতো। লোকক্ষয়, অর্থক্ষয় তো হ'তই,—অনেক সময় একই ভূখণ্ডের উপর ক্রমাগত অভিযান ও পার্শ্ব অভিযান হওয়ার ফলে সেখানে চাষবাস হ'ত না, ফলে পরের বৎসর হুঁশিষ্ণ হ'ত। সাধারণজনের বাড়িঘরদোর তো নষ্ট হ'তই, কলাসৃষ্টির উন্নয়ন উত্তম নিদর্শনও লোপ পেত। এইসব যুদ্ধবিগ্রহের ফলেই ইওরোপের তুলনায় এদেশে বেঁচে আছে অতি ভিন্ন রাজপ্রাসাদ। কোনো কোনো স্থলে পলায়মান সৈন্য পথপ্রান্তের প্রতিটি ইদারাতে বিষ ফেলে যেত। ফলে বৎসরের পর বৎসর ধরে পার্শ্ববর্তী জনপদবাসীর একমাত্র জলের সন্ধান অব্যাবহার্য হয়ে থাকতো।

এই দলাদলি মারামারি থেকে, কি দিল্লী-আগ্রার মত বৃহৎ নগর, কি সুদূর স্ববের (প্রভিন্স) ছোট শহর, আমীর-ওমরাহ, সিপাহসালার, ফৌজদার প্রায় কেউ নিষ্কৃতি পেতেন না। কারণ এঁদের প্রায় প্রত্যেকেই আহ্বান, আদেশ, অমুনয়-ভরা চিঠি পেতেন প্রত্যেক যুযুধান রাজপুত্রের কাছ থেকে—‘আমাকে অর্থবল সৈন্যবল সহ এসে সাহায্য করো।’ তখন প্রত্যেক আমীরের সামনে জীবনমরণ সমস্তা দাঁড়াতে—আখেরে জিতবে কোন্ ধোড়াটা, ব্যাক্ করি কোন্টাকে? অতিশয় বিচক্ষণ কূটনৈতিকরাও রং হস্ ব্যাক্ করে আপন, এবং কোনো কোনো স্থলে সপরিবার, প্রাণ দিয়ে ভুলের খেসারতী দিয়েছেন। অধিকাংশ ক্ষেত্রেই নিরপেক্ষ থাকবার উপায় ছিল না। মোগল রাজপুত্র মাত্রই ইংরিজি প্রবাদটাতে বিশ্বাস করতেন, ‘ওয়ান হু ইজ নট উইন্ মৌ ইজ্ এগেনস্ট্ মি’, যে আমার সঙ্গে নয়, সে আমার বিপক্ষে।

নির্বন্ধাটে প্রতিষ্ঠিত বাদশাদের তো কথাই নেই, অতিশয় টলটলায়মান সিংহাসনে বসে জু'দিনের রাজাও সঙ্গে সঙ্গে পাঠিয়ে দিতেন সেপাই-শাক্তী, ফাঁসডের দল—তাঁর নিকটতম আত্মীয়দের উভয় চক্ষু অন্ধ করে দেবার জন্ত—যেন তারা চিরতরে তাঁর প্রতিদ্বন্দ্বী হয়ে সিংহাসন লাভের জন্ত যুদ্ধ ঘোষণা না করতে পারে। শাস্তিকামী, ধর্মচরণে আজীবন নিযুক্ত, সিংহাসন আরোহণে সম্পূর্ণ অনিচ্ছুক জনেরও নিষ্কৃতি ছিল না। নিষ্কৃতি ছিল একমাত্র পন্থায়—আত্মীয়-স্বজন দশ-দেশ ত্যাগ করে মক্কায় গিয়ে আশ্রয় নেওয়া। তবে সেটাও

করতে হ'ত আগেভাগে পরিপূর্ণ শান্তির সময়। একবার ধুকুমার লেগে যাওয়া মাত্রই তামাম দেশে এসে যেত এমনই অশান্তি, লুটতরাজ যে তখন আর বন্ধরে গিয়ে জাহাজ ধরার উপায় থাকতো না। এমন কি পরিপূর্ণ শান্তির সময়ও আগেভাগে শেষ রক্ষা বাবদে কসম খাওয়া যেত না—মজাতে নির্বাসিত বাইরাম খান নাকি পথমধ্যে গুজরাতে আকবরের গুপ্তচর দ্বারা নিহত হন।

ইংরেজ ফার্সীতে লিখিত ইতিহাসরাজির সব কটাকেই গুণায় আণ্ডা মিলিয়ে নিন্দাবাদ করে বলেছে, এ-সবেতে আছে শুধু লড়াই আর লড়াই। বিবেচনা করি, গুণুলোতে যদি গুণায় গুণায় শান্তিকামী পীর-দরবেশ ঘুরে বেড়াতেন, কিংবা তার চেয়েও ভালো হ'ত যদি রাজা-প্রজায় সবাই মিলে চাঁদনি চৌকে হাঙ্গেলুইয়া হর্ষরব তুলে ইংরেজের আগমনী গান ধরতেন, তাহলে বোধ হয় খেত সমালোচকরা সন্তুষ্ট হতেন। দুর্ভাগ্যক্রমে মোগলরা ঘে-ঐতিহ্য সঙ্গে এনেছিল সেটা তার বিকৃততমরূপে দেখা দিল তাদের পতনের সময়। ফলে স্বার্থে স্বার্থে যে সংঘাত উপস্থিত হল তার সমাধান যুদ্ধ ভিন্ন অস্ত্র কোনো পন্থায় সম্ভব ছিল না। ঐতিহাসিকরা সেসব যুদ্ধের বর্ণনা না দিয়ে দি নেশন অব শপ্লিফটারসের জন্তু সেই সংকর্মের টেকনিক বয়ান করলে সত্যের অপলাপ হ'ত।

কিন্তু এসব ইতিহাস শুধু যুদ্ধে যুদ্ধে ভর্তি ছিল একথা বললে আরেকটা খুব বড় সত্য গোপন করা হয়। এদের প্রচুর সাহিত্যিক মূল্যও যে ছিল সে বিষয়ে কোনো সন্দেহ নেই।

তার পূর্বেই একটি সত্য স্বীকার করে নিই। বিদেশাগত কিছু লোক ভিন্ন এদেশের কারোরই মাতৃভাষা ফার্সী ছিল না। এবং মাতৃভাষা ভিন্ন অস্ত্র ভাষাতে শত ভেঙ্কিবাঙ্গি দেখাতে পারলেও সেখানে সত্যকার সাহিত্য সৃষ্টি করা যায় না। কিন্তু সঙ্গে সঙ্গে এ তত্ত্বও অনস্বীকার্য যে, সাহিত্য যে উপাদানে নিমিত হয় তার অভাব ভারতবর্ষে রচিত ফার্সী ইতিহাসে কখনো ঘটে নি। তুলনা দিয়ে বলা যায়, রামায়ণের কাহিনী যত কাঁচা ভাষাতেই রচা হোক না কেন তার চিত্তাকর্ষণী শক্তি কিছু না কিছু থাকবেই।

তাই ফার্সী ভাষায় রচনাকারী ঐতিহাসিকরা হামেশাই কোনো বাদশার রাজত্বকালের তাবৎ লড়াই, বাদশার প্রসন্ন দৃষ্টি লাভের জন্তু আমীরদের প্রতিশ্রুতি, কূটনৈতিক চতুরঙ্গ কৌড়ার মারপ্যাচ ইত্যাদি বর্ণনা করার পর পঞ্চমুখ হতেন বাদশার বিবাহের সালসার বর্ণনা দিতে; সেই উপলক্ষে সম্মিলিত কবিকুলের বর্ণনা দিতে, এবং সর্বশেষে বাদশার ব্যক্তিগত গুণাগুণের উল্লেখ করতেন। সব সময় যে তাঁরা নিরপেক্ষতা রক্ষা করতে সমর্থ হতেন তা নয়, কিন্তু

বাদশা সজ্জন হলে তাঁর গুণ বর্ণনায় পঞ্চমুখ হতে কোনো অহুবিধাই উপস্থিত হ'ত না।

যেমন গুজরাতের এক বাদশা ছিলেন অত্যন্ত আচারনিষ্ঠ, পুণ্যশীল। তাঁর জীবিতাবস্থায়ই গুণমুগ্ধ প্রজাসাধারণ তাঁর নাম দেন 'অল্-হালীম'—'পুণ্যশীল'। মিরাত-ই-সিকন্দরী গুজরাতের প্রখ্যাত ইতিহাস। তার লেখক অল্-হালীমের সময়কালীন যুদ্ধবিগ্রহের বর্ণনা দেবার পর পরমানন্দে হজুর বাদশার সর্বপ্রকারের পুণ্যশীল খামখেয়ালির বর্ণন-পর্বে প্রবেশ করেছেন। কে বলবে তখন আমাদের এই ঐতিহাসিক শুধু যুদ্ধবিগ্রহের পুঙ্খানুপুঙ্খ বর্ণনা দিয়েই উল্লাস বোধ করেন। বস্তুত এই অহুচ্ছেদে প্রবেশ করার পর মনে হয় তাঁর যেন আর কোনো তাড়া নেই, মাথুরে পৌঁছনে র পর কৌতুনিয়ার খে অবস্থা হয়। এ ইতিহাস তাঁকে যে একদিন শেষ করে 'তামাম্ শুদ্' লিখতে হবে সে ভাবনা তাঁর চৈতন্য থেকে যেন সম্পূর্ণ লোপ পেয়েছে।

হজুর অল্-হালীমকে এক বিদেশাগত পাচক এক নূতন ধরনের পোলাও খাওয়ালে পর হজুর পরম পরিতৃপ্তি প্রকাশ করে বললেন, 'উজীর। আমার প্রজারা কি কখনো-সখনো এরকমের পোলাও খায়?' উজীর স্মিতহাস্য করে বললেন, 'হজুর, তা কখনো হয়।' হজুর বললেন, 'একা একা খেয়ে আমি কেমন যেন সুখ পাচ্ছি নে।' হকুম দিলেন, মহল্লা মহল্লায় বিরাট বিরাট পাত্রে করে যেন সব্বই এরকমের পোলাও তৈরী করে তাবৎ আহমদাবাদবাসীদের খাওয়ানো হয়। আমাদের ঐতিহাসিকটি যেন ঈষৎ আমোদ উপভোগ করে ইঙ্গিত করেছেন, প্রধানমন্ত্রী হজুরের এসব 'খামখেয়ালীর অপব্যয়' দেখে ভারী বিরক্ত হতেন।

তা সে যা-ই হোক তাবৎ আহমদাবাদবাসী সেদিন কাজকর্ম ছেড়ে দিয়ে দিনভর ফিস্টি খেলে। যে সাবরমতীর পারে বসে বহু যুগ পরে রবীন্দ্রনাথ 'ক্ষুধিত পাষণ' রচেন ছিলেন সেই সাবরমতীর পারে সেদিন আর কেউ ক্ষুধিত রইল না।

ঠিক ঐ রকমই দিল্লীর শেষ মোগলদের কোন্ এক বাদশার বিয়ের শোভাযাত্রায় উঁচু হাতীর পিঠ থেকে রূপো দিয়ে বানানো ফুল রাস্তার দু' পাশের দর্শকদের উপর মুঠো মুঠো ছড়ানো হয়। ঐতিহাসিক খাফী খান—কিংবা খুশ্-হাল্-চন্দ বা অন্য কেউ হতে পারেন, আমার মনে নেই—যখন তাঁর ইতিহাস লিখছেন তখন দিল্লীর বড় দুঃখের দিন। সেই জাঁকজমক শান-শওকতের স্বরণে যেন উক দীর্ঘরাস ফেলে বলছেন, 'এ অধমও সেই দর্শকদের মধ্যে ছিল। সেও তার কুর্ভার দামন্ (অগ্রভাগ, অঞ্চল) দু' হাত দিয়ে প্রসারিত করে

উদ্গ্রীব আকাজ্জক প্রতীক্ষা করলো। এ অধমের কী শোভাগ্যা, কী ধূশ-কিম্ব! আম্মো তিনটে ছোট ছোট ফুল পেয়ে গেলুম। জয় হোক দিল্লীশ্বরের! জগদীশ্বর তাঁকে দীর্ঘজীবী করুন!’

এ যুগের ইতিহাস বিবাদময়, কিন্তু ঘটনাবলি বলে একাধিক ফার্সীজ হিন্দুও তার স্মদীর্ঘ বিবরণ লিখে গিয়েছেন। তার একটি ঘটনার বর্ণনা দেবার জন্য বক্ষ্যমাণ লেখেন। কিন্তু তৎপূর্বে এক লহমার তরে আহমদাবাদ ফিরে যাই।

মিরাৎ-ই-সিকন্দরী ইতিহাস বলে, অল্-হালীম্ আহমদাবাদের দুর্গান্ত শীতে লক্ষ্য করলেন, গৃহহীনদের দুরবস্থা। আদেশ দিলেন যে, প্রতি চৌরাস্তায় যেন সজ্জার পর কাঠ পুড়িয়ে আগুন জ্বালানো হয়। বহু গৃহহীন এমন কি গৃহস্থও সেই আগুন ঘিরে বসে আগুন পোহাতে পোহাতে গাল-গল্প, গান-বাজনা করে রাত কাটাতো। এতেও সন্তুষ্ট না হয়ে অল্-হালীম্ বৃহৎ আবাস নির্মাণ করে দিলেন—ভিথিরি-গরীবের বসবাসের জন্য। ঐতিহাসিকরা বলতে পারবেন, এ ধরনের ‘পুয়ের হোম’ পৃথিবীর এই সর্বপ্রথম কি না।

শীতে যাতে তারা কষ্ট না পায় তার জন্য লেপের ব্যবস্থাও হল। মিরাৎ-ই-সিকন্দরীর লেখক বলছেন, ‘কিন্তু এসব লক্ষ্যীছাড়া ভ্যাগাবণ্ডদের কেউ কেউ আপন আপন লেপ বিক্রী করে দিয়ে মদ খেত। খবরটা কি করে জানি হজুরের কানে গিয়ে পৌঁছল।’ আমার মনে সন্দেহ হয়, হয়তো বা আমাদের সেই সিনিক প্রধানমন্ত্রী উজ্জীর-ই-আজম্ সাহেবই মজা চেখে চেখে বাক্য নয়নে তাকিয়ে হজুরের অপব্যয়ের চরম পরিণামটি হজুরেরই খেদমতে পেশ করেন!

তিনি নিজে করে থাকলে সেটা বুমেরাঙের মত তাঁরই কাছে ফিরে আসে। হজুর বললেন, ‘এটা কি করে ঠেকানো যায়, বলো তো উজ্জীর।’ উজ্জীর অগ্ৰ-দিকে দৃষ্টি ফিরিয়ে নিয়ে ভাবখানা করলেন, স্বাধীন সম্রাট আসমুদ রাজস্থানব্যাগী গুর্জরভূমির মহামাত্র সম্রাটের অতিমাত্র প্রধানমন্ত্রী ‘নেপক্যাতা’ নিয়ে মাথা ঘামাতে পারেন না! হজুর কিন্তু উজ্জীরের অতশত স্মৃষ্কভূতির পশ্চাক্কাবন করেন না। বললেন, ‘রাতটা ভেবে দেখো।’ উজ্জীর-ই-আলা যে ভাবে কুর্নিশ করে বিদায় নিলেন তাতে মনে হল না যে, তিনি ত্রিধামা-ধামিনী অনিত্রায় যাপন করবেন।

পরদিন ফজরের নমাজের পরই, অর্থাৎ ব্রাহ্ম-মুহুর্তেই প্রধানমন্ত্রীর তলব পড়লো। হজুর সহাস্ত আস্তে তাঁকে বললেন, ‘বুঝলে হে উজ্জীর সাহেব, আমিই কাল রাতে চিন্তা করে দাওয়াইটা বের করেছি। প্রত্যেককে আলাদা লেপ না দিয়ে চার-চারজনকে এক-একটা করে, বড় লেপ দাও। চারজনই তো আর

মদের গোলাম হবে না যে এক জোট হয়ে লেপ বিক্রী করে দেবে। যারা খায় না তারা ঠেকাবে।’

এ ধরনের চুটকিতে মিরাত-ই-সিকন্দরী ভর্তি। তাছাড়া দীর্ঘত্তর কাহিনীও এ কেতাবে আছে। এমন কি বিশাল বিরাট বীরপুরুষ মুহম্মদ বেগড়ার (এর গোপ নাকি এতই দীর্ঘ ছিল যে তিনি তার দুই প্রান্ত মাথা ঘুরিয়ে পিছনে এনে ঘাড়ের উপরে গিঠ বেঁধে রাখতেন!) যোন জীবনও তিনি নির্বিকারচিত্তে সালঙ্কার বর্ণনা করেছেন। কিন্তু প্রাদেশিক ইতিহাস বলে এ কেতাব তার গ্রাঘ্য মূল্য পায় নি।

শেষ মোগলদের ইতিহাসে একটি অতিশয় হতভাগ্যের জীবন ও একটি ঈষৎ হাশুরস-মিশ্রিত ঘটনা—এই দুটি আমার মনে আসে। পুজোর বাজারে অল্প পত্রিকায় একটা করুণ রস লিখে আমার রেশন খতম। দ্বিতীয়টাই শুনুন।

পূর্বেই নিবেদন করেছি মোগলসম্রাট মাজেরই মৃত্যু হলে রাজপুত্রদের ভিতর লাগত যুদ্ধ। আওরঙ্গজেবের মৃত্যুর পরও তার ব্যতিক্রম হল না। লড়াই জিতে বাদশাহ হলেন শাহ আলম বাহাদুর শাহ। পাঁচ বৎসর রাজত্বের পর তাঁর মৃত্যু হলে পুত্র জাহান্দার শাহ তখতে বসলেন। মোগল বংশের উপর আর কেউ এঁর মত কলঙ্ক-কালিমা লেপন করেন নি। একটি মাত্র উদাহরণ দিচ্ছি। একটি বাইজী—লালকুনওরুকে তিনি দিয়েছিলেন বেগমের সম্মান ও তাঁকে নিয়ে বেরোতেন দিল্লী প্রকাশ্য রাস্তায় মগপান করতে।^১ তখনকার দিনে আজকের পানগুলার দোকানের মত মদের দোকান থাকতো—অর্থাৎ দাঁড়িয়ে দাঁড়িয়ে চৌ করে এক পাত্র মগপান করে ফের অল্প দোকানে আরেক পাত্র—করে করে বাড়ি পৌছনো যেত। কিংবা রাস্তায় গড়াগড়ি দেওয়া যেত। হজুর বাদশাহ সালামৎ সেই বাইজী লালকুনওরের পাশে দাঁড়িয়ে এইসব অতি সাধারণ শ্রেণীর দোকান

১ এ যুগে দ্বিতীয় বিশ্বযুদ্ধ আরম্ভ হওয়ার পূর্বে হিটলারের প্রধান সেনাপতি রুমবের্ক যুদ্ধ বয়সে ভালো করে অনুসন্ধান না করে তাঁর টেনোকে বিয়ে করে ফেলেন। অথচ ইনি একদা একাধিক শহরে দেমি-ম’দেন ছিলেন। বিয়ের স্বাক্ষ্রে পৃথিবীর ঐ সর্বপ্রাচীন ব্যবসায়ের মেয়েরা তাদের পাড়ায় পাড়ায় বিয়েটা সেলেব্রেট করে—যেন তারা সমাজে কষ্ট পেয়ে গেল—এবং শুধু তাই না, যে-সব পুলিশ তাদের উপর চোটপাট করতো তাদের ফোন করে তাদের হেলথ ড্রিক করে। পরে হিমলায় দলীল-দস্তাবেজসহ হিটলারের কাছে কেলেকারিটা ফাঁস করলে পর তিনি রুমবের্ককে রিটার্নার করতে আদেশ দেন।

ও তাদের খন্দেরের সঙ্গে ঢলাঢলি করতে করতে পাজের পর পাজ গলার ঢালতেন এবং লালকুনওয়ার তো কথাই নেই। তিনি একদা যে হাফ-গেরস্থ অঞ্চলে (ফরাসীতে ছবছ একেই বলে 'দেমি-মঁদ', এদের জ্বীলোক বাসিন্দা 'দেমি-মঁদেন') তাঁর বাবসা ঢালাতেন, সেখানকার লোকেররা এসে সেখানে জুটতো। বাদশা সালামৎ দরাজ দিলে ঢালাই পাইকিরি হিসাবে মত্ত বিতরণ করতেন। তখনকার দিনে দিল্লীর বাদশারা বয়েলের গাড়ি চড়ে বেড়াতে ভালোবাসতেন। তার ড্রাইভারও সেই সর্বজনীন গণতান্ত্রিক পানোৎসবে অপাংক্লেয় হয়ে রইত না। রাস্তায় ভিড় জমে যেত। আমীর-ওমরাহ হঠাৎ এসে পড়লে পাঙ্কি ঘুরিয়ে নিতেন; পদাতিক ভদ্রজন এই বেলেপানার মাঝখানে পড়ে বিব্রত না হওয়ার জন্য গুস্তা মেরে ভাইনে বায়ের কোনো দোকানে আশ্রয় নিতেন।

মুসলমান শাস্ত্রে মত্তপান নিষিদ্ধ। অবশ্য দেশবাসী জানতো যে রাজা বাদশারা এ আইনটি এড়িয়ে যান, কিন্তু তাঁরাও চক্ষুলজ্জার খাতিরে খোলাখুলিভাবে সচরাচর মত্তপান করতেন না। এ যুগে রাজা ফারুক প্রায় জাহান্দার শাহ'র মত আচরণ করে কাইরোর জনসাধারণের আঁকল গুডুম করে দেন। রোজার মাসে—আবার বলছি উপবাসের মাসে তিনি তাঁর নিত্যপরিবর্তিত দেমি-মঁদেন নিয়ে প্রশস্ত দিবালোকে এক 'বার' থেকে আরেক 'বারে' ঘুরে বেড়াতেন—মাতা এবং প্রাসাদের অস্থায়ী মুরুব্বীদের সর্ব সত্বপদেশ তুড়ি মেয়ে উড়িয়ে দিয়ে। এঁরই পরিত্যক্তা এক দেমি-মঁদেন প্রেয়সী ভবিষ্যদ্বাণী করেছিলেন যে, এই 'মহাপুরুষটি' গুরুভোজন বা অত্যধিক পানের ফলে গতাস্থ হবেন। বহুব্রাহ্ম ভক্ষণ করে রাজ্যচ্যুত অবস্থায় ইনি অধুনা রোম শহর থেকে সাধনোচিত ধামে গেছেন—ঝিঝুকের ভিতরকার বস্ত্র মাত্রাধিক খাওয়ার ফলে।

তা বা-ই হোক, জাহান্দার শাহ একদিন ইত্যাকার রোঁদ মারতে মারতে বেএক্লেয়ার হয়ে যান—না হওয়াটাই ছিল ব্যত্যয়—এবং আধামাতাল গাড়োয়ান ছজুর ও লালকুনওয়ারকে কোনো গতিকে গাড়িতে তুলে পাশাপাশি গুইয়ে দিয়ে লালকেল্লা পানে গাড়ি ঢালায়। বয়েল দুটো সর্বশ্রেষ্ঠ জাতের। পথ চিনে সোজা কেল্লার ভিতরে প্রাসাদের সামনে গিয়ে দাঁড়ালো। লালকুনওয়ার টলতে টলতে প্রাসাদে ঢুকলেন। বয়েল দুটো চললো—আপন মনে বয়েলখানার দিকে, কারণ গাড়োয়ান সম্পূর্ণ বেহুঁশ।

ঘণ্টাখানেক পরে পড়ল খোঁজ খোঁজ রব। বাদশা কোথায়, বাদশা কোথায়? এ যে ভয়ঙ্কর পরিস্থিতি। থবরটা যদি রটে যায় তবে বাদশার ঘে-

কোনো ভাই, চাচা, ভাতিজা নিজে কে রাজা বলে অবশ্যই ঘোষণা করবেন এবং তাহলেই তো চিস্তির। বিরাট লালকেল্লা তন্ন তন্ন করে খোঁজা হল, কিন্তু হজুর যেন মহাশূন্যে অন্তর্ধান করেছেন।

তখন এক হুবুন্ধিমানের মাধ্যমে আলৌকিক অনুপ্রেরণা এল। এক মাইল দূরের বয়েলখানাতে অনুসন্ধান করে দেখা গেল, হজুর অঘোর নিদ্রায়, গাড়োয়ানও তদ্বৎ।

বলা বাহুল্য, পথচারী মণ্ডপায়ী মহলে হজুর অতিশয় জনপ্রিয় হলেও আমীর-ওমরাহ—মায় প্রধানমন্ত্রী, যদিও তিনি জানতেন; জাহান্দারশাহ তথৎ-হীন হলে তাঁরও নবীন রাজার হাতে জীবন সংশয়—সকলেই তাঁর উপর বিরূপ হয়ে উঠেছিলেন।

ওদিকে দুই প্রধান আমীর সিদ্ধ দেশের সৈয়দ আব্দুল্লা ও সৈয়দ হুসেন আলী ব্যাক করছেন অল্প ঘোড়া—জাহান্দারশাহের ভ্রাতা আজীম্ উশ-শান-এর পুত্র হৃদর্শন, সুপুরুষ—বলা হয় তৈমুরের বংশে এরকম বলবান সুপুরুষ আর জন্মানি নি—ফররুখ সিয়ারকে। তাঁরা দিল্লীর দিকে রওয়ানা হয়েছেন সিংহাসন অধিকার করতে। যুদ্ধে জাহান্দার পরাজিত হয়ে বন্দী হলেন। সিংহাসন হারিয়ে তিনি যত না শোক প্রকাশ করেছিলেন তার চেয়ে বেশী মর্মবেদনা প্রকাশ করলেন, বার বার বেদনাতুর, মিনতিভরা আত্মকণ্ঠে চিৎকার করে, ‘আমার লালকুনওয়ারকে আমার কাছে আসতে দাও, দয়া করে লালকুনওয়ারকে আসতে দাও।’ সৈয়দ ভ্রাতৃত্ব তখনই তাঁদের স্বরূপ দেখাতে আরম্ভ করেছেন—অর্থাৎ তাঁরা গ্যাডস্টোনের মত কিংমেকারস্, তাঁরা রাজা ম্যাকফেকচার করেন—লালকুনওয়ার অল্পমতি পেলেন জাহান্দার-এর বন্দীজীবনের সাথী হওয়ার।

অধম শুধু পটভূমিটি নির্মাণ করছে; নইলে জাহান্দার শাহ বা ফররুখ সিয়ার কেউই আমার লক্ষ্য প্রাণী নন। তবু ফররুখ সিয়ার সম্বন্ধে ষৎসামান্ত বলতে হয়। ইনি বুদ্ধি ধরতেন কম, এবং যে কূটনীতিতে ছিলেন সম্পূর্ণ অজ্ঞ সেইটে প্রয়োগ করতে চাইতেন দুই ঘুরফুর পকসিদ্ধ, অস্বাভাবিক উচ্চাকাঙ্ক্ষী সৈয়দ ভ্রাতৃত্বের বিরুদ্ধে। তাঁদের একজন প্রধানমন্ত্রীর ও অল্পজন প্রধান দেনাপতির পদ গ্রহণ করে বাদশাহ সলামৎকে প্রায় উপেক্ষা করে রাজত্ব চালনা করতে লাগলেন। নানাপ্রকার মেহেরবানী বণ্টন করে দুই ভাই শক্তিশালী আমীর-ওমরাহ গোষ্ঠী নির্মাণ করলেন এবং প্রত্যক্ষত সন্দেহ হইল না যে সৈয়দ ভ্রাতৃত্ব স্বাধিকারপ্রমত্ত হয়ে বাই বরুন না কেন, শাহী কোঁজ তাঁদের বিরুদ্ধে

বিদ্রোহ করবে না। বেচারী বাদশাহ ক্রমেই ক্ষমতা হারাতে লাগলেন এবং শেষটায় চেষ্টা দিলেন, যেসব ভাগ্যাশ্বেষী অ্যাডভেনচারাররা ইরান তুরান থেকে দিল্লী আসত তাদের নিয়ে একটা দল সৃষ্টি করতে।

একদা এঁদের মধ্যে যারা সত্যাকার কৃতবিদ্য কিংবা রণবিশারদ তাঁরা দিল্লী দরবারে ও জনসাধারণের ভিত্তর সম্মান পেতেন। কিন্তু পাঁচশত বৎসর মোগল রাজত্ব চলার পর দিল্লীর খাসবাসিন্দা মুসলমান ও হিন্দুগণ একটা জোরদার ‘স্বদেশী’ পার্টি তৈরী করে ফেলেছিলেন। সৈয়দ ভাইরা ছিলেন এ দলের নেতা। (ভূতগ্যক্রমে এ যুগের ঐতিহাসিকরা এই ‘স্বদেশী’ দলের মাহাত্ম্য পরিপূর্ণরূপে হৃদয়ঙ্গম করেন নি; আর ইংরেজ ঐতিহাসিক অবশ্যই চাইতো না যে এরই অহুসরণে নিত্য নবাগত ইংরেজ ভাগ্যাশ্বেষীদের বিরুদ্ধে ভারতে একটা ‘স্বদেশী’ পার্টি গড়ে উঠুক)।

নিরুপায় হয়ে ফররুখ সিয়ার তাঁর স্বস্তর ঘোষণার রাজা অজিত সিংকে দিল্লীতে আসবার জন্ত সর্নিবন্ধ অহুরোধ জানিয়ে দূত পাঠালেন। কারণ তখন তিনি সত্যই বুঝে গিয়েছিলেন যে, সৈয়দ ভ্রাতৃদ্বয় তাঁকে আর বেশী দিন বরদাস্ত করবেন না। তাঁকে সিংহাসনচ্যুত করে অজ্ঞ ক্রীড়নক তথৎ-ই-তাউসে বসাবেন।

অজিত সিং দিল্লী পৌঁছনো মাত্রই সৈয়দরা তাকে সংবর্ধনা করতে অগ্রসর হলেন—বাদশা সালামৎ তখন কার্ঘত লালকেল্লায় বন্দী। তাঁরা ঐ ‘স্বদেশী’ বিদেশীর জিগিরটি উচ্চকণ্ঠে গাইলেন। অজিত সিংও বোধহয় বুঝতে পেরেছিলেন, সৈয়দদের সঙ্গে মোকাবেলা করার মত শক্তি তাঁর নেই। ফররুখ সিয়ারকে সিংহাসনচ্যুত করা বাবদে তিনি সম্পূর্ণ সম্মতি স্পষ্ট ভাষায় দিয়েছিলেন কি না বলা কঠিন।

সৈয়দদ্বয় ফররুখ সিয়ারকে ধরে আনবার জন্ত অন্তরে সৈন্ত পাঠালেন। হারেমের রমণীরা উচ্চৈঃস্বরে কন্দন করে উঠলেন। তুকী রমণীদের সাহস যথেষ্ট, নুরজাহান জাহানারা অতি কৃতিত্বের সঙ্গে তাবৎ ভারত শাসন করেছেন, কিন্তু এঁদের ভিত্তর কেউ সে রকম ছিলেন না, কিংবা হয়তো দস্তী ফররুখ সিয়ার এঁদের মস্তনায় কর্ণপাত করেন নি। অবশ্য তাঁকে সবলে টেনে আনতে দূতদের যথেষ্ট বেগ পেতে হয়েছিল। কারণ তাঁর শরীরে ছিল অসাধারণ বল।

, সৈয়দদ্বয়ের সামনে তাঁকে আনা হলে তাঁদের একজন আপন কলম-দান খুলে, চোখে সুরমা (কাজল) লাগাবার শলাকা ঘাতকের হাতে দিলেন। ফররুখ সিয়ারকে সবলে চিৎ করে ফেলে অন্ধ করা হল। তবে কোনো কোনো ঐতিহাসিক বলেন, ঐ নিষ্ঠুর কর্ম যে করেছিল সে তাঁকে সম্পূর্ণ অন্ধ করে নি—সে ভেবেছিল,

বলা তো যায় না, হয়তো একদিন তিনি আবার রাজা না হলেও যথেষ্ট শক্তিশালী হবেন, তখন সে যত্নদণ্ড তো এড়াবেই, হয়তো বা বখশিশও পেতে পারে। ফররুখ সিয়ারকে নহবৎখানায় বন্দী করে রাখা হল। লালকেল্লার আজকের দিনের প্রধান প্রবেশপথ ও দেওয়ান-ই-আম-এর মাঝখানে এটা পড়ে।

ওদিকে কিন্তু দিল্লীর অগ্নি এক মহল্লায় এক ভিন্ন কমেডি শুরু হয়েছে।

সৈয়দদ্বয় অনেক চিন্তা ততোধিক তর্কবিতর্ক আলোচনা করে স্থির করেছেন যে, ফররুখ সিয়ারের খুড়ো রফী-উশ্-শানের (ইনি আজীম-উশ্-শানের পরের ভ্রাতা—আওরঙ্গজেবের দৌহিত্র) জ্যেষ্ঠ পুত্র তরুণ মুহম্মদ ইব্রাহীমকে সিংহাসনে বসানো হবে। সেই মর্মে দূত পাঠানো হয়েছে রফী-উশ্-শানের হাভেলিতে। সেখানে ইব্রাহীম তাঁর ভাই ও অগ্ন্যাগ্নি আত্মীয়স্বজন সহ বাস করেন।

দূতের দল উপস্থিত হওয়া মাত্রই হাভেলিতে উচ্চৈঃস্বরে বামাকঠের ক্রন্দন রোদন চিংকার অভিসম্পাত আরম্ভ হল।

কারণটা সরল। কয়েকদিন ধরেই দিল্লী শহর শত রকমের গুজবে ম-ম করছে। ফররুখ সিয়ার সিংহাসনচ্যুত হলে হতেও পারেন—যদিও অনেকেই প্রাণপণ আশা করছিলেন, অজিত সিং যাই করুন, আপন জামাতাকে সিংহাসন-চ্যুতি থেকে রক্ষা করবেন নিশ্চয়ই, নইলে তাঁর নিধন অবধারিত ও দিল্লীবাসীদের কাছে যে ব্যক্তি পুত্রকে হত্যা করে তার চেয়েও ঘৃণ্য—যে তার মেয়েকে বিধবা হতে দেয়। • (কিছুদিন পর ফররুখ সিয়ার নিহত হওয়ার পর অজিত সিং রাস্তায় বেরোলেই তাঁর সশস্ত্র পাইক-বরকন্দাজকে সম্পূর্ণ উপেক্ষা করে রাস্তার ছোড়ার তাঁর পাক্কীর দুই পাশে ছুটতে ছুটতে তারস্বরে ঐক্যতান ধরতো, ‘দামাদকুশ, দামাদকুশ’—জামাতৃহস্তা, জামাতৃহস্তা! পুত্রকে হত্যা করে কেউ এভাবে লালিত হয়েছেন বলে আমার স্মরণে আসছে না।)

ফররুখ সিয়ার সিংহাসন হারালে সৈয়দ ভ্রাতৃদ্বয়ের যে কার প্রতি ‘নেক্-নজর’—অবশ্য যে-ই রাজা হোন তাঁকে হতে হবে ভ্রাতৃদ্বয়ের হস্তে পুস্তলিকা মাত্র—পড়বে তার কিছু স্থিরতা ছিল না। দূতরা তাই যখন হাভেলির সামনে এসে স্নসংবাদ দিলে, তারা এসেছে সমারোহ সহকারে নবীন রাজা মুহম্মদ ইব্রাহীমকে তাঁর অভিষেকের জ্ঞা নিয়ে যেতে, তখন সবাই নিঃসন্দেহে ভাবলে এটা একটা আশ্চর্য্য। আসলে আর কেউ বাদশা হয়ে দূত পাঠিয়েছেন ইব্রাহীমকে ছলে বলে পকড় করে নিয়ে গিয়ে হয় হত্যা করতে, নিদেন অঙ্ক করে দিতে—যাতে করে পরবর্তী প্রতিদ্বন্দ্বীরা সম্পূর্ণ নিমূল হয়; এ রেওয়াজ তো রাস্তার ভিথিরি পর্যন্ত জানে, জানবে না শুধু রাজবাড়ির হারেমের মহিলারা! তওবা! তওবা!!

বিরিট বাড়ি। বিস্তর কুটুরি, চিলেকোঠা। তদুপরি এসব কারবার তো দিল্লী শহরে হামে হাল লেগেই আছে। তাই দু-চারটে গুপ্তঘর, পালিয়ে যাবার স্বড়কও যে নেই, এ-কথাই বা বলবে কে? হারেম-মহিলারা তড়িঘড়ি ইব্রাহীম ও তার ছোট ভাই রফী উদ্-দৌলাকে কোথায় যে লুকিয়ে ফেললেন তার সন্ধান পেতে—আদৌ যদি পাওয়া যায়—লাগবে সময়। ওদিকে দূতদের পই পই করে বলা হয়েছে, তারা যাবে আর আসবে, ছরবার মত দ্রুতবেগে, এবং পথমধ্যে যেন তিলাধিকাল বিলম্ব না করে। কারণটি অতিশয় স্বপ্রকাশ। দিল্লী শহরের দুষ্-পোষা শিশু পর্যন্ত জানে, একবার যদি খবর রটে যায় এবং সেটা কিছু মাত্র অসম্ভব নয়—যে ফররুখ সিয়ার সিংহাসনচ্যুত হয়ে গিয়েছেন এবং সে সিংহাসন তখনো শূন্য তা হলে আওরঙ্গজেব-বংশের যে কোন রাজপুত্র দুঃসাহসে ভর করে নিজেকে বাদশা বলে ঘোষণা করে দেবে। সৈয়দ-ভায়ারা বিলক্ষণ জানতেন যে, যদিও আমীর-ওমরাহ সোওয়ার-সেপাই তাঁদের পক্ষে, তবু এ তথ্যটি ভুললে বিলকুল চলবে না যে, ফররুখ সিয়ার ছিলেন অত্যন্ত জনপ্রিয় সম্রাট। তারপর আরেকটা কথা। আওরঙ্গজেবের এক বংশধর যদি অগ্র বংশধরকে খেদিয়ে দিয়ে সিংহাসন দখল করেন, তবে জনসাধারণ হয়তো কোনো পক্ষই নেবে না। কিন্তু সৈয়দ ভ্রাতৃত্ব তো কোনো রাজাদেশে, সিংহাসনে হকধারী কোনো রাজপুত্রের হুকুমে বাদশাহ ফররুখ সিয়ারকে সিংহাসনচ্যুত করেন নি! তাঁরা কে? আসলে সিদ্ধ প্রদেশের চুই ভাগ্য্যাঘেয়ী। একজন ফররুখ সিয়ারের প্রধানমন্ত্রী, অগ্রজন প্রধান সেনাপতি। অর্থাৎ তাঁর কর্মচারী এবং তাঁরই হুননেমক খেয়েছেন অন্তত ছ'টি বছর ধরে। তাই মনিবকে সিংহাসনচ্যুত করে এঁরা যে অপকর্মটি করলেন এটা নেমকহারামীর চূড়ান্ত! দিল্লীর জনসাধারণ উজবুক নয়। তারা যদি ক্ষেপে যায় তবে সৈন্ত-সামন্ত নিয়েও দিল্লীকে ঠাণ্ডা করা রীতিমত মুশকিল হবে।

অতএব সৈয়দদের সর্বাপেক্ষা জরুরী প্রয়োজন, তড়িঘড়ি আওরঙ্গজেবের কোন সন্তানকে সিংহাসনে বসিয়ে তাঁর কাছ থেকে ফরমান নিয়ে আইনত এবং ঐতিহ্যগত পন্থায় দিল্লীর রাজভক্ত প্রজাগণকে মোকাবেলা করা।

কিন্তু দূতরা গুপ্তঘরের সন্ধান পাবে কি করে? বাচ্ছাটাকে কেড়ে নিতে চাইলে বেরালটা পর্যন্ত মারমুখো হয়ে ওঠে। এরা আবার তুর্কী রমণী—যুগ যুগ ধরে ইয়া ভাগড়া ভাগড়া মর্দকে কড়ে আঙ্গুলের চতুর্দিকে ঘুরিয়েছে।

অবশ্যই পাঠক প্রশ্ন করতে পারেন, ফররুখ সিয়ারকে হারেমের ভিতর থেকে ধরে আনা গেল, আর এখন এই চ্যাংড়াটাকে কাবু করা যাচ্ছে না?

ব্যাপারটা সরল। ফররুখ সিয়ারের হারেমের তুর্কী রমণীরা যে বাদশার সঙ্গে

সঙ্গে সর্ব সম্মান হারিয়ে বসেছেন। এরা বাধা দিলে সেপাইরা তাদের উপর প্রয়োগ করবে পত্তবল। এরা জানে দুদিন বাড়েই এইসব নিশ্চয়, হতজ্যোতি, লুপ্তসম্মান স্বন্দরীদের পাঠিয়ে দেওয়া হবে 'সোহাগপুরা'তে। আল্লা জানেন, কোন্ কাষ্ঠরসিক এই পরিত্যক্তা রমণীদের দীনদরিদ্র নির্লজ্জভাবে অবহেলিত শেষ আশ্রয়স্থলকে 'সোহাগপুরা' নাম দিয়েছিল। এরা সেখানে পাবেন সেক' গ্রাসাচ্ছাদন। তার বীভৎস বর্ণনা থেকে আমি পাঠককে নিকৃতি দিলুম।...কিন্তু যে ইব্রাহীম এখন রাজা হতে চললেন তাঁর মুকুব্বীদের তো ভিন্ন শিরঃপীড়া!

তাই নূতন রাজাকে আনতে গিয়ে দূতদের প্রাণ যায়-যায়। মরায়ী হয়ে তাঁর মা, মাসী, জ্যোঠি, খুড়ি এক কথায় তাবৎ রমণীরা আরম্ভ করেছেন দূতের গুষ্ঠীকে বেধড়ক ঠ্যাঙাতে। ছেঁড়া জুতো, খোঁচা খোঁচা খ্যাংরা-খররা, হেন বস্ত্র নেই যা দিয়ে তাঁরা ওদের পেটাতে কস্বর করছেন। বেচারীরা খাচ্ছে বেদরদ মার, হু'হাত দিয়ে যতখানি পারে সে মার ঠেঁকাবার চেষ্টা করছে। একখানা কাঠির বাঁটার সপাং করে মুখের উপর মার—সেটা কোন্ জঙ্গীলাটের কোন্ অস্ত্রের চেয়ে কম! বেচারীরা এঁদের গায়ে হাত তোলা দূরে থাক, ঠেলাটি পর্যন্ত দিতে পারে না। কালই তো এঁরা লালকেল্লার প্রাসাদে গিয়ে আবাস নেবেন। তখন বেচারীদের হালটা হবে কি? খুদ বাদশা সালামতের পিসিকে মেরেছিল ধাক্কা, খুড়িকে মেরেছিলে কহুই দিয়ে গুলতা—বেয়াদবী বেতমিজী তবে আর কাকে বলে! বন্দ'করো ব্যাটাদের পিঞ্জরা মে', ঝুলিয়ে রাখো বদমাইশদের লাহোরী দরওয়াজার উপর! সৈয়দ-ভায়ারা কি তখন আর তাদের স্মরণে আনবেন!

এই একতরফা জেনানা আক্রমণ, তথা গৃহনির্মিত সাতিশয় মারাত্মক অস্ত্র-শস্ত্রের দফে দফে বয়ান প্রত্যেক ঐতিহাসিক দিয়েছেন বড়ই প্রেমসে। এই মারপিটের বর্ণনাতে পৌঁছে এ যুগের ঐতিহাসিকরা ভাবেন, তাঁরা যেন বেহেশতে পৌঁছে গেছেন—নড়বার নামটি পর্যন্ত করেন না।

আর আর্ত চিংকার উঠছে সম্মার্জনী-লাঙ্ঘিত হতভাগ্যদের—'দোহাই আল্লাব, কসম আল্লাব, পয়গম্বর সাক্ষী, আমরা কোনো কুমৎলব নিয়ে আসি নি। আমরা এসেছি হুজুরকে তাঁর শাযা তখতের উপর বসাতে।' কিন্তু অরণ্যে রোদন আর জনারণ্যে রোদনে ফারাক থাকলে জনসমাবেশকে 'অরণ্য' নাম দেওয়া হল কেন?

ওদিকে দুই 'কিং-মেকার্স' বা রাজা নির্মাণের রাজমিস্ত্রি মহা প্রতাপাশ্রিত শ্রীবৃত্ত সৈয়দ আব্দুল্লা ও সৈয়দ হুসেন আলী লালকেল্লার দিওয়ান-ই-আম-এক

ভিতর বসে আছেন যেন কাঠ-কয়লার আগুনে আক্ৰিষ্ঠার উপর। দূতের পর দূত পাঠিয়ে যাচ্ছেন রফী-উল্-শানের হাভেলীতে, কিন্তু সে যেন সিংহের গুহাতে মাহুষ পাঠানো। কেউই আর ফিরে আসে না। যে যায়, সে-ই ঝাঁটা-পেটার দ'য়ে লীন হয়ে যায়, কিংবা রাস্তা থেকে দাঁড়িয়ে চিংকার করে 'অগুরুচন্দন-ঠারের ভাষায়' বোঝাতে চেষ্টা করে যে, প্রতিটি মুহূর্ত জীবন-মরণ সমস্তা সঙ্কটময় করে তুলছে। ভিতরে একপাল লোক ছুটেছে গুপ্তঘরের সন্ধানে, তাদের পিছনে ছুটেছে জেনানা-রেজিমেণ্ট পেটিকোট-পল্টন আসমান-ফাটানো চিল্লি-চিংকার করতে করতে। সর্বপ্রকারের সংগ্রামানভিজ্ঞ আপনাদের সেবক, এই দীন লেখক, তাঁদের হাতে যে সব মারপাশ আছে, তাঁদের রণকৌশল, বাহুনির্মাণাদির আর কী বর্ণনা দেবে? বাবুচিখানার খুস্তি সাঁড়ানী থেকে আরম্ভ করে সেই মোগল যুগে কত কি থাকতো তার বর্ণনা দেব নিরীহ বাঙালী, আমি! মাশাল্লা।

চতুর্দিকে, আকাশে-বাতাসে সেই অভূতপূর্ব উত্তেজনা, দ্রুতগতিতে ধাবমান বহুবিধ নরনারী, চিংকার আর্তরব, আল্লার শপথ, রসুলের নামোচ্চারণ, হজরৎ আলীর অলুকাপ্পার জন্তু করুণ ফরিয়াদ, মরহমের দিনের ইমাম হাসন-হুসেনের ঝাণ্ডা নিয়ে কাড়াকাড়ি হেন, এমন সময়—

এমন সময় অতি ধীরে ধীরে একটি বালক—বালকই বটে, কারণ সে অজাতশত্রু অজাতগুপ্ত—ঐ যে হোথা মুদির দোকান দেখা যাচ্ছে, সেখান থেকে ধীরে ধীরে এই হাভেলির সামনে এসে একবার মাত্র সেই হলখুল কাণ্ডের দিকে একটা শাস্ত দৃষ্টি ফেলে বাড়িতে ঢুকলো। তার পরনে হুনময়লা সূতির পাজামা, তার উপর একটা অতি সাধারণ কুর্তা। মাথায় টুপিটি পর্যন্ত নেই, পায়ে চটি আছে কি না ঠিক ঠাহর হল না। সে কুর্তার সামনের দিকটার (পূর্বোল্লিখিত 'দামন' বা অঞ্চল) দুই খুঁট দুই হাত দিয়ে এগিয়ে ধরে তাতে সামলে রেখেছে পায়রাকে খাওয়ার দানা। স্পষ্ট বোঝা গেল, এইমাত্র পাড়ার মুদির দোকান থেকে সে বেসাতিটা কিনে এনেছে। এদিক ওদিক তাকিয়ে তার বুকেতে বিলম্ব হল না যে, হট্টগোলের উৎপাতে পায়রাগুলো উধাও হয়ে গিয়েছে। তখন তার খেয়াল গেল চতুর্দিকের ছোটোছুটি আর চেলাচেল্লির দিকে। সে কিন্তু নির্বিকার। আস্তে আস্তে এদিক ওদিক ঘোরাফেরা করতে লাগলো—বাড়িটা যেন চাঁদনি চৌক।

এবারে বাইরে শোনা গেল এক পদস্থ অস্বারোহীর কটুবাক্য আর তীব্র চিংকার—ইনি অস্ততপক্ষে ফৌজদারই হবেন। 'ওরে সব না-মর্দ, বেগুতুফ, বেকার নাকসার হল। এই এখুনি বেরিয়ে আয়, কাম খতম্ করে। নইলে হজরৎ আলীর ঝাণ্ডার কলম খেয়ে বলছি, তোদের কিয়ামতের শেষ-বিচারের

দিন এই লহমাতোই হাজির হবে। আল্লার গজব, আল্লার লানৎ তোদের উপর, তোদের বাল-বাচ্চার উপর।’

এই ছঁশিয়ারী, এই দিব্যিদীলাশ যেন তিলিস্মাৎ-ভাহুমতীর কাজ করলো।

দূতদের দুজনার দৃষ্টি হঠাৎ গেল সেই দামনে-দানা-ভরা বালকটির দিকে। লাফ দিয়ে পড়লো সেই দুই নরদানব তার উপর। এক ঝটকায় তাকে কাঁধে ফেলে দে-ছুট দে-ছুট দেউড়ির দিকে, দেউড়ি ছাড়িয়ে রাস্তা পেরিয়ে আল্লার মালুম কোন দিকে! কি যে ঘটলো কিছুই বোঝা গেল না। সঙ্গে সঙ্গে উঠলো বামাকুলের আর্তনাদ—‘ইয়াল্লা, এরা যে রফী উদ্-দরজাংকে নিয়ে গেল রে। ধরো, পাকড়ো ওদের। পাকড়ো, পাকড়ো, জানে নু পায়, যেতে না পায় যেন! ইয়া রহ্‌মান, ইয়া রহীম!’

কিন্তু কে ধরে তখন কাকে?

হারেমের মেয়েরা ভাবতেই পারেননি যে রফী-উশ্-শানের সর্বকনিষ্ঠ পুত্র নাবালক বাচ্চা রফী-উদ্-দরজাংকে ধরে এরা চম্পট দেবে। যতক্ষণ এরা জেনানা জঙ্গীলাট হয়ে সার্বভৌম মহম্মদ ইব্রাহীম আর মধ্যম রফী উদ্-দৌলাকে পঞ্চত্ব, কন্সেকম্ অন্ধত্ব থেকে রক্ষা করছিলেন, ততক্ষণে, যার নিরাপত্তা সম্বন্ধে কোনো ভয়-ভীতি ছিল না, সেই সর্বকনিষ্ঠ ভ্রাতা রফী উদ্-দরজাংকে নিয়ে ‘দুশমন’ উধাও হয়ে গিয়েছে।

আজব সেই লড়াই তাজ্জবভাবে ফোরন্ থেমে গেল। দোস্ত দুশমন কোনো পক্ষের কেউ মারা গেল না, হার মানলো না, সন্ধি করলো না, ধরা দিল না—আচানক্ সবকুচ্ছ বিলকুল ঠাণ্ডা!

সৈয়দ ভ্রাতৃত্ব দিওয়ান-ই-আম্ থেকে নহবৎখানা পর্যন্ত পাইচারির বদলে ছুটোছুটি আরম্ভ করেছেন। এঁরা বিস্তর লড়াই লড়েছেন, জীবন এঁদের বহুবীর বিপন্ন হয়েছে, কিন্তু এবারে তাঁরা যে রকম যেমে নেয়ে কাঁই হয়ে গেলেন এরকমটা আর কখনো হন নি। ক্রোধে, জিঘাংসায় তাঁরা শুধু একে অণ্ডকে বলছেন, যে-কটা না-মর্দকে তাঁরা পাঠিয়েছিলেন তাঁদের জ্যাস্ত শরীর থেকে চামড়া তোলবার হুকুম দেবেন, নয় ফোঁটা ফোঁটা গরম তেল তাদের ব্রহ্মতালুতে ঢেলে ঢেলে নিধন করবেন।

এমন সময় সেই দুই পাহলোয়ান এসে উপস্থিত শাহজাদা রফী উদ্-দরজাংকে সঙ্গে নিয়ে।

শাহজাদা হোক আর ককীরজাদাই হোক, সে কিন্তু পুঁটুলি পাকিয়ে ছু হাত দিয়ে-জোরে পাকড়ে আছে পায়রার দানা-ভর্তি তার কৌচড়। এসব বাদশা-

উজীরের ব্যাপার দিল্লী শহরে এখন আছে তো তখন নেই—কিন্তু পায়রার দানা কটি পায়রার দানা, শাহজাদা মিয়া রফীর কাছে এটা ভয়ঙ্কর সত্য।

ইতিমধ্যে সৈয়দ ভায়রা হুকার দিয়ে উঠেছেন, ‘কম্বখৎ, না-দান—এ কাকে ধরে এনেছো তোমরা? বাদশা হবেন বড় ভাই, ধরে আনলে ছোটটাকে। তোমাদের জ্যাস্ত না পুঁতলে—’

সৈয়দদ্বয় তখন নাগরিক, ফৌজদার এমন কি তৈমুরের বংশধর, বাবুর-হুমায়ূনের পুত্র-পৌত্র বাদশাহ-সালামতদের ও জান-মালের মালিক। এ সব কথা দূত দুটি ভালো করেই জানে। কিন্তু আজকের ঝাঁটার মার তাদের করে দিয়েছে বেপরোয়া। চরম বিরক্তি আর তচ্ছিল্যের সঙ্গে বললে, ‘যা পেয়েছেন তাই নিয়ে সন্তুষ্ট হন। আর আমাদের মারুন আর কাটুন, যা খুশী করুন।’

দুই ভাই তাড়াতাড়িতে ব্যাপারটা জানতে পেরে বুঝলেন, এখন আবার নতুন করে পাইক-বরকন্দাজ পাঠিয়ে বড় দুই ভাইয়ের একজনকে—তঁারা ইব্রাহীমের চেয়ে রফী উদ্-দৌলাকেই পছন্দ করেছিলেন বেশী—ধরে আনাতে সময় লেগে যাবে বিস্তর। আজকের ভাষায় ততক্ষণ টাইম-বম্ কেটে যাবে!

একে দিয়েই তা হলে কাজ চালিয়ে নিতে হবে। গতাস্তর কি?

আর ও নিয়ে মাথা ঘামিয়েই বা লাভ কি? ইব্রাহীমই হোক আর রফী উদ্-দৌলাই হোক, যেই হোক, তাকে তো হতে হবে ওঁদের হাতেরই পুতুল। সে পুতুল তার মায়ের গর্ভ-ফ্যাক্টরি থেকে পয়লা চালানো বেরিয়েছে, না তেমনি কিস্তিতে তাতে কীই বা যায় আসে? ফরাসী সম্রাটের চেয়েও সরল কণ্ঠে তখন তাঁরা বলতে পারতেন, ‘লে’ তা সে হু’—‘ভারতবর্ষ? সে তো আমরা হু’ভাই!’ বাদশা? যে কোনো গড্-ড্যাম আগুয়েজ্জিব-বংশের গর্তশ্রাব—!

নবীন রাজার অভিষেকের জন্ত দুই ভ্রাতা তাঁর হৃদিকে চলেছেন রাজার দুই বাহু ধরে। আল্লা জানেন, কার আদেশে তাঁর দুই বন্ধুমুঠি শিথিল করার ফলে এই এখন পায়রার দানা ঝরঝর করে দিওয়ান-ই-আমের পাথরের মেঝেয় ছড়িয়ে পড়ল।

চতুর্দিকে সৈয়দদের মিজ ও পরামর্শদাতা আমীর-ওমরাহ তাঁদের মহামূল্যবান কিংখাবের পাগড়ী, শুভ্র মলমলের আঁকারাখা, তার ভিতর দিয়ে ফুটে বেরুচ্ছে নীচের সাক্ষা জবির বোনা সদরীয়ার সোনালী আভা, কোমরে কান্দীরের সর্বশ্রেষ্ঠ শাল দিয়ে তৈরী কোমরবন্ধ, তার বাঁ দিকে গৌজা জাঁতির মত জাম্বুর অঙ্গ, ডাইনে ঝুলছে দিমিশ্কেব তলোয়ার—থাপের উপর মুষ্টিতে বিচিত্র মণিমানিক্যের জড়োয়া কাজ, পরনে সাটিনের পাঞ্জামা, পায়ে জবির কাজ করা শুভ-তোলা

সিলিমশাহী। উফৌষে মুক্তোর সিরপেচ, বৃকে মোতির হার, হাতে হীরের আংটি।

এদের ভিতর দিয়ে চলেছেন বাদশাহজাদা। পরনে হুনময়লা পাজামা, গায় মামুলী কুর্তা। বাস্। পাঁচ লহমা পরে যিনি হবেন দিল্লীখরো বা জগদীখরো বা! এ যে জগদীখরের কোঁতুকবোধের চূড়ান্ত নিদর্শন।

সৈয়দদের একজন শাহজাদার মাথায় বসিয়ে দিলেন তাঁর আপন পাগড়ী—মস্তকাভরণহীন অভিষেক কল্লনাভীত। সেই বিরাট সাইজের পাগড়ী শাহজাদার কান দুটো গিলে ফেলল। অল্প ভ্রাতা তাঁর মুক্তোর সাতলখা হার পরিয়ে দিলেন তাঁর গলায়। ময়লা কুর্তার উপর সে মালা দেখালো ঘোলা জলের উপর রাজহংস!

এবং রফী উদ্-দরজাৎ এই বেশেই বসলেন—যা-তা সিংহাসনের উপর নয়—আসল ময়ুর সিংহাসনের উপর। এও আরেক রঙ্গ। কারণ সচরাচর মোগল বাদশারা বসতেন আটপৌরে সিংহাসনের উপর। ফরকথ সিয়াবের অভিষেকের বাৎসরিক পূর্ব না অল্প কোনো উপলক্ষে তোবাখানা থেকে আগের দিন ময়ুর-সিংহাসন আনানো হয়েছিল; সেটা তখনো তোবাখানায় ফেরত পাঠানো হয় নি বলে যেন কনট্রাস্টটা চরমে পৌঁছনোর জন্য পাজামা-কুর্তা পরে শ্রীযুত রফী বসলেন তারই উপর!

এর পরের ইতিহাস আরো চমকপ্রদ, আরো অচিস্তনীয়। কিন্তু তার ভিতর খুঁজে খুঁজে হায়রান হয়ে যাবেন, কিন্তু এরকম কোঁতুকজনক বড়-কিছু একটা পাবেন না। আমি একেবারে কিছু পাই নি। শুধু খুন আর লড়াই। নৃশংস আর বীভৎস। আমি তাই বাকিটা সংক্ষেপেই বলি—নিতান্ত খারাপ ছোট গল্প পড়ার পরও শুধোন, 'তারপর কি হল?' তাঁদের জন্য।

সৈয়দ ভ্রাতৃত্ব শব্দর শেষ রাখতে নেই বলে ফাঁসুড়ে পাঠিয়ে ফরকথ সিয়াবকে খুন করালেন। এক বছরের ভিতরই ধরা পড়লো রফী উদ্-দরজাতের মামা। সে বছর যেতে না যেতেই তিনি মারা গেলেন। মারা যাওয়ার পূর্বে তিনি তাঁর বড় ভাই রফী উদ্-দৌলাকে সিংহাসনে বসিয়ে দিয়ে গেলেন। তিনিও ঐ বৎসরই মারা গেলেন। তারপর বাদশা হলেন মুহম্মদ শাহ বাদশাহ। তিনি প্রায় ত্রিশ বৎসর রাজত্ব করেন। ইতিমধ্যে সৈয়দ ভ্রাতাদের দুর্দিন ঘনিয়ে এল। একজন আততায়ীর ছুরিকাঘাতে নিহত হলেন, অল্পজন বন্দী অবস্থায় বিষপ্রয়োগবশতঃ।

বস্তুত এ যুগের ইতিহাস পড়লে বার বার স্মরণে আসে :

রাজত্ব-বধূরে যে-ই করে আলিঙ্গন

তীক্ষ্ণধার অসি পরে সে দেয় চুষন।

এই গত শারদীয়া বেতার জগতে ‘কোষ্ঠীবিচার’ নামক একটি কথিকা এ-অর্থম নিবেদন করে। বিবরণটি ছিল সত্য ঘটনা অবলম্বনে বর্ণিত। তৎসম্বন্ধেও আমার এক দোস্ত সেটি পড়ে কিঞ্চিৎ অপ্রসন্ন হন। আমি সবিনয় বললুম, ‘ব্রাদার, এটা বরহক্ জলজ্যাস্ত ঘটেছিল; আমাকে দুঃখো কেন?’ তিনি বললেন, ‘তুমি সেটি রসস্বরূপে প্রকাশ করতে চেয়েছ; সেক্ষেত্রে সত্য-মিথ্যের কোনো অভ্যুহাত নেই।’ একদম খাঁটি কথা। তাই এবারে কিন্তু যেটি নিবেদন করবো সেটি পড়ে তিনি প্রসন্ন হবেন, এমত আশা করি, আর আপনারা পাঁচজন তো আছেনই। এই সুবাদে আরেকটি সামান্য বক্তব্য আমার আছে। হিন্দু-মুসলমান বাঙালী-অবাঙালী কাউকেই আমি বেদনা দিতে চাই নে। দিলে সেটা অজ্ঞানিত এবং তার জগ্রে এইবেলাই বে-কৈফিয়ৎ মাক্ চেয়ে নিচ্ছি। কিন্তু আমার বক্তব্য দৃষ্টবুদ্ধিজনিত ভ্রমাত্মক সপ্রমাণ না হওয়া পর্যন্ত সেটি সংহরণ করতে আমি অক্ষম—এটা গুরুর আদেশ।

এদানির কিছু লোক আবার আমার কাছ থেকে প্রাচীন দিনের শাস্তিনিকেতন সম্বন্ধে ভালোমন্দ শুনতে চান। আমি তাঁদের লুকায়িত বক্তব্যটিও বিলক্ষণ মালুম করতে পেরেছি; সেটি এই, ‘যা বুড়োচ্ছ, দুদিন বাদেই ভীমরতি ধরবে এবং তখন হয়ে দাঁড়াবে একটি চৌকশ “লিটারারি বোর”; যত্ববধি দাঁত-মুখ খিঁচিয়ে সওয়া যাচ্ছে ততক্ষণ তোমার আপন কথা ধানাই-পানাই না করে আশ্রমের কথা কও, গুরুদের কথা কও ইত্যাদি।’

তাই সই। দেশকাল ঠিক ঠিক রাখবো। পাত্র ভিন্ন নামে ভিন্ন বেশে আত্মপ্রকাশ করবেন।

১৯২০।২১ সনে রবীন্দ্রনাথ শাস্তিনিকেতনে কলেজ কোর্স খোলেন। ঐ সময় গান্ধীজী সরকারী ইন্স্কুল কলেজের পড়ুয়াদের গোলামী-তালিম বর্জন করতে আহ্বান জানান। ফলে ভারতের সর্বপ্রদেশ থেকে যে সব মেধাবী ছিল, গান্ধীজীর বাণী গ্রহণ করলো তারা, জমায়েৎ হল শাস্তিনিকেতনে। আর এলেন কয়েকটি থাজা মাল, যারা বছরের পর বছর পোঁনঃপুনিক দশমিকের পাইকিরি হিসেবে বেধড়ক ফেল মেরে যাচ্ছিলেন। অবশ্য এদের একজন বলেছিল, ‘এলন্ এ্যানসার বুক লিখেছিলুম, স্তর, যে এগজামিনার বললে “এনকোর”। তাইতে ফের একই পরীক্ষা দিতে হল।’ এঁদের মধ্যে আমার মত গুণাগ্রকৃতির দু-চারটি কাবেল সন্ধান ছিলেন।

ইতিমধ্যে এলেন বিশ্বনাথ তিরুমল রাও অন্ধপ্রদেশের বিশাখাপত্তনম থেকে।
এঁকে নিয়ে যখন দু'দলে কাড়াকাড়ি পড়ে গেল তখন ধরা পড়লো ইনি বরের
পিসি, কনের মাসি। অর্থাৎ ইনি যেমন অনেকটা ইজ্ঞনাথের মত অন্ধকার স্বাস্থ্য
স্ট্রাডিস্ট ক্লাস-টীচারের মাথায় হঠাৎ কঞ্চল ফেলে তাকে কয়েক বা বসিয়ে বাড়ি
থেকে হাওয়া হয়ে এখানে চলে আসেন, ঠিক তেমনি কলাভবনে প্রবেশ করার
পর দেখা গেল, তিনি একই হাতে পাঁচটা তুলি নাচাতে পারেন—যাহুকরণ
যেমন পাঁচটা বল নাচায়। স্কেচে ওস্তাদ, ফিনিশে তালেবর।

তত্পরি আরেকটি অতিশয় আশ্রমপ্রিয় সদৃশ তীর ছিল, যার প্রসাদাৎ
তিনি সর্বত্রই কলকে পেতেন। উচ্চতায় যতপি পাঁচ ফুট দুই, কিন্তু পেশীগুলো
যেন মানওয়ারি জাহাজের দড়া দিয়ে তৈরী, এবং ফুটবলে চৌকশ। বীরভূমের
কাঁকরময় গ্রাউণ্ডে ভজন খানেক আছাড় খেয়ে সর্বাস্থে রক্তলাহন আকার পরও
তিনি বুলেটবেগে ছুট লাগাতে কহুর করতেন না এবং হাসিমুখে। বিচক্ষণ জন
সে হাসিতে নষ্টামির গোপন চিহ্ন দেখতে পেত।

আমাদের দোস্তি প্রথম দিন থেকেই। নাম যখন শুধালুম সেটা দ্রুতগতিতে
দায় সারার মত বলে নিয়ে জানালে, ‘ওটা তোলা নাম। আমার ডাকনাম
চিন্নি। তোমার?’

‘নীতু।’

পরবর্তী যুগে চিন্নি, ওরফে মিঃ রাও, স্বর্গত শ্রামাপ্রসাদের সঙ্গে দিল্লীতে কাজ
করে। তার ভুলে ভতি অনর্গল বাঙলা কথার তুবড়িবাঁজি রাশভারি
শ্রামাপ্রসাদের মুখেও কৌতুকহাস্য এনে দিত এবং বিশেষ করে ঐ কারণেই তিনি
চিন্নিকে মাত্রাধিক স্নেহ করতেন। চিন্নি উত্তম ইংরিজি বলতে পারত, কিন্তু তার
বক্তব্য, দিল্লীর মঞ্জপালয়ই হোক আর ভুবনভাঙার কুরকুরে চায়ের দোকানই
হোক, সে তার শান্তিনিকেতনে শেখা বাঙলা ছাড়বে কেন? স্বয়ং গুরুদেবের
সঙ্গে সে বাঙলায় কথা কহিত নির্ভয়ে—চারটিখানি কথা নয়, এবং শ্রামাপ্রসাদ
এই তত্বটি আবিষ্কার করে, চিন্নির ভজন ভজন ভুল-ভতি বাঙলা সম্বন্ধে বলতেন,
‘রাও কিন্তু তার বাঙলা প্রতিদিন ইমপ্রুভ করে যাচ্ছে।’ অর্থাৎ ভুল বাড়ছে!

শ্রামাপ্রসাদ মন্ট্রি রিজাইন দিলে পর চিন্নিও তার জুতো থেকে দিল্লীর ধূলা
ঝেড়ে ফেলে মাত্রাজ চলে যায়। সেখান থেকে ইউনেস্কোর আহ্বানে তাইল্যান্ড,
কলম্বো, জিনীভা, ওয়াশিংটন, বাগদাদে কীর্তিভ্রমণ বিস্তার করে।

সে যে দড়মালে তৈরী সেটা আশ্রমে তার আঠারো বছর বয়সেই ধরা পড়ে।
সেখানে ইঙ্কুলের ছেলেরা ছুবেলা উপাসনা করে; প্রস্তাব হল আমাদেরও করত

হবে। চিল্লি উচ্চকণ্ঠে জানিয়ে দিল সে নাস্তিক। ফৈসালা কদার জন্তু আমাদের মীটিং বললো। প্রিন্সিপাল মেসেজ পাঠালেন, তিনি চান, আমরা যেন উপাসনা করি। চিল্লি বললে, 'ইস্কুলের ছেলেদের বাপ-মা উপাসনার কথা জেনেভেনেই বাচ্চাদের এখানে পাঠিয়েছেন। আমাদের অধিকাংশই এসেছি তাঁদের অমতে (এ কথাটা খুবই খাঁটি; আমাদের গার্জেনদের অধিকাংশই ছিলেন সরকারী চাকুরে; তাঁরা অসহযোগ আন্দোলনে সায় দেন কি প্রকারে? আমার পিতাকে তো ইংরেজ রীতিমত ভয় দেখায়)। আমরা সাবালক; আমি নাস্তিক।' চিল্লি পার্লামেন্টেরেনও বটে—তার দোস্ত মসৌজীকে চ্যালেঞ্জ করে বললে, 'তুমি তো ক্রীশ্চান; তোমার সর্ব প্রার্থনা পাঠাতে হয় প্রভু যীশুর মাধ্যমে। আশ্রমের উপাসনায় যোগ দেবে কি করে?' আমার দিকে তাকিয়ে বললে, 'তুই তো মিয়া ভাই (মুসলমান)! পাঁচবেকং নেমাজ করিস' (করবো বলে বাবার কাছে প্রতিজ্ঞাবদ্ধ হয়ে এসেছিলুম)। সভাপতির দিকে তাকিয়ে বললে, 'গুর ঘাড়ে আরো দুটো চাপানো কি ধর্মসম্মত?' ইত্যাদি, ইত্যাদি। রেভারেণ্ড এ্যানড্রুজ আপ্রাণ চেষ্টা করেছিলেন সভাকে রাজী করাতে। পাত্রীসাহেবের ষাবতীয় স্কিল, তত্পরি তাঁর সরল আন্তরিকতা, তিনি সবকিছু প্রয়োগ করে খুব সুন্দর বক্তৃতা দেন। কিন্তু ভোটে চিল্লিপন্থীরা কয়েকটি ভোটে জিতে গেল। তখন সর্বসম্মতিক্রমে প্রস্তাব পাশ হ'ল, গুরুদেব বা আদেশ দেবেন তাই হবে। এ্যানড্রুজ সাহেবকেই আমরা দূত করে পাঠালুম।

গুরুদেব মাত্র একটি শব্দ উচ্চারণ করেন—'না'।

এই গেল চিল্লির পরিচয়।

ইতিমধ্যে আরেকটি ছেলে এল অঙ্ক থেকে। মাধব রাও। সেও চমৎকার ফুটবল খেলে।

*

*

*

রাজ রাজমহেন্দ্রবরাম নগর—অর্থাৎ রাজমন্ডীর শ্রীযুত জগন্নাথ রাও চিল্লির বন্ধু। তিনি চিল্লিদের বাড়ির ছেলের মত। শাস্তিনিকেতনের প্রাক্তন ব্রাহ্মছাত্র অন্ধদেশের শ্রীযুত চালামায়া গুরুদেবের প্রচুর কবিতা গল্প উপন্যাস এবং বিশেষ করে তাঁর ধর্ম সম্বন্ধীয় রচনা অনবদ্য তেলুগুতে অনুবাদ করেন। জগন্নাথ রাও সেগুলো পড়ে আকণ্ঠ রবীন্দ্রভক্ত হয়ে গিয়েছিলেন। চিল্লির আশ্রমাগমনের ফলে তাঁর আশ্রমদর্শনের সদিচ্ছা প্রবলতর হল। চিল্লিকে আকস্মিক আনন্দদানের উদ্দেশ্যে তাকে কোনো প্রকারের নোটিশ না দিয়ে শুধু চিল্লির পিতামাতাকে জানিয়ে এক শুভপ্রাতে রওনা দিলেন কলকাতা অভিমুখে।

কলকাতায় উঠলেন বড়বাজার অঞ্চলে এক অন্ধ মেসে। সেখানে শুধোলেন, শান্তিনিকেতন কি প্রকারে যেতে হয়? কেউ কিছু জানে না বলে টাইমটেবল যোগাড় করা হল—সেখানেও শান্তিনিকেতনের সন্ধান নেই। তখন একজন বললে, কাছেই তো পোয়েটের বাড়ি; সেখানে গেলেই জানা যাবে। শ্রীযুত জগন্নাথ রাও তাই করলেন। সেখানে দেখেন ‘বিশ্বভারতী পাবলিকেশন্স’ দফতর খোলা বটে, কিন্তু লোকজন কেউ নেই। শেষটায় একটি ছোকরা কেরানীকে আবিষ্কার করা হলে সে বললে, হাওড়া থেকে যেতে হয়, সে কখনো ওখানে যায় নি। ঝাঁরা যাওয়া-আসা করেন, তাঁরা সবাই গেছেন ঝাঁরানে। শান্তিনিকেতনের কে এক মিস্টার রাও সেই ভোরে হাসপাতালে মারা গেছেন।

জগন্নাথ রাও ত্রিভুবন অঙ্ককার দেখলেন। সম্মিতে ফিরে আর্ডকর্থে শুধোলেন, ‘কে?’ ছোকরাটি বললে, বড়ই দুঃখের বিষয়। মিস্টার রাও আশ্রমের হয়ে ফুটবল খেলতে যান শিউড়িতে। সেখানে খেলাতে জোর চোট লাগার ফলে তাঁর হানিয়া স্ট্রেন্জুলেটেড্ হয়ে যায়। এ্যান্ড্রুজু সাহেব এখানকার হাসপাতালকে জরুরী চিঠি লিখে লোকজন সহ তাঁকে পাঠান কাল রাত্রে। সবই করা হয়েছিল, কিন্তু তাঁকে বাঁচানো গেল না।

জগন্নাথ রাও টলতে টলতে বেরিয়ে এলেন। চিল্লি ওয়াল্টেয়ারে আরেকবার এই রকম খেলার মাঠে বেহুঁশ হয়।

রাস্তা থেকে আবার ফিরে গেলেন ছোকরাটির কাছে। শুধোলেন, ‘তার বাড়িতে তার পাঠানো হয়েছে?’ ছোকরাটি বললে সে জানে না।

জগন্নাথ রাও মেসে ফিরে এসে শয্যা নিলেন। দেশবাসীর পরামর্শ করে তাঁর কথামত চিল্লির বাড়িতে তার পাঠালেন দুঃসংবাদটা জানিয়ে।

জগন্নাথ রাওয়ের কোনোই ইচ্ছা আর রইল না শান্তিনিকেতন যাবার, কিন্তু তিনি পরিবারের বন্ধু—এখন এত দূর কলকাতা অবধি এসে যদি সবিস্তার খবর নেবার জন্ত সেখানে না যান তবে সবাই দুঃখিত হবেন।

নিতান্ত কর্তব্যের পীড়নে জগন্নাথ রাও হাওড়া গিয়ে, বোলপুরের ট্রেন ধরলেন।

বিকেলের দিকে যখন আশ্রমে পৌঁছলেন তখন গেস্ট হাউসে হিতলাল (বর্তমান কালোর দোকানের কালোর পিতা) ভিন্ন কেউ ছিল না—হিতলাল ইংরিজি জানে না। জগন্নাথ বিছানাপত্র সেখানে রেখে বেরুলেন কলাভবনের সন্ধানে। চিল্লি তাঁকে কলাভবনের ঠিকানা দিয়ে চিঠি লিখত।

সে কলাভবন বাড়ি আর নেই। তবে তার ভিতটা এখনো দেখতে পাওয়া

যায়, গুরুদেবের 'দেহলী' বাড়ির কাছে, বোলপুর যাবার রাস্তার পাশে।

কলাভবন সে সময়টায় নির্জন থাকে। নিচের তলায় কাউকে না পেয়ে তিনি সিঁড়ি দিয়ে ল্যাণ্ডিং পৌঁছে সেখান থেকে উপরের দিকে তাকিয়ে দেখেন,—

আমি যাচ্ছিলুম বোলপুর—নশি কিনতে; হঠাৎ শুনি, সেই অবেলায় কলাভবনে শোরগোল, স্পষ্ট চিনতে পেলুম আর্টিস্ট রমেন চক্রবর্তীর গম্ভীর গলা। কিন্তু আর্ট কণ্ঠে...তুমি যাও, শিগগীর যাও, জল নিয়ে এস। আমি ততক্ষণে দেখছি,—

তিন লম্ফে সেখানে পৌঁছে দেখি, চিল্লি 'দেহলী' বাড়ির দিকে কালবোশেখী বেগে ছুটেছে। আমি সেদিকে খেয়াল না করে সিঁড়ি বেয়ে মাঝখানে উঠে দেখি কে একজন লোক দু'পা ইয়া ফাঁক আর দু'হাত ওয়া লম্বা করে ধূলি-শয়নে চিং হয়ে পড়ে আছে। জোয়ারের সমুদ্র বেলাতটকে মড়া ফিরিয়ে দিলে সে ঘেরকম শুয়ে থাকে। চোঁট ছোটো তার কাঁপছে, আর বিড় বিড় করে বলছে, 'চিল্লি, চিল্লি!' চক্রবর্তী বললেন, সে আবার কি? তিনি বিখনাথ রাণ্ডয়ের ডাকনাম জানতেন না। আমি বুঝিয়ে বললুম। চক্রবর্তী বললেন, দেখো তো, সৈয়দ, ডাক্তার এসেছে কি না, বিকেলে তো মাঝে-মাঝে আসে। আমি বললুম, দেখি, মনে তো হচ্ছে ভিন্নি কেটে যাচ্ছে।

খানিকক্ষণ পরে ফিরে এসে দেখি, ওদের কেউই আর সেখানে নেই।

চিল্লি ভালো অভিনয় করতে জানে। রাত্রে তার ঘরে সে দেখালে জগন্নাথ রাও সিঁড়ি দিয়ে উঠতে উঠতে হঠাৎ তাকে দেখে—সে আর চক্রবর্তী তখন সিঁড়ি দিয়ে নামছিলেন—থমকে গিয়ে কাঁপতে লাগলেন। দু'হাত হৃদিকে ছোটো হাঁটুর সঙ্গে এক তালে মুগী ঝগীর মত কাঁপতে কাঁপতে ধপাস্। চিল্লি বললে, 'অবশ্য আমার মুখেও জগন্নাথ বিন্ময় দেখতে পেয়েই ভয় পেয়েছিল আরো বেশী। ভাগ্যিস রমেনবাবু সঙ্গে ছিলেন! আমাকে ঐ আবছায়া আলোতে একলা-একলি দেখতে পেলে তার কোনো সন্দেহ থাকতো না যে, আমার ভূত কলাভবনের মায়া কাটাতে না পেরে সন্ধ্যার নির্জনে সেখানে আবার এসেছে।'

হঠাৎ দেখি জগন্নাথ রাণ্ডয়ের মুখ একেবারে রক্তহীন, মাছের পেটের মত পাঁশটে হয়ে গিয়েছে। কাঁপতে কাঁপতে যা বললেন তা শুনে রমেনবাবুর মত ঠাণ্ডা মাথা স্থিরবুদ্ধির লোক পর্যন্ত অচল দৃষ্টিতে সামনের দিকে তাকিয়ে রইলেন। এতক্ষণে জগন্নাথের খেয়াল গেছে যে, তিনি চিল্লির বাপ-মাকে তার করে জানিয়ে বসে আছেন যে চিল্লি নেই।

আমি ভেঙে বললুম, 'আপনি তো আচ্ছা—নেতার মাইও!—রাও তো

‘আপনাদের দেশে প্রত্যেক সেকেণ্ড ইন্ডিয়ট।’

জগন্নাথ বার বার বলেন, ‘চিনি তো আমায় জানায় নি যে আরেকজন অজ্ঞবাসী এসেছে। তার উপর ফুটবল, তারপর পেটে—’

রমেনবাবু গম্ভীর কণ্ঠে বললেন, ‘ওহে! এতক্ষণ তো খুব রগড় করলে! শোনো, ব্যাপারটা সিরিয়স! এ্যান্ড্রুজ সাহেবের কাছে যাও। আর কারো টেলিগ্রাম বাপ-মা বিশ্বাস নাও করতে পারেন। গুরুদেব তো বালিনে!’

সাহেব মোটেই চটলেন না। নাস্তিক চিনির জন্ত খাটি খুঁটান ছ’পাতা লগ্না তার করলেন সব বুঝিয়ে। আর আমি চিনিরকে তাঁর সামনেই বললুম, এবার প্রার্থনা করোগে, বাড়িতে যেন ভালো-মন্দ কিছু একটা না হয়। দুই অক্ষ ভাইজ্যাগ্ বাগের ট্রেন ধরলেন।

চিনি ফোকটে ছুটি মেরে হুপ্তা তিনেক পরে ফিরল। আমরা শুধালুম, ‘কি, আপন ছেরান্দ সাঁপটাবার মত ঠিক সময়ে পৌঁচেছিলি তো? হুঁকোটা লে, খুলে ক’!’

চিনি বললে, ‘টেলিগ্রাম পৌঁচেছিল দেহিতে। ইতিমধ্যে দাদাকে আনানো হয়েছে মাদ্রাজ থেকে। বাড়িতে কান্নাকাটি সে আর কি বলতে—অবশ্য আমার শোনা কথা। যেদিন তার পৌঁছল সেদিন বামুন এসেছে শ্রাহের ব্যবস্থা করতে। আর ট্র্যাজেডিটা দেখ, বাড়িস্থ সবাই শোকে এমনি বিকল যে, কে একজন তারটা সহ্য করে নিয়ে একপাশে রেখে দিয়েছে, ঘণ্টা দুই কেউ খোলে নি, ভেবেছে, কি আর হবে, কণ্ডলেন্স-টেন্স। খুলেছিল শেষটায় আমার ছোট ভাই। সেও নাকি প্রায় ঐ জগন্নাথ রাণয়ের মত পাণ্ডাশ মেরে রাম ইন্ডিয়টের মত গা-গা ডাক ছেড়েছিল। বাকিরা ভাবলে, আবার কে মরলো? তারপর কেউ বিশ্বাস করে না তারটাকে, যদিও সবাই করতে চায়। এ্যান্ড্রুজ সাহেব এত বিখ্যাত লোক, তিনি আমাদের চিনিটার জন্ত ইত্যাদি...’

শেষটায় বিশ্বাস করেছিলেন বটে, কিন্তু আমি না পৌঁছানো পর্বন্ত কারো কারো মনের ধোঁকা কাটে নি।

রাত্রে ছাতের উপর পাশাপাশি শুয়ে আছি হুঁজনতে। আমি বললুম, ‘চিনি, ঘুমুলি?’

‘না।’

‘আর তোর মা?’

‘বিশ্বাস করবি নে, সেটা ভারি ইন্ট্রেস্টিং। জগন্নাথ রাণয়ের তার পৌছনোর পর থেকেই মায়ের মুখে শুধু এক বুলি, “কিছুতেই হতে পারে না। আমার ছেলে

নিশ্চয়ই বেঁচে আছে। এই তো বছরের পরলা দিনে আমি গণংকার ঠাকুরকে
কি বছরের মত এবারও সব ক'টা ছেলের কোণ্ঠী দেখিয়েছি। তিনি এবারও
বলেছেন, চিম্নির সামনে ফাঁড়াটি পর্যন্ত নেই”।’

চিম্নি বললে, ‘যখন পুরুতঠাকুর আঁকের ব্যবস্থা করতে এসেছে তখনো তার
মুখে ঐ এক বুলি, “কি হবে এসব ব্যবস্থা করে ? গণংকার বলেছে, এ বছরে
চিম্নির জ্বর-জ্বালাটি পর্যন্ত নেই”।’

কে তাঁর সঙ্গে কথা কাটাকাটি করে বোঝাবে চিম্নি নেই ?

আর আঁকে যা টাকা খরচা হওয়ার কথা ছিল সেটা মা দিয়েছে গণংকারকে ।